

Namo tassa bhagavato arahato sammāsambuddhassa

Khuddakanikāye

Nettivibhāvinī

Ganthārambhakathā

Yajitabbaṃ yajitvāna, namitabbaṃ namāmahaṃ;
Yajānādyānubhāvena, antarāye jahaṃ sadā.

Yena yā racitā netti, yena sā anumoditā;
Yehi saṃvaṇṇanā katā, tesānubhāvanissito.

Kiñci kiñci saritvāna, līnālīnānusandhyādiṃ;
Karissaṃ jinasuttānaṃ, hitaṃ nettivibhāvanaṃ.

Appameyyaḡuṇo **mahādharmarāj**avhayo bhavo;
Acchariyo abbhuto yo, bodhisambhārapūraṇo.

Nānāraṭṭhissarissaro, seṭṭho sāsanapaggaho;
Pāsaṃsarājapāsaṃso, narācinteyyacintako.

Cintitakāraḡo rājā, siratṭhimālapālako;
Ajeyyajeyyako mahācetyādikāraḡo sadā.

Assāmaccena byattena, jinacakkahitattinā;
Anantasutināmena, sakkaccaṃ abhiyācīto.

Kāmaṃ saṃvaṇṇanā katā, therāsabhehi gambhīrā;
Gambhīrattā tu jānituṃ, jīnaputtehi dukkarā.

Tasmā yācītānurūpena, karissaṃ sādaraṃ suṇa;
Sissasikkhanayānugaṃ, yottaṃ nettivibhāvananti.

1. Saṅghavāraatthavibhāvanā

Tattha yassa sikkhattayaṃsaṅghassa navaṅgassa satthusāsanavarassa atthasaṃvaṇṇanaṃ yaṃ nettippakaraṇaṃ kātukāmo, tassa nettippakaraṇassa nissayaṃ visayabhūtaṃ saṃvaṇṇetabbasahitaṃ, saṃvaṇṇetabbam eva vā salokapālena tilokena sadā pūjetabbassa ceva namassitabbassa ca naruttamassa satthuno sāsanavaraṃ vidūheva ñātabbaṃ. Etaṃ sāsanavaraṃ tāva dassento taṃjanakena, taṃvijānakavidūhi ca niyametum, ratanattayaḡuṇaparidīpanaṃca kātum –

“Yaṃ loko pūjayate, salokapālo sadā namassati ca;
Tasseta sāsanavaraṃ, vidūhi ñeyyaṃ naravarassā”ti. – paṭhamagāthamāha;

Imāya hi paṭhamagāthāya “**etaṃ sāsanavaraṃ ñeyya**”nti ettakameva ekantato karaṇavisesabhāvena adhippetam. Eteneva visesakaraṇena ekantādhippetanettivisayasāsanavarassa

dassitattā. Ekantādhīpetasāsanaṅgavameva nettisaṃvaṇṇanāya saṃvaṇṇetabbattā visayaṃ teneva vakkhati **aṭṭhakathācariyo** –

“Etaṃ idāni amhehi vibhajitabbahāranayapaṭṭhānavicāraṇavisayabhūtaṃ sāsanaṃ ādikalyāṇatādiguṇasampattiyā varam aggaṃ uttamaṃ nipuṇañāgocarātāya paṇḍitavedanīyamevā”ti (netti. aṭṭha. saṅgahavāraṇṇanā) ca,

“Etaṃ tividhampī ‘sāsanaṅgavara’nti padena saṅgaṇhitvā tattha yaṃ paṭṭhamaṃ, taṃ itaresaṃ adhigamūpāyoti sabbasāsanaṃulabhūtaṃ, attano pakaraṇassa ca visayabhūtaṃ pariyaṭṭhisāsanaṃevā”ti (netti. aṭṭha. saṅgahavāraṇṇanā) ca,

“Idāni yaṃ vuttaṃ ‘sāsanaṅgavaraṃ vidūhi ñeyya’nti, tattha nettisaṃvaṇṇanāya visayabhūtaṃ pariyaṭṭhidhamameva pakāraṇarena niyamevā dassetu”nti (netti. aṭṭha. saṅgahavāraṇṇanā) ca.

Tattha pariyaṭṭhisāsanaṃsāpi mūlaṃ hotīti vuttaṃ “**sabbasāsanaṃulabhūta**”nti. Etena kammasādhanaṅgapi adhippetatthe siddhe nānāvidhasādhakavacanāṃ nānāvādānaṃ anokāsakaraṇatthāya kataṃ. Svākkhātātādiddhammaṅgā pana sāsanaṃsā visesadesakanaravarasaddena vā paridīpakatthabhāvena vā dīpitā avinābhāvato. Sāsanaṅgavaraṃsā pana janakasambandhipekhattā “**naravarassā**”ti vuttaṃ. Tena ca aggapuggalo sāsanaṅgavarajanako vācakatthasambandhibhāvena vutto. Anaññasādhāraṇamaḥākaruṇāsabbhaññutaññāṇādiguṇavisessā pana janakasambandhibhūtaṃsā narassa visesakenaravarasaddena vā paridīpakatthabhāvena vā dīpito.

Kim nu so sāsanaṅgavarajanako naravaro paramatthova, udāhu pūjaṅgīyo ceva namassaṅgīyo cāti vuttaṃ “**yaṃ loko...pe... namassati cā**”ti, tena sāsanaṅgavarajanako naravaro paramatthova na hoti, atha kho salokapālena lokena sadā sabbakālesu pūjaṅgīyo ceva namassaṅgīyo cāti visesito thomitoti.

Ettha ca pūjanaṅgamaṃsācetanāvācakena vā pūjanaṅgamaṃsācetanāphalūpacārattho puññaṃmahattasaṅkhāto pūjaṅgīyabhāvo ceva āsavakkhayañānapadaṭṭhānasabbhaññutaññāṇādiguṇasaṅkhāto namassaṅgīyabhāvo ca dīpakatthabhāvena pariggahetvā dīpito. Tenāha **aṭṭhakathācariyo** “bhagavato sadevakassa lokassa pūjaṅgīyavandanīyabhāvo, aggapuggalabhāvo ca vuccamāno guṇavisitṭhatam dīpetī”tiādi (netti. aṭṭha. saṅgahavāraṇṇanā).

Tādisassa naravarassa tādisaṃ sāsanaṅgavaraṃ kim yena kenaci viññeyyanti vuttaṃ “**vidūhī**”ti. Tena tipīṭakadharā ariyabhūtā paṇḍitā vācakatthabhāvena gahitā, suppaṭṭipannatādisaṅghaṅgā pana vandadhātuvacanena vā dīpakatthabhāvena vā dīpitāti. Evaṃ pariggahetvā dīpīte ratanattayaṅgū sandhāya “evaṃ paṭṭhamaṅgāthāya sātisaṅgāṃ ratanattayaṅgūparidīpanaṃ katvā”ti (netti. aṭṭha. saṅgahavāraṇṇanā) vakkhati, na gāthāya niravasesatthe. Tattha **evanti** evaṃ sāsanaṅgavaradassanaṃbhūtāya paṭṭhamaṅgāthāyāti atthova daṭṭhabbo. Apare panācariyā “imāya paṭṭhamaṅgāthāya ekantato adhippetānādhīpetavacanāni ceva vācakatthadīpakatthavisessāni ca sutṭhu avicāretvā ‘evaṃ paṭṭhamaṅgāthāya sātisaṅgāṃ ratanattayaṅgūparidīpanaṃ katvā’ti vacanaṅgāyaṃ nissāya sātisaṅgāṃ ratanattayaṅgūparidīpanaṃ kātum ‘yaṃ lokotyādimāhā’ti ca sātisaṅgāṃ ratanattayaṅgū dassento ‘yaṃ lokotyādimāhā’ti” ca vadanti. Tesam vādo amhākaṃ nakkhamati. Kāraṅgāṃ pana mayā heṭṭhā vuttānusārena ñātābanti ayaṃ padānukkamaṅgurūpānusandhyattho.

Atha vā ekaṃ samayaṃ jambuvanaṅgāde nisīditvā sissānaṃ hitaṃ cintento, attano abhinīhārasampattim passanto, sammāsambuddhena pasamsito, mahākaccāyano sathhārā anumoditaṃ sāsanaṅgāyattaṃ navaṅgassatthavaṅgānaṃ soḷasahārādiṅgākatthavidhaṃ nettippakaraṅgāṃ ārabhanto, “**yaṃ loko**”tyādimāha. Yadi evaṃ yathāvuttappakāraṃ nettippakaraṅgabhūtaṃ soḷasahārātyādikam ārabhitabbaṃ, taṃ anārabhitvā kasmā nettippakaraṅgato bahibhūtaṃ “yaṃ loko”tyādikam

ārabhitabbaṃ, seyyathāpi ambaṃ puṭṭho labujaṃ byākareyya, labujaṃ puṭṭho ambaṃ byākareyya, evameva nettippakaraṇamārabhanto aññaṃ ārabhatīti? Tathāpi yassa yathāvuttassa sāsanaavarassa atthasaṃvaṇṇanaṃ yaṃ nettippakaraṇaṃ kātukāmo yassa nettippakaraṇassa visayabhūtaṃ saṃvaṇṇetabbasahitaṃ, saṃvaṇṇetabbaṃ eva vā taṃ sāsanavaraṃ tāva dassento taṃjanakena, taṃvijānakavidūhi ca niyametum, ratanattayagunaṃparidīpanaṃca kātum **“yaṃ loko”**tyādimāha. Ayaṃ līnantaracodanāsahito anusandhyattho.

“Yaṃ loko pūjayate, salokapālo sadā namassati ca;
Tassetā sāsanavaraṃ, vidūhi ñeyyaṃ naravarassā”ti. –

Niggahitalopaṃ katvā racitā gāthā ariyāsamaññalakkhaṇena sampannā. Kathaṃ? Pubbaḍḍhe tiṃsa mattā, aparāḍḍhe sattavīsa mattā. Sampiṇḍitā sattapaññaṃsa mattāva bhavanti. Akkharānaṃ pana imissaṃ gāthāyaṃ sattatiṃsa. Tesu garukkharā vīsati, lahukkharā sattarasa bhavanti. “Tassetāṃ sāsanavara”nti pana sānūnāsikaṃ virujjhati.

Tattha niddesattho aṭṭhakathānūsārena vijānitabbo. **Salokapālo** sabbo sattaloko sakkaccaṃ sabbaññaṃtaññaṃādiānekagunaṃnussaraṇena vā pūjetabbapūjanena vā paṭipattipūjanena vā **sadā** sabbakālesu sakkaccaṃ **yaṃ** naravaraṃ **pūjayate** ceva **namassati ca**, **tassa** pūjetabbassa ceva namassitabbassa ca satthuno **naravarassa** tilokaggassa mayā saṃvaṇṇetabbasahitaṃ, saṃvaṇṇetabbaṃ eva vā **vidūheva ñeyyaṃ** ñātabbaṃ. Nipunaññaṃagocaraṃ **etaṃ** mayā buddhiyaṃ ṭhapitaṃ **sāsanavaraṃ** mayā ārabhitabbassa nettippakaraṇassa visayanti paṭhamāṃ jānitabbaṃ dassetvā tassa atthasaṃvaṇṇanābhūtaṃ nettippakaraṇaṃ ahaṃ ārabhissāmi, taṃ tumhe sādhave suñātha manasi karoṭhāti samudāyayojanā, avayavayojanāpi kātabbā.

Kathaṃ? **“Salokapālo loko”**ti visesanavisesitabbabhāvena yojanā. Lokapālo vajjetvā avaseso loko ca na hoti, atha kho lokapālasahito lokoti viseseti. **“Loko pūjayate ceva namassati ca”**ti kattukārakaākhyātakiriyābhāvena yojanā “yo karoti, sa kattā”ti vuttatā. Yo loko kārako, so kattā hotu. Yo loko pūjayate ceva namassati ca, kathaṃ so kattāti? “Yo karoti, sa kattā”ti suttassa “yo karoti kiriyāṃ nipphādeti, so kiriyānipphādako kattā”ti atthasambhavato sayanabhuñjanādisabbakiriyānipphādako kattāyeva hoti. Ayañca loko pūjananamassanakiriyānipphādakoyevāti. Kathaṃ ayaṃ loko kiriyānipphādakoti? **“Loko”**ti sattapaññattiyā paramatthato avijjamānāyapi paññāpetabbo santāne pavattamāno hadayavatthunissito cittuppādo gahetabbo, so yathārahaṃ hetādhīpatisahajātādīpaccayena paccayo nipphādako bhava. Evaṃ lokassa kattukārakabhāvo vijānitabboti paccayapaccayuppannabhāvena yojanā. Esa nayo tīsu piṭakesupi evarūpesu ṭhānesu.

“Yaṃ naravaraṃ pūjayate ceva namassati ca”ti kammakārakaākhyātakiriyābhāvena yojanā “yaṃ karoti, taṃ kamma”nti vuttatā. Yaṃ kātabbaṃ, taṃ kammaṃ hotu. Yaṃ pūjayati ceva namassati ca, kathaṃ taṃ kammanti? “Yaṃ karoti, taṃ kamma”nti suttassa “yaṃ karoti kiriyāya sambajjhati, kiriyāya sambajjhitabbaṃ kamma”nti atthasambhavato karaṇavācavacanīyādisabbakiriyāya sambajjhitabbaṃ kammaṃ hotveva. Ayañca naravaro pūjananamassanakiriyāya vācavacanīyabhāvena sambajjhitabboyevāti. Kathaṃ ayaṃ naravaro vacanīyoti? Pūjananamassanacetanāya ārammaṇakaraṇavasena naravaro vacanīyo, cetanā vācakā, evaṃ vācavacitabbabhāvo hotveva. **“Yaṃ naravara”**nti paññattiyā paramatthato avijjamānāyapi paññāpetabbo santānavasena pavattamāno lokiyalokuttaragunaṃsahito khandhapañcako vutto, so ārammaṇapaccayena paccayo, cetanā paccayuppannāti paccayapaccayuppannabhāvena yojanā. Esa nayo tīsu piṭakesu evarūpesu ṭhānesu.

“Tassa naravarassā”ti visesanavisesitabbabhāvena yojanā. Naravaro nāma nimantitabbādiko na hoti, atha kho pūjetabbo namassitabbo evāti viseseti. Tassa pūjetabbassa ceva namassitabbassa ca naravarassa sāsanavaranti jāññaṃjanakabhāvena yojanā. Sāsanavaraṃ nāma paccakabuddhasāvakaḥ buddharājarājādīnaṃ sāsanavaraṃ na hoti, pūjetabbassa ceva namassitabbassa ca

naravarassa tilokasseva sāsavaranti niyameti.

“**Vidūhi ñeyya**”nti kattukārakakitakiriyābhāvena yojanā. Kattubhāvo heṭṭhā vuttova. “**Vidūhī**”ti sattapaññattiyā paramatthato aviññamānāyapī paññāpetabbo santāne pavattamāno sāsavarare sammohadhamśakaññasahito hadayavatthunissito cittuppādo vutto, so yathārahaṃ hetādhīpatisahajātādapaccayena paccayo nipphādako bhava. Ñā-itidhātuyā atthabhūtaṃ ñāṇaṃ paccayuppannaṃ nipphādeyyaṃ bhava, evaṃ paccayapaccayuppannabhāvena yojanā.

“**Ñeyyaṃ sāsavarā**”nti visesanavisesyabhāvena yojanā. Sāsavarāṃ nāma na yena kenaci ñeyyaṃ, atha kho vidūheva saṅhasukhumaññāna ñeyyaṃ sāsavaranti viseseti.

“**Etāṃ sāsavarā**”nti visesanavisesyabhāvena yojanā. Sāsavarāṃ nāma mayā buddhiyaṃ aṭṭhapitaṃ appavattetabbaṃ hoti, mayā idāni nettippakaraṇassa visayabhāvena buddhiyaṃ viparivattamānaṃ ṭhapetabbaṃ pavattetabbaṃ sāsavaranti viseseti. Etāṃ sāsavarāṃ nettippakaraṇassa visayanti yojanā kātābā. Tenāha “etāṃ idāni amhehi vibhajitabbahāranayapaṭṭhānavicāraṇavisayabhūtaṃ sāsana”nti (netti. aṭṭha. saṅgahavāraṇṇanā). Iccevaṃ nettiyā paṭhamagāthāya saṅkhepena yojanatto samatto.

Tattha **yanti** aniyamanaravarassa satthuno vācakaṃ payogavantasabbanāmaṃ. Aniyamo ca pūjananamassanakiriyāya aniyamittā vutto, na naravarato aññasatassa sambhavatoti. Esa nayo sesāniyatesupī tīsu piṭakesu. Lokiyanti ettha puññāpuññāni, tabbipāko cāti **loko**. Ettha sattanikāye puññāpuññāni lokiyanti pavattanti, tabbipāko ca lokiyati pavattati, iti sattanikāyassa puññāpuññānaṃ, tabbipākassa ca pavattanassa ādhārahāvato “**etthā**”tipadena niddiṭṭho sattanikāyo **lokonāma**. **Pūjayateti** viggahavirahitaṃ ākhyātapadaṃ, sakkaccaṃ pūjanaṃ karoti.

Lokaṃ pālentīti **lokapālā**, puññāpuññānañceva tabbipākassa ca pavattanādhārattā lokā ca. Ke te? Cattāro mahārājāno, indayamavarūṇakuverā vā, khattiyacatumahārājāsakkasuyāmasantusitasunimmitaparanimmitavasavattimahābrahmādayo vā. Pālanañcetha issariyādhīpaccena taṃtaṃsattalokassa aññamaññavihesanani vāraṇādiāñāpavattāpanayasaparivāraṭṭhānantarādiniyyādanā, saha lokapālehi yo vattatīti **salokapālo**. Atha vā ye hirottappā lokaṃ pāleṇti, iti pālanato te hirottappā **lokapālā**. Tenāha bhagavā “dveme, bhikkhave, sukkā dhammā lokaṃ pāleṇti”ti (a. ni. 2.9; itivu. 42). Lokapālehi hirottappehi samannāgato loko **salokapālo** nāma. Hirottappasampanno hi sappuriso loko sakkaccaṃ sadā sabbakālesu pūjayati ceva namassati ca pāpahirijigucchanato, dhammacchandavantatāya ca.

Aññe pana pūjentā namassantāpi kadāciyeva pūjenti namassanti, na sabbadāti. **Sadāti** pūjananamassanakālavācaviggahavirahitaṃ vikappanāmaṃ, sabbanāmaṃ vā. **Namassatīti** viggahavirahitaṃ ākhyātapadaṃ, sakkaccaṃ namassanaṃ karoti. **Tassetāti** ettha **tassāti** niyamavācakaṃ payogavantasabbanāmaṃ viggahavirahitameva. Niyamo ca pūjananamassanakiriyāya visesito. Tasmā tassa pūjananamassanakiriyāya niyamitabbassa pūjetabbassa namassitabbassa naravarassāti attho vuttova. Sesaniyamesu aññesupī eseva nayo. **Etanti** ācariyena vibhajitabbahāranayapaṭṭhānavicāraṇavisayabhūtaṃ sāsavaraparāmasanaṃ payogavantasabbanāmaṃ viggahavirahitaṃ.

Sāsati etenāti **sāsanaṃ**, etena navavidhasuttantena, navavidhasuttantasahitena vā varena sabbena samatthe veneyye diṭṭhadhammikasamparāyikaparamatthehi tividhayānamukhena yathārahaṃ satte sāsati anusāsati vineti. Iti sāsānūsāsānakiriyānūsārena veneyyasattānaṃ jānanapaṭipajjanādhigamassa kāraṇakaraṇattā “etenā”ti padena niddiṭṭhaṃ navavidhasuttantaṃ, navavidhasuttantasahitaṃ vā varaṃ sabbaṃ **sāsanaṃ** nāma. Navavidhasuttantadesanāya hi veneyyānaṃ jānanaṃ purimajānanaṃ pacchimajānanaṃ, jānanaṃ paṭipajjanena pacchimaṭipajjanena adhigamo, purimādhigamena pacchimādhigamo hoti. Tena vuttaṃ “saddhā sīlaṃ sutāṃ cāgo paññā saddhāya sīlassa sutassa cāgassa

paññāyā”ti (paṭṭhā. 1.1.423) ca “paṭhamassa jhānassa parikkammaṃ paṭhamassa jhānassa”tyādi (paṭṭhā. 1.1.423) ca. **Sāsadhātuyā** desanāsaddo ca taṃjanako desanāññānasampayuttacittuppādo ca mukhyattho, taṃupanissayapaccayā veneyyānaṃ atthajānanapaṭipajjanaadhigamanādi kāraṇūpacārattho, “etenā”ti padena vuttāya sāsanaabhūtāya nāmapaññattiyā karaṇasattisaṅkhātā upanissayapaccayasatti phalūpacārattho. Iti-saddopi tameva nāmapaññattiyā upanissayapaccayasattiṃ hetubhāvena parāmasati, tassā sattiyā ādhārabhūtā nāmapaññatti yu-paccayattho. Eseva nayo tīsu piṭakesu evarūpesu ṭhānesu.

Ekantaniyyānaṭṭhena, anaññasādhāraṇaguṇatāya ca uttamaṭṭhena **varaṃ** uttamaṃ, pariyaṭṭisāsanamhi phalaniyyādanato, magganiyyānahetubhāvato ca niyyānaṭṭhena, sāvakādīhi ajaniyattā asādhāraṇaṭṭhena ca uttamaṭṭhena **varaṃ**, varitabbanti vā **varaṃ**. Yathāvuttassa sāsanaṃ paṇḍitehi abhipatthitasamidhihetutāya varitabbatā patthetabbatā **sāsanavaraṃ** nāma, yathāvuttaṭṭhena vā sāsanañca taṃ varañcāti **sāsanavaraṃ**. **Ca**-saddena sattibhedam, **taṃ**-saddena atthābhedaṃ desseti.

Vidantīti **vidū**. Ye paṇḍitā yathāsabhāvato kammakammaphalāni, kusalādibhede ca dhamme vidanti, iti vidanato te paṇḍitā **vidū** nāma, tehi. Nātabbanti **ñeyyam**. Nā-dhātuyā nipariyāyato ārammaṇikaṃ ñānaṃ vuttaṃ, ṭhānūpacāratto sāsanaavarassa ārammaṇapaccayabhāvo dassito, iti-saddena ārammaṇapaccayabhāvo parāmasito. Tassa iti-saddena parāmasitabbassa ārammaṇapaccayabhāvassa ādhāraṃ sāsanavaraṃ naya-paccayatthoti daṭṭhabbam. Nānaṃ arahatīti vā **ñeyyam**, vidūnaṃ ñānaṃ jānaṃ ārammaṇabhāvena arahatīti attho. Imasmiṃ naye taddhitapadaṃ daṭṭhabbam.

Narati netīti **naro**. Yo puriso attānaṃ itthīnaṃ uccaṭṭhānaṃ narati neti, iti naranato nayanato so puriso **naro** nāma. So hi puttabhūtopi mātuyā pituṭṭhāne tiṭṭhati, kaniṭṭhabhātubhūtopi jeṭṭhabhaginīnaṃ pituṭṭhāne tiṭṭhati. Atha vā naritabbo netabboti **naro**. So hi jātakālato paṭṭhāya yāva attano sabhāvena attānaṃ dhāretuṃ samattho na hoti, tāva parehi netabbo, na tathā añño tiracchānādikoti. Ettha pana satthuvisayatāya narati veneyyasatteti **naroti** attho adhippeto. Satthā hi satte apāyādito sugatiṃ vā maggaphalanibbānaṃ vā netīti. Sabbaññutaññāñādiānekaguṇasamannāgatattā **varo** uttamo, varitabbo patthetabboti vā **varo**, tilokaggo. Pakatiyā uccaṭṭhānaṭṭho **naro** guṇuttamena samannāgato **varo**, naro ca so varo cāti **naravaro**. Ca-ta-saddānaṃ atthabhedo vuttova, visesanaparapadasamāsoyam. Yena vuttaṃ “aggapuggalassāti attho”ti (netti. aṭṭha. saṅgahavāraṇṇanā). Aññe pana “narānaṃ, naresu vā varoti naravaro”ti vadanti, taṃ vacanaṃ “aggapuggalassāti attho”ti (netti. aṭṭha. saṅgahavāraṇṇanā) aṭṭhakathāvacanena virujjhati maññe. Tassa naravarassāti. Icevaṃ nettippakaraṇassa ādigāthāya samāsenā ca vacanattho samatto.

Sarūpattho yojanattavacanattānusārena vijānitabbo. Tathāpi viṣuṃ suṭṭhu jānanattāya puna vattabbo. “**Ya**”nti padassa anaññasādhāraṇasabbaññutaññāñādiānekaguṇasampanno salokapālena lokena pūjetabbo ceva namassitabbo ca sāsanaavaradesako tilokaggo sarūpattho. “**Loko**”ti padassa yathāvuttalokapālasahito saddhācāgādisampanno sabbasattaloko sarūpattho. Lokasaddo ekavacanayuttopi jātisaddattā niravasesato satte saṅgaṇhāti yathā “mahājano”ti. Kāmañcettha lokasaddo “lokavidū”tyādīsu saṅkhārabhājanesupi pavatto, pūjananamassanakiriyāsādhanaṭṭā pana sattalokeva vācakabhāvena pavattoti. Tenāha “pūjanakiriyāyogyabhūtātāvasenā”ti (netti. aṭṭha. saṅgahavāraṇṇanā).

Pūjayateti ettha pūjanakiriyāya mukhyato pūjanasaṅkhāto pūjentānaṃ cittuppādo sarūpattho, phalūpacārena taṃcittuppādassa ārammaṇapakatūpanissayabhūtā vuttappakārā sabbe buddhaguṇā sarūpatthā. **Te**-vibhattipaccayassa pūjanakiriyāsādhako vuttappakāro loko ca sarūpattho, evaṃ sati atthabhedābhāvato dvīsu vācakesu ekova vācako vattabbo, kasmā ekasmiṃ atthe dve vācakā vuttāti? Nāyaṃ doso dvinnaṃ vācakānaṃ sāmāññavisesavācakattā. Lokasaddo hi pūjanakiriyāsādhako, aññakiriyāsādhako ca vadatīti sāmāññāvācako ca hoti. Pūjayate-saddo lokapūjanaitthipūjanapurisapūjanatiracchānapūjanādikiriyāsādhakañca vadatīti sāmāññāvācako. Tasmā pūjayate-saddo lokasaddassa sarūpattho, pūjanakiriyāsādhako ca na aññakiriyāsādhakoti niyāmeti. Lokasaddo ca pūjayatesaddassa sarūpattho pūjanakiriyāsādhako. Loko pana pūjanakiriyāsādhako

tilokaggo sarūpattho. Icevamaṃ nettiyā ādigāthāya sarūpattho saṅkhepena vijānitabbo.

Evamaṃ tassā anusandhyādīnaṃ jānitabbabhāve satipi ajānanto viya pucchitvā dosaṃ āropetvā parihāravasenāpi gambhīrādhippāyassa anākulassa visesajānanaṃ bhavissati. Tasmā pucchitvā dosaṃ ropetvā parihāravasena gambhīrādhippāyaṃ sampiṇḍetvā kathayissaṃ. Amhākācariya kimattham “yaṃ loko” tyādimāha? Nettippakaraṇaṃ kātuṃ. Evamaṃ sati nettippakaraṇabhūtaṃ “soḷasahārā netti” tyādikaṃ eva vattabbaṃ, kasmā taṃ avatvā tato nettippakaraṇato aññaṃ “yaṃ loko pūjayate” tyādimāha. Seyyathāpi samuddaṃ gacchanto himavantaṃ gacchati, himavantaṃ gacchanto samuddaṃ gacchati, evameva nettippakaraṇaṃ karonto sāsanaavaradassanaṃ karotīti? Saccaṃ, tathāpi yassa saṃvaṇṇanaṃ nettippakaraṇaṃ kātukāmo taṃ sāsanavaraṃ paṭhamaṃ dassetuṃ “yaṃ loko” tyādimāha. Evamaṃ sati “etaṃ sāsanavara” nti ettakameva vattabbaṃ, kasmā “yaṃ loko” tyādi vuttanti? Taṃ sāsanavaraṃ janakena naravarena niyamevā thometuṃ vuttaṃ. Tathāpi “tassa naravarassā” ti ettakameva vattabbaṃ, kasmā “yaṃ loko” tyādi vuttanti? Taṃ janakaṃ naravaraṃ lokapālena lokaseṭṭhena saddhiṃ sabbena lokena pūjanīyanamassanīyabhāvena thometuṃ “yaṃ loko” tyādi vuttaṃ. Pūjentāpi vanditvā pūjenti, tasmā “pūjayate” ti ettakameva vattabanti? Tathāpi keci kesañci pūjāsakkārādīni karontāpi tesam apākaṭaguṇatāya namakkāraṃ na karonti. Evamaṃ bhagavato yathābhūtaabbhuggatasaddatāya pana bhagavantaṃ pūjetvāpi vandatiyevāti dassetuṃ “namassati cā” ti vuttaṃ. Pūjento, namassanto ca na kadāciyeva, atha kho sabbakālanti dassetuṃ “sadā” ti vuttaṃ. Tādisassa naravarassa tādisaṃ sāsanavaraṃ saṅhasukhumaññaṇasampannehi vidūheva sukhumaññaṇeneva ñeeyanti sāsanavaraṃ thometuṃ “vidūhi ñeeya” nti vuttaṃ.

Ettha ca “pūjayate, namassati” ti etehi pūjananamassanakiriyāya hetubhūtā sabbaññaṇāññaṇādayo aneke lokiyalokuttaraguṇā pakāsītā honti te guṇe āgamma sabbalokassa pūjananamassanacetanāya pavattanato. Tesu hi kiñci sarūpato, kiñci anumānato sārīputtattherādayo anussaranti, pūjenti, namassanti. Tena vuttaṃ “anussaretha sambuddha” nti (saṃ. ni. 1.249). Ekadesaguṇāpi pūjārahā namassanārahā, kasmā sabbepi guṇā pakāsītāti? Sabbaguṇadassanena bodhisambhārasambharaṇamahākaraṇāyogasaṅkhātahetuññaṇapahāna-ānubhāvarūpakāyasampattisaṅkhātaphalahitajjhāsaiyindriya- pākakālāgamanadesanāññaṇasaṅkhātasattu-pakārasampadāvasena thomanā dassitā. Tena attahitapaṭipatti, parahitapaṭipatti ca nirupakkilesūpagamanāpagamanañca lokasamaññaṇupapavatti, tadanatidhāvanañca caraṇasampatti, vijjāsampatti ca attādhipatitā, dhammādhipatitā ca lokanāthaattanāthata ca pubbakārikataññaṇutā ca aparantapatā, anattantapatā ca buddhakarāṇadhammabuddhabhāvasiddhi ca paratāraṇaattatāraṇañca sattānuggahacittatā, dhammavirattacittatā ca pakāsītā bhavanti. Tena sabbappakārena anuttaradakkhiṇeeyatāuttamaṃ pūjanīyanamassanīyabhāvaṃ pūjananamassanakiriyāya ca khettaṅgatabhāvaṃ pakāseti. Tena pūjananamassanakānaṃ yathicchitabbapayojanasampatti pakāsītāti sabbaguṇā pakāsītāti.

Ādikalyāṇatādiguṇasampattiyā **varam** aggaṃ uttamaṃ, nipuṇaṇñaṇagocaratāya paṇḍitavedanīyañca, tasmā “varam ñeeya” nti vacanehi svākkhātātādayo sabbe dhammaguṇā pakāsītā. Ariyasaccapaṭivedhena samuggahātakilesasammohāyeva paramatthato paṇḍitā bālyādisamatikkamanato, tasmā bhāvitalokuttaramaggā, sacchikatasāmaññaṇaphalā ca puggalā visesato “vidū” ti vuccanti. Te hi yathāvuttasāsanavaraṃ aviparītato ñātuṃ, netuñca sapaṇasantāne sakkuṇanti. Tasmā ye suppaṭipannatādayo anekehi suttapadehi saṃvaṇṇitā, te ariyasaṅghaguṇāpi niravasesato “vidūhi” ti padena pakāsītāti. Evamaṃ nettiyā paṭhamaṃ gāthāya “etaṃ sāsanavara” nti padena sāsanaṭṭayaṃ saṅgaṇhitvā tattha itaresaṃ dvinnaṃ adhigamūpāyabhāvato sabbasāsanaṃ mūlabhūtaṃ, attano nettippakaraṇassa ca visayabhūtaṃ pariyattisāsanaavarassa dassanamukhena sabbe ratanattayaṃ guṇāpi thomanāvasena nayatova pakāsītā honti. Nayato hi dassitā sabbe guṇā niravasesā gahitā bhavanti, na sarūpato. Tenāha bhagavantaṃ ṭhapetvā paññaṇavantaṃ aggabhūto dhammasenāpatisārīputtattheropi buddhaguṇaparicchedanamanuyutto “apica me dhammanvayo vidito” ti (dī. ni. 2.146) bhagavatāpi –

“Evamaṃ acintiyā buddhā, buddhadhammā acintiyā;

vuttam hoti – chabyañjanapadachaatthapadabhedena dvādasavidham byañjanapadaatthapadavasena duvidham sabbapariyattisañkhātam suttaṃ mama nettippakaraṇassa visayaṃ sāsanaavaranti ñātabbam. Sarūpato pucchitvā atthapadam, byañjanapadañca sarūpato ñātabbanti.

Evam paṭhamagāthāya ‘‘sāsanavara’’nti vuttassa suttassa pariyattibhāvañceva atthapadabyañjanapadabhāvena veditabbatañca dassetvā idāni tassa suttassa pavicayūpāyaṃ nettippakaraṇaṃ padatthavibhāgena dassetuṃ ‘‘**soḷasahārā**’’tyādimāha. Atha vā dutiyagāthāya nettippakaraṇassa visayaṃ sāsanavaraṃ niyametvā dassitaṃ, ‘‘netti nāma katamā, katividhā’’ti pucchitabbatā nettināma ettikāti sañkhepato dassetuṃ ‘‘**soḷasahārā**’’tyādimāha. Tattha tassa sāsana suttassa atthapariyettī nettisaṃvaṇṇanā mayā mahākaccāyanena niddiṭṭhā **netti** nāma soḷasahārasamudāyā pañcanayasamudāyā aṭṭhārasamūlapadasamudāyāti vijānitabbāti.

Te hārādayo kenatthena **netti** nāma? Veneyyasatte ariyadhammaṃ netīti nettīti evamādi attho saṃvaṇṇanāsu (netti. aṭṭha. ganthārambhakathā) vuttova. Imāya tatiyagāthāyapi ‘‘mahākaccāyena niddiṭṭhā’’ti pāṭho sundaro. ‘‘Mahākaccāyanena niddiṭṭhā’’ti vā pāṭho, na sundaro. Lakkhaṇañhi mayā heṭṭhā vuttanti. ‘‘Soḷasahārādisamudāyā netti’’ti vuttā, te hārā suttassa byañjanavicayo vā honti, atthavicayo vā, nayā ca byañjanavicayo vā honti, atthavicayo vāti vicāraṇāyaṃ sati ‘‘ime imassa vicayo’’ti niyametvā dassetuṃ ‘‘**hārā byañjanavicayo**’’tiādimāha. Tattha hārā suttassa byañjanavicayo honti, na atthavicayo soḷasahārānaṃ mūlapadaniddhāraṇaṃ vajjjetvā byañjanamukheneva saṃvaṇṇanābhāvato. Tayo pana nayā suttassa atthavicayo honti, tiṇṇaṃ nayānaṃ mūlapadasaṅkhātaavijjādisabhāvadhammaniddhāraṇamukheneva suttassa atthasaṃvaṇṇanābhāvato.

‘‘Taṃ ubhayaṃ sutte saṃvaṇṇanābhāvena kenaci kathaciyeva yojetabbam, udāhu sabbathā sabbattha yojita’’nti pucchitabbabhāvato taṃ ubhayaṃ sabbattha suttesu sabbathā yojitanti dassetuṃ ‘‘**ubhayaṃ pariggahīta**’’nti vuttam. Hārā ceva nayā ca ubhayaṃ suttassa atthaniddhāraṇavasena parito samantato gahitaṃ sabbathā suttesu yojitanti.

‘‘Hārādisamudāyabhūtaṃ nettisañkhātaṃ suttaṃ kathaṃ saṃvaṇṇetabbam suttaṃ saṃvaṇṇetī’’ti vattabbabhāvato vuttam ‘‘**vuccati suttaṃ yathāsutta**’’nti. Nettisañkhātaṃ saṃvaṇṇanāsuttaṃ saṃvaṇṇetabbasuttānurūpaṃ yathā yena yena desanāhārena vā aññena vā saṃvaṇṇetabbam, tena tena **vuccati** saṃvaṇṇetīti attho. Atha vā ‘‘nettisañkhātaṃ suttaṃ kittakaṃ saṃvaṇṇetabbam suttaṃ saṃvaṇṇetī’’ti vattabbabhāvato vuttam ‘‘**vuccati suttaṃ yathāsutta**’’nti. Tattha **yathāsuttaṃ** yaṃ yaṃ suttaṃ bhagavatā vuttam, taṃ taṃ sabbam suttaṃ nettisañkhātaṃ suttaṃ **vuccati** vadati assādādīnavadassanavasena saṃvaṇṇetīti. Tena vuttam ‘‘nettinayena hi saṃvaṇṇetuṃ asakkuṇeyyaṃ nāma suttaṃ natthī’’ti (netti. aṭṭha. saṅgahavāraṇṇanā).

‘‘Yaṃ yaṃ bhagavatā desitaṃ suttaṃ nettisaṃvaṇṇanāya saṃvaṇṇitaṃ, sā saṃvaṇṇetabbā desanā ca viññeyyā, udāhu desitabbāñcā’’ti vattabbabhāvato ‘‘**yā ceva desanā**’’tyādimāha. Yā ceva desanā pāḷi saṃvaṇṇitā, sā ca, tāya desanāya desitaṃ yaṃ dhammajātaṃ, tañca ubhayaṃ vimuttāyatanadesanāsīsena paricayaṃ karontehi ekantena viññeyyaṃ ubhayasseva anupādisesapariniḍḍānapariyosānānaṃ sampattīnaṃ hetubhāvato. ‘‘Tassa ubhayassa vijānane sādhetabbe sādhetabbassa vijānanassa hetubhūtā katamā anupubbī’’ti pucchitabbabhāvato vuttam ‘‘**tatrā**’’tyādi. Tattha **tatra** vijānane sādhetabbe suttādinavaṅgassa sāsanaṃ atthapariyēsanā atthavicāraṇā hāranayānaṃ **ayaṃ anupubbī** vijānanassa sādhetabbassa hetubhūtā anupubbī nāmāti attho. Atha vā tassa ubhayassa vijānane sādhetabbe suttādinavaṅgassa sāsanaṃ atthapariyēsanāya atthavicāraṇāya ayaṃ anupubbī vijānanassa sādhetabbassa hetubhūtā anupubbī nāmāti. Atha vā vakkhamānāya hāranayānupubbīyā navavidhasuttantapariyēsanā vijānanassa hetubhūtāti veditabbā. Tenākāreneva **aṭṭhakathāyaṃ** tidhā vuttāti.

Saṅgahavārassa atthavibhāvanā niṭṭhitā.

2. Uddesavāraatthavibhāvanā

1. Evaṃ saṅgahavārena saṅkhepato dassite hārādayo idāni vibhāgena dassetuṃ “**tattha katame soḷasa hārā**”tiādidesanā āradhā. Atha vā soḷasahārādisamudāyā netti nāma mayā mahākaccānena niddiṭṭhāti vuttā, “katame te soḷasa hārā”ti pucchitabbattā vuttam “**tattha soḷasa hārā**”tyādi. Tattha **tatthā**ti tesu soḷasahārādīsu. Desanā hāro, vicayo hāro...pe... sāmāropano hāroti ime soḷasa hārāti daṭṭhabbā.

Tattha sabbasādhāraṇattā hārapadassa vacanatto paṭhamam vattabbo. Kenatṭhena hārāti? Harīyanti etehīti **hārā**. Etehi saṃvaṇṇanāvīsesehi saṃvaṇṇīyesu suttageyyādīsu aññānasamśayavipallāsā harīyanti, iti aññānādiharaṇakāraṇattā “etehī”ti padena niddiṭṭhā saṃvaṇṇanāvīsesā **hārā** nāma, hara-dhātuyā ācariyassa vacībhedasaddo, taṃsamuṭṭhāpako cittuppādo ca mukhyattho, veneyyānaṃ saṃvaṇṇetabbasuttassa atthajānanādiññānasampayuttacittuppādo kāraṇūpacārattho, tassa upanissayapaccayabhūtānaṃ saṃvaṇṇanāvīsesānaṃ upanissayapaccayasatti phalūpacārattho, iti-saddena sā upanissayapaccayasattīyeva parāmasīyati. Taṃsattisampannā saṃvaṇṇanāvīsesā ṇa-paccayatthā hontī. Esa nayo evarūpesu ṭhānesupi. Vitthāro **aṭṭhakathāyaṃ** (netti. aṭṭha. 1) vutto eva.

Asādhāraṇato pana desīyati etāyāti **desanā**. Etāya saṃvaṇṇanāya saṃvaṇṇetabbasuttattho desīyati saṃvaṇṇīyati saṃvaṇṇanānusārena ñāpīyati, iti ñāpanakāraṇattā “etāyā”ti padena niddiṭṭhā visesasamvaṇṇanā **desanā** nāma, na pālidesanā, pālidesanāya saṃvaṇṇetabbasamvaṇṇanābhāvena saḥacaraṇato vā desanā. Kiñcāpi aññe hārā desanāpālīsaṅkhātassa suttassa atthasaṃvaṇṇanābhāvato desanāya saḥacārino hontī, ayaṃ pana hāro yebhuyyena yathārutavaseneva viññāyamānattā pālidesanāya saḥa caratīti vattabbataṃ arahati, na tathā pare. Na hi assādādīnavanissaraṇādīsandassanalakkhaṇarahitā pālidesanā atthī, ayañca hāro assādādīsandassanalakkhaṇoti.

Viciyanti etenāti **vicayo**. Etena saṃvaṇṇanāvīsesena sutte padapañhādayo viciyanti, iti vicāraṇakāraṇattā so saṃvaṇṇanāvīseso **vicayo** nāma. Katvatthādhikaraṇatthāpi labbhanti. Saṃvaṇṇetabbasuttena padapañhādivicayanalakkhaṇo saṃvaṇṇanāvīseso **vicayo hāro**.

Yuttāyutti vicārīyati etāyāti **yutti**. Etāya visesasamvaṇṇanāya sabbesaṃ hārānaṃ bhūmigocarānaṃ yuttāyutti vicārīyati, iti vicāraṇakāraṇattā “etāyā”ti padena niddiṭṭhā visesasamvaṇṇanā **yutti** nāma. Idha uttarapadalopo daṭṭhabbo, yuttīyā vicāraṇā, vicāraṇīyabhāvena saḥacaraṇato vā yutti. Sabbahārānaṃ bhūmigocarānaṃ yuttāyuttivicāraṇalakkhaṇo saṃvaṇṇanāvīseso **yutti hāro**.

Padati pavatteti phalaṃ etenāti **padam**, kāraṇam. Ṭhanti tiṭṭhanti ettha phalāni tadāyattavuttitāyāti **ṭhānam**, kāraṇam. Padañca taṃ ṭhānañcāti **padaṭṭhānam**, āsannakāraṇam. Sutte āgatadhammānaṃ padaṭṭhānaṃ vicārīyati etāyāti **padaṭṭhānā**, visesasamvaṇṇanā, vicāraṇalopova, sutte āgatadhammānaṃ padaṭṭhānānaṃ, tesañca padaṭṭhānānaṃ vicāraṇalakkhaṇo saṃvaṇṇanāvīseso **padaṭṭhāno hāro**.

Sutte avuttāpi samānalakkhaṇā dhammā lakkhīyanti etena saṃvaṇṇanāvīsesenāti **lakkhaṇo**, sutte vuttena dhammena samānalakkhaṇānaṃ dhammānaṃ avuttānampi nidhāraṇalakkhaṇo saṃvaṇṇanāvīseso **lakkhaṇo hāro**.

Sutte dassiyamānā nibbacaṇādayo cattāropi viyūhīyanti vibhāgena sampiṇḍīyanti ettha, etena vāti **byūho**, catunnaṃ nibbacaṇādīnaṃ byūho **catubyūho**. Nibbacaṇādhīpāyabyañjanānañceva desanānidānassa ca pubbāparena saddhiṃ sandassanalakkhaṇo saṃvaṇṇanāvīseso **catubyūho hāro**.

Desanāya gahitadhammena sabhāgā, visabhāgā ca dhammā āvaṭṭīyanti ettha, etena vāti **āvaṭṭo**, desanāya gahitadhammānaṃ sabhāgavisabhāgadhammavasena āvaṭṭanalakkhaṇo saṃvaṇṇanāvīseso

āvatto hāro.

Asādhāraṇāsādhāraṇānaṃ saṃkilesadhamme, vodānadhamme ca sādhāraṇāsādhāraṇato, padaṭṭhānato, bhūmito ca vibhajanalakkhaṇo saṃvaṇṇanāvīseso **vibhatti hāro**.

Sutte niddiṭṭhā dhammā paṭipakkhavasena parivattiyanti iminā, ettha vāti **parivatto**, sutte niddiṭṭhānaṃ dhammānaṃ paṭipakkhato parivattanalakkhaṇo saṃvaṇṇanāvīseso **parivattano hāro**.

Sutte vuttassa ekasseva atthassa vācakaṃ vividhaṃ vacanaṃ ettha saṃvaṇṇanāvīseseti vivacanaṃ, vivacanameva **vevacanaṃ**, sutte vutte ekasmiṃ atthe anekapariyāyasaddayojanālakkhaṇo saṃvaṇṇanāvīseso **vevacano hāro**.

Sutte vuttā atthā pakārehi nāpīyanti iminā, ettha vāti **paññatti**, ekekassa dhammassa anekāhi paññattīhi paññāpetabbākāralakkhaṇo saṃvaṇṇanāvīseso **paññatti hāro**.

Suttāgatā dhammā paṭiccasamuppādādīsu otarīyanti anuppavesīyanti ettha, etena vāti **otaraṇo**, paṭiccasamuppādādimukhehi suttatthassa otaraṇalakkhaṇo saṃvaṇṇanāvīseso **otaraṇo hāro**.

Sutte padapadatthapañhārambhā sodhīyanti samādhīyanti ettha, etena vāti **sodhano**, sutte padapadatthapañhārambhānaṃ sodhanalakkhaṇo saṃvaṇṇanāvīseso **sodhano hāro**.

Sāmaññavīsesabhūtā dhammā vinā vikappena adhiṭṭhīyanti anuppavattiyanti ettha, etena vāti **adhiṭṭhāno**, suttāgatānaṃ dhammānaṃ avikappanavasena sāmaññavīsesaniddhāraṇalakkhaṇo saṃvaṇṇanāvīseso **adhiṭṭhāno hāro**.

Yo hetu ceva paccayo ca phalaṃ parikaroti abhisankharoti, iti so hetu ceva paccayo ca **parikkhāro**, yo saṃvaṇṇanāvīseso taṃ parikkhāraṃ hetuñceva paccayañca ācikkhati, iti so saṃvaṇṇanāvīseso **parikkhāro** nāma. Sutte āgatadhammānaṃ parikkhārasankhāte hetupaccaye niddhāretvā saṃvaṇṇanālakkhaṇo saṃvaṇṇanāvīseso **parikkhāro hāro**.

Sutte āgatadhammā padaṭṭhānādīdimukhena samāropīyanti ettha, etena vāti **samāropano**, sutte āgatadhammānaṃ padaṭṭhānavevacanabhāvapahānasamāropanavicāraṇalakkhaṇo saṃvaṇṇanāvīseso **samāropano hāro**. Bhāvasādhana vasenāpi sabbattha vacanattho vattabboti tassāpi vasena yojetabbanti. Sesam saṃvaṇṇanānusārena nātābbanti.

“Tattha katame soḷasa hārā desanā” tyādinā hārasarūpaṃ vuttaṃ, kimatthaṃ “tassānugīti” tyādi vuttanti? Anugītigāthāya sukhaggahaṇatthaṃ puna “**tassānugīti desanā vicayo yutti**” tyādi vuttaṃ. Tattha **tassāti** hāruddesassa. **Anugīti**ti anu pacchā gāyanagāthā. **Pañcadasoti** pañcadasamo. **Soḷasoti** soḷasamo. **Atthato asaṃkiṇṇāti** desanādīpadatthato lakkhaṇatthato saṅkarato rahitā. Tena vuttaṃ **aṭṭhakathāyaṃ** “so ca nesam asaṅkaro lakkhaṇaniddese supākaṇo hotī” ti. Sesam saṃvaṇṇanānusārena nātābbanti. “Keci hārā kehici hārehi saṃkiṇṇā viya dissanti, kasmā asaṃkiṇṇāti nātābba” nti vattābattā vuttaṃ “**etesañceva**” tiādi. Tattha **etesañceva bhavatīti** etesam soḷasannaṃ hārānaṃ yathā yenākārena asaṅkaro hoti, tathā asaṅkarākārena bhavati. Ayati pavattati nayavibhattīti **ayā**, vitthārena ayāti **vitthāratayā**, ta-kāro missakadosāpagamatthāya āgato, nayavibhattivīsesavacanaṃ. Nayena nāyena vibhatti **nayavibhatti**, na pañcanayavibhattāhārānaṃ vitthārena pavattā nāyavibhatti tathā asaṅkarākārena bhavati tasmim asaṃkiṇṇāti nātābbāti adhippāyo.

2. Soḷasa hārā sarūpato vuttā, amhehi ca viññātā, “katame pañca nayā” ti vattābabbhāvato tathā pucchitvā sarūpato uddisitum “**tattha katame pañca nayā**” tyādi vuttaṃ. **Aṭṭhakathāyaṃ** pana “evaṃ hāre uddisitvā idāni naye uddisitum ‘tattha katame’ tiādi vutta” nti (netti. aṭṭha. 2) vuttaṃ. “Tattha

nayanti saṃkilese, vodāne ca vibhāgato ñāpentīti **nayā**, nīyanti vā tāni ettha, etehi vāti **nayā**”tiādīnā (netti. aṭṭha. 2) **aṭṭhakathāyaṃ** vitthārena vacanattho vutto. **Nī**-dhātuyā nandiyāvaṭṭādinayānusārena saṃkilese, vodāne ca ālambitvā pavatto ñāṇasampayuttacittuppādo mukhyattho, nandiyāvaṭṭādinayānaṃ upanissayapaccayasatti phalūpacārato gahitā, iti-saddo taṃ phalūpacārato gahitasattiṃ parāmasi, taṃsattisahitā nandiyāvaṭṭādinayā a-paccayatthā.

Tañhāvijjāhi saṃkilesapakkhassa suttassa, samathavipassanāhi vodānapakkhassa suttassa catusaccayojanamukhena nayanalakkhaṇo saṃvaṇṇanāviseso **nandiyāvaṭṭo nayo**. Tattha **catusaccanti** tañhā ca avijjā ca bhavamūlattā samudayasaccaṃ, avasesā tebhūmakā dhammā dukkhasaccaṃ, samathavipassanā maggasaccaṃ, tena pattabbā asaṅkhatadhātu nirodhasaccanti.

Tīhi avayavehi lobhādīhi saṃkilesapakkhe, tīhi avayavehi alobhādīhi ca vodānapakkhe pukkhalo sobhanoti **tipukkhalo**, akusalamūlehi saṃkilesapakkhassa, kusalamūlehi vodānapakkhassa suttatthassa catusaccayojanamukhena nayanalakkhaṇo saṃvaṇṇanāviseso **tipukkhalo**.

Sīhassa bhagavato vikkīlitaṃ ettha nayeti **sīhavikkīlito**, subhasaññādīhi vipallāsehi sakalasaṃkilesapakkhassa, saddhindriyādīhi vodānapakkhassa suttatthassa catusaccayojanamukhena nayanalakkhaṇo saṃvaṇṇanāviseso **sīhavikkīlitanayo**.

Atthanayattayadisābhāvena kusalādidhammānaṃ ālocanaṃ **disālocanaṃ**. Tassa tassa atthanayassa yojanattham katesu suttassa atthavissajjanesu ye vodānādayo, saṃkilesikā ca tassa tassa nayassa disābhūtā dhammā suttato niddhāretvā kathitā, tesam yathāvuttadhammānaṃ citteneva “ayaṃ paṭhamā disā, ayaṃ dutiyā disā”tiādīnā ālocanaṃ **disālocanaṃ**.

Tathā ālocitānaṃ dhammānaṃ atthanayattayayojane samānayanato aṅkuso viyāti **aṅkuso**, tassa tassa nayassa disābhūtānaṃ kusalādidhammānaṃ samānayanam **aṅkuso nayo**.

Lañjetīti **lañjako**. Yo nayo suttattham lañjeti pakāseti, iti lañjanato pakāsanato so nayo lañjako nāma, nayo ca so lañjako cāti **nayalañjako**. Nayalañjako paṭhamo nandiyāvaṭṭo nāma, nayalañjako dutiyo tipukkhalo nāma, nayalañjako tatiyo sīhavikkīlito nāmāti yojetabbo.

Uggatānaṃ visesena uggatoti **uttamo**, taṃ uttamaṃ. **Gatāti** ñātā, matāti attho. “Matā”ti vā pāṭho. Sesamettha vuttanayānusārenapi saṃvaṇṇanānusārenapi jānitabbanti.

Yathāvuttanayavisesasaṃvaṇṇanāya ṭikāyaṃ –

“Samūhādiṃ upādāya lokasaṅketasiddhā vohāramattatā **sammutisabhāvo**, pathavīphassādīnaṃ kakkhaḷaphusanādīlakkhaṇaṃ **paramatthasabhāvo**. Ayañhettha saṅkhepo – yasmim bhinne, itarāpohe vā cittaena kate na tathā buddhi, idaṃ **sammutisaccaṃ** yathā ghaṭe, sasambhārajale ca, tabbipariyāyena **paramatthasacca**”nti –

Vacane ghaṭakathalaāpajalakaddamādisaṅkhātāṃ samūhādiṃ upādāya lokassa pubbe ghaṭakathalaāpajalakaddamādisaṅketasiddhā ghaṭakathalaāpajalakaddamādivohāramattatā **sammutisabhāvo** saṅketavasena avitathattā. Pathavīādīnaṃ kakkhaḷādīlakkhaṇaṃ, phassādīnaṃ phusanādīlakkhaṇaṃ **paramatthasabhāvo**. “Yadi evaṃ ghaṭādike abhinne vā āpādike vā anurūpena ūnabhāvena appavattamāne vā sati sammutibhāvo hotu, bhinne vā ūne vā kathaṃ sammutibhāvo bhaveyya, pathavīphassādīnampi bhijjamānattā, kakkhaḷaphusanādīnaṃca pathavīphassādīhi anaññattā kathaṃ paramatthasabhāvo bhaveyya, katamena saṅkhepena atthena sammutisabhāvo, paramatthasabhāvo ca amhehi jānitabbo”ti vattabbabhāvato “**ayañhettha saṅkhepo**”tiādīmāha. Tattha **etthāti** etesu sammutisabhāvaparamatthasabhāvesu **ayaṃ** nayo vuccamāno **saṅkhepo** attho daṭṭhabbo.

Yasmiṃ ghaṭādiḱe bhinne sati tato ghaṭādito itaro kathalādibhāvo cittena pubbe katena yathā yena kathalādivohārena bhavati, yasmiṃ āpādiḱe sambhārajalādiḱe ūnabhāvena pavattamāne sati vā tato āpādito itaro kaddamādivohāvo cittena pubbe katena yathā yena kaddamādivohārena bhavati, tathā tena vohārena buddhi kathalādisabhāvajānanam kaddamādisabhāvajānanam bhavati, idaṃ abhinne ghaṭādiḱam vā bhinne kathalādiḱam vā anūne āpādiḱam vā ūne kaddamādiḱam vā sabbaṃ sammutisaccam hotveva. “Kaddamasmiṃ bhinne, kaddamasmiṃ ūne vā sati itaro sammutisabhāvo”ti pucchitabbabhāvato “**ghaṭe, sambhārajale cā**”ti vuttaṃ.

Sammutisaccasabhāvo tumhehi vutto, amhehi ca ñāto, “katamo paramatthasaccasabhāvo”ti vattabbabhāvato “**tabbipariyāyena paramatthasacca**”nti vuttaṃ. Pathaviādīnaṃ kakkhaḷādilakkhaṇato itarassa phusanādilakkhaṇassa asambhavato, phassādīnaṃ phusanādilakkhaṇato itarassa kakkhaḷādilakkhaṇassa asambhavato pathaviṃphassādīnaṃ lakkhaḷaphusanādilakkhaṇam paramatthasaccam hotvevāti imasmiṃ saṅkhepatthe gahite koci virodho natthīti adhippāyoti.

3. Pañca nayā sarūpato ācariyena uddiṭṭhā, amhehi ca viññātā, “yāni padāni aṭṭhārasa mūlapadāni uddiṭṭhāni, katamāni tāni”ti pucchitabbattā tāni sarūpato dassetuṃ “**tattha katamāni aṭṭhārasa mūlapadāni**”tyādimāha. **Aṭṭhakathāyaṃ** pana “evaṃ nayepi uddisitvā idāni mūlapadāni uddisitūṃ ‘tattha katamāni’tiādi āraddha”nti vuttaṃ. Tattha kusalāni nava padāni, akusalāni nava padāni aṭṭhārasa mūlapadāniṭi daṭṭhabbāniṭi yojanā. Mūlanti patiṭṭhahanti etehi nayā, patiṭṭhānavibhāgā cāti **mūlāni**, padanti patiṭṭhahanti ettha nayā, paṭṭhānavibhāgā, adhigamā cāti **padāni**, vuttappakāraṭṭhena mūlāni ca tāni padāni cāti **mūlapadāni**. Kucchite pāpadhamme salayantīti **kusalāni**, kuse rāgādayo lunantīti **kusalāni**, kusā viya lunantīti **kusalāni**, kusena ñāṇena lātabbāni pavattetabbāniṭi **kusalāni**. Kusalānaṃ paṭipakkhāniṭi **akusalāni** a-saddo cettha paṭipakkhatthoti.

Nava padāni kusalāni, nava padāni akusalāniti gaṇanaparicchedato, jātibhedato ca uddiṭṭhāni, “katamāni tāni”ti pucchitabbattā nava padāni akusalāni paccāsattinyāyena sarūpato dassetuṃ “**katamāni nava padāni akusalāni**”tiādi vuttaṃ. **Aṭṭhakathāyaṃ** pana –

“Evaṃ gaṇanaparicchedato, jātibhedato ca mūlapadāni dassetvā idāni sarūpato dassento saṃkilesapakkhamyeva paṭhamam uddisati ‘taṇhā’tiādinā”ti (netti. aṭṭha. 3) –

Vuttaṃ. Tattha rūpādiḱe khandhe tasati paritasatīti **taṇhā**. Avindiyam kāyaduccaritādiṃ vindatīti **avijjā**, vindiyam kāyasucaritādiṃ na vindatīti **avijjā**, vijjāya paṭipakkhāti vā **avijjā**. Lubbhanti tenāti **lobho**, lubbhātīti vā **lobho**, lubbhanam vā **lobho**. **Dosamohesupi** eseva nayo. Asubhe rūpakkhandhādiḱe “subha”nti pavattā saññā **subhasaññā**. Dukkhadukkhādiḱe “sukha”nti pavattā saññā **sukhasaññā**. Anicce saṅkhāradhamme “nicca”nti pavattā saññā **niccasaññā**. Anattasabhāvesu cakkhādīsu khandhesu “attā”ti pavattā saññā **attasaññā**. **Yatthāti** yesu padesu sabbo akusalapakkho saṅgham samosaraṇam gacchati, tāni padāni akusalāniṭi yojanā. **Saṅgham** gaṇanam. **Samosaraṇam** samāropanam.

Paccanīkadhamme uddhaccādiḱe nīvaraṇe sameti vūpasameti tadaṅgavikkhambhanavasenāti **samatho**. Saṅkhāre aniccādiḱi vividhehi ākārehi passatīti **vipassanā**. Lobhassa paṭipakkho **alobho**. Dosassa paṭipakkho **adoso**. Mohassa paṭipakkho **amoho**. Ethāpi a-saddo paṭipakkhattho, na abhāvattādiḱoti adhippāyo. Asubhe rūpakkhandhādiḱe, cakkhādimhi vā “asubha”nti pavattā saññāpadhānacittuppādā **asubhasaññā**, visesato kāyānupassanāsatiṭṭhānam. Dukkhadukkhātādīsu “dukkha”nti pavattā saññāpadhānacittuppādā **dukkhasaññā**, visesato vedanānupassanāsatiṭṭhānam. Anicce khandhādiḱe vipariṇāmadhamme “anicca”nti pavattā saññāpadhānacittuppādā **aniccasaññā**, visesato cittānupassanāsatiṭṭhānam. Anattasabhāve khandhe, cakkhādimhi vā “anattā”ti pavattā saññāpadhānacittuppādā **anattasaññā**, visesato dhammānupassanāsatiṭṭhānam. Paññāsatisīsenā hi pavattā ayam desanā. Tena vuttaṃ bhagavatā “kathaṅca, bhikkhave, satibalam daṭṭhabbam? Catūsu satipaṭṭhānesu, ettha satibalam daṭṭhabba”nti. **Yatthāti** yesu padesu sabbo kusalapakkho saṅgham

samosaraṇaṃ gacchati, tāni padāni kusalanīti yojanā.

Uddānanti uddhaṃ dānaṃ rakkhaṇaṃ uddānaṃ, saṅgahavacananti attho. Uddāne avutte sati heṭṭhā vuttassa atthassa vipakiṇṇabhāvo dinno viya bhavēya, tasmā vipakiṇṇabhāvassa nivāraṇatthaṃ uddānanti adhippāyo. **Caturo ca vipallāsāti** subhasukhaniccaattasaññā. Kilesā bhavanti ettha navapadesūti **bhūmī**, kilesānaṃ bhūmīti **kilesabhūmī**, kilesapavattanaṭṭhānāni nava padānīti vuttaṃ hoti.

Caturo satipaṭṭhānāti asubhadukkhaaniccaanattasaññā. **Indriyabhūmīti** saddhādīnaṃ vimuttiparipācanindriyānaṃ bhūmī pavattanaṭṭhānāni samosaraṇaṭṭhānāni.

Navahi kusalapadehi kusalapakkhā **yujjanti** yojīyanti, **navahi** akusalapadehi akusalapakkhā **yujjanti** yojīyanti. Navahi kusalapadehi saha kusalapakkhā **yujjanti** yujjantā bhavanti, navahi akusalapadehi saha akusalapakkhā **yujjanti** yujjantā bhavanti uddesavāre vuttāvaseso saṃvaṇṇanānusārena vijānitabbo.

Iti sattibalānurūpā racitā

Uddesavārassa atthavibhāvanā niṭṭhitā.

3. Niddesavāraatthavibhāvanā

Soḷasahāraniddesavibhāvanā

4. Hārādīsu samudāyassa nettippakaraṇassa uddeso uddiṭṭho, amhehi ca ñāto, “katamo niddeso”ti pucchitabbattā uddiṭṭhe hārādayo niddisituṃ “**tattha saṅkhepato netti**”tiādi āraddhaṃ. **Aṭṭhakathāyaṃ** pana “evaṃ uddiṭṭhe hārādayo niddisituṃ ‘tattha saṅkhepato’tiādi āraddha”nti (netti. aṭṭha. 4) vuttaṃ. Tattha **tatthāti** tasmim “tattha katame soḷasa hārā? Desanā vicayo”tiādiuddesapāṭhe. **Saṅkhepatoti** samāsato. **Nettīti** nettippakaraṇaṃ. **Kittitāti** kathitā, idāni niddesato kathessāmīti vuttaṃ hoti.

ĪAssādādīnavatā, nissaraṇampi ca phalaṃ upāyo ca.

Āṇattī ca bhagavato, yogīnaṃ desanāhāro”ti. –

Gāthāyaṃ yena saṃvaṇṇanāvīsesena sutte āgatā assādopi **ādīnavatā** ādīnavopi nissaraṇampi phalampi upāyopi **yogīnaṃ** atthāya bhagavato āṇattipi ime dhammā dassitā saṃvaṇṇitā saṃvaṇṇanāvasena ñāpitā, so saṃvaṇṇanāvīseso **desanāhāro** nāmāti atthayojanā.

Vacanatthādayo **aṭṭhakathāyaṃ** vitthārato vuttāva, tasmā kiñcimattameva kathessāmi. Assādīyateti **assādo**, ko so? Sukhaṃ, somanassaṃ, iṭṭhārammaṇabhūtā pañcupādānakkhandhā ca. Assādeti etāyāti vā **assādo**, ko so? Taṇhā, vipallāsā ca. Vipallāsavasena hi ekacce sattā aniṭṭhampi ārammaṇaṃ iṭṭhākārena assādenti.

Ābhusaṃ kamma dīnaṃ dukkhādi hutvā vāti pavattatīti **ādīnavo**, dukkhādi. Atha vā ativiya ādīnaṃ kapaṇaṃ hutvā vāti pavattatīti **ādīnavo**, kapaṇamanusso, tathābhāvā ca tebhūmakā dhammā aniccatādiyogato.

Nissarati etenāti **nissaraṇaṃ**, ariyamaggo. Nissaratīti vā **nissaraṇaṃ**, nibbānaṃ. **Pi**-saddo sampiṇḍanattho. Nissaraṇabhedo **aṭṭhakathāyaṃ** (netti. aṭṭha. 4 hārasaṅkhepa) bahudhā vuttova.

Phalati pavattatīti **phalaṃ**, desanāya phalaṃ. Yadi pi desanā phalanipphādikā na hoti, tathāpi bhagavato dhammadeśanaṃ sutvā puññasambhārā sambhavanti, puññasambhārahetuto phalaṃ pavattaṃ, tasmā desanāya phalaṃ nāmāti. Katamaṃ taṃ? Devamanussesu āyuvanṇasukhabalayasaparivāraadhīpateyyaupadhisampatticakkavattisiri devavarajja-siricatusampatticakkasīlasamādhisampadā vijjābhīṇṇā paṭisambhidā sāvaka bodhipacceka bodhisammāsambodhiyo.

Paccayasāmaggiṃ upagantvā ayati pavattati phalaṃ etenāti **upāyo**, ko so? Ariyamaggassa pubbhāgapaṭipadā. Purimā paṭipadā hi pacchimāya paṭipadāya adhigamūpāyo, paramparāya magganibbānādhiḡamaṃ ca upāyo. Keci “maggopi upāyo”ti vadanti, tesam matena nibbānameva nissaraṇanti vuttaṃ siyā. “Te pahāya tare oghanti idaṃ nissaraṇa”nti (netti. 5) pana ariyamaggassa nissaraṇabhāvaṃ vakkhati, tasmā kesaṇci vādo na gahetabbo.

Āṇattīti āṇārahassa bhagavato veneyyānaṃ hitasiddhiyā “evaṃ sammāpaṭipattiṃ paṭipajjāhi, micchāpaṭipattiṃ mā paṭipajjāhi”ti vidhānaṃ āṇāṭhapanāṃ āṇatti nāma.

Yujjanti payujjanti catusaccakammaṭṭhānabhāvanāsūti **yogino**, veneyyā, tesam yogīnaṃ atthāyāti vacanasesaṃ nīharitvā yojanā kātabbā. Sutte āgatānaṃ sabbesaṃ assādādīnaṃ ekadesāgatānaṃpi nīharitvā sabbesaṃ vibhajanasaṃvaṇṇanāvīseso desanāhāroti niddesato gahetabbo, so ca vibhajanākāro desanāhāravibhaṅge (netti. 5) āgamissatīti idha na dassitoti.

Desanāhāraniddeso niddiṭṭho, amhehi ca ñāto, “katamo vicayahāraniddeso”ti pucchitabbatā –

2. Yaṃ pucchitaṇca vissajjitaṇca, suttassa yā ca anugīti.

Suttassa yo pavicayo, hāro vicayoti niddiṭṭho”ti. –

Gāthā vuttā. Tattha suttassa **yaṃ pucchitaṇca** yā pucchā vicayamānā ca suttassa **yaṃ vissajjitaṇca** yā vissajjanā vicayamānā ca suttassa **yo** padādivicayo, assādādivicayo ca atthi, te vuttappakārā vicayamānā pucchādayo yena saṃvaṇṇanāvīsesena viciyanti, so saṃvaṇṇanāvīseso vicayo hāroti niddiṭṭhoti atthayojanā kātabbā.

Pucchīyate **pucchitaṃ**. Vissajjīyate **vissajjitaṃ** bhāvasādhanattho daṭṭhabbo, na kammaśādanattho. Tena vuttaṃ **ṭikāyaṃ** “bhāvatthe totī āha – ‘vissajjitaṃti vissajjanā’”ti.

“**Suttassā**”ti niyamitattā saṃvaṇṇanāvīsesena aṭṭhakathāyaṃ āgataṃ na gahetabbanti daṭṭhabbāṃ. So vicayo hāro **aṭṭhakathāyaṃ (netti. aṭṭha. 4 hārasaṅkhepa)** vuttova. Kathaṃ? –

“Ayaṃ pucchā adīṭṭhajotānā dīṭṭhasaṃsandānā vimaticchedānā anumati pucchā kathetukamyatāpucchā sattādhiṭṭhānā dhammādhiṭṭhānā ekādhiṭṭhānā anekādhiṭṭhānā sammutivīsayā paramatthavīsayā atītavīsayā anāgatavīsayā paccuppannavīsayā”tiādīnā **pucchāvicayo** veditabbo. “Idaṃ vissajjanaṃ ekasabyākaraṇaṃ vibhajjabyākaraṇaṃ paṭipucchābyākaraṇaṃ ṭhapanāṃ sāvasesaṃ niravasesaṃ sauttaraṃ niruttaraṃ lokiyaṃ lokuttara”ntiādīnā **vissajjanavicayo**.

“Ayaṃ pucchā iminā sameti, etena na sametī”ti pucchitattaṃ ānetvā, vicayo pubbenāparaṃ saṃsanditvā ca vicayo **pubbāparavicayo**. “Ayaṃ anugīti vuttatthasaṅgahā avuttatthasaṅgahā tadubhayatthasaṅgahā kusalatthasaṅgahā akusalatthasaṅgahā”tiādīnā **anugītivīsayo**. Assādādīsū sukhavedānāya “iṭṭhārammaṇānubhavanalakkhaṇā”tiādīnā, taṇhāya “ārammaṇaggahaṇalakkhaṇā”tiādīnā, viparītaggahaṇalakkhaṇā”tiādīnā, avasiṭṭhānaṃ tebhūmakadhammānaṃ “yathāsakalakkhaṇā”tiādīnā sabbesaṇca dvāvīsatiyā

tikesu, dvācattālīsādhike ca dukasate labbhamānapadavasena taṃtaṃsādatthavisesaniddhāraṇaṃ **assādvicayo**.

Dukkhavedanāya “aniṭṭhānubhavanalakkhaṇā” tiādinā, dukkhasaccānaṃ “paṭisandhilakkhaṇā” tiādinā, aniccatādīnaṃ ādiantavantatāya aniccantikātāya ca “aniccā” tiādinā sabbesaṇca lokiyadhammānaṃ saṃkilesabhāgiyahānabhāgiyatādivasena ādīnavavuttiyā okāraniddhāraṇena **ādīnavavicayo**. Nissaraṇapade ariyamaggassa āgamanato kāyānupassanādipubbabhāgapaṭipadāvibhāgavisesaniddhāraṇavasena, nibbānassa yathāvuttapariyāyavibhāgavisesaniddhāraṇavasenāti evaṃ **nissaraṇavicayo**. **Phalādīnaṃ taṃtaṃsuttadesanāya sādhetabbaphalassa tadupāyassa tattha tattha suttavidhivacanassa ca vibhāganiddhāraṇavasena vicayo** veditabbo. Evam padapucchāvissajjanapucchāpubbāparānugītīnaṃ, assādādīnaṇca visesaniddhāraṇavaseneva vicayalakkhaṇo “vicayo hāro” ti veditabboti –

Evaṃ vuttova.

Vissajjanaviseso pana **ṭikāyaṃ** vutto. Kathaṃ? –

“Cakkhu anicca” nti puṭṭhe “āma, cakkhu aniccamevā” ti ekantato vissajjanaṃ **ekamsabyākaraṇaṃ**, “aññindriyaṃ bhāvetabbaṃ, sacchikātabbaṇca” ti puṭṭhe “maggapariyāpannaṃ bhāvetabbaṃ, phalapariyāpannaṃ sacchikātabba” nti vibhajitvā vissajjanaṃ **vibhajjabyākaraṇaṃ**, “aññindriyaṃ kusala” nti puṭṭhe “kiṃ anavajjaṭṭho kusalattho, udāhu sukhavipākaṭṭho” ti paṭipucchitvā vissajjanaṃ **paṭipucchābyākaraṇaṃ**, “sassato attā, asassato vā” ti vutte “abyākatameta” ntiādinā avissajjanaṃ **ṭhapanāṃ**, “kiṃ panete ‘kusalā’ ti vā ‘dhammā’ ti vā ekatthā, udāhu nānatthā” ti idaṃ pucchanaṃ **sāvasesaṃ**. Vissajjanassa pana sāvasesato veneyyajjhāsavāsena desanāyaṃ veditabbā. Apāṭihīrakaṃ **sauttaraṃ** sappāṭihīrakaṃ **niruttaraṃ**, sesaṃ vicayahāraniddese suviññeyyamevāti –

Vuttova. Saṃvaṇṇanāsu vutto attho anākulo pākaṇo yatipotēhi viññāto, so sabbattha amhehi na vibhattoti daṭṭhabbo.

Vicayahāraniddeso niddiṭṭho, amhehi ca ñāto, “katamo yuttihāraniddeso” ti pucchitabbattā –

3. Sabbesaṃ hārānaṃ, yā bhūmī yo ca gocaro tesam.

Yuttāyuttaparikkhā, hāro yuttīti niddiṭṭho” ti. –

Gāthā vuttā. Tattha **sabbesaṃ** soḷasannaṃ hārānaṃ **yā bhūmī** pavattanaṭṭhānabhūtaṃ byañjanaṃ, **yo gocaro** suttattho ca atthi, **tesam** bhūmisāṅkhātabyañjanagocarasaṅkhātasuttatthānaṃ **yā yuttāyuttaparikkhā** yuttāyuttīnaṃ vicāraṇā saṃvaṇṇanā katā, so yuttīyuttīparikkhāvicāraṇasaṅkhāto saṃvaṇṇanāvīseso “yutti hāro” ti niddiṭṭhoti atthayojanā.

Tesaṃ hārānaṃ bhūmibhūtassa sutte āgatassa byañjanassa yuttibhāvo duvidho sabhāvaniruttibhāvo, adhippetatthavācakahāvo ca. Gocarabhūtassa pana sutte āgatassa yuttibhāvo suttavinayadhammatāhi avilomanāṃ. Ayuttibhāvo vuttavipariyāyena gahetabbo.

Yuttihāraniddeso niddiṭṭho, amhehi ca ñāto, “katamo padaṭṭhānahāraniddeso” ti pucchitabbattā –

4. Dhammaṃ deseti jino, tassa ca dhammassa yaṃ padaṭṭhānaṃ.

Iti yāva sabbadhammā, eso hāro padaṭṭhāno” ti. –

Gāthā vuttā. Tattha **dhammanti** yaṃ kiñci kusalādidhammaṃ sutte jino deseti, **tassa** sutte jinena desitassa kusalādidhammassa yañca padaṭṭhānaṃ niddhāretabbaṃ, taṃ taṃ padaṭṭhānañcāti evaṃ vuttanayena **yāva** yattakā sabbe dhammā sutte jinena desitā, tattakānaṃ sabbesaṃ dhammānaṃ yañca padaṭṭhānaṃ niddhāretabbaṃ, tassa ca padaṭṭhānassa yañca padaṭṭhānaṃ niddhāretabbaṃ, taṃ taṃ padaṭṭhānañca, iti evaṃ vuttanayena **yāva** yattakā **sabbe** padaṭṭhānadhammā niddhāretabbāva, tattakāni sabbāni dhammapadaṭṭhānāni yathānurūpaṃ niddhāretvā yena saṃvaṇṇanāvīsesena kathitāni, eso saṃvaṇṇanāvīseso “padaṭṭhāno hāro”ti niddiṭṭhoti atthayojanā.

Sutte desitakusaladhammassa yonisomanasikārasaddhammassavanasappurisūpanissayādi padaṭṭhānaṃ, sutte desitaakusaladhammassa ayonisomanasikārasaddhammassavanaasappurisūpanissayādi padaṭṭhānaṃ, abyākatassa dhammassa yathārahaṃ kusalākusalābyākatā padaṭṭhānantiādīnā niddhāretabbanti.

Padaṭṭhānahāraniddeso niddiṭṭho, amhehi ca ñāto, “katamo lakkhaṇahāraniddeso”ti pucchitabbattā

5. Vuttamhi ekadhamme, ye dhammā ekalakkhaṇā keci.

Vuttā bhavanti sabbe, so hāro lakkhaṇo nāmā”ti. –

Gāthā vuttā. Tattha **ekadhamme** sutte bhagavatā vuttamhi, aṭṭhakathāyaṃ niddhārite vā sati tena dhammena ye keci **dhammā** ekalakkhaṇā bhavanti, sabbe te dhammā sutte sarūpato avuttāpi samānalakkhaṇatāya saṃvaṇṇetabbabhāvena ānetvā yena saṃvaṇṇanāvīsesena vuttā bhavanti, so saṃvaṇṇanāvīseso “lakkhaṇo nāma hāro”ti niddiṭṭhoti atthayojanā.

Ekam samānaṃ lakkhaṇaṃ etesanti **ekalakkhaṇā**, samānalakkhaṇā, sahaṇāritāya vā samānakiccatāya vā samānahetutāya vā samānaphalatāya vā samānārammaṇatāya vā avuttāpi niddhāritāti. Kathaṃ? – “Nānattakāyānānattasaññino (dī. ni. 3.341, 357, 359; a. ni. 9.24), nānattasaññānaṃ amanasikārā”tiādīsu **sahaṇāritāya** saññāya sahaṇatā dhammā niddhāritā. “Dadam mittāni ganthati”tiādīsu (saṃ. ni. 1.246; su. ni. 189) **samānakiccatā**, piyavacanaatthacariyā samānatthāpi niddhāritā, “phassapaccayā vedanā”tiādīsu (ma. ni. 3.126; saṃ. ni. 2.1; mahāva. 1; vibha. 225; udā. 1; netti. 24) **samānahetutāya** saññādayopi niddhāritā, “avijjāpaccayā saṅkhārā”tiādīsu (ma. ni. 3.126; saṃ. ni. 2.1; mahāva. 1; vibha. 225; udā. 1; netti. 24) **samānaphalatāya** taṇhupādānādayopi niddhāritā, “rūpaṃ assādeti abhinandati, taṃ ārabba rāgo uppajjati”tiādīsu (paṭṭhā. 1.1.424) **samānārammaṇatāya** taṃsampayuttā vedanādayopi niddhāritā, niddhāretvā vattabbāti atthoti. Vitthāro **vibhaṅgavāre** (netti. 23) āgamissati.

Lakkhaṇo hāro niddiṭṭho, amhehi ca ñāto, “katamo catubyūho hāro”ti pucchitabbattā –

6. “Neruttamhippāyo, byañjanamatha desanānidānañca;
Pubbāparānusandhī, eso hāro catubyūho”ti. –

Gāthā vuttā. Tattha **neruttam** suttapadanibbacanañca buddhānaṃ tassa tassa suttassa desakānaṃ, sāvakānaṃ vā **adhippāyo** ca atthabyañjanena byañjanamukhena **desanānidānañca** pubbāparena anusandhi ca ete niruttādayo yena saṃvaṇṇanāvīsesena vibhāvīyanti, eso saṃvaṇṇanāvīseso “catubyūho hāro”ti niddiṭṭho. Desanāpavattinimittaṃ desakassa ajjhāsayaṃ **desanānidānaṃ** nāma. Catubyūhahārassa bahuvīsayattā **vibhaṅge** (netti. 25 ādayo) lakkhaṇasampattiṃ katvā kathayissāma.

Catubyūhahāraniddeso niddiṭṭho, amhehi ca ñāto, “katamo āvaṭṭahāraniddeso”ti pucchitabbattā –

7. “Ekamhi padaṭṭhāne, pariyesati sesakaṃ padaṭṭhānaṃ;

Āvaṭṭati paṭipakkhe, āvaṭṭo nāma so hāro’’ti. –

Gāthā vuttā. Tattha parakkamadhātuādīnaṃ **padaṭṭhāne ekamhi** ārambhadhātuādike desanāruḷhe sati visabhāgatāya vā sesakaṃ padaṭṭhānaṃ pariyesati, desanāya sarūpato aggahaṇena vā sesakaṃ padaṭṭhānaṃ pariyesati, yena saṃvaṇṇanāvīsesena pariyesitvā yojento desanaṃ pamādādīnaṃ padaṭṭhānabhūte kosajjādike **paṭipakkhe āvaṭṭati** āvaṭṭāpeti, so saṃvaṇṇanāvīseso ‘‘āvaṭṭo hāro nāmā’’ti niddiṭṭhoti atthayojanā.

‘‘**Paṭipakkhe**’’ti idaṃ nidassanamattaṃ, sesepi sabhāge āvaṭṭanato. Na hi ārambhadhātuādike desanāruḷhe sati tappaṭipakkhe kosajjādikeyeva desanaṃ āvaṭṭeti, atha kho avasesavīriyārambhādikepi desanaṃ āvaṭṭetīti.

Āvaṭṭahāraniddeso niddiṭṭho, amhehi ca ñāto, ‘‘katamo vibhattihāraniddeso’’ti pucchitabbattā –

8.Dhammañca padaṭṭhānaṃ, bhūmiñca vibhajate ayaṃ hāro.

Sādhāraṇe asādhāraṇe ca neyyo vibhatti’’ti. –

Gāthā vuttā. Tattha kusalādivasena anekavidhaṃ sabhāvad**hammañca** dānasīlādi**padaṭṭhānañca** ‘‘dassanabhūmi bhāvanābhūmi’’ti evamādikaṃ **bhūmiñca** sādhāraṇe ca asādhāraṇe ca yena saṃvaṇṇanāvīsesena vibhajate, so saṃvaṇṇanāvīseso ‘‘vibhatti hāro’’ti neyyoti atthayojanā.

‘‘Imasmiṃ sutte vuttā kusalā vāsanābhāgiyā, imasmiṃ sutte vuttā kusalā nibbedhabhāgiyā’’tyādinā, ‘‘imasmiṃ sutte vuttā akusalā kilesabhāgiyā’’tyādinā dhammañca, ‘‘idaṃ sīlaṃ imassa mahaggatavīsesassa padaṭṭhānaṃ, idaṃ sīlaṃ idaṃ jhānaṃ imassa lokuttarassa padaṭṭhāna’’ntyādinā padaṭṭhānañca, ‘‘dassanapahātābassa puthujjano bhūmi, bhāvanāpahātābassa sotāpannādayo bhūmi’’tyādinā bhūmiñca, ‘‘kāmarāgabyāpādā puthujjanasotāpannānaṃ sādhāraṇā’’tyādinā sādhāraṇe ca, ‘‘kāmarāgabyāpādā anāgāmiarahantānaṃ asādhāraṇā’’tyādinā asādhāraṇe ca yena vibhajati, so vibhatti hāro nāmātiādinā (netti. 33-34) vitthāretvā vibhajanākāro gahetabbo.

Vibhattihāraniddeso niddiṭṭho, amhehi ca ñāto, ‘‘katamo parivattanahāraniddeso’’ti pucchitabbattā

–

9.Kusalākusale dhamme, niddiṭṭhe bhāvite pahīne ca.

Parivattati paṭipakkhe, hāro parivattano nāmā’’ti. –

Gāthā vuttā. Tattha sutte **bhāvite** bhāvitābhe **kusale** anavajjadhamme **niddiṭṭhe** kathite, saṃvaṇṇite vā **pahīne** pahātābhe **akusale** sāvajjadhamme **niddiṭṭhe** kathite, saṃvaṇṇite vā tesam dhammānaṃ **paṭipakkhe** viparītadhamme yena saṃvaṇṇanāvīsesena **parivattati** parivatteti, so saṃvaṇṇanāvīseso ‘‘parivattano hāro nāmā’’ti vedittabboti atthayojanā.

‘‘Sammādiṭṭhissa purisapuggalassa micchādiṭṭhi nijjiṇṇā bhavati’’tiādinā ca ‘‘yassa vā pāṇātipātā paṭiviratassa pāṇātipāto pahīno’’tiādinā ca ‘‘bhuñjitābā kāmā ...pe... kāmehi veramaṇī tesam adhammo’’tiādinā ca paṭipakkhe parivattanabhāvaṃ **vibhaṅgavāre** (netti. 35 ādayo) vakkhatīti na vitthāritā.

Parivattanahāraniddeso niddiṭṭho, amhehi ca ñāto, ‘‘katamo vevacānahāraniddeso’’ti pucchitabbattā

–

10 **vevacanāni bahūni tu, sutte vuttāni ekadhammassa.**

Yo jānāti suttaṅgāni, vevacano nāma so hāro”ti. –

Gāthā vuttā. Tattha **ekadhammassa** padatthassa sutte **vuttāni tu** vuttāni eva, **bahūni tu** bahūni eva vevacanāni yena saṃvaṇṇanāvīsesena yo suttaṅgāni jānāti, jānitvā ekasmimyeva padatthe yojeti, tassa suttaṅgāni so saṃvaṇṇanāvīseso “vevacano nāma hāro”ti niddiṭṭhoti atthayojanā.

Ettha ca yo so-saddā asamānattā ca hontīti “yo suttaṅgāni”ti vatvā “so saṃvaṇṇanāvīseso”ti vuttanti. “**Bhagavā**”ti padassa ekasmimyeva atthe bhagavati “arahaṃ sammāsambuddho vijjācaraṇasampanno sugato lokavidū anuttaro purisadammasārathi satthā devamanussānaṃ buddho bhagavā, phalanipphattigato vesārajappatto adhigatapaṭisambhido catuyogavippahīno agatigamanavītivatto uddhaṭasallo niruḥhavaṇo madditakaṇṭako nibbāpitaṭṭhāno bandhanāṭīto ganthaviniveṭṭhano ajjhāsavāpītivatto bhinnandhakāro cakkhumā lokadhammasamatikkanto anurodhavirodhaviṭṭhāno itṭhāniṭṭhesu dhammesu asaṅkhepagato bandhanāṭītivatto ṭhapitasāṅgāmo abhikkantataro ukkādhāro ālokakaro pajjotakaro tamonudo raṇaṅjaho aparimāṇavaṇṇo appameyyavaṇṇo asaṅkheyyavaṇṇo ābhāṅkaro pabhāṅkaro dhammobhāsapajjotakaro”ti (netti. 38) evamādiṅi bahūni vevacanāni yojitāni. Vitthāro **vibhaṅgavāre** (netti. 37 ādayo) āgamissati.

Vevacanaḥāraniddeso niddiṭṭho, amhehi ca nāto, “katamo paññattihāraniddeso”ti pucchitabbattā –

11 **Ekam bhagavā dhammaṃ, paññattīhi vividhāhi deseti.**

So ākāro ñeyyo, paññattī nāma so hāro”ti. –

Gāthā vuttā. Tattha bhagavā **ekam** khandhādidhammaṃ **vividhāhi** nikkhepappabhavapaññattādīhi paññattīhi yena paññāpetabbākārena deseti, so paññāpetabbākāro yena saṃvaṇṇanāvīsesena vibhāvito, so saṃvaṇṇanāvīseso “paññatti hāro nāmā”ti ñeyyoti atthayojanā.

Tattha **vividhāhi paññattīhi** nikkhepapaññattipabhavapaññattipariññāpaññattipahānapaññattībhāvanāpaññattīsaṅgīyāpaññattīnirodhapaññattīniḥḥāpaññattīti evamādiṅi paññattīhi ekapadatthasseva paññāpetabbākāravibhāvanālakkaṇo saṃvaṇṇanāvīseso paññatti hāro nāmāti.

Tattha “idaṃ dukkha”nti ayaṃ paññatti pañcannaṃ khandhānaṃ, channaṃ dhātūnaṃ, atṭhārasannaṃ dhātūnaṃ, dvādasannaṃ āyatanānaṃ, dasannaṃ indriyānaṃ **nikkhepapaññatti**.

“Kabaḷīkāre ce, bhikkhave, āhāre atthi rāgo, atthi nandī, atthi taṇhā, patiṭṭhitam tattha viññānaṃ viruḥham. Yattha patiṭṭhitam viññānaṃ viruḥham, atthi tattha nāmarūpassa avakkanti. Yattha atthi nāmarūpassa avakkanti, atthi tattha saṅkhārānaṃ vuddhī”ti (saṃ. ni. 2.64; kathā. 296) evamādi **pabhavapaññatti** dukkhassa ca samudayassa cāti.

“Kabaḷīkāre ce, bhikkhave, āhāre natthi rāgo, natthi nandī, natthi taṇhā”ti (saṃ. ni. 2.64; kathā. 296) evamādi **pariññāpaññatti** dukkhassa, “**pahānapaññatti** samudayassa, **bhāvanāpaññatti** maggassa, **sacchikiriyāpaññatti** nirodhassa”ti ca “nikkhepapaññatti sutamayiyā paññāya, sacchikiriyāpaññatti anaññātaññassāmīti indriyassa, pavattanāpaññatti dhammacakkassā”ti evamādivitthāro **vibhaṅge** (netti. 39 ādayo) āgamissati.

Paññattihāraniddeso niddiṭṭho, amhehi ca nāto, “katamo otaraṇahāraniddeso”ti pucchitabbattā –

12 **Yo ca paṭiccuppādo, indriyakhandhā ca dhātuāyatanā.**

Etehi otarati yo, otaraṇo nāma so hāro’’ti. –

Gāthā vuttā. Tattha yo paṭiccasamuppādo ca ye indriyakhandhā ca yāni dhātuāyatanāni ca yena saṃvaṇṇanāvisesena niddhāritāni, etehi paṭiccasamuppādādindriyakhandhadhātāyatanehi, sutte āgatapadatthamukhena niddhāriyamānehi ca yo saṃvaṇṇanāviseso **otarati** ogāhati paṭiccasamuppādādi ke tattha vācakavasena, tattha ñāpakavasena vā anupavisati, so saṃvaṇṇanāviseso otaraṇo hāro nāmāti atthayojanā.

Tattha **indriyakhandhā**ti indriyāni ca khandhā cāti indriyakhandhā. **Dhātuāyatanā**ti dhātuyo ca āyatanāni ca dhātuāyatanā. Kathaṃ otaraṇo? ‘‘Uddhaṃ adho sabbadhi vippamutto’’tiādi (netti. 42) pāṭho.

Uddhanti rūpadhātu ca arūpadhātu ca. **Adhoti** kāmādhātu. **Sabbadhi vippamuttoti** tedhātuke ayaṃ asekkhāvimutti. Tāniyeva asekkhāni pañcindriyāni, ayaṃ indriyehi otaraṇā.

Tāniyeva asekkhāni pañcindriyāni vijjā, vijjuppādā avijjānirodho...pe... dukkhakkhandhassa nirodho hoti, ayaṃ paṭiccasamuppādehi otaraṇā.

Tāniyeva asekkhāni pañcindriyāni tīhi khandhehi saṅgahitāni sīlakkhandhena samādhikkhandhena paññākkhandhena, ayaṃ khandhehi otaraṇā.

Tāniyeva asekkhāni pañcindriyāni saṅkhārapariyāpannāni ye saṅkhārā anāsavā, no ca bhavaṅgā, te saṅkhārā dhammadhātusaṅgahitā, ayaṃ dhātūhi otaraṇā.

Sā dhammadhātu dhammāyatanapariyāpannā, yaṃ āyatanāṃ anāsavaṃ, no ca bhavaṅgaṃ, ayaṃ āyatanehi otaraṇāti evamādihi **vibhaṅge** (netti. 42 ādayo) āgamissatīti.

Otaraṇahāraniddeso niddiṭṭho, amhehi ca ñāto, ‘‘katamo sodhanahāraniddeso’’ti pucchitabbattā –

13 Vissajjitamhi pañhe, gāthāyaṃ pucchitā yamārabba.

Suddhāsuddhaparikkhā, hāro so sodhano nāmā’’ti. –

Gāthā vuttā. Tattha tissaṃ **gāthāyaṃ** āruḷhe **pañhe** ñātumicchite atthe bhagavatā vissajjanagāthāyaṃ vissajjitamhi **yaṃ** suttatthaṃ **ārabba** adhikicca sā gāthā **pucchitā** pucchāntthāya ṭhapitā, tassa suttatthassa yena saṃvaṇṇanāvisesena **suddhāsuddhaparikkhā** vicāraṇā bhava, so saṃvaṇṇanāviseso sodhano hāro nāmāti atthayojanā.

Kathaṃ? ‘‘Avijjāya nivuto loko’’ti padaṃ sodhitam, ārambho na sodhito. ‘‘Vivicchā pamādā nappakāsati’’ti padaṃ sodhitam, ārambho na sodhito. ‘‘Jappābhilepanaṃ brūmī’’ti padaṃ sodhitam, ārambho na sodhito. ‘‘Dukkhamassa mahabbhaya’’nti padañca sodhitam, ārambho ca sodhitoti. Evaṃ padādīnaṃ sodhitāsodhitabhāvavicāro hāro sodhano nāma. Vitthārato pana **vibhaṅge** (netti. 45 ādayo) āgamissatīti.

Sodhanahāraniddeso niddiṭṭho, amhehi ca ñāto, ‘‘katamo adhiṭṭhānahāraniddeso’’ti pucchitabbattā

14 Ekattatāya dhammā, yepi ca vemattatāya niddiṭṭhā.

Te na vikappayitabbā, eso hāro adhiṭṭhāno’’ti. –

Gāthā vuttā. Tattha **ye** dukkhasaccādayo **dhammā ekattatāya** sāmāññenapi ca **vemattatāya** visesenapi niddiṭṭhā, yena saṃvaṇṇanāvisesena niddiṭṭhā dukkhasaccādayo dhammā **na vikappayitabbā** sāmāññavisesakappanāya vohārabhāvena anavaṭṭhānato, kāladisāvisesādīnaṃ viya apekkhāsiddhito ca, eso saṃvaṇṇanāviseso adhiṭṭhāno hāroti atthayojanā.

Tattha **ekattatāyāti** ekassa samānassa bhāvo **ekattaṃ**, ekattameva **ekattatā**, tāya. **Ekasaddo** cettha samānatthavācako, na saṅkhyāvācako. **Vemattatāyāti** viṣiṭṭhā mattā **vimattā**, vimattā eva **vemattaṃ**, vemattassa bhāvo **vemattatā**, tāya. Yathā hi “ajja sve”ti vuccamānā kālavisesā anavaṭṭhitā bhavanti, “purimā disā, pacchimā disā”ti vuccamānā disāvisesā, evaṃ sāmāññavisesā ca atthassa sabhāvāti. Tathā hi “idaṃ dukkha”nti vuccamānaṃ jātiādiṃ apekkhāya sāmāññaṃ samānampi saccāpekkhāya viseso hoti. Esa nayo samudayasaccādisupīti. “Dukkha”nti ekattatā. “Jāti dukkhā, jarā dukkhā, maraṇaṃ dukkha”nti evamādi vemattatā. “Dukkhasamudayo”ti ekattatā, “taṇhā ponobhavikā nandīrāgasahagatā”ti evamādi vemattatāti evamādi vitthāro **vibhaṅge** (netti. 46 ādayo) āgamissatīti.

Adhiṭṭhānahāraniddeso niddiṭṭho, amhehi ca ñāto, “katamo parikkhārahāraniddeso”ti pucchitabbatā –

15e dhammā yaṃ dhammaṃ, janayantippaccayā paramparato.

Hetumavakaḍḍhayitvā, eso hāro parikkhāro”ti. –

Gāthā vuttā. Tattha avijjādikā **ye** paccaya**dhammā** saṅkhārādikāṃ **yaṃ** phalad**dhammaṃ** **paccayā** sahaṃjātapaccayena **paramparato** paramparapaccayabhāvena janayanti, tassa saṅkhārādiphālassa paccayaṃ parikkhārabhūtaṃ purimuppannaṃ avijjādikāṃ asādhāraṇaṃ janakaṃ **hetuṃ**, ayonisomanasikārādikāṃ sādharmaṇaṃ paccaya**hetuṃca avakaḍḍhayitvā** suttato niddhāretvā yo saṃvaṇṇanāviseso parikkhārasaṃvaṇṇanābhāvena pavatto, eso saṃvaṇṇanāviseso parikkhāro hāro nāmāti atthayojanā. Avijjādayo hi avijjādīnaṃ asādhāraṇaṃ hetū bhavanti, ayonisomanasikārādayo sādharmaṇapaccayā. Tenāha – “asādhāraṇalakkhaṇo hetu, sādharmaṇalakkhaṇo paccayo”ti, “avijjā avijjāya hetu, ayonisomanasikāro paccayo”tiādikaṃ (netti. 49) vibhaṅgavacanāṇca.

Parikkhārahāraniddeso niddiṭṭho, amhehi ca ñāto, “katamo samāropanahāraniddeso”ti pucchitabbatā –

16e dhammā yaṃ mūlā, ye cekatthā pakāsītā muninā.

Te samāropayitabbā, esa samāropano hāro”ti. –

Gāthā vuttā. Tattha **ye** sīlādayo **dhammā yaṃ mūlā** yesaṃ samādhiādīnaṃ mūlā, te sīlādayo dhammā tesāṃ samādhiādīnaṃ padaṭṭhānabhāvena saṃvaṇṇanāvisesena samāropayitabbā, ye ca rāgavirāgacetovimuttisekkhaphalākāmadhātusamatikkamanādisaddā anāgāmiphalatthātāya **ekatthā** samānatthāti buddham**uninā** pakāsītā, te rāga...pe... tikkamanādisaddā aññaṃaññavevacanabhāvena samāropayitabbā, eso saṃvaṇṇanāviseso samāropano hāro nāmāti atthayojanā.

Ettha ca sīlādikkhandhattayassa pariyāyantaravibhāvanāpāripūrī kathitā, bhāvanāpāripūrī ca pahātabbassa pahānena hotīti bhāvanāsamāropanapahānasamāropanāpi dassitāti catubbidho samāropano padaṭṭhānasamāropano, vevacanasamāropano, bhāvanāsamāropano, pahānasamāropanoti.

Tattha kāyikasucaritaṃ, vācasikasucaritaṇca sīlakkhandho, manosucarite anabhijjhā, abyāpādo ca samādhikkhandho, sammādiṭṭhi paññākkhandho. Sīlakkhandho samādhikkhandhassa padaṭṭhānaṃ, samādhikkhandho paññākkhandhassa padaṭṭhānaṃ. Sīlakkhandho, samādhikkhandho ca samathassa padaṭṭhānaṃ, paññākkhandho vipassanāya padaṭṭhānaṃ. Samatho rāgavirāgacetovimuttiyā padaṭṭhānaṃ,

vipassanā avijjāvirāgapaññāvimuttiyā padaṭṭhānanti evamādi **padaṭṭhānasamāropano**. Rāgavirāgā cetovimutti sekkhaphalaṃ, avijjāvirāgā paññāvimutti asekkhaphalaṃ, idaṃ vevacanaṃ. Rāgavirāgā cetovimutti anāgāmiphalaṃ, avijjāvirāgā paññāvimutti aggaphalaṃ arahattaṃ, idaṃ vevacanaṃ. Rāgavirāgā cetovimutti kāmādhātusamatikkamaṇaṃ, avijjāvirāgā cetovimutti tedhātusamatikkamaṇaṃ, idaṃ vevacanaṃ. Paññindriyaṃ, paññābalaṃ, adhipaññāsikkhā, paññākkhandhoti evamādi vevacanaṃti evamādi **vevacanasamāropano**. Kāye kāyānupassino viharato cattāro satipaṭṭhānā bhāvanāpāripūriṃ gacchanti, catūsu satipaṭṭhānesu bhāviyamānesu cattāro sammappadhānā bhāvanāpāripūriṃ gacchanti, catūsu sammappadhānesu bhāviyamānesu cattāro iddhipādā bhāvanāpāripūriṃ gacchantīti evamādi **bhāvanāsamāropano**. Kāye kāyānupassī viharanto asubhe “subha”nti vipallāsaṃ pajahati, kabalīkāro cassa āhāro pariññaṃ gacchati, kāmupādānena ca anupādāno bhavati, kāmāyogena ca viṣamūyutto bhavati, abhijjābhāyaganthena ca vippayujjati, kāmāsavena ca anāsavo bhavati, kāmoghaṇca uttiṇṇo bhavati, rāgasallena ca visallo bhavati, rūpūpikā cassa viññānaṭṭhiti pariññaṃ gacchati, rūpadhātuyaṃ cassa rāgo pahīno bhavati, na ca chandāgatiṃ gacchati, vedanāsūti evamādi **pahānasamāropanoti** evamādi samāropano hāro niyuttoti.

Iti sattibalānurūpā racitā.

Soḷasahāraniddesavibhāvanā niṭṭhitā.

Nayaniddesavibhāvanā

17. Hāraniddesā niddiṭṭhā, amhehi ca ñātā, “katame nayaniddesā”ti pucchitabbattā “**taṇhañcā**”tiādi vuttaṃ. Atha vā evaṃ uddesakkameneva hāre niddisitvā idāni naye niddisituṃ “**taṇhañcā**”tiādi vuttaṃ. Tattha yo saṃvaṇṇanāviseso sutte āgataṃ **taṇhañca avijjañca** atthato niddhāraṇavasena gahitaṃ taṇhañca avijjañca saṃkilesapakkhaṃ neti, sutte āgatena samathena, sutte āgatāya vipassanāya atthato niddhāraṇavasena vā gahitena samathena, gahitāya vipassanāya vodānapakkhaṃ neti, nayanto ca saccehi yojetvā neti, ayaṃ saṃvaṇṇanāviseso so nandiyāvaṭṭo nayo nāmāti atthayojanā.

Ettha ca atthanayassa bhūmi, saṃvaṇṇanā ca gāthāyaṃ “nayo”ti vuttā, tasmā “saṃvaṇṇanāviseso”ti vuttaṃ. Na hi atthanayo saṃvaṇṇanā, catusaccapaṭivedhassa anurūpo pubbhāge anugāhaṇanayo atthanayova. Tassa pana atthanayassa yā saṃvaṇṇanā ugghaṭitaññuādīnaṃ vasena taṇhādīmukhena nayabhūmiracānā pavattā, tassa saṃvaṇṇanāva nayavohāro katoti vitthārato **hārasampāte** (netti. 78-79) āgamissati.

Nandiyāvaṭṭanayaniddeso niddiṭṭho, amhehi ca ñāto, “katamo tipukkhalanayaniddeso”ti pucchitabbattā –

18. o akusale samūlehi, neti kusale ca kusalamūlehi.

Bhūtaṃ tathaṃ avitathaṃ, tipukkhalam taṃ nayaṃ āhū”ti. –

Gāthā vuttā. Tattha yo saṃvaṇṇanāviseso akusale **samūlehi** attano akusalassa tīhi lobhādīhi mūlehi saṃkilesapakkhaṃ neti, kusale ca **kusalamūlehi** tīhi alobhādīhi vodānapakkhaṃ neti, nayanto ca **bhūtaṃ** kusalākusalam neti, na abhūtaṃ māyāmarīciādayo viya, **tathaṃ** kusalākusalam neti, na ghaṭādayo viya sammutisaccamattaṃ, **avitathaṃ** kusalākusalam neti, na vitathaṃ. Kusalākusalānaṃ sabhāvato vijjamānattā **bhūtā** paramatthasaccattā **tathā**, akusalassa iṭṭhavipākatābhāvato, kusalassa ca anīṭṭhavipākatābhāvato vipāke sati avisamvādakattā **avitathā** bhavanti, kusalākusalā hi etesaṃ tiṇṇaṃ “bhūtaṃ, tathaṃ, avitatha”nti padānaṃ kusalākusalavisesanātaṃ daṭṭhabbā.

Atha vā akusalāmūlehi akusalāni, kusalamūlehi ca kusalāni nayanto ayaṃ nayo bhūtaṃ tathaṃ

avitatham neti cattāri saccāni niddhāretvā yojeti. Dukkhadāni hi bādhakādibhāvato aññathābhāvābhāvena **bhūtāni**, saccasabhāvattā **tathāni**, avisamvādanato **avitathāni**. Vuttañhetam bhagavatā – “cattārimāni, bhikkhave, tathāni avitathāni anaññathāni”ti sam. ni. 5.1090; paṭi. ma. 2.8). Akusalādisuttatthassa catusaccayojanamukhena nayanalakkhaṇam tam samvaṇṇanāvisesaṃ tipukkhalam nayanti āhūti atthayojanā.

Tattha tīhi hetūhi pukkhalo sobhanoti **tipukkhalo** akusalādiko atthanayo samvaṇṇanāvisesoti thānūpacārato tipukkhalanayo nāmāti. Vitthāro pana **hārasampāte** (netti. 87-88) āgamissati.

Tipukkhalanayaniddeso niddiṭṭho, amhehi ca ñāto, “katamo sīhavikkīḷitanayaniddeso”ti pucchitabbatā –

19o neti vipallāsehi, kilese indriyehi saddhamme.

Etam nayaṃ nayavidū, sīhavikkīḷitam āhū”ti. –

Gāthā vuttā. Tattha **yo** samvaṇṇanāviseso sutte vuttehi vipallāsehi kilese saṃkilesapakkham neti, sutte vuttehi indriyehi saddhamme vodānapakkham neti, **etam** samvaṇṇanāvisesaṃ **nayavidū** saddhammanayakovidā, atthanayakusalā eva vā sīhavikkīḷitam nayanti āhūti atthayojanā.

Tattha **vipallāsehī**ti asubhe subham, dukkhe sukham, anicce niccam, anattani attāti catūhi vipallāsehi. **Indriyehī**ti saddhādīhi indriyehi. **Saddhammeti** paṭipattipaṭivedhasaddhamme. Sesamettha vuttanayameva. Vitthāro pana **hārasampāte** (netti. 86-87) āgamissatīti.

Sīhavikkīḷitanayaniddeso niddiṭṭho, amhehi ca ñāto, “katamo disālocananayaniddeso”ti pucchitabbatā –

20veyyākaraṇesu hi ye, kusalākusalā tahiṃ tahiṃ vuttā.

Manasā volokayate, tam khu disālocanam āhū”ti. –

Gāthā vuttā. “Sīhalocanam āhū”ti pāṭho likhito, so pana na therassa pāṭhoti daṭṭhabbo bhinnalakkhaṇattā. Tattha tahiṃ tahiṃ veyyākaraṇesu **ye kusalākusalā** nayassa disābhūtā dhammā vuttā, te kusalākusale nayassa disābhūtadhamme abahi abhantaram citte eva yaṃ olokanaṃ karoti, **tam** olokanaṃ **khu** olokanaṃ **eva** disālocananti āhūti atthayojanā.

Tattha **veyyākaraṇesū**ti tassa tassa atthanayassa yojanattham katesu suttassa atthavissajjanesu. **Kusalāti** vodāniyā. **Akusalāti** saṃkilesikā. **Vuttāti** suttato niddhāretvā kathitā. **Olokayate**ti te kusalādidhamme citteneva “ayaṃ paṭhamā disā, ayaṃ dutiyā disā”tiādinā tassa tassa nayassa disābhāvena upaparikkhati, vicāretīti attho. **Khūti** avadhāraṇatthe nipāto, tena disālocananayo koci atthaviseso na hotīti dassēti.

21. Disālocananayaniddeso niddiṭṭho. Amhehi ca ñāto. “Katamo aṅkusanayaniddeso”ti pucchitabbatā “**oloketvā**”tiādigāthā vuttā. Tattha tamtamnayadisābhūte sabbe **kusalākusale** disālocanena oloketvā **ukkhīpiya** suttato uddharitvā **yaṃ samāneti** yaṃ samānayanam karoti, ayaṃ samānayanasaṅkhāto nayo aṅkuso nayo nāmāti atthayojanā.

Ettha ca **aṅkuso** nāma hatthīnam icchitaṭṭhānam ānayanakāraṇabhūto vajirādimayo tikkhaggo ujuvaṅkabhūto dabbasambhāraviseso, ayampi nayo aṅkuso viyāti atthena **aṅkuso**. Etena hi nayena icchitam suttattham nayatīti. Mukhyato pana aṅke vijjhanaṭṭhāne uddhaṭo asati anto pavisatīti **aṅkuso**. Aṅkasaddūpapadaupubbaasadhātu apaccayoti. Ayampi nayo kocipi atthaviseso na hotīti.

Soḷasa hāraniddesā ceva pañca nayaniddesā ca ācariyena niddiṭṭhā. Amhehi ca ñātā,
“saṃvaṇṇetabbasutte kiṃ soḷasa hārā paṭhamam yojetabbā, udāhu nayā”ti pucchitabbattā –

22 Soḷasa hārā paṭhamam, disālocanato disā viloketvā.

Saṅkhiya aṅkusena hi, nayehi tihi niddise sutta’nti. –

Gāthamāha. **Aṭṭhakathāyam** pana “evaṃ hāre, naye ca niddisitvā idāni **nesam** yojanakkamaṃ dassento ‘soḷasa hārā paṭhama’ntiādīmāhā”ti (netti. aṭṭha. 22) vuttam. Tattha soḷasa hārā byañjanapariyeyṭṭhibhāvato saṃvaṇṇetabbasutte saṃvaṇṇanābhāvena paṭhamam yojetabbā, yojentena niddiṭṭhā hārānukkameneva yojetabbā, na uppaṭipāṭiyā. Hārasaṃvaṇṇanānukkamena saṃvaṇṇetabbam paṭhamam saṃvaṇṇetvā pacchā disālocanena oloketvā aṅkusanayena netvā tīhi atthanayehi niddiseti adhippāyo.

Iti sattibalānurūpā racitā

Nayaniddesavibhāvanā niṭṭhitā.

Dvādasapadavibhāvanā

Nettivisayam sāsana varasaṅkhātam saṃvaṇṇetabbasuttam yesam byañjanapadānam, atthapadānañca vasena “dvādasapadāni sutta’nti saṅgahavāre vuttam, “katamāni tāni”ti pucchitabbattā sarūpato niddisituṃ –

23 Akkharam padam byañjanam, nirutti tatheva niddeso.

Ākārachattṭhavadanam, ettāva byañjanam sabbam.

24 Ākāsanā pakāsanā, vivaraṇā vibhajanuttānīkamma paññatti.

Etehi chahi padehi, attho kammañca niddiṭṭha’nti. –

Gāthādvayam vuttam. **Aṭṭhakathāyam** pana “idāni yesam byañjanapadānam, atthapadānañca vasena ‘dvādasapadāni ‘sutta’nti vuttam, tāni padāni niddisituṃ ‘akkharapada’ntiādīmāhā”ti (netti. aṭṭha. 23) vuttam.

Tattha kenaṭṭhena akkharanti? Akkharatṭhena asaṅcaraṇatṭhena. Akārādivaṇṇo hi akārādito ikārādipariyāyam nakkharati, na saṅcarati, na saṅkamati. Tenāha **aṭṭhakathāyam** “apariyosite pade vaṇṇo akkharam pariyaṅavasena akkharāṇato asaṅcaraṇato”ti (netti. aṭṭha. 23). **Apariyosite padeti** ca vibhatyantabhāvam appatte dviticatukkharavantesu padesu ekadvitikkharamatteyeva **akkharam** nāma, pariyaṅosite **padam** yeva, na akkharanti adhippāyo. Padam pana pavesanato atthavasena pariyaṅayam saṅcarantam viya hoti, na evam akārādivaṇṇo avevacanattā. “Mā evam maññasi”tiādīsu vā ekakkharapadā **mā-kārādi akkharam** nāma, vibhatyantam padam pana **padameva** hoti.

Pajjati attho etenāti **padam**. Tam nāmākhyātopasagganipātappabhedena catubbidham. Tattha dabbapadhānam “phasso vedanā citta”nti evamādikaṃ **nāmapadam**. Tattha hi dabbamāvibhūtarūpam, kiriyā anāvibhūtarūpā. Kiriyāpadhānam “phusati vedayati vijānāti”ti evamādikaṃ **ākhyātapadam** nāma. Tattha hi phusanādikiriyā āvibhūtarūpā, dabbamanāvibhūtarūpam. Kiriyāvisesabodhahetubhūtam pa-upa-itievamādikaṃ **upasaggapadam** nāma. “Cirappavāsim (dha. pa. 219) upavuttha”nti (a. ni. 3.71; su. ni. 405) evamādīsu hi pa-upādisaddā vasanādikiriyāya viyogādivisiṭṭhatam dīpentī. Vacanattho pana nāmapadaākhyātapadadvayam upagantvā tassa padadvayassa attham sajjantīti **upasaggāti** daṭṭhabbo.

Kiriya ceva dabbassa ca sarūpavisesapakāsanahetubhūtaṃ “evaṃ, itī”ti evamādikam **nipātapadam** assapi saṃvaṇṇanāyapi icchitattā, akkharena pana katham gahitoti ce? Akkharehi suyyamānehi suṇantānaṃ visesavidhānassa katattā padapariyosāne padatthasampañipatti hoti. Tasmā akkharenapi atthākāro gahitovāti veditabbo. Tena vuttaṃ – “akkharehi saṅkāseti, padehi pakāseti, akkharehi ca padehi ca ugghaṭeti”ti (netti. 9) ca.

Vivaraṇā vitthāraṇā. Vibhajanā ca uttānikammaṇca paññatti ca **vibhajanuttānikammaṇattī** samāhāre ayaṃ dvandasamāso. Tattha vibhāgakaṇaṃ **vibhajanam** nāma. Byañjanākārehi yo atthākāro niddisiyamāno, so atthākāro vivaraṇavibhajanāti dvīhi atthapadehi niddisito. Pākātakaraṇaṃ **uttānikammaṇ** nāma. Pakārehi ñāpanaṃ **paññatti**. Niruttiniddesasaṅkhātehi byañjanapadehi pakāsiyamāno yo atthākāro atthi, so atthākāro uttānikammaṇattīhi paṭiniddisito. Etehi saṅkāsanādīhi chahi atthapadehi **attho** suttattho gahito, **kammaṇca** ugghaṭanādikammaṇca niddiṭṭhanti attho. Yena suttatthena ugghaṭitañño cittasantānassa sambodhanakiriyaṇsaṅkhātassa ugghaṭanakammaṇca nibbatti bhava, so suttattho saṅkāsanāpakāsanākāro hoti. Yena suttatthena vipaṇcitanñño cittasantānassa bodhanakiriyaṇsaṅkhātassa vipaṇcanakammaṇca nibbatti, so suttattho vivaraṇāvibhajanākāro hoti. Yena suttatthena neyyassa cittasantānassa pabodhanakiriyaṇsaṅkhātassa nayakammaṇca nibbatti, so suttattho uttānikammaṇattākāro hotīti daṭṭhabbo. Tenāha **aṭṭhakathācariyo** “suttatthena hi desanāya pavattiyamānena ugghaṭitaññuādiveneyyānaṃ cittasantānassa pabodhanakiriyaṇnibbatti, so ca suttattho saṅkāsanādīākāro”ti (netti. aṭṭha. 24).

“Yathāvuttehi tīhi atthanayehi ceva chahi atthapadehi **ca** ayutto pi attho kiṃ koci atthi, udāhu sabbo attho yutto evā”ti pucchitabbatā –

25 Tīhi ca nayā anūnā, atthassa ca chappadāni gaṇitāni.

Navahi padehi bhagavato, vacanassattho samāyutto”ti. –

Gāthamāha. Tattha **tīhi**ti līngavipallāsaniddeso, tayoti pana pakatilīnganiddeso vattabbo. Gaṇitā anūnā tayo atthassa nayā ca gaṇitāni anūnāni cha atthassa padāni ca niddiṭṭhāni, niddiṭṭhehi ca atthapadehi bhagavato vacanassa sabbo attho **samāyutto**va ayutto koci attho natthīti yojanā kātabbā. **Atthassāti** suttatthassa. **Nayāti** nettiatthanayā. **Padānīti** nettiatthapadāni.

26. Ye hārādayo niddiṭṭhā, te hārādayo sampiṇḍetvā nettippakaraṇassa padatthe sukhaggahaṇattham gaṇanavasena paricchinditvā dassento “**atthassā**”tiādimāha. Tattha **atthassa** samūhassa avayavabhūtanī navabhedāni atthapadāni suttabyañjanassa atthassa pariyeṭṭhisāṅkhātāya saṃvaṇṇanāya gaṇanato catuvīsati byañjanapadāni honti, atthapadabyañjanapadabhūtaṃ ubhayaṃ saṅkhepayato sampiṇḍayato **tettiṃsā** tettiṃsavidhā **ettikā** tettiṃsavidhāva nettīti yojanā.

Tattha **navappadānīti** tayo atthanayā, cha atthapadāni ca. **Catubbīsāti** soḷasa hārā, cha byañjanapadāni, dve disālocanayāaṅkusanayā cāti evaṃ tettiṃsavidhā ca netti nāma, ito vinimutto añño koci nettipadattho natthīti attho daṭṭhabbo.

“Evaṃ tettiṃsapadatthāya nettīyā hāranayānaṃ katamo desanāhāravicyahāro”tiādi desanākkameneva siddho, evaṃ siddhe satipi “soḷasa hārā paṭhama”nti ārambho “sabbepime hārā ceva nayā ca iminā dassitakkameneva saṃvaṇṇetabbesu suttesu saṃvaṇṇanāvasena yojetabbā, na uppaṭipāṭiyā”ti imamattam dīpeti. Dīpanavacanasavanānūsārena ñāpeti, tasmā evaṃ kamo dassito, assādādīnavanissaraṇāni dhammadesanāya nissayāni, phalaṇca dhammadesanāya phalaṃ, upāyo ca dhammadesanāya upāyo, āṇatti ca dhammadesanāya sarīraṃ. Desanāhārassa tāsam assādādīnavanissaraṇaphalupāyāṇattīnaṃ vibhāvanasabhāvattā.

Niddhāraṇena vināpi pakatiyā sabbasaṃvaṇṇetabba suttesu anarūpāti suviññeyyattā,

saṃvaṇṇanāvisesānaṃ vicayahārādīnaṃ nissayabhāvato ca paṭhamam desanāhāro dassito.

Padapucchāvissajjanāpucchāpadānugītihi saddhiṃ desanāhārapadatthānaṃ assādādīnaṃ pavicyabhāvato desanāhārānantaram vicayo hāro.

Vicayahārena pavicitānaṃ atthānaṃ yuttāyuttivicāraṇabhāvato vicayahārānantaram yutti hāro.

Padatthānahārassa yuttāyuttānaṃyeva atthānaṃ upapattianurūpaṃ kāraṇaparamparāya niddhāraṇattā yuttihārānantaram padaṭṭhānahāro.

Yuttāyuttānaṃ kāraṇaparamparāya pariggahitasabhāvānaṃyeva ca dhammānaṃ avuttānampi samānalakkhaṇatāya gahaṇalakkhaṇattāya padaṭṭhānahārānantaram lakkhaṇahāro.

Lakkhaṇahārena atthato suttantarato niddhāritānampi dhammānaṃ nibbacaṇādīni vattabbāni, na sutte sarūpato āgatadhammānaṃyevāti dassanattham lakkhaṇahārānantaram catubyūho hāro. Evañhi niravasesato atthāvabodho hoti.

Catubyūhena hārena vuttehi nibbacaṇādhippāyanidānehi saddhiṃ sutte padatthānaṃ suttantarasamśandanasāṅkhāte pubbāparavicāre dassite tesam suttapadatthānaṃ sabhāgavisabhāgadhammantarāvaṭṭanaṃ sukhena sakkā dassetunti catubyūhahārānantaram āvaṭṭo hāro. Suttantarasamśandanaṃ hi sabhāgavisabhāgadhammantarāvaṭṭanayassa upāyabhāvato “ārambhatha nikkamathā”tiādigāthāya (saṃ. ni. 1.185; netti. 29; peṭako. 38) ārambhananikkamanabuddhasāsanayogadhunanehi vīriyasamādhipaññindriyāni niddhāretvā tesu ārambhananikkamanabuddhasāsanayogadhunanesu ananuyogassa mūlaṃ pamādoti suttantare dassito pamādo āvaṭṭitoti.

Āvaṭṭena hārena sabhāgavisabhāgadhammāvaṭṭanena payojite sādhaṇānāsādhaṇāvasena saṃkilesavodānadhammānaṃ padaṭṭhānato ceva bhūmito ca vibhāgo sakkā sukhena yojetunti āvaṭṭahārānantaram vibhatti hāro.

Vibhattihārena saṃkilesavodānadhammānaṃ vibhāge kate saṃvaṇṇetabbasutte āgatā dhammā akasirena paṭipakkhato parivattetuṃ sakkāti vibhattihārānantaram parivattanahāro. Vibhattihārena hi “sammādiṭṭhiṃ purisapuggalassa micchādiṭṭhiṃ nijjiṇṇā hoti”ti (netti. 35) paṭivibhattasabhāve eva dhamme parivattanahāravibhaṅge udāharīyissati.

Parivattanahārena paṭipakkhato parivattitāpi dhammā pariyāyavacanehi bodhetabbā, na saṃvaṇṇetabbasutte āgatadhammāyevāti dassanattham parivattanahārānantaram vevacanaṃhāro.

Vevacanaṃhārena pariyāyato pakāsītānaṃ dhammānaṃ pabhedato paññattivasena vibhajanaṃ sukhena sakkā ñātunti vevacanaṃhārānantaram paññatti hāro.

Paññattihārena pabhavapariññādipaññattivibhāgamukhena paṭiccasamuppādasaccādidhammavibhāge kate sutte āgatadhammānaṃ paṭiccasamuppādādīmukhena avataraṇam sakkā dassetunti paññattihārānantaram otaraṇo hāro.

Otaraṇena hārena dhātāyatanādīsu otāritānaṃ saṃvaṇṇetabbasutte padatthānaṃ pucchārambhasodhanaṃ sakkā sukhena sampādetunti otaraṇahārānantaram sodhanaṃ hāro.

Sodhanena hārena saṃvaṇṇetabbasutte padapadatthesu visodhitesu tattha tattha ekattatāya vā vemattatāya vā labbhamānasāmaññāvisesabhāvo sukaro hotīti dassetuṃ sodhanahārānantaram adhiṭṭhāno hāro.

Sāmaññavisesabhūtesu sādharmaṇāsādhāraṇesu dhammesu adhiṭṭhānena hārena paveditesu parikkhārasaṅkhātassa sādharmaṇāsādhāraṇarūpassa paccayaheturāsissa pabhedo suviññeyyoti adhiṭṭhānahārānantaraṃ parikkhāro hāro.

Asādhāraṇe, sādharmaṇe ca kāraṇe parikkhārena hārena dassite tassa attano phalesu kāraṇākāro, tesam hetuphalānaṃ pabhedato desanākāro, bhāvetabbapahātabbadhammānaṃ bhāvanāpahānāni ca niddhāretvā vuccamānāni sammā saṃvaṇṇetabbasuttassa atthaṃ tathattāvabodhāya saṃvattantīti parikkhārahārānantaraṃ samāropano hāro dassito hoti. Idaṃ hārānaṃ dassanānukkamakāraṇaṃ daṭṭhabbaṃ.

Uddeso ugghaṭitañño upakārāya saṃvattati yathā, evaṃ nandiyāvaṭṭanayo ugghaṭitañño upakārāya saṃvattati, tasmā paṭhamaṃ nandiyāvaṭṭanayo dassito. Niddeso vipaṇcitañño upakārāya saṃvattati yathā, evaṃ tipukkhalanayo vipaṇcitañño upakārāya saṃvattati, tasmā nandiyāvaṭṭanayānantaraṃ tipukkhalanayo. Paṭiniddeso neyyassa upakārāya saṃvattati yathā, evaṃ sīhaviṅṅāṭṭanayo neyyassa upakārāya saṃvattati. Tasmā tipukkhalānantaraṃ sīhaviṅṅāṭṭanayo dassitoti tiṇṇaṃ atthanayānaṃ dassanānukkamo veditabbo. Atthanayānaṃ disābhūtāya bhūmiyā āloketvā tesam tassā disāya bhūmiyā samānayaṃ hoti. Na hi sakkā anoloketvā samānetunti disālocanayaṃ dassetvā aṅkusanayo dassito. Potthakāruḥhāvachekā sabbāsu disāsu hatthigamaṇaṭṭhānaṃ oloketvā aṅkusena icchitaṭṭhānaṃ samānayaṃ. Keci acchekā anoloketvā vinayaṃ. Tesam nayanamattameva, na samānayaṃ. Evameva paṇḍitā suttatthaṃ vaṇṇentā manasāva oloketvāva nayā netabbāti daṭṭhabbā.

Samuṭṭhānasamvaṇṇanā adhippāyasamvaṇṇanā padatthasamvaṇṇanā vidhianuvādasamvaṇṇanā nigamanasamvaṇṇanāti vā, payojanasamvaṇṇanā piṇḍatthasamvaṇṇanā anusandhisamvaṇṇanā codanāsamvaṇṇanā parihārasamvaṇṇanāti vā, upogghātasamvaṇṇanā padaviggahasamvaṇṇanā padatthacālanasamvaṇṇanā paccupaṭṭhānasamvaṇṇanāti vā, tathā ekanālikākathā caturassakathā nisinnavattikākathāti vā āgatā.

Tattha **samuṭṭhānaṃ** nidānameva. **Vidhianuvādo** visesavacanameva. **Upogghāto** nidānameva. **Cālanā** codanāyeva. **Paccupaṭṭhānaṃ** parihārova.

Pāliṃ vatvā ekekapadassa atthakathanasaṅkhātā samvaṇṇanā **ekanālikākathā** nāma.

Paṭipakkhaṃ dassetvā paṭipakkhassa upamaṃ dassetvā sapakkhaṃ dassetvā sapakkhassa upamaṃ dassetvā kathanasaṅkhātā samvaṇṇanā **caturassakathā** nāma.

Visabhāgadhammavaseneva pariyoṣānaṃ gantvā puna sabhāgadhammavaseneva pariyoṣānagamanasaṅkhātā samvaṇṇanā **nisinnavattikākathā** nāma.

Tā sabbā samvaṇṇanāyopi desanāhārādīsu nettisamvaṇṇanāsu antogadhāyeva. Tenāha “yattakā hi suttassa samvaṇṇanāvīsē, sabbe te nettiupadesāyattā”ti. Evaṃ ettāvatā etaparamatā daṭṭhabbā. Hetuphalabhūmiupanisāsabhāgavisabhāgalakkhaṇanayādayo pana **aṭṭhakathāyaṃ** (netti. aṭṭha. 4 dvādasapada) vitthārato vuttāti na vitthārayissāmīti.

Iti sattibalānurūpā racitā

Niddesavāraatthavibhāvanā niṭṭhitā.

4. Paṭiniddesavāraatthavibhāvanā

1. Desanāhāravibhāvanā

5. Evaṃ hārādayo sarūpato ācariyena uddesato uddiṭṭhā, niddesato ca niddiṭṭhā, amhehi ca ñātā, atha kasmā puna “tattha katamo desanāhāro” tiādiko āraddhoti ce? Veneyyānaṃ tividdhattā. Veneyyā hi atitikkhapañño nātittikkhapañño mandapañnoti tividdhā honti. Tesañhi atitikkhapaññassānurūpaṃ hārādayo uddesato uddiṭṭhā, nātittikkhapaññassa anurūpaṃ niddesato niddiṭṭhā, idāni mandapaññassānurūpaṃ hārādayo vibhajitvā dassetuṃ “**tattha katamo desanāhāro**” tiādiko vibhaṅgavāro āraddho. **Aṭṭhakathāyaṃ** pana “**evaṃ hārādayosukhaggahaṇatthaṃ gāthābandhavasena sarūpato niddisitvā idāni tesu hāre tāva paṭiniddesavasena vibhajituṃ ‘tattha katamo desanāhāro’ tiādi āraddha**” nti (netti. aṭṭha. 5) vuttaṃ.

Tattha ye hārādayo uddesaniddesesu niddiṭṭhā, tattha hārādīsu katamo desanāhāro ti ce? Yā “assādādīnavatā” tiādigāthā (netti. 4) vuttā, sā ayaṃ gāthā niddesavasena desanāhāro nāma, tassa “assādādīnavatā” tiādi (netti. 4) niddesassa idāni mayā vuccamāno “ayaṃ desanāhāro kiṃ desayati” tiādiko vitthārasaṃvaṇṇanāviseṣo desanāhāravibhaṅgo nāmāti yojanā. “Ayaṃ desanāhāro kiṃ desayati” ti pucchitabbattā pucchāṃ ṭhapetvā “imaṃ desayati” ti niyametvā dassetuṃ “**ayaṃ desanāhāro kiṃ desayati? Assādaṃ ādīnava**” ntiādi vuttaṃ. Tattha ayaṃ desanāhāro kiṃ desayati ti ce? **Assādaṃ desayati** saṃvaṇṇeti vitthāreti, **ādīnavaṃ desayati**...pe... vitthāreti, **nissaraṇaṃ desayati**...pe... vitthāreti, **phalaṃ desayati**...pe... vitthāreti, **upāyaṃ desayati**...pe... vitthāreti, **āṇattiṃ desayati** saṃvaṇṇeti vitthāretīti yojano.

Ettha ca “ayaṃ desanāhāro” ti saddo pubbāparāpekkhoti daṭṭhabbo. “Assādādīnavatā” tiādigāthāyaṃ (netti. 4) dassitā ime assādādayo kattha saṃvaṇṇetabbe pālīdhamme āgatā” ti pucchitabbattā “**dhammaṃ vo, bhikkhave, desessāmī**” tiādi vuttaṃ. “Assādādīnavatā” tiādigāthāyaṃ (netti. 4) dassitā ime assādādayo kattha saṃvaṇṇetabbe pālīdhamme āgatā” ti pucchitabbattā “dhammaṃ vo, bhikkhave, desessāmi ādikalyāṇaṃ majjhekalyāṇaṃ pariyoṣānakalyāṇaṃ sātthaṃ sabyañjanaṃ kevalaparipuṇṇaṃ parisuddhaṃ brahmacariyaṃ pakāsessāmī” ti paṭiññātabbe pālīdhamme saṃvaṇṇetabbe ye assādādayo āgatā, te ayaṃ desanāhāro desayati ti adhippāyo.

Tattha dhammasaddo pariyaṭṭhisaccasamādhīpaññāpakatipuññāpattiñeyyādīsu bahūsu atthesu pavatto, tathāpi idha pariyaṭṭhidhammeyeva pavattoti daṭṭhabbo. Atthuddeso pana **aṭṭhakathāyaṃ** (netti. aṭṭha. 5) vutto, tasmā idha mayā na vutto. **Vo**-kāropi upayogakaraṇapadapūraṇasampadānatthesu dissati ca, tathāpi idha sampadānatthevāti daṭṭhabbo. Bhikkhanti yācanti sīlakkhandhādayo, paccaye vā kāyaviññattiyāti **bhikkhū**, saṃsāre bhayaṃ ikkhanti paccavekkhantīti vā **bhikkhū**. **Bhikkhaveti** te bhikkhū ālapati, kimatthāyāti attano mukhābhīmukhaṃ katvā dhammassavane atiussāhane niyojetuṃ ālapatīti vedītabbo.

Dhammaṃ desessāmīti nāhaṃ issaratāya tumhe aññaṃ kiñci kāreyyāmi, dhammaṃ yeve desessāmi, desento ca na aññesaṃ dhammaṃ sutvā sutamayaññānusārena desessāmi, anāvāraṇaññaṇena sabbañneyyadhammesu paccakkhakarītāya idāni mayāyeve pavattiyamānaṃ dhammaṃ ahaṃ desessāmīti paṭijānāti. Ādimhi kalyāṇaṃ **ādikalyāṇaṃ**, ādi kalyāṇametassāti vā **ādikalyāṇaṃ**. Sesesupi eseve nayo. Ādikalyāṇādayo cetha atthakalyāṇādivasena vuttāti daṭṭhabbā. Tenāha – “sīlena ādikalyāṇaṃ, samādhinā majjhekalyāṇaṃ, paññāya pariyoṣānakalyāṇaṃ. Buddhasubuddhatāya vā ādikalyāṇaṃ, dhammasudhammatāya majjhekalyāṇaṃ, saṅghasuppaṭipattiyā pariyoṣānakalyāṇaṃ. Atha vā ugghaṭṭitaññūvinayanena ādikalyāṇaṃ, vipaṇcītaññūvinayanena majjhekalyāṇaṃ, neyyapuggalavinayanena pariyoṣānakalyāṇaṃ. Ayamevattho idhādhippeto” ti (netti. aṭṭha. 5).

Arīyati ñāyatīti **attho**, ara-dhātuyā nippariyāyato ñāṇappadhāno ārammaṇikacittuppādo attho, ṭhānūpacārato atthassa ñātābassa ārammaṇapaccayasatti attho, iti-saddena sāyeve satti parāmasīyati, ārammaṇapaccayasattisahito ārammaṇapaccayasānkhāto ñātābbo attho ta-paccayasassa atthoti dhātupaccayānaṃ atthaviseṣo daṭṭhabbo. Asati bhavatīti vā **attho**, saha atthena yo dhammo vattatīti so dhammo **sāttho**, atthena samannāgato vā dhammo **sāttho**, saṅkāsanādīchaatthapadasamāyogato vā

sāttho. Ayamevattho idhādhippeto nettivisayattā. Sampannaṃ byañjanaṃ yassa dhammassāti **sabyañjano.** Sithiladhanitadīgharassagarulahasambandhavavattitavimuttaniggahitasampannattā, akārantādiitthilingādiekavacanādisampannattā, pamādalekhādirahitattā ca avayavo sampanno taṃsamūhattā dhammo **sampannabyañjano** nāma, akkharādichabyañjanapadasamāyogā vā **sabyañjano.** Ayamevattho idhādhippeto. Imasmiṃ ayaṃ ūno, so netabbo pakkipitabboti upanetabbābhāvato **kevalaparipuṇṇo,** sīlakkhandhasamādhikkhandhapaññākkhandhavimuttikkhandhavimuttiñāṇadassanakkhandhapāripūriyā vā **kevalaparipuṇṇo.** Idhāyaṃ atireko, so apānetabboti vatvā apānetabbābhāvato **parisuddho,** caturoghanittharaṇatthāya, lokāmisānirapekkhatāya pavattiyamānattā vā **parisuddho.** Setṭhattā **brahmacariyaṃ,** brahmānaṃ vā setṭhānaṃ ariyānaṃ cariyaṃ **brahmacariyaṃ,** pabbajjabrahmacariyamaggabrahmacariyasāsanābrahmacariyādīsu sāsānābrahmacariyaṃ pakāsāyissāmi, paridīpayissāmīti attho.

“Dhammaṃ vo, bhikkhave, desessāmi...pe... pakāsessāmī”ti paṭiññātabbe pāḷidhamme āgate assādādayo desanāhāro desayati saṃvaṇṇeti vitthāretīti ācariyena sāmāññavaseneva vuttaṃ, tasmā desanāhāro idha pāḷiyaṃ āgataṃ imaṃ assādaṃ desayati, idha pāḷiyaṃ āgataṃ imaṃ ādīnavaṃ desayati tiādi viseso na viññātabbo, “kathaṃ viññātabbo”ti pucchitabbattā “idha pāḷiyaṃ āgato ayaṃ assādo, idha pāḷiyaṃ āgato ayaṃ ādīnavo”ti visesaṃ niyamevā upalakkhaṇanayena dassetuṃ “**tattha katamo assādo? Kāmaṃ kāmayamānassā**”tiādi āradhāṃ. Tattha **tatthāti** tassaṃ “assādādīnavatā”tiādigāthāyaṃ niddiṭṭhesu visayavisayibhedesu assādesu katamo assādo tattha tesu pāḷidhammesu kattha pāḷiyaṃ āgatoti pucchitvā –

“Kāmaṃ kāmayamānassa, tassa cetaṃ samijjhati;
Addhā pītimano hoti, laddhā macco yadicchatī”ti. (su. ni. 772; mahāni. 1) –

Idha pāḷigāthāyaṃ yo visayabhūto assādo āgato, so ayaṃ assādetabbo assādo desanāhārassa visayoti. **Aṭṭhakathāyaṃ** pana –

“Evaṃ bhagavatā desito, pakāsito ca sāsānādhhammo yesaṃ assādādīnaṃ dassanavasena pavatto, te assādādayo desanāhārassa visayabhūtā yattha yattha pāṭhe savisesaṃ vuttā, tato tato niddhāretvā udāharaṇavasena idhānetvā dassetuṃ ‘tattha katamo assādo’tiādi āradhā’nti (netti. aṭṭha. 5) vuttaṃ.

Tattha assādīyateti **assādo,** assādetabbo vatthukāmo. Kāmīyateti **kāmo,** vatthukāmo ca. Taṃ kāmayatīti **kāmayamāno,** satto. Tassa pītiyā yuttaṃ mano etassāti **pītimano.** Manati jānātītiādivacanatthēna **macco.** Kāmaṃ kāmitabbaṃ vatthu kāmayamānassa tassa sattassa etaṃ kāmitabbaṃ vatthu sace samijjhati, evaṃ sati so satto addhā pītimano hoti. Yo macco yaṃ vatthūṃ icchati, taṃ vatthūṃ so macco laddhā addhā pītimano hotīti gāthāyattho daṭṭhabbo.

“Kāmaṃ ...pe... pītimano hotī”ti ettakameva avatvā “laddhā macco yadicchatī”ti vuttattā lobhanīyaṃ vatthūmyeva laddhā pītimano na hoti, atha kho patthetabbaṃ pūjetabbanti sabbaṃ laddhā macco pītimano ca hotīti atirekattho daṭṭhabbo.

Visayabhūto assādetabbo assādo idha pāḷiyaṃ gāthāyaṃ āgatoti ācariyena vibhatto, amhehi ca ñāto, “dukkhadomanassādibhedesu ādīnavesu katamo ādīnavo kattha pāḷidhamme āgato”ti pucchitabbattā “**tattha katamo ādīnavo? Tassa ce kāmayamānassā**”tiādi āradhāṃ. Tattha **tatthāti** tassaṃ “assādādīnavatā”tiādigāthāyaṃ niddiṭṭhesu dukkhadomanassādīsu ādīnavesu katamo ādīnavo tattha tesu pāḷidhammesu kattha pāḷiyaṃ āgatoti pucchitvā –

“Tassa ce kāmayamānassa, chandajātassa jantuno;
Te kāmā parihāyanti, sallaviddhova ruppatī”ti. (su. ni. 773; mahāni. 2) –

Idha pāḷigāthāyaṃ yo domanassasaṅkhāto ādīnavo āgato, so ayaṃ domanassasaṅkhāto ādīnavo desanāhārassa visayoti.

Gāthāyaṃ pana kāmayati icchatīti **kāmayāno**. Atha vā yāyati gacchatīti **yāno**, kāmena yāno **kāmayāno**, tassa. Chando jāto yassa so **chandajāto**, tassa. Vijjhīyateti **viddho**, sallati pavisatīti **sallo**, sallena viddho **sallaviddho**. Kāmaṃ kāmayānassa chandajātassa jantuno ye kāmā labhitabbā, te kāmā kenaci antarāyena yadā parihāyanti, tadā so jantu ruppati. Kīdisova ruppati? Ayomayasallaviddho migo ruppati iva, parihīnakāmo jantu ruppatīti daṭṭhabbo. Ettha ca “ruppatī”tivacanena domanassuppatti dassitāti daṭṭhabbā.

Domanassabhūto ādīnavo idha pāḷiyaṃ āgatoti ācariyena vibhatto, amhehi ca ñāto, “magganibbānavasena duvidhesu nissaraṇesu katamaṃ nissaraṇaṃ kattha pāḷiyaṃ āgata”nti pucchitabbattā “**tattha katamaṃ nissaraṇaṃ? Yo kāme parivajjeti**”tiādi āraddhaṃ. Tattha **tatthāti** tassaṃ “assādādīnavatā”tiādigāthāyaṃ niddiṭṭhesu magganibbānavasena duvidhesu nissaraṇesu katamaṃ nissaraṇaṃ tattha tesu pāḷidhammesu kattha pāḷidhamme āgatanti pucchivā –

“Yo kāme parivajjeti, sappasseva padā siro;
Somaṃ visattikaṃ loke, sato samativattatī”ti. (su. ni. 774; mahāni. 3) –

Idha pāḷigāthāyaṃ yaṃ samativattanakaraṇaṃ maggasaṅkhātaṃ nissaraṇaṃ āgataṃ, taṃ idam maggasaṅkhātaṃ samativattanakaraṇaṃ nissaraṇaṃ desanāhārassa visayanti.

Gāthāyaṃ **yoti** jhānalābhī vā ariyo vā. **Kāmeti** vuttappakāro vatthukāmo. Tesu pavattachandarāgassa vikkhambhanena vā samucchindanena vā parivajjeti. Kiṃ parivajjeti iva vajjeti? Sappassa **siro** siram cakkhumā puriso disvā **padā** pādena parivajjeti iva, evaṃ parivajjeti. **Sato** satisampanno **so** puggalo loke rūpādīsu **visattikaṃ imaṃ** taṇhaṃ yena maggena **samativattati** saṃ suṭṭhu atikkamivā vattati, idam maggasaṅkhātaṃ samativattanakaraṇaṃ ekadesaṃ nissaraṇaṃ nāmāti yojetabbaṃ. “Pādā”ti vattabbe ākāraṇassa rassaṃ katvā “padā”ti vuttaṃ. **Pādāti** ca pādena yathā “amohabhāvā amohabhāvenā”ti. Tena vuttaṃ “attano pādenā”ti (netti. aṭṭha. 5).

Ekadeso visayasāṅkhāto assādo idha pāḷiyaṃ āgatoti ācariyena vibhatto, amhehi ca ñāto, “ekadeso visayasāṅkhāto assādo kattha pāḷiyaṃ āgato”ti pucchitabbattā “**tattha katamo assādo? Khettaṃ vatthu**”ntiādi āraddhaṃ. Atha vā “tattha katamo assādo? Khettaṃ vatthu”ntiādi kasmā evaṃ āraddhaṃ, nanu “tattha katamo assādo? Kāmaṃ kāmayamānassā”tiādinā assādo vibhatto? Saccam, assādo pana duvidho visayavisayivasena, tasmīṃ visayasāṅkhāto assādo pubbe vibhatto, idāni visayasāṅkhātaṃ assādaṃ vibhajitum “**tattha katamo assādo? Khettaṃ vatthu**”ntiādi āraddhaṃ. Tattha **tatthāti** tassaṃ “assādādīnavatā”tiādigāthāyaṃ niddiṭṭhesu visayavisayibhedesu assādesu katamo assādo tattha tesu pāḷidhammesu kattha pāḷiyaṃ āgatoti pucchivā –

“Khettaṃ vatthum hiraññaṃ vā, gavāssaṃ dāsaporisaṃ;
Thiyo bandhū puthū kāme, yo naro anugijjhatī”ti. (su. ni. 775; mahāni. 4) –

Idha pāḷigāthāyaṃ yo anugijjhanasāṅkhāto assādo āgato, so ayaṃ anugijjhanasāṅkhāto visayiasādo desanāhārassa visayoti.

Gāthāyaṃ **khettaṃ** khipīyanti bījāni ettha ṭhāneti khettaṃ. Khipantānaṃ janānaṃ khipanakiriyā khipa-dhātuyā mukhyattho, khipanakiriyājanako cittuppādo phalūpacārattho, tassa cittuppādassa upanissayapaccayabhūtassa kedārassa viruḷhāpanasatti phalūpacārattho, iti-saddena sā viruḷhāpanasattiyeva parāmasīyati, tassā sattiyaṃ patiṭṭhaṃ kedārasāṅkhātaṃ ṭhānaṃ ta-paccayattho. Esa nayo tīsu piṭakesu evarūpesu ca vacanatthesu yathārahaṃ nīharitvā gahetabbo. Vapanti patiṭṭhahanti etthāti **vatthu**. Aparāṇṇādīnaṃ patiṭṭhahanaṃ vāpa-dhātuyā mukhyattho, ṭhānassa patiṭṭhāpanasatti

phalūpacārattho, iti-saddena sā patiṭṭhāpanasatti parāmasīyati. Tassā sattiyā patiṭṭhaṭṭhānaṃ ta-paccayattho. **Khettam** pana pubbaṇṇavirūhanaṭṭhānaṃ, **vatthu** aparāṇṇavirūhanaṭṭhānaṃ.

Hinoti pavattati pītisomanassanti **hi**, kiṃ tam? Pītisomanassaṃ, rāti pavatteti jātarūpanti **ram**, kiṃ **tam**? Jātarūpaṃ, hiṃ ranti **hiram**, dutyātappurisasamāso. Nāpeti tosetīti **nam**, kiṃ **tam**? Jātarūpaṃ. Hiram hutvā **nam hiraññaṃ**, pavattamānaṃ pītisomanassaṃ pavattetvā jane visesena tosetīti attho gahetabbo. **Vā**-saddo vuttāvuttatthasamuccayattho. Gacchanti visesenāti **gāvo**, rattindivaṃ asanti bhakkhanti visesenāti **assā**, gāvo ca assā ca **gavāssaṃ**. Dātabbaṃ paṭhamaṃ dentīti **dā**, asanti bhakkhantīti **asā**, datvā asā **dāsā**, sāmikānaṃ dātabbaṃ paṭhamaṃ datvā pacchā asanti bhakkhantīti attho. Sāmikehi vā dinnaṃ asanti bhakkhantīti **dāsā**, dukkhena kasirena asanti pavattantīti vā **dāsā**. Mātāpitūnaṃ hadayaṃ purentīti **purisā**, puram hitam vā isanti gavesantīti **purisā**. Buddhapaccekabuddhacakkavattibhāvaṃ pureti kammanti **puram**, kiṃ tam? Balavakammaṃ, puram isanti sīlenāti vā **purisā**. Purisā eva hi sammāsambuddhapaccekabuddhacakkavattibhāvaṃ gacchanti. “Puri uccaṭṭhāne sentīti vā **purisā**. Purisā hi mātūnaṃ pituṭṭhāne ṭhitā” ti ime vacanattā vuttappakārā yuttāyeva atthasambhavato. Dāsā ca purisā ca **dāsaporisaṃ**, majjhe vuddhi. Ettha ca dāsaggahaṇena dāsīpi gahitā. Dāsā dukkaṭṭajanā, purisā sukhitajanāti viseso daṭṭhabbo. Ṭhanti patiṭṭhahanti ettha mātugāme puttadhītīti **thiyo**. **Narasaddassa** viggahattho heṭṭhā vuttova.

Ekadeso domanassasaṅkhāto ādīnavo idha pāligāthāyaṃ āgatoti ācariyena vibhatto, amhehi ca ñāto, “dukkhasaṅkhāto ādīnavo kattha pāliyaṃ āgato” ti pucchitabbattā “**tattha katamo ādīnavo? Abalā nam balīyanti**” tiādi āraddham. Atha vā “tattha katamo ādīnavo? Abalā nam balīyanti” tiādi kasmā evaṃ āraddham, nanu “tattha katamo ādīnavo? Tassa ce kāmāyānassā” tiādinā ādīnavo vibhattoti? Saccam, ādīnavo pana bahuvīdho dukkhadomanassādivasena, tasmim bahuvīdhe ādīnave ekadeso domanassasaṅkhāto ādīnavo pubbe vibhatto, idāni dukkhasaṅkhātam ādīnavaṃ vibhajitum “**tattha katamo ādīnavo? Abalā nam balīyanti**” tiādi āraddham. Tattha **tatthāti** tassaṃ “assādādīnavatā” tiādigāthāyaṃ niddiṭṭhesu dukkhadomanassādīsū ādīnavesu katamo ādīnavo tattha tesu pāliḍhammesu kattha pāliḍhamme āgatoti pucchitvā –

“Abalā nam balīyanti, maddantenam parissayā;
Tato nam dukkhamanveti, nāvaṃ bhinnamivodaka” nti. (su. ni. 776; mahāni. 5) –

Idha pāligāthāyaṃ yo dukkhasaṅkhāto ekadeso ādīnavo āgato, so ayam dukkhasaṅkhāto ekadeso ādīnavo desanāhārassa visayoti.

Gāthāyaṃ natthi balaṃ etesaṃ kilesānanti **abalā**. Kasmā kilesā abalā hontīti? Kusalehi pahātabbattā. **Naranti** khettādikāme anugijjhantaṃ naram, saddhābalādivirahato vā abalaṃ tam naram **balīyanti** abhibhavanti. Kiñcāpi kilesā kusalehi pahātabbattā abalā honti, tathāpi kāmamanugijjhantaṃ saddhābalādivirahitaṃ abhibhavitum samattā bhavanti. **Maddantenam parissayāti** kāmāgiddham kāme pariyesantaṃ, kāmam rakkhantañca enaṃ naram pari samantato paripīletvā ayanti pavattantīti parissayā, sīhabyagghādayo ceva kāyaduccarītādayo ca maddanti. **Tato** tehi parissayehi abhibhūtam **nam** naram jātiādi**dukkham anveti** anugacchati. Kimiva anveti? Udakaṃ bhinnanāvaṃ anveti iva, evaṃ anvetīti attho.

Ekadesam maggasāṅkhātam nissaraṇam idha pāligāthāyaṃ āgantoti ācariyena vibhattam, amheti ca viññātam, “nibbānasāṅkhātam ekadesam nissaraṇam kattha pāliḍhamme āgata” nti pucchitabbattā “**tattha katamaṃ nissaraṇam? Tasmā jantu sadā sato**” tiādi āraddham. Atha vā “tattha katamaṃ nissaraṇam? Tasmā jantu sadā sato” tiādi kasmā evaṃ āraddham, nanu “tattha katamaṃ nissaraṇam? Yo kāme parivajjetī” tiādinā nissaraṇam vibhattanti? Saccam, nissaraṇam pana duvidham magganibbānavasena, tattha duvidhe nissaraṇe maggasāṅkhātam nissaraṇam pubbe vibhattam, idāni nibbānasāṅkhātam nissaraṇam vibhajitum “**tattha katamaṃ nissaraṇam? Tasmā jantu sadā sato**” tiādi āraddham. Tattha **tatthāti** tassaṃ “assādādīnavatā” tiādigāthāyaṃ niddiṭṭhesu

magganibbānesu nissaraṇesu ekadesaṃ nibbānasaṅkhātaṃ nissaraṇaṃ tattha tesu pāḷidhammesu kattha pāḷidhamme āgatanti pucchitvā –

“Tasmā jantu sadā sato, kāmāni parivajjaye;
Te pahāya tare oghaṃ, nāvaṃ sitvāva pāragū”ti. –

Idha pāḷigāthāyaṃ yaṃ nibbānasaṅkhātaṃ nissaraṇaṃ āgataṃ, idaṃ nissaraṇaṃ desanāhārassa visayanti.

Gāthāyaṃ **tasmāti** yasmā kāmagiddhaṃ naraṃ dukkhaṃ anveti, tasmā jantu **sadā** sabbakāle pubbarattāpararatte jāgariyānuyogena **sato** satisampanno hutvā **kāmāni** kilesakāme vikkhambhanavasena vā samucchedavasena vā **parivajjaye** pariyaheyya. **Te** kāme ariyamaggena pahāya catubbidhaṃ **oghaṃ** tareyya tarituṃ sakkuṇeyya. Ko tarati iva tareyya? Nāvāsāmiko nāvaṃ yaṃ pavisantaṃ udakaṃ **sitvā** bahi siñcitvā lahukāya nāvāya appakasirena taritvā **pāragū** pāraṃ gacchati iva, evaṃ attani pavattaṃ kilesūdakaṃ siñcitvā ariyamaggena nīharitvā lahukena attabhāvena anupādisesāya nibbānadhātuyā nibbānena pāraṃ nibbānaṃ santim gaccheyyāti attho. Idaṃ nibbānaṃ kasmā nissaraṇaṃ hoti? Sabbasaṅkhatanissaraṇato **nissaraṇaṃ** nāma.

Idaṃ nissaraṇaṃ idha pāḷidhamme āgatanti ācariyena vibhattaṃ, amhehi ca viññātaṃ, “katamaṃ phalaṃ kattha pāḷidhamme āgata”nti pucchitabbattā “**tattha katamaṃ phalaṃ? Dhammo have rakkhati dhammacāri**”ntiādi āradhāṃ. Tattha **tatthāti** tassaṃ “assādādīnavatā”tiādigāthāyaṃ niddiṭṭhesu rakkhananipphādanamaccutaraṇādīsū phalesu katamaṃ phalaṃ tattha tesu pāḷidhammesu kattha pāḷidhamme āgatanti pucchitvā –

“Dhammo have rakkhati dhammacāriṃ, chattaṃ mahantaṃ yatha vassakāle;
Esānisamso dhamme suciṇṇe, na duggatiṃ gacchati dhammacārī”ti. (su. ni. 102, 103) –

Idha pāḷigāthāyaṃ yaṃ anathehi dhammassa rakkhanaphalaṃ āgataṃ, rakkhāvahanassa abbhudayassa yañca nipphādanaṃ phalaṃ āgataṃ, idaṃ rakkhananipphādanaṃ phalaṃ desanāhārassa visayanti.

Gāthāyaṃ **dhammoti** yena puggalena yo dānādippabhedo puññadhammo nibbattito, so dhammo. **Dhammacāriṃ** dhammanibbattakaṃ taṃ puggalaṃ anathehi **rakkhati**. Kimiva? **Vassakāle** deve vassante sati mahantaṃ kusalena dhāretabbaṃ chattaṃ dhārentaṃ kusalaṃ taṃ janaṃ vassatemanato rakkhati yathā, evaṃ rakkhitabbo dhammopi attasammāpaṇidhānena appamatto hutvā suṭṭhu dhammaṃ rakkhantaṃyeva rakkhati, tādiso dhammacārīyeva duggatiṃ na gacchati. Eso ānisamso **suciṇṇe** suciṇṇassa **dhamme** dhammassa ānisamsoti attho.

Ekadesaṃ phalaṃ idha pāḷidhamme āgatanti ācariyena vibhattaṃ, amhehi ca ñātaṃ, “katamo upāyo kattha pāḷiyaṃ āgato”ti pucchitabbattā “**tattha katamo upāyo? Sabbe saṅkhārā aniccā**”tiādi āradhāṃ. Tattha **tatthāti** tassaṃ “assādādīnavatā”tiādigāthāyaṃ niddiṭṭhesu vipassanāpubbaṅgamanibbidādīsū upāyesu katamo upāyo tattha tesu pāḷidhammesu kattha pāḷidhamme āgatoti pucchitvā –

“Sabbe saṅkhārā ‘aniccā’ti...pe...;
Sabbe dhammā ‘anattā’ti, yadā paññāya passatī”ti. (dha. pa. 277-279) –

Idha pāḷigāthāsu yo vipassanāpubbaṅgamanibbidāññānasaṅkhāto visuddhiyā adhiḡamahetubhāvato maggo āgato, ayaṃ upāyo desanāhārassa visayoti.

Gāthāsu **sabbe** niravasesā kammacittotuāhārehi saṅkharitā saṅkhatasaṅkhārā hutvā abhāvaṭṭhena **aniccā** iti yadā paññāya passatī, atha anicce dukkhasabhāve nibbindati, eso vipassanāpubbaṅgamo

nibbindanañāṇasaṅkhāto dhammo visuddhiyā maggoti. “Sabbe saṅkhārā aniccā” tiādīsu saṅkhārānaṃ saṅkhatadhammabhāvo paccayākāravibhaṅgaṭṭhakathāyaṃ (vibha. aṭṭha. 226 saṅkhārapadaniddesa) vuttova, taṃ vibhaṅgaṭṭhakathāṃ anoloketvā ekacce ācariyā “vipassanāñāṇarammaṇattā tebhūmakadhammāyevā” ti vadanti, evaṃ sati maggaphaladhammānaṃ niccādibhāvo bhavye, tasmā vibhaṅgaṭṭhakathānurūpova attho daṭṭhabbo. **Dukkhāti** dukkhadukkhavipariṇāmadukkhasaṅkhāradukkhabhāvena dukkhā. **Anattāti** niccasārasukhasāraattasārahitattā asārakaṭṭhena anattā, avasavattanaṭṭhena vā anattā.

Ekadeso upāyo idha pāḷidhamme āgatoti ācariyena vibhatto, amhehi ca ñāto, “katamā āṇatti kattha pāḷidhamme āgatā” ti pucchitabbattā “**tattha katamā āṇatti? Cakkhumā visamānīvā**” tiādī āraddhaṃ. Tattha **tatthāti** tassaṃ “assādādīnavatā” tiādigāthāyaṃ niddiṭṭhāsu pāpaduccaritaparivajjanāṇattikalyāṇasucaritacaraṇāṇattiādīsu katamāṇatti tattha tesu pāḷidhammesu kattha pāḷidhamme āgatāti pucchitvā –

“Cakkhumā visamānīva, vijjamāne parakkame;
Paṇḍito jīvalokasmiṃ, pāpāni parivajjaye” ti. (udā. 43) –

Idha pāḷidhamme yā pāpaduccaritaparivajjanāṇatti āgatā, ayaṃ pāpaduccaritaparivajjanāṇatti desanāhārassa visayāti.

Gāthāyaṃ **cakkhumā** puriso vijjamāne parakkame āvahiṭaṃ sarīraṃ āvahantova hutvā **visamāni** bhūmippadesāni vā visame hatthiādayo vā parivajjeti iva, evaṃ jīvalokasmiṃ paṇḍito **pāpāni** lāmakāni duccharitāni parivajjeti. Āṇatti nāma āṇārahassa dhammarājassa bhagavato āṇā, sā bahuvīdhā, tasmā “kareyya kalyāṇa” tiādigāthāyaṃ sucaritacaraṇā āṇatti.

“Upetha saraṇaṃ buddhaṃ, dhammaṃ saṅghaṇca tādinaṃ;
Samādiyatha silāni, taṃ vo atthāya hehī” ti. (therīgā. 249-250, 289-290) –

Ādīsu gāthāsu saraṇagamanāṇattisīlasamādānāṇattiādī āgatāti.

“Suññato lokaṃ avekkhassū” tiādī kasmā evaṃ āraddhaṃ, nanu “tattha katamaṃ phalaṃ? Dhammo have” tiādīnā, “tattha katamo upāyo? Sabbe saṅkhārā” tiādīnā, “tattha katamā āṇatti? Cakkhumā” tiādīnā ca phalūpāyāṇattiyō vibhattāti? Saccamaṃ, viṣuṃ viṣuṃ pana suttessa āgatā phalūpāyāṇattiyō vibhattā, idāni ekato āgatā phalūpāyāṇattiyō vibhajitūṃ “**suññato lokaṃ avekkhassū**” tiādī āraddhaṃ.

Tattha **suññato lokaṃ avekkhassū** ti sabbampi saṅkhāralokaṃ attato suññoti avasavattitāsallakkhaṇavasena vā tucchabhāvasamanupassanavasena vā passāti idaṃ bhagavato vacanaṃ vidhānabhāvato **āṇatti** nāma. Niccasārasukhasāraattasārādirahitattā “**mogharāja**” ti ālapati, saddhāsīlasutacāgādirahitattā vā **mogho**.

“**Sadā sato**” ti puggalavasena vuttāya satiyā suññatādassanassa sampajānhetubhāvato satiyeva **upāyo**, na satimāti ettha satīti adhippāyo.

Attānudiṭṭhiṃ ūhaccā ti ettha attānudiṭṭhi nāma “rūpaṃ attā, rūpavā attā, rūpasmiṃ attā, attāni rūpa” tiādiṭṭhā vā vīsativatthukā diṭṭhi. Maggena **ūhacca** samucchinditvā **evaṃ** vuttavidhinā **maccutaro** maccuno visayātikanta **siyā** bhavye. Ettha yaṃ maccuvisayaṃ taraṇaṃ atikkamaṇaṃ, tassa atikkamaṇassa yaṅca pubbhāgapaṭipadāsampajjanaṃ, **idaṃ** bhagavato desanāya **phalaṃ** desanāhārassa visayanti adhippāyo. Pubbe viṣuṃ viṣuṃ phalūpāyāṇattiyō vibhattāpi –

“Suññato lokaṃ avekkhassu, mogharāja sadā sato;

Attānudiṭṭhiṃ ūhacca, evaṃ maccutaro siyā’’ti. (su. ni. 1125; mahāni. 186; cūḷani. piṅgiyamāṇavapucchā 144, mogharājamāṇavapucchāniddeśa 88) –

Ekagāthāyaṃ puna ekato vibhajanato phalādīsu ekato dassitesu sabbattha suttesu vā sabbattha gāthāsu vā phalādayo dassetabbā assādādayo viya katthaci niddhāretvāti viseso vijānitabbo. Tenāha aṭṭhakathācariyo “yathā pana...pe... ekato udāharaṇaṃ katanti daṭṭhabba’’nti (netti. aṭṭha. 5).

6. Desanāhārassa viśayabhūtā assādādayo “idha pāḷidhamme ayaṃ assādo āgato, idha pāḷidhamme ayaṃ ādīnavo āgato’’tiādīnā viśesato nidassanavasena sarūpato ācariyena vibhattā, te assādādayo tiṇṇaṃ ugghaṭitaññūādīnaṃ puggalānaṃ sāmāññato bhagavā kiṃ nu kho deseti, udāhu ekassa puggalassa yathālābhaṃ kiṃ nu desetīti anuyogassa sambhavato imassa puggalassa imaṃ deseti, imassa puggalassa imaṃ desetīti puggalabhedena assādādayo vibhajivā dassetuṃ “**tattha bhagavā ugghaṭitaññūssā**’’tiādi āradḍhaṃ. Tattha **tatthāti** tesu assādādīsu. Nissaraṇaṃ ugghaṭitaññussa puggalassa bhagavā deseti, ādīnavañca nissaraṇaṃ ime dve vipaṅcitaññussa puggalassa bhagavā deseti, assādañca ādīnavañca nissaraṇaṃ ime tayo neyyassa puggalassa bhagavā desetīti yojanatto daṭṭhabbo.

Aṭṭhakathāyaṃ pana “evaṃ assādādayo udāharaṇavasena sarūpato dassetvā idāni tattha puggalavibhāgena desanāvibhāgaṃ dassetuṃ ‘tattha bhagavā’’tiādi vutta’’nti vuttaṃ.

Tattha **ugghaṭitaññūssāti** ugghaṭiyate paṭivijjhīyate, ṭhapīyate vā sappabhedo vitthāro atthoti **ugghaṭito**, jānātīti **ñū**, ugghaṭitaṃ atthaṃ ñū **ugghaṭitaññū**, uddesamatteneva sappabhedam savitthāraṃ paṭivijjhitaṃ atthaṃ paṭivijjhātīti attho. Yo puggalo uddeseneva uddiṭṭhamatteneva atthaṃ ñatvā atthasiddhipatto hoti, so ugghaṭitaññū nāma.

Vipaṅcīyate vittharīyate atthoti **vipaṅcito**, taṃ jānātīti **vipaṅcitaññū**. Yo puggalo niddesena niddiṭṭhamattameva atthaṃ ñatvā atthasiddhipatto, so vipaṅcitaññū nāma.

Paṭiniddesena attho netabbo pāpetabboti **neyyo**. Yo puggalo paṭiniddesena vā paṭilomena vā vibhattaṃ eva atthaṃ ñatvā atthasiddhipatto, so neyyo nāma. Nissaraṇadesanāyeva ugghaṭitaññussa paṭivedhābhisamayo siddho hoti, ādīnavadesanāya ceva nissaraṇadesanāya ca vipaṅcitaññussa paṭivedhābhisamayo siddho hoti, assādadesanāya ca ādīnavadesanāya ca nissaraṇadesanāya ca neyyassa paṭivedhābhisamayo siddho hotīti adhippāyo idha gahetabbo.

Padaparamo panettha paṭivedhābhisamayabhajanābhāvato na gahito. Tasmiñca aggahite assādo, ādīnavo, nissaraṇaṃ, assādādīnavā, assādanissaraṇāni, ādīnavanissaraṇāni, assādādīnavanissaraṇāni cāti sattu paṭṭhānanayesu tatiyachattasattamāva gahitā, avasesā cattāro nayā na gahitā. Veneyyavinayanābhāvato hi gahaṇāgahaṇaṃ daṭṭhabbaṃ. Veneyyavinayañca veneyyānaṃ santāne ariyamaggassuppādanaṃ, na sāsanaṇavinayanamattaṃ, ariyamagguppādanañca yathāvuttehi eva tīhi padaṭṭhānanayehi sijjhatīti itare nayā idha na vuttā.

Yasmā pana **peṭake** (peṭako. 23) –

“Tattha katamo assādo ca ādīnavo ca?
‘Yāni karoti puriso, tāni passati attani;
Kalyāṇakārī kalyāṇaṃ, pāpakārī ca pāpaka’’nti.

“Tattha yaṃ kalyāṇakārī kalyāṇaṃ paccanubhoti, ayaṃ assādo. Yaṃ pāpakārī pāpaṃ paccanubhoti, ayaṃ ādīnavo.

“Aṭṭhime, bhikkhave, lokadhammā. Katame aṭṭha? ‘Lābho’’tiādi (a. ni. 8.6). Tattha lābho yaso

sukhaṃ pasamsā, ayaṃ assādo. Alābho ayaso dukkhaṃ nindā, ayaṃ ādīnavo.

“Tattha katamo assādo ca nissaraṇaṇca?

‘Sukho vipāko puññānaṃ, adhippāyo ca ijjhati;
Khippaṇca paramaṃ santiṃ, nibbānamadhigacchatī’ti. –

Ayaṃ assādo ca nissaraṇaṇca.

“Dvattiṃsimāni, bhikkhave, mahāpurisassa mahāpurisalakkhaṇāni, ye hi samannāgatassa mahāpurisassa dveveva gatiyo bhavanti...pe... vivaṭacchadoti sabbaṃ lakkhaṇasuttaṃ (dī. ni. 3.199) ayaṃ assādo ca nissaraṇaṇca.

“Tattha katamo ādīnavo ca nissaraṇaṇca?

‘Bhārā have pañcakkhandhā, bhārahāro ca puggalo;
Bhārādānaṃ dukhaṃ loke, bhāranikkhepanaṃ sukhaṃ.

‘Nikkhipitvā garuṃ bhāraṃ, aññaṃ bhāraṃ anādiya;
Samūlaṃ taṇhaṃ abbuyha, nicchāto parinibbuto’ti. (saṃ. ni. 3.22) –

Ayaṃ ādīnavo ca nissaraṇaṇca.

“Tattha katamo assādo ca ādīnavo ca nissaraṇaṇca?

‘Kāmā hi citrā madhurā manoramā, virūparūpena mathenti cittaṃ;
Tasmā ahaṃ pabbajitomi rāja, apanṇakaṃ sāmāññaṃ eva seyyo’ti. (ma. ni. 2.307; theragā. 787; peṭako. 23) –

Ayaṃ assādo ca ādīnavo ca nissaraṇaṇcā’ti vuttaṃ, tasmā tepi nayā idha niddhāretvā veditabbā. Phalādīsupi ayaṃ nayo labbhatiyeva.

Yasmā **peṭake** (saṃ. ni. 1.23, 192; peṭako. 22; mi. pa. 2.1.9) – “tattha katamaṃ phalaṇca upāyo ca? ‘Sīle patiṭṭhāya naro sappañño’ti gāthā, idaṃ phalaṇca upāyo ca.

“Tattha katamaṃ phalaṇca āṇatti ca?

‘Sace bhāyatha dukkhassa, sace vo dukkhamappiyaṃ;
Mākattha pāpakaṃ kammaṃ, āvi vā yadi vā raho’ti. (udā. 44) –

Idaṃ phalaṇca āṇatti ca.

“Tattha katamo upāyo ca āṇatti ca?

‘Kumbhūpamaṃ kāyamimaṃ viditvā, nagarūpamaṃ cittamidaṃ ṭhapetvā;
Yodhetha māraṃ paññāvudhena, jitaṇca rakkhe anivesano siyā’ti. (dha. pa. 40) –

Ayaṃ upāyo ca āṇatti cā’ti vuttaṃ, tasmā evaṃ phalādīnaṃ dukkhavasenāpi udāharaṇaṃ veditabbam.

“Ugghaṭṭitaññuādīnaṃ tiṇṇaṃ puggalānaṃ imassa puggalassa imaṃ deseti, imassa puggalassa

imaṃ desetī”ti yehi puggalehi assādādayo yathārahaṃ ācariyena vibhattā, te puggalā yāhi paṭipadāhi bhinnā, tā paṭipadā kittikā bhavanti, tāhi bhinnā puggalā ca kittikāti vicāraṇāya sambhavato tā paṭipadā, te ca puggalā ettakāti gaṇanato dassetuṃ “**tattha catasso paṭipadā**”tiādi āraddhaṃ.

Tattha **tatthāti** tesu ugghaṭitaññuādīsu puggalesu. Ye puggalā yāhi paṭipadāhi bhinnā, tā paṭipadā catasso bhavanti, te ca puggalā cattāroti yojanā kātābbā. Katamā catasso? Dukkḥapaṭipadā dandhābhiññā, dukkhāpaṭipadā khippābhiññā, sukhāpaṭipadā dandhābhiññā, sukhāpaṭipadā khippābhiññā cāti catasso. Katame cattāro? Taṇhācarito mando puggalo, taṇhācarito udatto puggalo, diṭṭhicarito mando puggalo, diṭṭhicarito udatto puggalo cāti cattāro.

Paṭipadābhiññāhi kato vibhāgopi paṭipadāhi kato vibhāgo nāma hoti avinābhāvatoti manasi katvā “catasso paṭipadābhiññā”ti avatvā “catasso paṭipadā”ti vuttā. Tā panetā samathavasenāpi bhinnā, vipassanāvasenāpi bhinnā. Kathaṃ samathavasena? Pathavīkasiṇādīsu sabbapaṭhamam “pathavī pathavī”tiādinā pavattamanasikārato paṭṭhāya yāva jhānassa upacāraṃ uppajjati, tāva pavattā paññā samathabhāvanā “paṭipadā”ti vuccati. Upacārato pana paṭṭhāya yāva appanā, tāva pavattā paññā “abhiññā”ti vuccati heṭṭhimapaññāto adhigatapaññābhāvato.

Sā ca paṭipadā kassaci dukkhā kicchā hoti nīvaraṇādipaccanīkadhammasamudācārāggahaṇatāya, kassaci tadabhāvato sukhā akicchā hoti, abhiññāpi kassaci dandhā asīghappavatti hoti avisadaññatāya, kassaci khippā sīghappavatti hoti visadaññatāyāti.

Kathaṃ vipassanāvasena? Yo rūpārūpamukhena vipassanaṃ abhinivisanto cattāri mahābhūtāni pariggahetvā upādārūpaṃ pariggaṇhāti, arūpaṃ pariggaṇhāti, rūpārūpaṃ pana pariggaṇhanto dukkhena kasirena kilamanto pariggahaetaṃ sakkoti, tassa **dukkḥapaṭipadā** nāma hoti. Pariggahitarūpārūpassa vipassanāparivāse maggapātubhāvadandhatāya **dandhābhiññā** nāma hoti. Tabbipariyāyena itarā dve hontī. Vipassanāvasena pana bhinnāyeva paṭipadābhiññāyo idha daṭṭhabbā abhisamayādhikārattā, **aṭṭhakathāyaṃ** pana “evaṃ yesaṃ puggalānaṃ vasena desanāvibhāgo dassito, te puggale paṭipadāvibhāgena vibhajitvā dassetuṃ ‘catasso paṭipadā’tiādi vutta’nti (netti. aṭṭha. 6) vuttaṃ. Yojanāyayo vuttanāyānusāreṇeva veditabbo.

Catūhi paṭipadābhiññāhi cattāro puggalā sabbeva aniyamato vaṭṭadukkhato kiṃ nu kho niyyanti, udāhu “imāya paṭipadābhiññāya ayaṃ puggalo niyyāti, imāya paṭipadābhiññāya ayaṃ puggalo niyyāti”ti niyamato ca niyyātīti vicāraṇāya sambhavato “ayaṃ puggalo imehi nissayehi upanissayapaccayaṃ labhitvā imāya paṭipadābhiññāya vaṭṭadukkhato niyyāti”ti niyametvā dassetuṃ “**taṇhācarito mando**”tiādi vuttaṃ.

Tattha taṇhācarito mando puggalo satipaṭṭhānehi **nissayehi** upanissayapaccayaṃ labhitvā **satindriyena** satindriyādhikena ariyamaggena dukkhāpaṭipadādandhābhiññāya vaṭṭadukkhato niyyāti, taṇhācarito udatto puggalo jhānehi **nissayehi** upanissayapaccayaṃ labhitvā **samādhindriyena** samādhindriyādhikena ariyamaggena dukkhāpaṭipadākhippābhiññāya vaṭṭadukkhato niyyāti, diṭṭhicarito mando puggalo sammappadhānehi **nissayehi** upanissayapaccayaṃ labhitvā **vīriyindriyena** vīriyindriyādhikena ariyamaggena sukhāpaṭipadādandhābhiññāya vaṭṭadukkhato niyyāti, diṭṭhicarito udatto puggalo sacchehi **nissayehi** upanissayapaccayaṃ labhitvā **paññindriyena** paññindriyādhikena ariyamaggena sukhāpaṭipadākhippābhiññāya vaṭṭadukkhato niyyātīti yojanā kātābbā. **Aṭṭhakathāyaṃ** pana –

“Cattāro puggalāti yathāvuttapaṭipadāvibhāgeneva cattāro paṭipannakapuggalā, taṃ pana paṭipadāvibhāgaṃ saddhiṃ hetupāyaphalehi dassetuṃ ‘taṇhācarito’tiādi vutta’nti (netti. aṭṭha. 6)

Vuttaṃ. Tattha **taṇhācaritoti** taṇhāya nibbattitaṃ caritaṃ etassa puggalassāti taṇhācarito. **Mandoti**

mandiyāya avijjāya samannāgatoti mando, mohādhikapuggalo. **Udattoti** udaatto, uḷārapaññoti attho. Uḷāraṃ phalaṃ detīti **udo**, ko so? Pavicayo, attani nibbattoti **atto**, udo atto yassa puggalassāti **udattoti** vacanatto kātabbo.

Paṭhamāya paṭipadāya hetu nāma taṇhācaritatā, mandapaññatā ca, upāyo satindriyaṃ, sabbāsampi phalaṃ niyyānameva. Dutiyāya paṭipadāya hetu nāma taṇhācaritatā, udattapaññatā ca, upāyo vīriyindriyaṃ. Tatiyāya paṭipadāya hetu nāma diṭṭhacaritatā, mandapaññatā ca, upāyo samādhindriyaṃ. Catutthiyā paṭipadāya hetu nāma diṭṭhacaritatā, udattapaññatā ca, upāyo paññindriyanti hetupāyaphalāni daṭṭhabbāni.

Ettha ca diṭṭhacarito udatto puggalo ugghaṭitaññū nāma, diṭṭhacarito mando ceva taṇhācarito udatto ca vipañcitaññū nāma, taṇhācarito mando puggalo neyyo nāma, tasmā “tatha bhagavā ugghaṭitaññussa puggalassa nissaraṇaṃ desayati” tiādinā nayena ugghaṭitaññūādiveneyyattayassa bhedadassanena nissaraṇaṃ desayati, “ādīnavañca nissaraṇañca desayati, assādañca ādīnavañca nissaraṇañca desayati” ti desanāvibhāgo dassito. “Tattha catasso paṭipadā” tiādinā paṭipadābhedadassanena “taṇhācarito mando puggalo, taṇhācarito udatto puggalo, diṭṭhacarito mando puggalo, diṭṭhacarito udatto puggalo” ti catudhā bhinnaṃ taṇhācaritamandādīkaṃ puggalacatukkaṃ dassitanti daṭṭhabbaṃ.

Idāni catūhi paṭipadābhiññāhi catudhā bhinnaṃ taṇhācaritamandacatukkaṃ atthanayayojanāya dutiyāya visayaṃ katvā dassetuṃ “**ubho taṇhācaritā**” tiādi vuttaṃ. Tattha taṇhāya samādhipaṭipakkhattā taṇhācaritā mandaudattā ubho puggalā samathapubbaṅgamāya vipassanāya upanissayaṃ labhitvā rāgavirāgāya maggapaññāya niyyanti cetovimuttiyā sekkhaphalabhāvāya. Sammādiṭṭhisahiteneva sammāsamādhinā niyyānaṃ bhavati, na sammāsamādhinā eva, tasmā diṭṭhacaritā mandaudattā ubho puggalā vipassanāpubbaṅgamena samathena avijjāvirāgāya maggapaññāya niyyanti paññāvimuttiyā asekkhaphalabhāvāyāti cattāropi puggalā duvidhāyeva bhavantīti vuttaṃ hoti.

Rāgavirāgāyāti rañjatīti **rāgo**, so virajjati etāyāti **virāgā**, rāgassa virāgā **rāgavirāgā**, tāya rāgavirāgāya. **Cetoti** cittappabhedena ca samādhī vuccati yathā “cittaṃ paññañca bhāvaya” ti (saṃ. ni. 1.23, 192; mi. pa. 2.1.9.). Paṭippassaddhivasena paṭipakkhato vimuccatīti **vimutti**, cetasā cittena samādhinā vimuccatīti **cetovimutti**, ceto eva vā vimutti **cetovimutti**, anāgāmi phalassamādhī. Anāgāmi puggalo hi samādhismiṃ paripūrakāritāya cetovimuttiyā niyyāti. **Avijjāvirāgāyāti** avindiyāya kāyaduccaritādiṃ vindaṭīti **avijjā**, vindiyaṃ vā kāyasucaritādiṃ na vindaṭīti **avijjā** niruttinayena. Virajjati etāyāti **virāgā**, avijjāya virāgā **avijjāvirāgā**, tāya avijjāvirāgāya. Pakārehi jānātīti **paññā**, vimuccatīti **vimutti**, paññāya vimuccatīti **paññāvimutti**, paññā **eva** vā vimutti **paññāvimutti**, arahattaphalapaññā, tāya paññāvimuttiyā.

“Tesu katame puggalā kena atthanayena hātabbā” ti vattabbato “**tattha ye samathapubbaṅgamāhi**” tiādi vuttaṃ. Tattha **tatthāti** tesu “ubho taṇhācaritā” tiādinā vibhassetu puggalesu ye ubho taṇhācaritā mandaudattā puggalā samatha...pe... niyyanti, te ubho taṇhācaritā mandaudattā puggalā nandiyāvattena nayena **hātabbā** gametabbā netabbā. Ye ubho diṭṭhacaritā mandaudattā puggalā vipassanā...pe... samathena niyyanti, te ubho diṭṭhacaritā mandaudattā puggalā sīhaviikkīlitena nayena **hātabbā** gametabbā netabbāti attho.

7. “Tattha catasso paṭipadā” tiādinā desanāhārena dukkhāpaṭipadābhedenā taṇhācaritamandādibhedo puggalo vibhatto, amhehi ca ñāto, “tassa vibhattānantaraṃ svāyaṃ desanāhāro kattha saṃvaṇṇetabbe dhamme kenaci ākārena sambhavatī” ti pucchitabbabhāvato “**svāyaṃ hāro kattha sambhavatī**” tiādimāha. Navamakkhaṇasampannassa sathā yaṃ dhammaṃ deseti, tasmīṃ saṃvaṇṇetabbe dhamme yā vīmaṃsādīkā sutamayādīkā tisso paññā vibhattā, tāhi paññāhi ye ugghaṭitaññūādayo tayo puggalā vibhattā, iti vibhattākārena ayaṃ desanāhāro sathārā desetabbe dhamme sambhavatīti daṭṭhabbo.

Tattha **svāyaṃ hāro**ti desanāhārena paṭipadāvibhāgena veneyyapuggalavibhāgo dassito, so ayam desanāhāro. **Kattha sambhavatī**ti kattha samvaṇṇetabbe dhamme samvaṇṇanābhāvena sambhavatī. **Yassāti** yo so veneyyo paccantajādīhi aṭṭhahi akkhaṇehi vimutto, savanadhāraṇādīhi ca sampattīhi samannāgato, tassa veneyyassa. **Satthāti** sadevakaṃ lokam sāsati anusāsati satthā. **Dhammanti** desitam samvaṇṇetabbaṃ dhammaṃ. **Desayatī**ti saṅkhepanayavitthāranayehi bhāsati. **Aññataroti** bhagavato sāvakesu evaṃ dhammaṃ desetum samattho sāvako. **Garuṭṭhāniyoti** gāravassa ṭhānabhūtehi sīlasutacāgādiguṇavisesehi yutto mānito saddahitabbavacano. **Sabrahmacārī**ti samaṃ, saha vā brahmaṃ satthusāsanaṃ carati paṭipajjati sabrahmacārī. **Saddhaṃ labhati** “yo satthā dhammaṃ deseti, so satthā sammāsambuddho hoti”ti satthari, “svākkhāto vatāyaṃ dhammo sāttho sabyañjano ekantaparipuṇṇo ekantaparisuddho atthāvaho hitāvaho sukhāvaho jhānamaggaphalanibbattako, amhehi ca saddahitabbo”ti desite dhamme ca acalasaddhaṃ labhati, saddahanam attano santāne punappunam uppādeti. Tathā “yo sāvako dhammaṃ deseti, so sāvako saṅkhepato vā vitthārato vā dhammaṃ desetum samattho vata garuṭṭhāniyo sabrahmacārī mānito saddahitabbavacano”ti desake sāvake ca “tādisena sāvakena desito yo dhammo, so dhammo sāttho sabyañjano ekantaparipuṇṇo ekantaparisuddho atthāvaho hitāvaho sukhāvaho jhānamaggaphalanibbattako, amhehi ca saddahitabbo”ti sāvakena desitadhamme ca saddhaṃ saddahanam attano santāne punappunam uppādetīti attho.

Tatthāti tasmim saddahitabbe satthārā desitadhamme ceva sāvakena desitadhamme ca saddahantassa veneyyassa yā vīmaṃsā, vīmaṃsantassa yā ussāhanā, ussahantassa yā tulanā, tulayantassa yā upaparikkhā, sā ayam vīmaṃsādīkā paññā saddhānusārena pavattanato **sutamayī paññā** nāma. Tattha vīmaṃsanam **vīmaṃsā**, pāliya, pāliatthassa ca vīmaṃsā. Vīmaṃsatīti vā **vīmaṃsā**, padaṃ padantarena, padattham padatthantarena vicāraṇakā paññā. Yathā cettha, evaṃ ussāhanādīsipi bhāvasādhanakattusādhanāni kātabbāni. **Ussāhanā** ca ussāhena upatthambhikā dhammassa dhāraṇaparicayasādīkā paññā ca, na vīriyam, ettha ca yā sutamatteyeva pavattā, vīmaṃsādībhāvaṃ appattā nivattā, sā sutamayī paññā na hoti. Yā ca sutvā vīmaṃsitvā ussāhanādībhāvaṃ appattā nivattā, yā ca sutvā vīmaṃsitvā ussahitvā tulanādībhāvaṃ appattā nivattā, yā ca sutvā vīmaṃsitvā ussahitvā tulayitvā upaparikkhanabhāvaṃ appattā nivattā, sāpi paññā na sutamayī paññā hotīti daṭṭhabbā. Yā pana sutvā saddahantassa vīmaṃsā, vīmaṃsantassa ussāhanā, ussahantassa tulanā, tulayantassa upaparikkhā hoti, ayam **sutamayī paññā** nāma hotīti daṭṭhabbā.

Sutamayī paññā ācariyena vibhattā, amhehi ca ñātā, “katamā cintāmayī paññā”ti vattabbabhāvato sutamayiyā paññāya vibhajanānantaram cintāmayim paññam vibhajitum “**tathā sutena nissayenā**”tiādīmāha. Tattha **sutanti** suyyate pariyattidhammoti **suto**, savanam pariyattidhammassāti vā **sutam**, duvidhampi sutam. **Nissayena** upanissāyāti attho. Itthambhūtalakkhaṇe cetam “sutena nissayenā”ti karaṇavacanam. Ettha pana “idaṃ pañātipātādiviramanam sīlanatṭhena sīlam, ayam ekaggatā samādhanatṭhena samādhi, imāni bhūtopādāni ruppanatṭhena rūpāni, ime phassādayo namanatṭhena nāmāni, ime rūpādayo pañca dhammā rāsātṭhena khandhā”ti tesam tesam dhammānam piḷanādisabhāvassa vīmaṃsanābhūtā paññā **vīmaṃsā** nāma. Tesameva sīlasamādhiādīnam sīlati patiṭṭhahati etthāti **sīlanti**ādivacanattham pucchitvā sabhāgalakkhaṇarasapaccupaṭṭhānapadaṭṭhānānam tuletva viya gahaṇapaññā **tulanam** nāma. Tesameva sīlasamādhiādīnam dhammānam sabhāvalakkhaṇam avijahitvā aniccatādukkhatādinamanaruppanādisappaccayasankhatādiakāre vitakketvā upaparikkhaṇapaññā eva **upaparikkhā** nāmāti visesato daṭṭhabbo. Sutadhammassa dhāraṇaparicayavasena pavattanato sutamayī paññā ussāhanā jātā viya na cintāmayī paññā cintitassa dhāraṇaparicayavasena appavattanatoti “ussāhanā”ti na vuttam.

Sutamayī paññā ceva cintāmayī paññā ca ācariyena vibhattā, amhehi ca ñātā, “katamā bhāvanāmayī paññā”ti vattabbabhāvato karaṇabhūtānam dvinnam sutamayicintāmayipaññānam dassanānantaram phalabhūtānam bhāvanāmayim paññam vibhajanto “**imāhi dvīhi**”tiādīmāha. Tattha **imāhi dvīhi paññāhī**ti sutamayicintāmayipaññāhi karaṇabhūtāhi. Sutamayipaññāya vā cintāmayipaññāya vā ubhayattha vā ṭhitoyeva yogāvacaro vipassanam ārabhatīti. **Manasikārasampayuttassāti** rūpārūpesu pariggahādivasena saṅkhāresu aniccatādivasena manasikārena

sammā pakārehi yuttappayuttassa.

Diṭṭhivisuddhikañkhāvitaraṇavisuddhimaggāmaggañāṇadassanavisuddhi-
paṭipadāñāṇadassanavisuddhisampādanena vipassanaṃ ussukkantassa yogāvacarassa santāne
ñāṇadassanavisuddhisāṅkhātaṃ **yaṃ** ariyamaggañāṇaṃ nibbānārammaṇadassanabhūmiyaṃ **vā**
bhāvanābhūmiyaṃ vā uppajjati, ayaṃ **bhāvanāmayī paññā**ti attho daṭṭhabbo. Yadiṭṭhi
paṭhamamaggañāṇaṃ paṭhamam nibbānadassanato “**dassana**”nti vuttaṃ, bhāvanāvasena pana
pavattanato “**bhāvanāmayī paññā**”ti veditabbaṃ. **Dassanabhūmī**ti paṭhamamaggaphalāni, sesāni
“bhāvanābhūmī”ti vuccanti.

8. Amhākācariya tumhehi “yassa satthā vā”tiādinā sutamayipaññādikā vibhattā, evaṃ sati sutena
vinā cintāmayī paññā nāma na bhaveyya, mahābodhisattānaṃ pana sutena vinā cintāmayī paññā
hotvevāti codanaṃ manasi katvā tasmīṃ saṅgahetvā pakārantarena vibhajitum
“**paratoghosā**”tiādimāha.

Tattha **paratoghosā**ti parato pavatto desanāghoso paccayo etissāti paratoghosā.
Paccattasamuṭṭhitāti pati visum attaniyeva samuṭṭhitā. **Yonisomanasikārā**ti tesam tesam
cintetabbānaṃ rūpādīnaṃ dhammānaṃ ruppananāmanādisabhāvapariggaṇhanādīnā upāyena
pavattamanasikārā cintāmayī paññā nāma, iminā sāvakaṃpi sāmāññato gahitā, tathāpi
ugghaṭṭitaññuādīnaṃyeva vuttattā sāvakaṃ idha gahitā, tasmā purimanayo yuttataro. **Paratoti**
dhammadesakato pavattena dhammadesanāghosena hetunā yaṃ ñāṇaṃ uppajjati, paccattasamuṭṭhitena,
yonisomanasikārena ca hetunā yaṃ ñāṇaṃ uppajjati, **ayaṃ** bhāvanāvasena pavattanato **bhāvanāmayī**
paññā nāma, iminā sāvakaṃpi sāmāññato gahitā, tathāpi ugghaṭṭitaññuādīnaṃyeva vuttattā sāvakaṃ idha
gahitā, tasmā purimanayo yuttataro. **Paratoti** dhammadesakato pavattena dhammadesanāghosena hetunā
yaṃ ñāṇaṃ uppajjati, paccattasamuṭṭhitena, yonisomanasikārena ca hetunā yaṃ ñāṇaṃ uppajjati, ayaṃ
bhāvanāvasena pavattanato bhāvanāmayī paññā nāmāti vibhajitvā paṇḍitehi ñeyyāti vitthārena
gambhīratthaṃ ñātum icchantehi “evaṃ paṭipadāvibhāgenā”tiādinā (netti. aṭṭha. 9) aṭṭhakathāvacanena
jānitabbo.

Sutamayipaññādikā tisso paññā ācariyena nānāyehi vibhattā, amhehi ca ñātā, “tāsu yassa ekā vā
dve vā paññā atthi, so puggalo konāmo, yassa ekāpi natthi, so puggalo konāmo”ti pucchitabbabhāvato
yassa ayaṃ paññā, imā vā atthi, so puggalo itthannāmo, yassa natthi, so puggalo itthannāmoti
paṭipadāpaññāppabhedenā puggalaṃ vibhajitum “**yassa imā**”tiādi vuttaṃ.

Tattha **yassa** atitikkhapaññassa sutamayī paññā ceva cintāmayī paññā ca imā dve paññā atthi, ayaṃ
atitikkhapañño uddesamatteneva jānanato **ugghaṭṭitaññū** nāma. **Yassa** nātittikkhapaññassa
uddesaniddesehi sutamayī paññā atthi, cintāmayī paññā natthi, ayaṃ nātittikkhapañño uddesaniddesehi
jānanato **vipañcitanñū** nāma. **Yassa** mandapaññassa uddesaniddesehi neva sutamayī paññā atthi, na
cintāmayī paññā ca, ayaṃ mandapañño uddesaniddesapaṭiniddesehi jānanato niravasesavitthāradesanāya
netabbato **neyyo** nāmāti. **Aṭṭhakathāyaṃ** pana “idāni yadattam imā paññā uddhaṭṭā, tameva
veneyyapuggalavibhāgaṃ yojetvā dassetum ‘yassā’tiādi vutta’ntiādi (netti. aṭṭha. 8) vuttaṃ.

9. “Tattha bhagavā ugghaṭṭitaññussā”tiādinā desanaṃ vibhāveti, “tattha catasso paṭipadā”tiādinā
paṭipadāvibhāgehi, “svāyaṃ hāro”tiādinā ñāṇavibhāgehi ca desanābhājanaṃ veneyyattayaṃ ācariyena
vibhattaṃ, amhehi ca ñātaṃ, “yāya desanāpāliyaṃ desanāhāraṃ yojetum pubbe ‘dhammaṃ vo,
bhikkhave, desessāmī’tiādinā desanāhāraṃ visayabhāvena yā pāḷidesanā nikkhittā, sā pāḷidesanā
desanāhārena niddhāritesu assādādīsū atthesu kimatthaṃ desayati”ti pucchitabbattā “imaṃ atthaṃ
desayati”ti niyametvā dassetum “**sāyaṃ dhammadesanā**”tiādi āradhāṃ.

Tattha **sāyaṃ dhammadesanā**ti yā dhammadesanā ādikalyāṇādikā pubbe desanāhāraṃ
visayabhāvena nikkhittā, sāyaṃ dhammadesanā assādādīsū kimatthaṃ desayatiṭi kathetukāmatāya
pucchati, pucchitvā “cattāri saccāni desayati”ti vissajjeti, tāni sarūpato dassetum “**dukkham**

samudayaṃ nirodhaṃ magga'nti vuttaṃ. Pavattipavattakanivattinivattanupāyabhāvena aviparītabhāvato **"saccāni"**ti vuttāni.

Yassaṃ desanāyaṃ saccāni desanāhārena niddhāritāni, sā desanā cattāri saccāni desayatīti yuttaṃ hotu. Yassaṃ desanāyaṃ assādādayo niddhāritā, sā desanā cattāri saccāni desayatīti na sakkā vuttaṃ. Heṭṭhā ca assādādayo niddhāritā, tasmā **"assādādayo"**tipi vattabbanti codanaṃ manasi katvā **"ādīnava phalañca dukkha"**'ntiādi vuttaṃ. Desanāhārena saṃvaṇṇanāyena desanāyaṃ niddhārito ādīnava ceva phalañca dukkhasaccaṃ hoti, assādo samudayasaccaṃ, nissaraṇaṃ nirodhasaccaṃ, upāyo ceva āṇatti ca maggasaccaṃ hoti, tasmā **"cattāri saccāni desayatī"**ti vattabbamevāti.

Tañhāvajjā tebhūmakadhammā dukkhaṃ, te ca aniccādīhi pīlitattā **ādīnavā**yeva. **Phalanti** desanāya phalaṃ lokiyaṃ, na lokuttaraṃ, tasmā dukkhanti vattabbameva. **Assādoti** tañhāssādassa gahitattā **"assādo samudayo"**ti ca vattabbaṃ. **Assādekadeso dukkhameva**, assādekadeso dukkhañceva samudayo ca. Saha vipassanāya ariyamaggo ca bhagavato āṇatti ca desanāya phalādhiḡamassa upāyabhāvato **"upāyo, āṇatti ca maggo"**ti vuttaṃ, nissaraṇekadesopi maggoti daṭṭhabbo. **"Imāni cattāri saccāni yā desanā visesato desayati, katamā sā"**ti pucchitabbattā visesaṃ niyametvā dassetuṃ **"imāni cattāri saccāni idaṃ dhammacakka"**'nti vuttaṃ. **Idaṃ** vuccamānaṃ dhammacakkaṃ imāni cattāri saccāni visesato desayatīti yojanā kātābbā.

"Yā desanā imāni cattāri saccāni visesato desayati, tassā desanāya dhammacakkabhāvaṃ kiṃ bhagavā āhā"ti vattabbabhāvato **"yathāha bhagavā"**tiādi vuttaṃ. Tattha **"jātipi dukkhā"**tiādivacanato (mahāva. 14) tañhāvajjā jātīdikāṃ tebhūmakadhammajātaṃ dukkhassa adhiṭṭhānabhāvena, dukkhadukkhādibhāvena ca **"dukkha"**'nti vuttaṃ. **Meti** mayā pavattitanti yojanā. **Bhikkhveti** savane ussāhaṃ janetuṃ ālapati. **Bārāṇasiyanti** bārāṇasīnagarassa avidūre. **Isipataneti** sīlakkhandhādīnaṃ isanato gavesanato **"isī"**ti voharītānaṃ paccekabuddhānaṃ patanaṭṭhāne. **Migadāyeti** migānaṃ abhayadānaṭṭhāne kārīte assameva.

Anuttaranti uttaritarābhāvena anuttaraṃ anatisayaṃ. **Dhammacakkanti** satipaṭṭhānādīke sabhāvadhāraṇādīnā atthena dhammo ceva pavattanaṭṭhena cakkañcāti dhammacakkaṃ. **Appaṭivattiyanti** appaṭisedhanīyaṃ. Kasmā? Janakassa bhagavato dhammissarattā sammāsambuddhattā, jaññassa ca anuttarattā koṇḍaññādīnañceva aṭṭhārasabrahmakotiṃyā ca catusaccapaṭivedhasādhanato ca. **"Kena appaṭivattiya"**'nti pucchitabbattā **"samaṇena vā"**tiādimāha. Tattha **samaṇenāti** pabbajjamattūpagatena. **Brāhmaṇenāti** jātibrahmaṇena. Paramatthānañhi samaṇabrahmaṇānaṃ paṭisedhane cittuppādānuppajjanampi natthi. **Devenāti** chakāmāvacaradevena. **Brahmunāti** rūpabrahmā gahitā. **"Samaṇena vā ...pe... brahmunā"**ti ettakameva avatvā **"kenaci"**ti vuttavacanena avasesakhattiyagahapatiparisajanā saṅgahitā. Tasmā khattiyabrahmaṇagahapatīsamānacātumahārājikatāvatiṃsamārabrahmaparisā aṭṭhavidhāpi paṭisedhetuṃ asamatthāyevāti veditābbā. **Lokasminti** sattasamūhe dhammacakkādhāre.

"Dvādasa padāni sutta"'nti gāthānurūpaṃ dhammacakkasutte padāni vibhajanto **"tattha aparimāṇā"**tiādimāha. Tattha **tatthāti** dhammacakkadesanāyaṃ (saṃ. ni. 5.1081; mahāva. 13 ādayo; paṭi. ma. 2.30). **"Aparimāṇā akkharā aparimāṇā padā"**ti avatvā **"aparimāṇā padā aparimāṇā akkharā"**ti uppaṭipāṭivacanehi yebhuyyena padasaṅgahitānīti dasseti. **Padā, akkharā, byañjanāti** ca liṅgavipallāsānīti daṭṭhabbāni. **Etasseva atthassāti** vattabbākārassa catusaccasaṅkhātassa atthasseva **saṅkāsānā pakāsānā** pakāsānākāro paññattākāroti ākāravantaākārasambandhe sāmivacanaṃ. **Saṅkāsānākāroti** ca saṅkāsānīyassa atthassa ākāro. Esa nayo sesesupi. **Itipīti** iti iminā pakārenapi, iminā pakārenapi **idaṃ** jātiādikāṃ dukkhaṃ ariyasaccanti veditābbā.

Ayanti kāmatañhādibhedā ayaṃ tañhā. **Dukkhasamudayoti** dukkhanibbattanassa hetubhāvato dukkhasamudayo. **Ayanti** sabbasaṅkhatato nissaṭṭā ayaṃ asaṅkhatā dhātu. **Dukkhanirodhoti** jātiādiṃpabhedassa dukkhassa anuppādananirodhapaccayattā dukkhanirodho. **Ayanti** sammādiṭṭhādiko

aṭṭhaṅgiko ariyo maggo. Dukkhanirodhabhūtaṃ nibbānaṃ ārammaṇakaraṇavasena gatattā, dukkhanirodhappattiyā paṭipadābhāvato ca **dukkhanirodhagāminī paṭipadā**. Sesam vuttanayameva.

“Tattha aparimāṇā”tiādīnā byañjanapadaatthapadāni vibhajitvā tesam aññamaññaṃ visayavisayabhāvena sambandhabhāvaṃ dassetuṃ **“tattha bhagavā akkharehi saṅkāsetī”**tiādi vuttaṃ. Atha vā bhagavā kiṃ sāmāññehi akkharādīhi saṅkāseti vā pakāseti vā, udāhu yathārahaṃ saṅkāseti pakāsetītiādivicāraṇāya sambhavato visayavisayibhāvena sambandhabhāvaṃ niyamevā dassetuṃ **“tattha bhagavā akkharehi saṅkāsetī”**tiādi vuttaṃ. Tattha “akkharehi saṅkāsetī”ti kasmā evaṃ vuttaṃ, nanu “dukkhasacca”ntiādisu padeneva dukkhasaccatthattādiko saṅkāsitabboti? Saccam, padāvayavassa pana akkharassa gahaṇamukheneva akkharasamudāyassapi padassa gahaṇam hoti, pade gahite ca dukkhasaccatthādikāvabodho hotveva, evaṃ sati padeneva sījhanato akkharo visum na gahetabboti? Na, dukkhasaccatthādikāvabodhassa visesupattibhāvato. **Du**-iti akkharena hi anekupaddavādhiṭṭhānabhāvena kucchitatho gahito, **kha**-iti akkharena dhuvasubhasukhattabhāvavirahena tucchatthoti evamādikāvabodhassa visesupatti bhavati. Tena vuttaṃ “padatthagahaṇassa visesādhānaṃ jāyatī”ti (netti. aṭṭha. 9). Padapariyosāne vākyapariyosānābhāvato akkharehi saṃkhiṭṭena dīpiyamāno attho padehi pakāsitovāti vuttaṃ **“padehi pakāsetī”**ti. Vākyapariyosāne pana saṅkāsito pakāsito attho vivarito vivaṇṇo katovāti vuttaṃ. **“Byañjanehi vivarati”**ti. Pakārehi ca vākyabhede kate so attho vibhatto nāmāti vuttaṃ **“ākārehi vibhajati”**ti. Vākyāvayavānaṃ padānaṃ paccekam nibbacaṇavibhāge kate so attho pākāṇo katovāti vuttaṃ **“nirutthi uttānikaroti”**ti. Katanibbacanehi vākyāvayavehi vitthārasena niravasesato desitehi veneyyasattānaṃ citte parisamantato tosaṇaṃ hoti, paññātejanañcāti āha **“niddesehi paññapeti”**ti.

“Bhagavā akkharehi saṅkāsetī”tiādīsu “bhagavā evā”ti vā “akkharehi evā”ti vā avadhāraṇe yojite “sāvako na saṅkāseti, padādīhi na saṅkāsetī”ti attho bhaveyya, sāvako ca saṅkāseti, padādīhi ca saṅkāseti. Kattha avadhāraṇaṃ yojetabbanti ce? “Bhagavā akkharehi saṅkāsetiyevā”ti avadhāraṇaṃ yojetabbaṃ. Evañhi sati sāvakena saṅkāsito vā padādīhi saṅkāsito vā attho saṅgahito hoti. Atthapadānaṃ akkharādīnāvisayatā siddhā hoti. Tena ekānusandhike sutte chaḷeva atthapadāni niddhāretabbāni, anekānusandhike sutte anusandhibhedena visum visum cha cha atthapadāni niddhāretabbāni.

“Chasu byañjanapadesu katamena byañjanapadena katamaṃ kiccaṃ sādhetī”ti pucchitabbattā “iminā idaṃ kiccaṃ, iminā idaṃ kiccaṃ sādhetī”ti niyamevā dassetuṃ **“tattha bhagavā akkharehi ca padehi ca ugghaṭeti”**tiādimāha. Tattha **tatthāti** akkharādīsu byañjanapadesu. **Ugghaṭeti**ti ugghaṇanakiccaṃ sādhetīti attho. Kiñcāpi desanāva ugghaṇanakiccaṃ sādheti, bhagavā pana desanājanakattā ugghaṇanakiccaṃ sādhetīti vuccati. Sesesupi evamattho daṭṭhabbo.

“Ugghaṇanakiccasādhikā desanāyeva kiṃ vipaṇcaṇavithāraṇakiccasādhikā desanājanakattā, udāhu visum visum kiccasādhikā aññā”ti pucchitabbabhāvato visum visum kiccasādhikā aññā desanāti niyamevā dassetuṃ **“tattha ugghaṇanā ādī”**tiādimāha. Atha vā “katamā ugghaṇanā, katamā vipaṇcaṇā, katamā vitthāraṇā”ti pucchitabbattā vuttaṃ **“tattha ugghaṇanā ādī”**tiādi. Tattha **tatthāti** ugghaṇanādikiccasādhikāsu desanāsu. **Ugghaṇanāti** ugghaṇanakiccasādhikā desanā ādidesanā hoti. **Vipaṇcaṇāti** vipaṇcaṇakiccasādhikā desanā majjhedesanā hoti. **Vitthāraṇāti** vitthāraṇakiccasādhikā desanā pariyosānadesanā hotīti attho daṭṭhabbo.

“Ugghaṭiyanto uddisiyamāno pariyattiatthabhūto dhammavinayo katamaṃ puggalaṃ vineti, vipaṇciyanto niddisiyamāno pariyattiatthabhūto dhammavinayo katamaṃ puggalaṃ vineti, vitthāriyanto paṭiniddisiyamāno pariyattiatthabhūto dhammavinayo katamaṃ puggalaṃ vineti”ti pucchitabbattā **“soyam dhammavinayo”**tiādimāha. **Aṭṭhakathāyaṃ** pana “evaṃ ‘akkharehi saṅkāsetī’tiādīnaṃ channaṃ byañjanapadānaṃ byāpāraṃ dassetvā idāni atthapadānaṃ byāpāraṃ dassetuṃ ‘soyam dhammavinayo’tiādi vutta”nti (netti. aṭṭha. 9) vuttaṃ.

Tattha **ugghaṭṭiyanto** uddisiyamāno uddesapariyattiatthabhūto so ayam **dhammavinayo** ugghaṭṭitaññupuggalaṃ vineti, **tena** ugghaṭṭitaññuno puggalassa vinayanena **naṃ** ugghaṭṭiyantaṃ uddisiyamānaṃ uddesapariyattiatthabhūtaṃ vinayaṃ “ādikalyāṇo”ti āhu. **Vipaṇciyanto** niddisiyamāno niddesapariyattiatthabhūto so ayam **dhammavinayo** vipaṇcitaññupuggalaṃ vineti, **tena** vipaṇcitaññupuggalassa vinayanena **naṃ** vipaṇciyantaṃ niddisiyamānaṃ niddesapariyattiatthabhūtaṃ vinayaṃ “majjhekalyāṇo”ti āhu. **Vitthāriyanto** paṭiniddisiyamāno paṭiniddesapariyattiatthabhūto so ayam **dhammavinayo** neyyaṃ puggalaṃ **vineti** vinayaṃ janeti, **tena** neyyassa puggalassa vinayanena **naṃ** vitthāriyantaṃ paṭiniddisiyamānaṃ paṭiniddesapariyattiatthabhūtaṃ vinayaṃ “pariyosānakalyāṇo”ti āhūti yojanathoti daṭṭhabbo.

Atha vā “akkharehi saṅkāseti”tiādinā channaṃ padānaṃ byāpāro dassito, evaṃ sati attho nibyāpāro siyā, attho ca nippariyāyato sabyāpāroyevāti codanaṃ manasi katvā āha “**soyaṃ dhammavinayo**”tiādi. Etena atthoyeva mukhyato veneyyattayassa vinayanakiccaṃ sādheti, atthavācako pana saddo thānūpacārato veneyyattayassa vinayanakiccaṃ sādhetīti dasseti. Padaparamassa pana saccappaṭivedhassa paṭiṭṭhānābhāvato so idha na vutto. Sekkhaḡgahaṇena vā kalyāṇaputhujjanaṃ viya neyyaggaḡaṇena padaparamassa puggalassāpi gahaṇaṃ daṭṭhabbaṃ. **Akkharehī**tiādisu karaṇatthe karaṇavacanaṃ, na hetvatthe. Akkharādīnaṃhi ugghaṭṭanaḡdīni payojaṇāniyeva hontī, na ugghaṭṭanaḡdīnaṃ akkharādīni payojaṇāni “annena vasatī”tiādisu viya na hetuattho gahetabbo. Tattha hi annena hetunā vasati, vasanena hetunā annaṃ laddhanti vasanakiriyāya phalaṃ vasanakiriyāya hetubhāvena gahitaṃ. “Ajjhesanena vasatī”tiādisupi eseva nayo. Tenāha “yadatthā ca kiriyā, so hetū”ti (netti. aṭṭha. 9). Tattha **yadatthā**ti so annādiko attho yassā vasanādikiriyāyāti yadatthā, vasanādikiriyā, so annādiko attho tassā vasanādikiriyāya hetūti attho veditabbo.

10. “Tattha aparimāṇā padā”tiādinā “dhammaṃ vo bhikkhave desessāmi”ti uddiṭṭhāya pāliyā dvādasapadasampattisaṅkhātaṃ tividhakalyāṇataṃ dassetvā idāni chaatthapadachabyañjanapadabhedena sampattisaṅkhātaṃ atthapadabyañjanapadakalyāṇataṃ dassento “**tattha chappadāni attho**”tiādimāha. Atha vā “dvādasapadāni sutta”nti vuttānurūpaṃ “tattha aparimāṇā”tiādinā “dhammaṃ vo bhikkhave desessāmi”ti uddiṭṭhāya pāliyā dvādasapadātaṃ dassetvā “ādikalyāṇaṃ majjhekalyāṇaṃ pariyosānakalyāṇa”nti vuttānurūpaṃ “tattha bhagavā akkharehi cā”tiādinā tassā pāliyā tividhakalyāṇatā dassitā, dassetvā idāni “sātthaṃ sabyañjanaṃ kevalaparipuṇṇaṃ parisuddha”nti vuttānurūpaṃ tassā pāliyā chaatthapadabyañjanapadasampannaṃ dassetuṃ “**tattha chappadāni attho**”tiādi vuttaṃ. Tattha **tatthā**ti tissaṃ desanāhāraṃvisayasāṅkhātāyaṃ pāliyaṃ chappadāni attho. Katamāni chappadāni? Saṅkāsanā, pakāsanā, vivaraṇā, vibhajaṇā, uttānīkammaṃ, paññatti imāni chappadāni. Attho yassa atthi tasmā **sātthaṃ**. **Tatthā**ti tissaṃ desanāhāraṃvisayasāṅkhātāyaṃ pāliyaṃ chappadāni byañjanaṃ. Katamāni chappadāni? Akkharaṃ, padaṃ, byañjanaṃ, ākāro, nirutti, niddeso imāni chappadāni. Byañjanaṃ yassa atthīti **sabyañjananti** yojanā kātābbā. **Tenā**ti tassā pāliyā tividhakalyāṇachaatthapadasampannachabyañjanapadasampannaṭṭhena, “dhammaṃ vo, bhikkhave... pe... suddha”nti bhagavā āhāti attho.

Kevalasaddassa sakalādiatthavācakatā adhippetatthaṃ niyamevā dassetuṃ “**kevalanti lokuttaraṃ na missaṃ lokiyehi dhammehī**”ti vuttaṃ. **Paripuṇṇanti** adhippetatthe ekopi attho ūno natthi, vācakasaddesupi anattako ekopi saddo adhiko natthīti paripuṇṇaṃ anūnaṃ anattirekaṃ. **Parisuddhanti** saddadosaṭṭhadosaḡdivirahato vā parisuddhaṃ, rāgādimalavirahato vā pariyodātānaṃ uttarimanussadhammavisesānaṃ upaṭṭhitatṭhānattā parisuddhaṃ pariyodātaṃ. Niggataṃ malaṃ etassa dhammassāti **nimmalaṃ**. Saddadosaḡdivirahato vā rāgādivirahato vā sabbamalehi apagataṃ pari samantato odātanti **pariyodātaṃ**. **Upaṭṭhitanti** upaṭṭhanti ettha sabbavisesāti upaṭṭhitaṃ yathā “padakkanta”nti. **Padakkantaṃ** padakkantaṭṭhānaṃ. Visisanti manussadhammehīti **visesā**, sabbe vivesā **sabbavisesā**, sabbato vā vivesāti **sabbavisesā**, uttarimanussadhammā. Tesāṃ sabbavisesānaṃ upaṭṭhitanti yojanā. **Idanti** sikkhattayasāṅgahaṃ sāsanaḡbrahmacariyaṃ. Tathāgatassa sammāsambuddhassa padanti **tathāgatapadaṃ**. **Padanti** ca paṭipattigamaṇena vā desanāgamaṇena vā

kilesaggahaṇaṃ. Ottharivā gamanaṭṭhānaṃ itipi **vuccati** pavuccati, tathāgatena gocarāsevanena vā bhāvanāsevanena vā **nisevitaṃ** bhajitaṃ itipi vuccati, tathāgatassa mahāvajiraññasabbaññutaññādanantehi **ārañjitaṃ** ārañjitaṭṭhānaṃ itipi vuccati, **ato** tathāgatapadādhāvena vattabbabhāvato **etaṃ** sāsanabrahmacariyaṃ itī paññāyati. **Brahmacariyanti** brahmuno sabbasattuttamassa bhagavato cariyaṃ, brahmaṃ vā sabbasetṭhaṃ cariyaṃ **brahmacariyaṃ**. **Paññāyatīti** yathāvuttehi pakārehi ñāyatīti attho veditabbo.

“Imassa sikkhattayassa saṅgahassa sāsanassa paripuṇṇabhāvaparissuddhabhāvasaṅkhātaṃ tathāgatapadabhāvaṃ! Tathāgatapadabhāvaṃ, tathāgatanisevitaṃbhāvaṃ, tathāgataārañjitaṃbhāvaṃ, tehi pakārehi ñāpitaṃbhāvaṃ kathaṃ mayaṃ nikkāṅkhā jānissāma”ti vattabbato **“tenāha bhagavā”**tiādi vuttaṃ, tabbhāvadīpakena bhagavatā vuttana vacanena tumhehi nikkāṅkhehi jānitaṃbhoti vuttaṃ hoti.

Yadi bhagavā akkharehi ca padehi ca ugghaṭeti, byañjanehi ca ākārehi ca vipaṇcayati, niruttīhi ca niddesehi ca vitthāreti, evaṃ sati ācariyena racitena desanāhārena payojanaṃ na bhavati, desanāhārena na vinā bhagavato desanāyameva atthasijjhanatoti codanaṃ manasi katvā **“kesaṃ ayaṃ dhammadeśanā”**ti pucchitvā **“yogīna”**nti āha. Tattha **yogīnanti** yujjanti catusaccakammaṭṭhānabhāvanāyanti **yogino**, tesāṃ yogīnaṃ. Tena mayā racitena desanāhārena saṃvaṇṇitā ayaṃ vuttappakāra bhagavato desanā ugghaṭanādikkiccaṃ sādhetīti desanāhāro yogīnaṃ sātthakoyevāti daṭṭhabbo. “Desanāhārassa assādādidesanāhārabhāvo kena amhehi jānitaṃbho saddahitaṃbho”ti vattabbattā **“tenāha āyasmā...pe... desanāhāro”**ti vuttaṃ. Tattha **tena** assādādidesanāhārabhāvena āyasmā mahākaccāno “assādādīnavatā...pe... desanāhāro”ti yaṃ vacanaṃ āha, tena vacanena tumhehi desanāhārassa yogīnaṃ assādādidesanāhārabhāvo jānitaṃbho saddahitaṃbhoti vuttaṃ hoti.

“Kiṃ pana ettāvata desanāhāro paripuṇṇo, añño niyutto natthi”ti pucchitabbattā **“niyutto desanāhāro”**ti vuttaṃ. Tattha yassaṃ desanāyaṃ assādādayo yena desanāhārena niddhāritā, tassaṃ desanāyaṃ so desanāhāro niddhāretvā yojitoti attho daṭṭhabboti.

Iti desanāhāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭṭhānūsārena gambhīrattho vitthārato vibhajitvā gahetabboti.

2. Vicayahāravibhaṅgavibhāvanā

11. Yena yena saṃvaṇṇanāvīsesabhūtena desanāhāravibhaṅgena assādādayo suttatthā ācariyena vibhattā, so saṃvaṇṇanāvīsesabhūto desanāhāravibhaṅgo paripuṇṇo, “katamo vicayo hāro”ti pucchitabbattā **“tattha katamo vicayo hāro”**tiādi vuttaṃ. Tattha **tatthāti** tesu niddiṭṭhesu soḷasasu desanāhārādīsu hāresu katamo saṃvaṇṇanāvīseso vicayo hāro vicayahāravibhaṅgo nāmāti pucchati. “Yaṃ pucchitañca vissajjitañca”tiādiniddesagāthāya idāni mayā vuccamāno “ayaṃ vicayo hāro kiṃ vicināti”tiādiko saṃvaṇṇanāvīseso vicayahāravibhaṅgo nāmāti yojanā.

“Ayaṃ vicayo hāro kiṃ vicināti”ti iminā yo vicayo vicinātabbo, taṃ vicayaṃ vicinātabbaṃ pucchati, tasmā vicinātabbaṃ visayaṃ viṣuṃ viṣuṃ niyametvā dassetuṃ **“padaṃ vicināti, pañhaṃ vicināti”**tiādi vuttaṃ. “Kiṃ vicayo padavicayo”tiādiṃ avatvā “kiṃ vicināti, padaṃ vicināti”tiādivacanena vicayasaddassa kattusādhanatthaṃ dasseti. Tattha **padaṃ vicināti**ti navavidhassa suttantassa sabbāṃ padaṃ yāva nigamanā nāmapadādijātisaddādiṭṭhilingādiākārantādipaṭhamavibhatyantādiekavacanādivasena vicināti. **Pañhaṃ vicināti**ti adīṭṭhajotanādisattādhīṭṭhānādisammutivīsayādiṭṭhāvīsayādivasena vicināti. **Vissajjanaṃ vicināti**ti ekaṃsabyākaraṇavissajjanādisāvasesabyākaraṇavissajjanādi sauttarabyākaraṇa vissajjanādi

lokiyabyākaraṇavissajjanādivasena vicināti. **Pubbāparam vicinatīti** pubbena अपaram saṃsanditvā vicināti. **Assādam vicinatīti** assādakataṇhādiassādetabbasukkhādivasena vicināti. **Ādīnavam vicinatīti** dukkhadukkHAVIPariṇāmadukkhasaṅkhārdukkhavasena vā anīṭṭhānubhavanādiādiāntavantaṭādisaṃkilesabhāgiyādivasena vā vicināti. **Nissaraṇam vicinatīti** maggavasena vā nibbānavasena vā maggassa vā āgamavasena, nibbānassa asaṅkhatadhātuādiṭṭhādivasena vā vicināti. **Phalam vicinatīti** dhammacaraṇassa duggatigamanābhāvena vā maccutaraṇādinā vā desanāya phalam, desanānusārena caraṇassa phalam vicināti. **Upāyam vicinatīti** aniccānupassanādivasena pavattananibbidāññādivasena vā saddhāsativasena vā visuddhiyā upāyam vicināti. **Āṇattim vicinatīti** pāpaparivajjanāṇattivasena vā lokassa suññatāpekkhanāṇattivasena vā vicināti. **Anugītim vicinatīti** vuttānugītivasena vā vuccamānānugītivasena vā anurūpaṃ gītim vicināti. **Sabbe nava suttante vicinatīti** suttageyyādike nava sutte āhaccavacanavasena vā anusandhivacanavasena vā nītatthavacanavasena vā neyyatthavacanavasena vā saṃkilesabhāgiyādivasena vā vicināti.

Kiñcāpi padavicayo paṭhamam vibhatto, suttassa pana anupadam vicinitabbatāya atibhāriyo, na sukaro padavicayoti taṃ aggahetvā pañhāvicayavissajjanavicaye tāva vibhajanto “**yathā kiṃ bhave**”tiādimāha. Tattha **yathā kiṃ bhaveti** yena pakārena so pañhāvicayo pavattetabbo, taṃ pakārajātam kīdisam bhavēyyāti attho daṭṭhabbo. Āyasmā ajito pārāyane bhagavantaṃ pañham yathā yena pakārena pucchati, tathā tena pakārena pañhāvicayo pavattetabboti attho. Tattha **āyasmāti** piyavacanam. **Ajīto** bāvarībrāhmaṇassa paricārakabhūtānam soḷasannaṃ aññataro ajito. **Pārāyaneti** pārāṃ nibbānaṃ ayati gacchati etenāti pārāyanaṃ, ajitasuttādisoḷasasuttasetam adhivacanam.

“Kenassu nivuto loko, (iccāyasmā ajito,)

Kenassu nappakāsati;

Kissābhilepanam brūsi, kiṃ su tassa mahabbhaya”nti. (su. ni. 1038; cūḷani. vatthugāthā 57, ajitamāṇavapucchānidessa 1) –

Gāthāya “**kena** dhammena **loko** ariyavajjo satto **nivuto** paṭicchādito, iti āyasmā ajito pucchati. **Kena** hetunā yathāvuttaloko nappakāsati, **assa** yathāvuttalokassa **kiṃ** abhilepanam iti tvam brūsi, **tassa** yathāvuttalokassa kiṃ mahabbhayanti tvam brūsīti pucchati”ti attho.

Iti iminā pabhedena cattāri **imāni** gāthāpādapadāni **pucchitāni** pucchāvasena vuttāni, pucchitathadīpakāni vā, padhānavasena pana so “**eko pañho**”ti mato, yadipi catunnam padānam pucchānavasena pavattattā catubbidhoti vattabbo, ñātum pana icchitassa ekasseva atthassa sambhavato “**eko pañho**”ti vuttam. “Kāraṇam vadehī”ti vattabbattā kāraṇamāha “**ekavattupariggahā**”ti. Idaṃ vuttam hoti – “yadipi nivāraṇāpakāsanābhilepanamahabbhayasaṅkhātā cattāro atthā pucchāyam gahitā, ekassa pana abhidheyyatthassa gahaṇato ‘eko pañho’ti padhānavasena gahitoti daṭṭhabbo”ti. “Ekavattupariggahaṇam katham amhehi saddahitabba”nti vattabbabhāvato “**evañhi āhā**”ti vuttam. **Evam** ekavattupariggahaṇeneva bhagavā **hi** yasmā āha, iti tasmā ekavattupariggahaṇam tumhehi saddahitabbanti vuttam hoti.

“**Kenassu nivuto loko**”ti iminā **lokādhiṭṭhānam** paṭicchādanam pucchati, na nānādhammādhiṭṭhānam. “**Kenassu nappakāsati**”ti iminā lokasseva **appakāsanam** pucchati, na nānāsabhāvadhammassa. “**Kissābhilepanam brūsi**”ti iminā lokasseva **abhilepanam** pucchati, na nānāsabhāvadhammassa. “**Kiṃ su tassa mahabbhaya**”nti iminā tasseva lokassa **mahabbhayam** pucchati, na nānāsabhāvadhammassa. Tasmā “kenassu nivuto loko”tiādiṭṭhāno ekādhiṭṭhānanānādhiṭṭhānesu ekādhiṭṭhāno, dhammādhiṭṭhānasattādhiṭṭhānesu sattādhiṭṭhāno, adiṭṭhājotanādīsu adiṭṭhājotanāpañhotiādinā yathāsambhavam vicinitabboti adhippāyo.

“Pañhassa yo loko ‘adhiṭṭhāno’ti gahito, so loko tividho”ti vattabbabhāvato “**loko tividho**”tiādi vuttam. Tattha tayo vidhā etassa lokassāti **tividho**. Kilissati rāgādivasena kāmāvacarasattoti **kilesa**,

kilesa ca so loko cāti **kilesaloko**, kāmāvacarasatto. So hi rāgādikilesabahulatāya kilesalokoti. Bhavati jhānābhīṇṇāhi buddhīhīti **bhavo**, bhavo ca so loko cāti **bhavaloko**, rūpāvacarasatto. So hi jhānādibuddhīhi bhavatīti. Indriyena samannāgatoti **indriyo**, indriyo ca so loko cāti **indriyaloko**, arūpāvacarasatto. So hi āneñjasamādhībahulatāya visuddhindriyo hotīti lokasamaññā pariyaṇṇadhammasena pavattā, tasmā ariyā na gahitāti.

“Kenassu nivuto loko”tiādigāthāya pucchāvicayo hāro ācariyena vibhatto, amhehi ca ñāto, “vissajjanāvicayo hāro kattha vissajjanāya vibhatto”ti pucchitabbattā “**tattha vissajjanā**”tiādi vuttaṃ. Tattha **tatthā**ti tassaṃ “kenassu nivuto loko”tiādi pucchāyaṃ –

“Avijjāya nivuto loko, (ajitāti bhagavā,) Vivicchā pamādā nappakāsati; Jappābhilepanaṃ brūmi, dukkhamassa mahabbhaya”nti. (su. ni. 1039; cūḷani. vatthugāthā 58, ajitamāṇavapucchānidessa) –

Ayaṃ gāthā vissajjanāti daṭṭhabbā. Tattha **avijjāya nivuto lokoti** kāḷapakkhacatuḍḍasī, ghanavanasaṇḍa, meghapaṭalacchādāna, aḍḍharattīnaṃ vasena caturaṅgasamannāgatena andhakārena rathaghaṭādi paṭicchādito viya dhammasabhāvapaṭicchādānalakkhaṇāya **avijjāya sattaloko nivuto** paṭicchādito. “**Ajitā**”ti ca ālapanāṃ katvā bhagavā āha. **Vivicchāti vicikicchāya** pamādahetu yathāvuttaloko **nappakāsati. Jappaṃ** taṇhaṃ yathāvuttalokassa “**abhilepana**”nti ahaṃ brūmīti bhagavā āha, **dukkhaṃ** jātiādivaṭṭadukkhaṃ **assa** yathāvuttalokassa “**mahabbhaya**”nti ahaṃ brūmīti bhagavā ajitaṃ āhāti attho.

“Imāya vissajjanāya kathaṃ vicineyyā”ti pucchitabbattā “**imāni cattāri padāni**”tiādi vuttaṃ. Tattha **imāni cattāri padāni**ti “kenassu nivuto loko”tiādi pucchāgāthāyaṃ vuttāni gāthāpadāni. **Imehi catūhi padehīti** “avijjāya nivuto loko”ti vissajjanāgāthāyaṃ vuttehi gāthāpadehi vissajjitāni. Kathaṃ? **Paṭhamā**ṃ padaṃ **paṭhamena** padena, **dutiyaṃ** padaṃ **dutiya**na padena, **tatiyaṃ** padaṃ **tatiya**na padena, **catutthā**ṃ padaṃ **catutthena** padena vissajjitaṃ.

“**Kenassu nivuto loko**”ti paṭhamapañhe “**avijjāya nivuto loko**”ti paṭhamā **vissajjanā** katā, na uppaṭipāṭiyā. Vijjāya paṭipakkhā avijjā, tasmā avijjāya ajānako loko bhavēyya. Kathaṃ nivuto saddahitabboti āha “**nīvaraṇehi nivuto loko**”ti. Yadi evaṃ “nīvaraṇena nivuto loko”ti vissajjanā kātabbāti codanaṃ manasi katvā vuttaṃ “**avijjānīvaraṇā hi sabbe sattā**”ti. “Sabbasattānaṃ avijjānīvaraṇabhāvo kena vacanena saddahitabbo”ti vattabbattā “**yathāha bhagavā**”tiādi vuttaṃ.

“Sabbasattānaṃ, bhikkhave, sabbapaṇānaṃ sabbabhūtānaṃ, pariyāyato ekameva nīvaraṇaṃ vadāmi, yadidaṃ avijjā. Avijjānīvaraṇā hi sabbe sattā. Sabbasova bhikkhave avijjāya nirodhā cāgā paṭinissaggā natthi sattānaṃ nīvaraṇanti vadāmi”ti yaṃ vacanaṃ **yathā** yena pakārena bhagavā āha, tathā tena pakārena vuttēna tena vacanena tumhehi sabbasattānaṃ avijjānīvaraṇabhāvo saddahitabboti.

“Avijjāya nivuto loko”ti padena “kenassu nivuto loko”ti paṭhamasseva padassa vissajjanā na siyā, “kenassu nappakāsati”ti dutiyapadassāpi vissajjanā siyāti codanaṃ manasi katvā “**tena cā**”tiādi vuttaṃ. Tattha **tena** “avijjāya nivuto loko”ti padena “kenassu nivuto loko”ti paṭhamassa padassa vissajjanā **yuttā** yuttatarā hoti, yuttatarattā “kenassu nivuto loko”ti pañhe “avijjāya nivuto loko”ti vissajjanāti mayā vattabbāyevāti adhippāyo.

“**Kenassu nappakāsati**”ti imasmim pañhe “**vivicchā pamādā nappakāsati**”ti ayaṃ **vissajjanā** kātabbā, vivicchāya pavattattā, pamādā **ca** loko nappakāsati attho. Avijjānīvaraṇāya nivuto loko nappakāsatiṭi vissajjanā kātabbā, “kathaṃ vivicchā pamādā loko nappakāsatiṭi vissajjanā katā”ti vattabbattā “**yo puggalo**”tiādi vuttaṃ. Tattha **yo** puthujjanabhūto **puggalo** avijjānīvaraṇehi nivuto, **so** puthujjanabhūto puggalo vivicchāya **vivicchati**. “Yāya vivicchāya vivicchati, sā vivicchā katamā

nāmā’ti pucchitabbattā “**vivicchā nāma vuccati vicikicchā**”ti vuttaṃ. “Tāya kasmā nappakāsati”ti vattabbattā “**so vicikicchanto**”tiādi vuttaṃ. Tāya vicikicchanto **so** puthujjanabhūto puggalo saddahitabbesu **nābhisaddahati**; saddahitabbesu na abhisaddahanto akusalānaṃ dhammānaṃ pahānāya, kusalānaṃ dhammānaṃ sacchikiriyāya ārabhitabbaṃ vīriyaṃ **nārabhati**; anārabhanto **so** puggalo **idha** loke pamādamanuyutto viharatīti, pamādena viharanto pamatto puggalo **sukke** dhamme na uppādiyati; anuppādayantassa **tassa** puggalassa **te** sukkā dhammā **anuppādiyamānā** hutvā **nappakāsanti** pakāsanavasena na pavattanti; tasmā “vivicchā pamādā loko nappakāsati”ti vissajjanā kātābbāti adhippāyo.

“Tādisassa sukkadhammānaṃ appakāsanabhāvo amhehi kena vacanena saddahitabbo”ti vattabbabhāvato “**yathāha bhagavā**”tiādi vuttaṃ. Tattha –

“Dūre santo pakāsanti, himavantova pabbato;
Asantettha na dissanti, rattiṃ khittā yathā sarā;
Te guṇehi pakāsanti, kittiyā ca yasena cā”ti. –

Yaṃ gāthāpāṭhaṃ bhagavā **yathā** yena appakāsanākārena āha, tathā tena appakāsanākārena vuttena tena gāthāpāṭhena tādisassa puggalassa sukkadhammānaṃ appakāsanabhāvo tumhehi saddahitabboyeva, tasmā “vivicchā pamādā loko nappakāsati”ti vissajjanā kātābbāvāti adhippāyo.

Gāthātho pana – himavanto pabbato dūre ṭhito dūre ṭhitānampi sacakkhukānaṃ puggalānaṃ pakāsati iva, evaṃ **santo** sappurisā dūre ṭhitānampi guṇavasena pavattāya kittiyā ca guṇavasena pavattehi yasaparibhogaparivārehi ca dūre ṭhitānaṃ paṇḍitānaṃ pakāsanti, rattikāle khittā sarā usū na dissanti yathā, **ettha** sattaloke vivicchāpamādānaṃ vasena viharanto asanto na dissanti. Ye santo pakāsanti, te santo guṇehi pakāsantīti dassetuṃ “**te guṇehi pakāsanti**”ti vuttaṃ. Guṇā nāma abbhantare jātā, “kathaṃ guṇehi pakāsanti”ti vattabbattā “**kittiyā ca yasena cā**”ti vuttaṃ. Guṇānubhāvena pavattāya kittiyā ca guṇānubhāvena pavattena yasena ca pakāsantā puggalā guṇehi pakāsantīti vattabbāvāti.

Yadi vivicchāpamādānaṃ vasena nappakāsati, evaṃ sati loko nivuto hoti, tasmā paṭhamassa padassāpi vissajjanā kātābbāti codanaṃ manasi katvā “**tena cā**”tiādi vuttaṃ. Tattha **tenāti** “vivicchā pamādā nappakāsati”ti padena “kenassu nappakāsati”ti dutiyassa padassa vissajjanā **yuttā** yuttatarāti attho. **Padenāti** ca padatthaṭṭhena vissajjanāti attho. **Padassāti** padatthassa pucchitabbassāti attho daṭṭhabbo. Esa nayo heṭṭhā, upari ca.

“Kissābhilepanaṃ brūsi”ti pañhe “jappābhilepanaṃ brūmī”ti vissajjanā tassā ajitena daṭṭhabbā. “Katamā jappā nāmā”ti pucchitabbattā “**jappā nāma vuccati taṇhā**”ti vuttaṃ. Sā taṇhā lokaṃ abhilimpatiṭṭi kathaṃ viññāyatīti yojanā. Tena vuttaṃ “**yathāha bhagavā**”tiādi. Tattha **yathā** yena taṇhāya abhilepanabhāvena –

“Ratto atthaṃ na jānāti, ratto dhammaṃ na passati;
Andhaṃ tamaṃ tadā hoti, yaṃ rāgo sahate nara”nti. –

Yaṃ gāthaṃ bhagavā āha, tathā tena abhilepanabhāvena vuttāya tāya gāthāya sā taṇhā lokaṃ abhilimpatiṭṭi viññāyatīti adhippāyo.

Gāthāyaṃ pana – rajjati sattoti **ratto**, rāgasamaṅgīsatto. Kāraṇaṃ paṭicca asati pavattati phalanti **atthaṃ**, phalaṃ. Kāraṇaṃ phalaṃ dhāreti, taṃ kāraṇaṃ **dhammaṃ** nāma. Andhakāraṃ **andhaṃ**. **Yanti** yamhi kāle. **Yanti** hi bhummatthe paccattavacanaṃ. Yamhi kāle rāgo **naraṃ** rāgasamaṅgiṃ **sahate** abhibhavati, tadā kāle **andhaṃ** andhakāraṃ tamaṃ hotīti yojanā. Rāgo naraṃ **yaṃ** yasmā sahate, tasmā andhaṃ tamaṃ tadā hotīti vā, rāgo yaṃ naraṃ sahate, tassa narassa andhaṃ tamaṃ tadā

hotīti vā, rāgo naraṃ **yaṃ saḥate** abhibhūyate yaṃ sahanaṃ abhibhavanaṃ nipphādeti, taṃ sahanaṃ abhibhavanaṃ **andhaṃ** andhakāraṃ tamaṃ hotīti vā yojanā.

“Yadi ratto atthādikaṃ na jānāti, evaṃ sati kathaṃ jappābhilepanaṃ bhavati”ti vattabbattā “**sāyaṃ taṇhā**”tiādi vuttaṃ. Tattha ārammaṇesu **āsattibahulassa** āsaṅgabahulassa taṇhāsamaṅgissa **puggalassa sā ayaṃ taṇhā evaṃ** bahuāsaṅgavasena **abhijappā** pariyuṭṭhānaṭṭhāyiniṃ hoti. **Iti karitvā** iminā kāraṇena **tattha** taṇhāya satta**loko** kenaci silesena **abhilitto** makkhito viya jappābhilepena abhilitto nāma bhavatīti yojanā. “Jappābhilepanaṃ appakāsanassapi kāraṇaṃ bhavati, tasmā ‘kenassu nappakāsati’ti dutiyapadatthassapi vissajjanā siyā”ti vattabbattā “**tena cā**”tiādi vuttaṃ.

“Tassa lokassa mahabbhayaṃ ki”nti imasmiṃ catutthapañhe “assa lokassa dukkhaṃ mahabbhayaṃ bhavē”ti ayaṃ vissajjanā tassā ajitena daṭṭhabbā. Bhāyati loko etasmāti **bhayaṃ**, mahantaṃ bhayaṃ **mahabbhayaṃ**. “Katividhaṃ dukkha”nti pucchitabbattā “**duvidhaṃ dukkha**”ntiādi vuttaṃ. Dve vidhā assa dukkhassāti **duvidhaṃ**. “Katamaṃ duvidhaṃ dukkha”nti pucchitabbattā “**kāyikaṇca cetasikaṇca**”ti vuttaṃ. “Katamaṃ kāyikaṃ, katamaṃ cetasika”nti pucchitabbattā “**yaṃ kāyikaṃ, idaṃ dukkhaṃ yaṃ cetasikaṃ, idaṃ domanassa**”nti vuttaṃ.

Rogādisatthādianiṭṭharūpaṃ satta**loka**ssa mahabbhayaṃ bhavēyya, “kathaṃ dukkhaṃ mahabbhayaṃ bhavēti saddahetabba”nti vattabbabhāvato “**sabbe sattā hī**”tiādi vuttaṃ. Tattha sabbe sattā yathāvuttassa **dukkhassa** ubbijjanti, dukkhena samasamaṃ aññaṃ bhayaṃ sattānaṃ natthi, dukkhato **uttaritarāṃ** vā pana bhayaṃ kuto atthi. **Hi** yasmā natthi, tasmā dukkhato aññaṃ bhayassa abhāvato “dukkhaṃ lokassa mahabbhaya”nti vacanaṃ saddahitabbanti adhippāyo.

“Sabbe sattā”tiādivacanena rogādisatthādianiṭṭharūpaṃ dukkhamūlamevāti dasseti. “Kāyikacetasikavasena duvidhaṃ dukkhaṃ dukkhavedanāyeva, **evaṃ** sati saṅkhāradukkhavipariṇāmadukkhānaṃ mahabbhayaabhāvo na āpajjeyyā”ti vattabbabhāvato “**tisso dukkhatā**”tiādi vuttaṃ.

“Tisso dukkhatā sabbesaṃ sattānaṃ sabbakālesu uppajjanti, kadāci kassaci na uppajjanti”ti pucchitabbattā “**tattha loko**”tiādi vuttaṃ. Tattha **tatthāti** tāsū tīsu dukkhatāsu. **Lokoti** bhogasampanno ceva appābādho ca satta**loko**. **Odhaso** odhiso **kadāci** karahaci attūpakkamamūlāya **dukkhadukkhatāya** muccati, kadāci parūpakkamamūlāya **dukkhadukkhatāya** muccati, tathā **odhaso** odhiso **kadāci** karahaci dīghāyuko loko **vipariṇāmadukkhatāya** muccati, “kena hetunā muccati”ti pucchitabbattā pucchaṃ ṭhapetvā hetuṃ dassetuṃ “**taṃ kissa hetū**”tiādi vuttaṃ. Satta**loke** appekacce appābādha honti, te bhogasampannattā ceva appābādhattā ca dukkhadukkhatāya muccanti, visesato rūpāvacarasattā muccanti. Appekacce dīghāyukāpi honti, te dīghāyukattā vipariṇāmadukkhatāya muccanti; visesato arūpāvacarasattā muccanti arūpāvacarasattānaṃ upekkhāsamaṃpattibahulattā.

Tesaṃ tāhi dukkhatāhi muccanaṃ anekantikaṃ hoti, tasmā tāhi anatikantattā anekantikaṃ muccanaṃ tumhehi vuttaṃ, amhehi ca ñātaṃ, “katamaṃ ekantikamuccana”nti pucchitabbattā “**saṅkhāradukkhatāya panā**”tiādi vuttaṃ. Tattha **saṅkhāradukkhatāyāti** dukkhavedanāpi saṅkhatattā saṅkhārapariyāpannā, tādīsāya saṅkhāradukkhatāyāti attho gahetabbo. **Lokoti** arahā. Upādīyati vipākakkhandhacatukkakaṭattārūpasāṅkhātaṃ khandhapañcakanti **upādi**, upādiyeva sesaṃ **upādīsesaṃ**, khandhapañcakaṃ, taṃ natthi etissā nibbānadhātuyāti **anupādīsesā**. **Anupādīsesāya nibbānadhātuyā** anupādīsesanibbānadhātu hutvā muccati, itthambhūtalakkhaṇe cāyaṃ karaṇaniddeso. **Nibbānadhātūti** ca khandhapañcakassa nibbāyanamattaṃ adhippetā, na asaṅkhatadhātu. **Tasmāti** saṅkhāradukkhatāya sakalalokabyāpakabhāvena sabbalokasaṅgāhakattā vuttappakārasaṅkhāradukkhatāya sabbalokassa dukkhaṃ hoti, **iti katvā** saṅkhāradukkhatāya sabbalokassa dukkhabhāvato “**dukkhamassa mahabbhaya**”nti bhagavatā vuttaṃ.

“Vedanāpaccayā taṇhā”ti (ma. ni. 3.126; saṃ. ni. 2.1, 3, 36; mahāva. 1; vibha. 225) vacanato

“dukkhamassa mahabbhaya”nti padena “kissābhilepanaṃ brūsī”ti tatiyapadassāpi vissajjanā siyāti āsaṅkabhāvato “**tena ca catutthassa padassa vissajjanā yuttā**”ti vuttaṃ. “Kena yathākkamaṃ pucchāvissajjanānaṃ yuttatarabhāvo jānitabbo”ti vattabbattā “**tenāha bhagavā**”tiādi vuttaṃ. Tena yathākkamaṃ pucchāvissajjanānaṃ yuttatarattā yuttatarajānanako bhagavā “avijjāya nivuto loko”tiādimāha, tasmā yuttatarabhāvo tumhehi jānitabboti.

Ettha ca lokassa nīvaraṇādīni ajānantena ca tithiyavādesu samayantaresu paricayena ca tesu samayantaresu ceva nīvaraṇādīsu ca saṃsayapakkhandaena ekaṃseneva sattādhiṭṭhānena pucchitabbattā, ekaṃseneva sattādhiṭṭhānena byākātābbattā ca sattādhiṭṭhānā pucchā katāti veditabbā. Sā cāyaṃ pucchā ajānantassa jānanatthāya, jātasamśayassa ca saṃsayavinodanattāya vissajjetabbassa nīvaraṇādivisayassa catubbidhattā catubbidhā. Nīvaraṇādīnaṃ pana visayānaṃ loko ca ādhārabhāvena gāthāyaṃ vuttoti “eko pañho dassito”ti ayamettha pucchāvicayo, vissajjanāvicayo pana “aditthajotanā vissajjanā, vimaticchedanā vissajjanā”tiādinā pucchāvicaye vuttanayānusārena veditabbo.

Ekādhāre pucchāvissajjane vicayo ācariyehi vibhatto, amhehi ca ñāto, “anekādhāre pucchāvissajjane yo vicayo vibhajanāraho, so vicayo kathaṃ amhehi viññāyati, amhākaṃ viññāpanatthāya tasmim vicayaṃ vibhajathā”ti vattabbabhāvato anekādhāraṃ pucchāṃ tāva nīharitvā dassetuṃ –

“Savanti sabbadhi sotā, (iccāyasmā ajito,)
Sotānaṃ kiṃ nivāraṇaṃ;
Sotānaṃ saṃvaraṃ brūhi, kena sotā pidhīyare”ti. (su. ni. 1040; cūḷani. vatthugāthā 59, ajitamānavapucchāniddeśa 3) –

Gāthamāha. Gāthāttho tāva daṭṭhabbo. **Savanti**ti sandanti, pavattanti attho. **Sabbadhīti** taṇhādīnaṃ ārammaṇabhūtesu sabbesu rūpādīsu āyatanesu. **Sotāti** taṇhābhijjhābyāpādādayo sotā. **Iccāyasmāti** iti evaṃ āyasmā ajito āha. **Sotānanti** taṇhābhijjhābyāpādādīnaṃ sotānaṃ. **Kiṃ nivāraṇanti** kiṃ katamaṃ dhammajātaṃ āvaraṇaṃ bhava, kā katamā dhammajāti rakkhā bhava. **Sotānaṃ saṃvaraṃ brūhīti** sotānaṃ taṇhābhijjhābyāpādādīnaṃ saṃvaraṇaṃ āvaraṇaṃ idaṃ dhammajātaṃ bhaveti sabbasattahitattaṃ amhākaṃ tvaṃ kathehi. **Kena sotā pidhīyareti** kena pahāyakadhammena taṇhābhijjhābyāpādādayo sotā paṇḍitehi pidhīyareti pucchātīti pucchitāni.

“Pucchāvasena kathitāya ‘savanti...pe... pidhīyare’ti imāya gāthāya kittakāni padāni pucchitāni, kittakā pañhā”ti pucchitabbattā “**imāni cattāri padāni pucchitāni, te dve pañhā**”ti vuttaṃ. “Pucchāvasena pavattāya imissā gāthāya yadi cattāri padāni siyuṃ, evaṃ santesu pañhāpi catubbidhā siyuṃ, kasmā ‘dve’ti vuttā”ti vattabbattā “**kasmā? Ime hi bahvādhivacanena pucchitā**”ti vuttaṃ. **Ime** etāya gāthāya gahitā atthā bahvādhivacanena pucchitā. Idaṃ vuttaṃ hoti – “savanti...pe... pidhīyareti bahūni vacanāni adhikicca pavattā saṃvarasaṅkhātā sati ceva pidahanahetubhūtā paññā cāti ime dve atthāva pucchitā, tasmā atthavasena dve pañhā vuttā vā”ti. “Pucchāya duvidhatthavisayatā kathaṃ vuttā”ti vattabbattā pucchāya duvidhatthavisayatāṃ vivarituṃ “**evaṃ samāpannessā**”tiādi vuttaṃ. Tattha **evaṃ samāpannessāti** imāhi duggatihetubhūtāhi ñātibyasanādisaṅkhātāhi āpadāhi vā, paṇavadhādīhi āpadāhi vā, samaṃ saha, sabbathā vā ayaṃ sattaloko āpanno ajjhotthaṭṭo, evaṃ ajjhotthaṭṭassa vā samāpannessa. **Evaṃ saṃkiliṭṭhassāti** ñātibyasanādayo vā paṇavadhādīni āgamma pavattehi dasahi kilesavatthūhi ca ayaṃ sattaloko saṃkiliṭṭho, evaṃ saṃkiliṭṭhassa ca lokassāti samāpannessa ajjhotthaṭṭassa lokassa vodānaṃ vuṭṭhānaṃ **kiṃ** katamaṃ dhammajātaṃ bhava. Iti **evañhi** saccaṃ ajitasutte āhāti vittharattho, pucchāya duvidhatthavisayatā ñātābbāti adhippāyo.

“Kiṃ nu sotā sabbassa lokassa sabbadhi savanti, udāhu, ekaccassevā”ti pucchitabbattā “**savanti sabbadhi sotāti, asamāhitassa savanti abhijjhābyāpādappamādabahulassā**”ti vuttaṃ. Tattha abhijjhābyāpādappamādabahulattā rūpādīsu nānārammaṇesu vikkhittacittasseva sotā **savanti** pavattanti, na samāhitassa abhijjhābyāpādappamādavirahitassāti adhippāyo daṭṭhabbo. “Katamā abhijjhā, katamo

byāpādo, katamo pamādo”ti vattabbattā “**tattha yā abhijjhā**”tiādi vuttaṃ. Tattha **tatthāti** tesu abhijjhābyāpādappamādesu. **Yā abhijjhā, ayaṃ lobho**, na abhijjhāyanamattaṃ. Lobho ca **akusalamūlaṃ**, na lubbhanamattaṃ. **Yo byāpādo, ayaṃ doso**, na byāpajjanamattaṃ. Doso ca **akusalamūlaṃ**, na dūsanamattaṃ. **Yo pamādo, ayaṃ moho**, na sativippavāsamattaṃ. Moho ca **akusalamūlaṃ**, na mūhanamattaṃ. **Evaṃ** iminā vuttappakārena abhijjhādīnaṃ akusalamūlattaṃ yassa abhijjhābyāpādappamādabahulassa **asamāhitassa** chasu rūpādīsu **āyatanesu** taṇhā savanti.

“Katividhā sā taṇhā”ti vattabbattā “**rūpataṇhā...pe... dhammataṇhā**”ti vuttaṃ. “Channaṃ rūpataṇhādīnaṃ chasu rūpādīyatanesu savanaṃ kena ca vacanena amhehi saddahitabba”nti vattabbattā “**yathāha bhagavā**”tiādi vuttaṃ. “Savatīti ca kho, bhikkhave...pe... paṭihaññāti”ti yaṃ vacanaṃ bhagavā **yathā** yena pakārena āha, tathā tena pakārena vuttanayena vacanena tumhehi saddahitabbanti adhippāyo. Ettha ca cakkhādīnaṃ rūpataṇhādīnaṃ channaṃ sotānaṃ dvārabhāvena pavattattā cakkhādayo nissitūpacāravasena sayamaṃ savanto viya bhagavatā vuttā. **Itīti** evaṃ vuttappakārena **sabbā** sabbasmā cakkhādīdvārato ca **savati** pavattati. **Sabbathā** sabbappakārena taṇhāyanamicchābhinivesanaunnamanādippakārena **savati** pavattatīti attho. “Kasmā sabbasmā cakkhādīdvārato ca savati pavattati, sabbappakārena taṇhāyanamicchābhinivesanaunnamanādippakārena savanabhāvo vijānitabbo”ti vattabbattā “**tenāhā**”tiādi vuttaṃ. Tattha **tenāti** asamāhitassa abhijjhābyāpādādīnaṃ cakkhādīdvārato ca taṇhāyanamicchābhinivesanaunnamanākārena taṇhādivasena pavattanato pavattajānanako bhagavā “**savanti sabbadhi sotā**”ti āha.

“Sotānaṃ ‘kiṃ nivāraṇa’nti iminā kiṃ pucchati? Sotānaṃ anusayappahānaṃ pucchati kiṃ? Udāhu vītikkamappahānaṃ pucchati”ti vattabbattā “**sotānaṃ kiṃ nivāraṇanti pariyaṭṭhānavighātaṃ pucchati**”ti vuttaṃ. “Idaṃ pariyaṭṭhānavighātaṃ vodānaṃ, udāhu vuṭṭhānaṃ ki”nti vattabbattā “**idaṃ vodāna**”nti vuttaṃ. “Sotānaṃ saṃvaram brūhi, ‘kena sotā pidhīyare’ti iminā kiṃ pucchati? Sotānaṃ pariyaṭṭhānaṃ pucchati kiṃ? Udāhu vītikkamaṇaṃ, samugghātaṃ vā pucchati ki”nti vattabbattā **sotānaṃ...pe... pidhīyareti anusayasamugghātaṃ pucchati**”ti vuttaṃ. “Idaṃ anusayasamugghātaṃ vodānaṃ kiṃ, udāhu vuṭṭhānaṃ ki”nti vattabbattā “**idaṃ vuṭṭhāna**”nti vuttaṃ.

“Savanti sabbadhi sotā”tiādi pucchāvicayo ācariyena vutto, amhehi ca ñāto; tāya pucchāya “katamo vissajjanavicayo”ti vattabbattā “**tattha vissajjanā**”tiādi vuttaṃ. **Tattha** pucchāyaṃ –

“Yāni sotāni lokasmiṃ, (ajitāti bhagavā),
Sati tesam nivāraṇaṃ;
Sotānaṃ saṃvaram brūmi, paññāyete pidhīyare”ti. (su. ni. 1041 cūḷani. vatthugāthā 60,
ajitamāṇavapucchānidessa 4) –

Gāthā vissajjanāti daṭṭhabbā. Tassaṃ gāthāyaṃ **ajita** lokasmiṃ yāni sotāni savanti, tesam sotānaṃ yaṃ nivāraṇaṃ, sā sati hoti; taṃ satim sotānaṃ saṃvaranti ahaṃ brūmi; **ete** sotā paññāya pidhīyareti yojanā kātabbā. Tattha **satīti** vipassanāpaññāya sampayuttā sati. **Paññāyāti** maggapaññāya. **Pidhīyareti** uppajjituṃ appadānavasena pidhīyanti pacchijjanti.

“Sati tesam nivāraṇaṃ sotānaṃ saṃvaram brūmi”ti bhagavā āha – “yāya kāyaci satiyā sotānaṃ saṃvaraṇakiccaṃ siddhaṃ kiṃ, viṣiṭṭhāya satiyā sotānaṃ saṃvaraṇakiccaṃ siddhaṃ kiṃ, katamāya satiyā sotānaṃ saṃvaraṇakiccaṃ siddha”nti pucchitabbattā “**kāyagatāya satiyā**”tiādi vuttaṃ. Tattha **kāyagatāya satiyāti** rūpakāye gataṃ kesādikaṃ aniccādito vipassitvā pavattāya vipassanāñānasampayuttāya satiyā. **Bhāvītāyāti** kāyagataṃ aniccato dukkhato anattato nibbindanato virajjanato nirodhanato paṭinissajjanato anupassanāvasena bhāvītāya. Evañhi aniccato anupassanto niccasaññaṃ pajahati; dukkhato anupassanto sukhasaññaṃ pajahati; anattato anupassanto attasaññaṃ pajahati; nibbindanto nandiṃ pajahati; virajjanto rāgaṃ pajahati; nirodhento samudayaṃ pajahati; paṭinissajjanto ādānaṃ pajahatīti. **Bahulikatāyāti** yathāvuttappakārena divasampi māsampi saṃvaccharampi sattasaṃvaccharampi bahulikatāya. **Cakkhunti** abhijjhādīpavattīdvārabhāvena ṭhitaṃ

cakkhum, niggahitāgamam daṭṭhabbam. **Nāviñchatī** cakkhudvāre pavattam abhijjhādisahitam cittasantānam, taṃsamaṅgīpuggalam vā nākaḍḍhati, manāpikesu rūpesu nāviñchatī yojanā. **Amanāpikesu** rūpesu **na paṭihaññati**. Kāyagatāya satiyā bhāvitāya bahulikatāya sotam nāviñchati. Manāpikesu saddesu...pe... amanāpikesu saddesu na paṭihaññatīti yojanā yathāsambhavato kātabbā.

“Kena kāraṇena nāviñchati paṭihaññatī”ti pucchati, indriyānam saṃvutanivāritattā nāviñchati na paṭihaññatīti vissajjati. “Kenārakkhena te saṃvutanivāritā”ti pucchati, satiārakkhena te saṃvutanivāritatīti vissajjati. “Satiārakkhena saṃvutanivāritabhāvo kena amhehi saddahitabbo”ti vattabbattā **tenāhā**”tiādi vuttam. Tattha **tenāti** tasmā satiārakkhena saṃvutanivāritattā saṃvutanivāritajānanako bhagavā “sati tesam nivāraṇa”nti yaṃ vacanam āha, tena vacanena tumhehi satiārakkhena saṃvutanivāritabhāvo saddahitabboti pubbhāge paññā satyānugāti kiccamevettha adhikanti daṭṭhabbam.

“Sati tesam nivāraṇa”nti vissajjanassa vitthārattho ācariyena vutto, amhehi ca ñāto, “paññāyete pidhīyare”ti vissajjanassa vitthārattho “katham amhehi jānitabbo”ti vattabbattā “paññāyete pidhīyare”ti vissajjanassa vitthārattham dassento “**paññāya anusayā pahīyanti**”tiādimāha. Tattha **paññāyati** maggapaññāya. **Anusayati** anurūpaṃ kāraṇam labhitvā uppajjanārahā kāmarāgānusayādayo. **Pahīyanti** samucchadavasena anusayesu paññāya pahīnesu pariyuṭṭhānāpi atthato pahīyanti. Kissa pahīnattā “pahīyanti”ti vuccati? Anusayassa pahīnattā pariyuṭṭhānā pahīyantīti vissajjati.

“Tam anusayappahānena pariyuṭṭhānappahānam kiṃ viya bhavatī”ti pucchitabbattā “**taṃ yathā khandhavantassā**”tiādi vuttam. Tattha khandhavantassa rukkhassa kudālādīnā bhūmiṃ khaṇitvā anavasesamūluddharāṇe kate tassa rukkhassa pupphaphalapallavaṅkurasantatipi kudālādīnā samucchinnāva bhavati yathā, evaṃ arahattamaggañāṇena anusayesu pahīnesu anusayānam pariyuṭṭhānasantati samucchinnā pidahitā paṭicchannā bhavati. Kena samucchinnā bhavati? **Paññāya** maggapaññāya samucchinnā bhavatīti atthayojanā daṭṭhabbā. “Paññāya paricchinnabhāvo katham saddahitabbo”ti vattabbattā “**tenā**”tiādi vuttam. “Paññāyete pidhīyare”ti vacanato anusayānam pariyuṭṭhānasantatiyā paññāya paricchinnabhāvo paṇḍitehi saddahitabboti adhippāyo.

Imesu pañhāvissajjanesu sotānam saṃvaram, pidhānañca ajānantena vā saṃsayitena vā saṃvarapidhānānam pucchitabbattā dhammādhīṭṭhānā pucchati pucchāvicayo ceva satipaññānam vissajjetabbattā dhammādhīṭṭhānam vissajjananti vissajjanavicayo ca veditabbo. Etesu ca “kenassu nivuto loko”tiādikō pañho nīvaraṇavicikicchāpamādaḥappānam vasena catubbidhopi lokādhīṭṭhānavasena eko pañhoti vutto, evaṃ sati “savanti sabbadhi sotā”tiādikopi pañho saṃvarapidhānānam vasena duvidhopi ekatthavasena gahetvā ekādhīṭṭhānavasena “eko pañho”ti vattabbo, sotānam bahubhāvato vā “bahupañho”ti vattabbo; tathā pana avatvā sote anāmasitvā saṃvarapidhānānam vasena “savanti sabbadhi sotā”tiādimhi “dve pañhā”ti vuttā. Tadanusārena “kenassu nivuto loko”tiādimhipi lokaṃ anāmasitvā nīvaraṇādīnam catunnam vasena “cattāro pañhā”tipi vattabbāti ayaṃ nayo dassitoti nayadassanam daṭṭhabbam.

Desanākāle vuttadhammassa anusandhimaggahetvā attanā racitanīyāmeneva pucchitapañhassa ceva pañham aṭṭhapetvā, paṭiññañca akatvā vissajjanassa ca vicayahāro ācariyena vibhatto, amhehi ca ñāto, “desanākāle vuttadhammassa anusandhim gahetvā pucchitapañhassa ceva taṃ pañham ṭhapetvā, paṭiññañca katvā vissajjanassa ca yo vicayo hāro vibhatto, so vicayahāro katham amhehi viññāyati, amhākaṃ viññāpanatthāya tasmim vicayaṃ vibhajethā”ti vattabbabhāvato tesu vicetabbākāram dassento “yāni sotāni”tiādigāthāya vicayākāradassanānantaram “**paññā ceva sati cā**”tiādimāha.

Tattha gāthāttho tāva viññātabbo – yāya paññāya anusayappahānena sotanirujjhanam vuttam, yāya satiyā ca pariyuṭṭhānappahānena sotanirujjhanam vuttam, sāyam **paññā ceva** sāyam **sati ca** tāhi paññāsatihi asesam sahuppannam **nāmañceva rūpañca, etaṃ** sabbam **kattha** nirujjhamāne asesam uparujjhatīti mārīsa **me** mayā puṭṭho tvam bhagavā mayham **etaṃ** nirujjhanam pabrūhi, iti āyasmā ajito

bhagavantam pucchati.

Ajita tvam **yametam** pañham pucchitam nirujjhanam maṃ apucchi, aham **te** tava **tam** nirujjhanam vadāmi. **Yattha** viññāṇanirodhe paññāsatisahitam **nāmañca rūpañca** viññāṇassa **nirodhena** saha ekato asesam uparujjhati, **ettha** viññāṇanirodhe **etam** sabbam viññāṇanirodhena ekato ekakkhaṇe apubbam acarimam **uparujjhati**, etam viññāṇanirodham tassa nāmarūpassa nirodho nātivattati, tam tam nāmarūpanirodham so so viññāṇanirodho nātivattatīti.

“Tasmim pañhe ayam ajito kiṃ pucchati? Uparujjhanameva pucchati, udāhu aññam pucchati”ti vattabbato **“ayam pañhe anusandhim pucchati”**tiādi vuttam. Tattha **ayanti** yo āyasmā ajito pañham apucchīti ayam ajito. **Pañheti** “paññā ceva sati cā”tiādi pañhe. Yadi anusandhim pucchati, evam sati “katthetam uparujjhati”ti pucchanaṃ ayuttam bhavyeyyāti? Na, anusandhiyati etena upanirujjhanenāti **anusandhīti** atthasambhavato. Tena vuttam **“anusandhim pucchanto kiṃ...pe... nibbānadhātu”**nti. Anusandhipucchanena anupādisesanibbānadhātuyāpi pucchanaṃ “katthetam uparujjhati”ti pucchanaṃ yuttameva.

“Yā anupādisesanibbānadhātu pucchitā, tam katamāya paṭipadāya adhigacchati”ti pucchitabbattā catusaccakammaṭṭhānabhāvanāsankhātam paṭipadam visayena saha dassetuṃ **“tīṇi saccāni”**tiādi vuttam. Tattha **saṅkhatānīti** kammātipaccayehi samecca sambhūya dukkhādīni karīyantīti saṅkhatāni. **Nirodhadhammānīti** nirujjhanam **nirodho**, dhammopi nirodhadhammova, tasmā nirodho dhammo sabhāvo yesam dukkhādīnanti **nirodhadhammānīti** atthova gahetabbo. Tāni tīṇi saccāni sarūpato dassetuṃ **“dukkham samudayo maggo”**ti vuttam. Tīṇi dukkhasamudayamaggasaccāni saṅkhatānīti vuttāni, “kiṃ nirodhasacca”nti pucchitabbattā **“nirodho asaṅkhato”**ti vuttam. Idha “nirodhadhammo”tipi vattabbam. Kammātipaccayehi asaṅkhatattā **asaṅkhato**. Uppādanirodhābhāvato **anirodhadhammo**. “Pahāyakapahātabbesu saccesu katamena pahāyakena katamo pahātabbo, katamāya bhūmiyā pahīno”ti pucchitabbattā **“tattha samudayo dvīsu bhūmīsū”**tiādi vuttam. Tattha **dvīsu bhūmīsūti** dassanabhāvanābhūmīsū. **Kāmacchandoti** kāmabhavarāgo. **Rūparāgoti** rūpabhavarāgo. **Arūparāgoti** arūpabhavarāgo. Saṃyojanabhedato dasa saṃyojanāni pahīyantīti yojanā.

12. Pahātabbasamyojanāni dassanabhūmibhāvanābhūmibhedena vibhattāni, amhehipi nātāni, “indriyabhedato katham vibhattāni”ti vattabbabhāvato **“tattha tīṇi”**tiādi vuttam. Atha vā “pahātabbasamyojanesu katamāni saṃyojanāni katamam indriyam attano pahāyakam katvā nirujjhanti”ti pucchitabbattā **“tattha tīṇi”**tiādi vuttam. **Adhiṭṭhāya** attano pahāyakam katvā **nirujjhanti** anuppādasena. “Anaññātāññassāmītindriyañca aññindriyañca saṃyojanānam nirujjhanahetu hotu, aññātāvindriyam kissa hetū”ti pucchitabbattā **“yam panā”**tiādi vuttam. Tattha **yam** yena aññātāvindriyena arahā “me jāti khīṇā”ti evam jānāti, **idaṃ** jānanahetu aññātāvindriyam **khaye** jātikkhaye arahattaphale pavattam **ñāṇam**. **Yam** yena aññātāvindriyena arahā “itthattāya aparam na bhavissāmī”ti pajānāti, **idaṃ** pajānanahetu aññātāvindriyam. **Anuppāde** pana anuppajjane arahattaphale pavattam **ñāṇam** aññātāvindriyam jānanahetu hotīti vuttam hoti. Indriyañāṇāni pahāyakāni katvā saṃyojanāni nirujjhanti, “tāni ñāṇāni kadā nirujjhanti”ti vattabbabhāvato **“tattha yañcā”**tiādi vuttam.

“Anaññātāññassāmītindriyam aññindriyam pāpuṇantassa nirujjhatu, aññindriyam arahattam pāpuṇantassa nirujjhatu, aññātāvindriyam kadā nirujjhati”ti pucchitabbattā **“tattha yañca khaye”**tiādi vuttam. Tattha **dveti** kiccabhedena dve, sabhāvato pana ekāva.

“Pajānanakiccampi ekameva, katham dve siyu”nti vattabbattā **“apicā”**tiādi vuttam. Ārammaṇapaññābhedenā dve nāmāni labbhantīti vuttam hoti. **Sāti** yā paññā pubbagāthāyam sotapidhānakiccena vuttā, sā paññā pakārehi jānanasabhāvena **paññā** nāma. **Yathādīṭṭham** ārammaṇam **apilāpanaṭṭhena** ogāhanaṭṭhena **sati** nāma.

13. “Paññā ceva sati cā”ti padassa attho ācariyena vibhatto, amhehi ca ñāto, “nāmarūpañcā”ti padassa attho katham amhehi ñātabbo”ti vattabbattā nāmarūpaṃ vibhajanto **“tattha ye pañcupādānakkhandhā”**tiādīmāha. Tattha **tatthā**ti kammavipākavaṭṭabhede bhavattaye. **Tatthā**ti pañcupādānakkhandhasaṅkhātānāmarūpasamudāye. **Pañcindriyānī**ti cakkhādipañcindriyāni. **Viññāṇasampayuttanti** sampayuttapaccayattaṃ sandhāya na vuttaṃ, pacurajanassa pana avibhajitvā gahaṇīyasabhāvamattaṃ sandhāya vuttaṃ. Vibhāgaṃ jānantehi pana “nāmaṃ viññāṇasampayuttaṃ, rūpaṃ pana na viññāṇasampayuttaṃ, sahaajāta”nti vibhajitvā gahetabbaṃ. **Tassā**ti paññāsatisahitassa nāmarūpassa. **Nirodhanti** anupādisesanibbānadhātuṃ.

Bhagavantaṃ pucchanto āyasmā ajito **“paññā ceva...pe... katthetaṃ uparujjhatī”**ti evaṃ pārāyane āha. “Paññā cevātiādīgāthāya yā anupādisesanibbānadhātu pucchitā, sā anupādisesanibbānadhātu katamena adhigamena pattabbā”ti pucchitabbattā caturiddhipādāmukhena ariyamaggādhigamamukhena pattabbā, caturiddhipādabhāvanāya ca cattāriñdriyāni mūlabhūtāni, tasmā mūlabhūtāni tāni cattāriñdriyāni niddhāretvā dassento **“tattha sati ca paññā cā”**tiādīmāha. Kusalākusaladhammagatiyo samanvesamānāya satiyā sījjhamānāya ekantena samādhī nippādetabbo, satiggahaṇena ca pariyuṭṭhānappahānaṃ gāthāyaṃ adhippettaṃ, pariyuṭṭhānappahānena ca samādhīkiccaṃ pākānti āha **“sati dve indriyāni satindriyañca samādhindriyañcā”**ti. Paññāya anusayasamuggahātaṃ catubbidhasammappadhānasaṅkhātēna vīriyena sījjhati, na vinā tenāti vuttaṃ **“paññā dve indriyāni paññindriyañca vīriyindriyañcā”**ti.

Imesu yathāvuttesu catūsu indriyesu pubbabhāge vā maggakkhaṇe vā sījjhantesu taṃsāmpayuttā yā saddahanā okappaṇā siddhā, idaṃ saddahanaokappanasāṅkhātaṃ dhammajātaṃ saddhindriyaṃ siddhaṃ, “tesu mūlabhūtesu indriyesu siddhesu katamena indriyena katamo dhammo siddho”ti pucchitabbattā iminā ayaṃ siddhoti dassento **“tattha yā saddhādhipateyyā”**tiādīmāha. Tattha **tatthā**ti satyādīsu. **Saddhādhipateyyā**ti paccayabhūtāya saddhāya siddho chando adhipatīti **saddhādhipati**, saddhādhipatinā pavattetabbā cittaṅgagatāti **saddhādhipateyyā**. **Chandasamādhī**ti chandaṃ jeṭṭhakaṃ katvā pavattito samādhī vā chandādhipatinā sampayutto pubbabhāge pavatto samādhī vā chandasamādhī, pahānaṃ pahānāhetu hotīti yojanā kātābbā. **Pahānanti** ca pajahati vikkhambhitakilese etena chandasamādhīnāti **pahānanti** karaṇasādhanaṃ gahetabbo. **Paṭisaṅkhānābalenā**ti parikammābalena. **Bhāvanābalenā**ti mahaggaṭabhāvanābalena.

“So chandasamādhī sayāṃ kevalova pahāna”nti vattabbattā **“tattha ye assāsapassāsā”**tiādī vuttaṃ. Tattha **tatthā**ti tasmīṃ samāhite citte cittuppāde. “Tasmīṃ samāhite cittuppāde assāsā”tiādīnā assāsādisīsenā assāsādijanakā vīriyasāṅkhārā gahitā, te ca yāva bhāvanāpāripūrī, tāva punappunaṃ saraṇato ca **sarā**, punappunaṃ saṅkappato ca **saṅkappā**. Yo pana “sarasaṅkappā, ime saṅkhārā cā”ti evaṃ vuttappakāro purimako chandasamādhī vā kilesavikkhambhanatāya ca tadaṅgappahānatāya ca pahānaṃ pahānāhetupadhānaṃ vā, “ime vuttappakārā saṅkhārādayo kiṃ bhāventī”ti pucchitabbattā **“ime ca saṅkhārā”**tiādī vuttaṃ. Tattha ime saṅkhārā ca tadubhayañca chandasamādhīppadhānasaṅkhārasamannāgataṃ vivekanissitaṃ virāganissitaṃ nirodhanissitaṃ vossaggaparīṇāmiṃ iddhipādaṃ bhāvetīti yojanā.

Chandasamādhīppadhānasaṅkhārasamannāgatanti chando eva adhipati **chandādhipati**, chandādhipatisamādhī. Tena vuttaṃ bhāgavatā – “chandaṃ ce, bhikkhave, bhikkhu adhipatiṃ karitvā labhati samādhī”nti (vibha. 432). Chandaṃhetuko vā samādhī, chandādiko vā samādhī **chandasamādhī**, chandādhipatissa paccayuppanno samādhīti vuttaṃ hoti. Padhānabhūtā saṅkhārā **padhānasaṅkhārā**, padhānasaddena saṅkhatasaṅkhārādayo nivattāpitā, chandasamādhī ca padhānasaṅkhārā cāti **chandasamādhīppadhānasaṅkhārā**, tehi samannāgato **chanda...pe... samannāgato**, taṃ...pe... gataṃ. Ijjhati samījjhati nippajjati **iddhi**, koṭṭhāso, iddhi eva pādo koṭṭhāsoti **iddhipādo**, iddhipādacattuttho. Ijjhanti vā tāya sattā iddhā vuddhā ukkaṃsagatā hontīti **iddhi**, pajjati etenāti **pādo**, iddhiyā pādoti **iddhipādo**. Iddhipādoti sāmāññatthavasena vuttopi “chandasamādhīppadhānasaṅkhārasamannāgata”nti vuttattā chandiddhipādova gahetabbo, taṃ

iddhipādaṃ taṃ chandiddhipādaṃ bhāveti vaḍḍhetīti attho.

Vivekanissitaṃ virāganissitaṃ vipassanākkhaṇe kiccato tadaṅgavivekanissitaṃ, ajjhāsayato nissaraṇavivekanissitaṃ, maggakkhaṇe pana kiccato samucchedavivekanissitaṃ, ārammaṇato nissaraṇavivekanissitaṃ. **Virāganissitaṃ** vipassanākkhaṇe kiccato tadaṅgavirāganissitaṃ, ajjhāsayato nissaraṇavivekanissitaṃ, maggakkhaṇe pana kiccato samucchedavirāganissitaṃ, ārammaṇato nissaraṇavirāganissitaṃ. **Nirodhanissitaṃ** vipassanākkhaṇe kiccato tadaṅganirodhanissitaṃ, ajjhāsayato nissaraṇanirodhanissitaṃ, maggakkhaṇe kiccato samucchedanirodhanissitaṃ, ārammaṇato nissaraṇanirodhanissitaṃ. **Vossaggapariṇāmiṃ** ettha pariccāgavossaggapakhandanavossaggavasena vossaggo duvidho. Tatthapi vipassanākkhaṇe tadaṅgavasena pariccāgavossaggo, nibbānaninnabhāvena pakkhandanavossaggo, maggakkhaṇe samucchedavasena pariccāgavossaggo, ārammaṇakaraṇena nibbānapakkhandanavossaggoti vibhajitvā gahetabbo. Yathāvuttavossaggatthaṃ pariṇamati, pariṇataṃ vā paripacati paripacanaṃ karotīti **vossaggapariṇāmiṃ**, taṃ vossaggapariṇāmiṃ.

Chandiddhipādabhāvanākāro ācariyena vutto, amhehi ca ñāto, “kathaṃ vīriyiddhipādabhāvanākāro amhehi vijānitabbo”ti vattabbabhāvato “**tattha yā vīriyādhipateyyā**”tiādi vuttaṃ. Tassattho heṭṭhā vuttanayānusārenea viññeyyo. Saṃkhittavasena pana ṭhapitaṃ pāṭhaṃ vitthārato ṭhapessāmi. Kathaṃ?

“Tattha yā vīriyādhipateyyā cittekaggatā, ayaṃ vīriyasamādhī. Samāhite citte kilesānaṃ vikkhambhanatāya paṭisaṅkhānabalena vā bhāvanābalena vā, idaṃ pahānaṃ. Tattha ye assāsapassāsā vitakkavicārā saññāvedayitā sarasaṅkappā, ime saṅkhārā. Iti purimako ca vīriyasamādhī, kilesavikkhambhanatāya ca pahānaṃ ime ca saṅkhārā, tadubhayaṃ vīriyasamādhippadhānasāṅkhārasamannāgataṃ iddhipādaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ.

“Tattha yā cittādhipateyyā cittekaggatā, ayaṃ cittasamādhī. Samāhite citte kilesānaṃ vikkhambhanatāya paṭisaṅkhānabalena vā bhāvanābalena vā, idaṃ pahānaṃ. Tattha ye assāsapassāsā vitakkavicārā saññāvedayitā sarasaṅkappā, ime saṅkhārā. Iti purimako ca cittasamādhī, kilesavikkhambhanatāya ca pahānaṃ ime ca saṅkhārā, tadubhayaṃ cittasamādhippadhānasāṅkhārasamannāgataṃ iddhipādaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ.

“Tattha yā vīmaṃsādhipateyyā cittekaggatā, ayaṃ vīmaṃsāsamādhī, samāhite citte kilesānaṃ vikkhambhanatāya paṭisaṅkhānabalena vā bhāvanābalena vā, idaṃ pahānaṃ. Tattha ye assāsapassāsā vitakkavicārā saññāvedayitā sarasaṅkappā, ime saṅkhārā. Iti purimako ca vīmaṃsāsamādhī kilesavikkhambhanatāya ca pahānaṃ ime ca saṅkhārā, tadubhayaṃ vīmaṃsāsamādhippadhānasāṅkhārasamannāgataṃ iddhipādaṃ bhāveti vivekanissitaṃ virāganissitaṃ nirodhanissitaṃ vossaggapariṇāmiṃ”nti.

Ayaṃ pana viśeso – **vīriyasamādhī**ti vīriyaṃ jeṭṭhakaṃ katvā pavattito samādhī vā vīriyādhipatinā sampayutto pubbabhāge pavatto samādhī vā vīriyasamādhī. **Cittasamādhī**ti cittaṃ jeṭṭhakaṃ katvā pavattito samādhī vā cittādhipatinā sampayutto pubbabhāge pavatto samādhī vā cittasamādhī. **Vīmaṃsāsamādhī**ti vīmaṃsaṃ jeṭṭhakaṃ katvā pavattito samādhī vā vīmaṃsādhipatinā sampayutto pubbabhāge pavatto samādhī vā vīmaṃsāsamādhīti.

Sattibalānurūpenettha saṅkhepavaṇṇanā katā, gambhīrañāṇehi pana aṭṭhakathāṭīkānurūpena vitthārato vā gambhīrato vā vibhajitvā gahetabbā.

14. “Chandasamādhī vīriyasamādhī cittasamādhī vīmaṃsāsamādhī”ti vutto, “evaṃ sati vīmaṃsāsamādhīyeva ñāṇamūlako ñāṇapubbaṅgamo ñāṇānuparivatti bhaveyya, aññe tayo samādhayo

aññānamūlakā aññānapubbaṅgamā aññānapavattiyo bhaveyyu’’nti vattabbattā sabbe samādhayo ñānamūlakādayoyevāti dassetuṃ “**sabbo samādhi ñānamūlako**’’tiādi vuttaṃ. Tatha **sabbo samādhīti** chandasamādhi, vīriyasamādhi, cittasamādhi, vīmaṃsāsamādhīti catubbidho samādhi. **Ñānamūlakoti** ekāvajjanavīthinānavajjanavīthīsu pavattaṃ upacāraññānamūlako. **Ñānapubbaṅgamoti** adhigamaññānam pubbaṅgamam assāti ñānapubbaṅgamo. **Ñāṇānuparivattīti** paccavekkhaṇaññānam anuparivatti assāti ñāṇānuparivatti. Atha vā nānāvajjanūpacāraññānam vā paṭisandhiññānam vā mūlam assāti **ñānamūlako**, upacāraññānam pubbaṅgamam assāti **ñānapubbaṅgamo**, appanāññānam anuparivatti assāti **ñāṇānuparivatti**. Sabbaṃ vā upacāraññānam mūlam assāti **ñānamūlako**. Appanāññānam pubbaṅgamam assāti **ñānapubbaṅgamo**. Abhiññāññānam anuparivatti assāti **ñāṇānuparivatti**, anuparivattanaṃ vā **anuparivatti**, ñāṇassa anuparivatti **ñāṇānuparivatti**, ñāṇānuparivatti assāti **ñāṇānuparivatti**. Ñāṇam pana pubbe vuttappakārameva.

Yathā pure tathā pacchāti yathā chandasamādhiādicatubbidhasamādhissa pubbenivāsānussatiñāṇānuparivattibhāvena pure atītāsu jātīsu asaṅkhyeyyesupi saṃvaṭṭavivaṭṭesu attano khandhapaṭibaddhassa, paresaṃ khandhapaṭibaddhassa ca suṭṭhu paṭivijjhanameva, na duppaṭivijjhanam tathā tathāvuttasamādhissa anāgatamaññāṇānuparivattibhāvena pacchā anāgatāsu jātīsu asaṅkhyeyyesupi saṃvaṭṭavivaṭṭesu attano khandhapaṭibaddhassa, paresaṃ khandhapaṭibaddhassa ca suṭṭhu paṭivijjhanameva, na duppaṭivijjhananti attho daṭṭhabbo. **Yathā pacchā tathā pureti** yathā yathāvuttasamādhissa cetopariyaññāṇānuparivattibhāvena anāgatesu sattasuyeva divasesu parasattānaṃyeva cittassa suṭṭhu paṭivijjhanameva, na duppaṭivijjhanam, tathā tathāvuttasamādhissa pure atītesu sattasuyeva divasesu parasattānaṃyeva cittassa suṭṭhu paṭivijjhanameva, na duppaṭivijjhananti attho.

Yathā divā tathā rattinti yathā cakkhumantānam sattānam divasabhāge sūriyālokena andhakārassa viddhamsitattā āpāthagataṃ cakkhuviññeyyam rūpaṃ manoviññānenapi suviññeyyam, tathā rattibhāge caturaṅgasamannāgatepi andhakāre vattamāne yathāvuttasamādhissa dibbacakkhuññāṇānuparivattibhāvena rūpāyanassa suṭṭhu paṭivijjhanameva, na duppaṭivijjhanam. **Yathā rattim tathā divāti** yathā rattibhāge caturaṅgasamannāgatepi andhakāre yathāvuttasamādhissa dibbacakkhuññāṇānuparivattibhāvena rūpāyanassa suṭṭhu paṭivijjhanameva, na duppaṭivijjhanam, tathā divasabhāge sukhumassa rūpāyanassa vā kenaci pākārādīnā tirohitassa rūpāyanassa vā atidūrattāhāne pavattassa rūpāyanassa vā yathāvuttasamādhissa dibbacakkhuññāṇānuparivattibhāvena suṭṭhu paṭivijjhanameva, na duppaṭivijjhananti attho daṭṭhabbo.

Yathā yathāvuttasamādhissa divasabhāge dibbasotaññāṇānuparivattibhāvena sukhumassa saddāyanassa vā kenaci pākārādīnā tirohitassa saddāyanassa vā atidūrattāhāne pavattassa saddāyanassa vā suṭṭhu paṭivijjhanameva, na duppaṭivijjhanam, tathā rattibhāgepi yathāvuttasamādhissa dibbasotaññāṇānuparivattibhāvena sukhumassa saddāyanassa vā kenaci pākārādīnā tirohitassa saddāyanassa vā atidūrattāhāne pavattassa saddāyanassa vā suṭṭhu paṭivijjhanameva, na duppaṭivijjhananti ayam nayopi netabbo. Tena vuttaṃ **aṭṭhakathāyam** –

“**Yathā pureti** yathā samādhissa pubbenivāsānussatiñāṇānuparivattibhāvenā’’tiādiṃ vatvā “yathā ca rūpāyatane vuttaṃ, tathā samādhissa dibbasotaññāṇānuparivattitāya saddāyatane ca netabba’’nti (netti. aṭṭha. 14).

“Ñānamūlakādisamādhinā pubbenivāsānussatiñāṇānuparivattibhāvādisahitena kiṃ bhāveti’’ti pucchitabbattā “**īti vivaṭṭenā**’’tiādi vuttaṃ. Tatha **īti** evaṃ vuttappakārena. **Apariyonaddhenāti** nīvaraṇādivigamanena. **Sappabhāsam cittanti** iddhipādasampayuttaṃ maggacittaṃ bhāveti. Iddhipādasampayutte maggacitte uppajjamāne hi maggacittasahabhūni kusalāni saddhindriyavīriyindriyasatindriyasamādhindriyapaññindriyabhūtāni **pañcindriyāni uppajjanti**. Maggacitte nirujjhamāne anuppajjanabhāvena **nirujjhanti** ekacittakkaṇikattā. Evaṃ maggaviññāṇassa nirodhā paññā ca sati ca nirujjhatīti yojanā.

“Kassa viññāṇassa nirodhā nāmarūpaṃ nirujjhatī”ti vattabbatā “**nāmarūpañcā**”tiādi vuttaṃ, paṭisandhiviññāṇassa nirodhā nāmarūpañca nirujjhatīti vuttaṃ hoti. Atha vā “viññāṇassa nirodhā paññā ca sati cāti vuttāni pañcindriyāni evaṃ nirujjhatī”ti vattabbatā nāmarūpañca nirujjhati, nirujjhamānaṃ pana nāmarūpaṃ paṭisandhiviññāṇassa nirodhā nirujjhatīti dassetuṃ “**nāmarūpañcā**”tiādi vuttaṃ. Tattha **nāmarūpañcā**ti maggena taṇhāvijjādike anupacchinne uppajjanārahaṃ vedanādikkhandhattayaṃ, bhūtopādārūpañca. **Viññāṇahetukanti** uppajjanārahaṃ paṭisandhiviññāṇaṃ hetu assa nāmarūpassāti viññāṇahetukaṃ. **Viññāṇapaccayā nibbattanti** viññāṇena paccayena nibbattaṃ. **Tassāti** uppajjanārahassa paṭisandhiviññāṇassa. **Hetūti** taṇhāvijjādiko kilesa. **Viññāṇanti** uppajjanārahaṃ paṭisandhiviññāṇaṃ. **Anāhārenti** appaccayaṃ. **Anabhinanditanti** kāmataṇhādīhi anabhinanditabbaṃ. **Appaṭisandhikanti** punabbhavābhisandahanarahitaṃ. Nti tādisaṃ viññāṇaṃ. **Ahetūti** natthi hetusaṅkhātaṃ paṭisandhiviññāṇaṃ imassa nāmarūpassāti ahetu. **Appaccayanti** sahāyavirahena natthi paccayā saṅkhārā imassāti appaccayaṃ. Evaṃ paṭisandhiviññāṇassa nirodhā nāmarūpañca nirujjhatīti.

“Paññāsatināṇeva nāmarūpassa ca vuttappakārena nirujjhanabhāvo kathaṃ amhehi saddahitabbo”ti vattabbatā “**tenāha bhagavā**”tiādi vuttaṃ. Vattabbakārena paññāsatināṇeva nāmarūpassa ca nirujjhanabhāvajanānako bhagavā yathānirujjhanabhāvādīpaṃ “**yametaṃ...pe... etthetaṃ uparujjhatī**”ti gāthāvacanaṃ āha. Tena gāthāvacanena tumhehi mayā vutto nirujjhanabhāvo saddahitaboyevāti. Etthāpi paññāsatināmarūpānaṃ nirujjhanāṃ ajānantena tattha vā saṃsayantena ajitena pucchitabbatā “adiṭṭhajotāna pucchāti vā diṭṭhasaṃsandanā pucchāti vā paññādīnaṃ anekathattā dhammato vā anekādhiṭṭhānā pucchāti vā dhammādhiṭṭhānā pucchā”ti vā iccevamādipucchāvicayo niddhāretabbo. “Sarūpadassanavissajjananti vā anekādhiṭṭhānavissajjananti vā dhammādhiṭṭhānavissajjana”nti vā iccevamādīvissajjanavicayo niddhāretabbo.

Evaṃ sattādhiṭṭhānādipucchāvissajjanāni ceva dhammādhiṭṭhānādipucchāvissajjanāni ca visuṃ visuṃ dassetvā pucchāvicayo ceva vissajjanavicayo ca ācariyena vibhatto, amhehi ca ñāto, “sattādhiṭṭhānadhammādhiṭṭhānesu ekato dassitesu pucchāvissajjanesu kathaṃ pucchāvicayo ceva vissajjanavicayo ca amhehi viññātabbo”ti pucchitabbatā sattādhiṭṭhānadhammādhiṭṭhānaṃ pucchāṃ nīharitvā tattha vicayaṃ vibhajanto “**ye ca saṅkhatadhammāse**”tiādimāha. **Aṭṭhakathāyaṃ** pana –

“Evaṃ anusandhipucchampi dassetvā heṭṭhā sattādhiṭṭhānā, dhammādhiṭṭhānā ca pucchā visuṃ visuṃ dassitāti idāni tā saha dassetuṃ “ye ca saṅkhatadhammāse”tiādi āradha”nti (netti. aṭṭha. 14) –

Vuttaṃ. Tassāyaṃ attho – idha sāsane **ye** arahanto saṅkhatadhammā honti, **puthū** bahūyeva satta janā **sekkhā** sīlādisikkhamānā honti, **tesaṃ** arahantāvaṇṇeva sekkhānañca iriyaṃ paṭipattim meṃ mahā puṭṭho nīpako tvaṃ bhagavā pabrūhi mārisa iti āyasmā ajito pucchanto āhāti.

15. Tassaṃ gāthāyaṃ “kittakāni pucchitāni”ti vattabbatā “**imāni**”tiādi vuttaṃ. Padatthānurūpaṃ pucchitabbatā “**imāni tīpi padāni pucchitāni**”ti vuttaṃ. “Ye ca ...pe... mārisā”ti gāthāyaṃ ye paññā pucchitā, te paññā tayo honti, “kissa kena kāraṇena tayo hontī”ti pucchitabbatā “**kissa...pe... yogenā**”ti vuttaṃ. Sekkhā ariyā ca asekkhā ariyā ca vipassanāpubbaṅgamaṃ pahānañcāti **sekhāsekhavipassanāpubbaṅgamappahānāni**, tesaṃ yogoti **sekhā...pe... yogo**, tena sekhā...pe... yogena. **Evaṃ** pucchāvidhinā **hi** yasmā “ye ca saṅkhatadhammāse...pe... mārisā”ti gāthamāha, tasmā tayo paññā hontīti daṭṭhabbā.

“Ye ca saṅkhatadhammāse”ti iminā asekkhānaṃ arahattaṃ pucchati, “ye ca sekkhā puthū idhā”ti iminā sekkhāsekkhānaṃ sekkhasikkhānaṃ pucchati, “tesaṃ me nīpako iriyaṃ, puṭṭho pabrūhi mārisā”ti iminā sekkhāsekkhānaṃ vipassanā pubbabhāge tadaṅgappahānaṃ pucchati. “Adiṭṭhajotāna pucchāti vā diṭṭhasaṃsandanā pucchāti vā sattādhiṭṭhānā pucchāti vā anekādhiṭṭhānā pucchā”ti vā iccevamādipucchāvicayo niddhāretabbo.

Sattadhammādhīṭṭhānaṃ puccaṃ nīharitvā puccāvicayo ācariyena vibhatto, amhehi ca ñāto, “tassaṃ puccāyaṃ katamā vissajjanāgāthā”ti puccitabbattā **“tattha vissajjanā”**tiādi āraddhaṃ. **Tatthāti** tassaṃ gāthāyaṃ. “Kāmesu...pe... paribbaje”ti **vissajjanāgāthā** bhagavatā vuttā. **Kāmesūti** kāmīyantīti **kāmā**, tesu kāmesu. Vatthukāmesu kilesakāmena paṇḍitehi nābhigijjheyya. **Manasā nāvīlosiyāti** āvilabhāvakare byāpādavittakkādayo ceva kāyaduccarītādayo ca dhamme pajahanto paṇḍito manasā anāvīlo suppasanno bhaveyya. **Kusalo sabbadhammānanti** sabbadhammānaṃ aniccatādinā paritullitattā aniccatādīsu pañcasu khandhesu kusalo cheko. **Satoti** kesādīsu saratīti sato. **Bhikkhūti** saṅkhatadhamme bhayādito ikkhatīti bhikkhu. **Paribbajeti** tadanāvikkhambhanasamucchedappahānabhāvena kilesakāmatthukāme pari samantato vajjeyya.

Pucchāgāthāyaṃ “nīpako”ti padena pasamsitena bhagavatā vissajjanāgāthā vuttā, tassa bhagavato yena anāvaraṇañāṇena ukkaṃsagatena pakkabhāvo dassito, taṃ anāvaraṇañāṇaṃ tāva kāyakammādibhedehi vibhajitvā dassento **“bhagavato sabbam kāyakamma”**ntiādimāha. Tattha anāvaraṇañāṇena jānitvā kataṃ sabbam kāyakammaṃ ñāṇapubbaṅgamaṃ ñāṇanuparivatti. Esa nayo sesesupi. **Atīte amseti** atītabhave sapaṅkhandhādike koṭṭhāse aññāṇena appaṭihatam bhagavato ñāṇadassanaṃ. **Anāgate amseti** anāgatabhave sapaṅkhandhādike koṭṭhāse. **Paccuppanne amseti** paccuppanne bhava sapaṅkhandhādike koṭṭhāse.

“Ñāṇadassanassa katarasmim paṭighāto”ti puccitabbattā puccaṃ ṭhapetvā paṭighātavisaṃyamaṃ dassetuṃ **“ko cā”**tiādi vuttam. Atha vā “paccuppannabhava sapaṅkhandhādike koṭṭhāse aññesampi ñāṇadassanaṃ bhaveyya, tadanūsārena atītanāgatakoṭṭhāsesupi katarasmim aññesaṃ ñāṇadassanassa paṭighāto bhaveyyā”ti puccitabbattā puccaṃ ṭhapetvā paṭighātavisaṃyamaṃ niyamevā dassetuṃ **“ko cā”**ti vuttam. Tattha **ko cāti** kva katarasmim samaye aññesaṃ ñāṇadassanassa paṭighāto bhaveyyāti puccā.

Anicce, dukkhe, anattaniye ca aññesaṃ aññāṇaṃ yaṃ adassanaṃ atthi, aññāṇadassanasāṅkhāto sabhāvo ñāṇadassanassa paṭighāto bhavati, na sapaṅkhandhādīdassanamattapaṭighāto. Etena aniccato lakkhaṇattaye pavattassa ñāṇadassanassa aññesaṃ durabhisambhavaṃ, bhagavato ca ñāṇadassanassa aññehi asādhāraṇataṃ dasseti. Bhagavato hi lakkhaṇattayavibhāvanena veneyyā catusaccappaṭivedham labhanti. “Bhagavato ñāṇadassanapaṭighātābhāvena aññesaṅca ñāṇadassanassa paṭighātābhāvo katamāya upamāya amhākaṃ pākaṭo”ti vattabbabhāvato upamāya pākaṭam kātuṃ **“yathā idhā”**tiādi vuttam. Tattha **idha** sattaloke cakkhumā **puriso** ākāse tārakāni **passeyya**, gaṇanasāṅketena “ettakānī”ti no ca jāneyya yathā, **evaṃ** aññesaṃ ñāṇadassanassa paṭighāto **ayaṃ** aññāṇadassanasabhāvo bhavati.

Bhagavato pana tathā abhāvato kenaci aññāṇena adassanena appaṭihatam ñāṇadassanaṃ bhavati attho daṭṭhabbo. “Bhagavato ñāṇadassanassa appaṭihatābhāvo kasmā amhehi saddahitabbo”ti puccitabbattā **“anāvaraṇañāṇadassanā hi buddhā bhagavanto”**ti vuttam. “Nīpakassa...pe... bhagavato anāvaraṇañāṇaṃ kāyakammādibhedehi ācariyena vibhajitvā dassitam, amhehi ca ñātam, pacchā gāthāya ‘iriya’nti padena puccitā sekkhāsekkhapaṭipadā katham vijānitabbā”ti vattabbattā sekkhāsekkhapaṭipadaṃ dassetuṃ **“tattha sekhenā”**tiādi vuttam. Tattha **tatthāti** tasmim vissajjane. **Sekhenāti** sikkhanasīlena puggalena rajanīyesu rūpārammaṇādīsu dhammesu gedhā cittaṃ rakkhitabbam, pariyaṭṭhānīyesu āghātavatthūsu dosā cittaṃ rakkhitabbam.

“Tesu gedhadosesu katamaṃ nivārento bhagavā vissajjanāgāthāyaṃ katamaṃ padamāhā”ti puccitabbattā **“tattha yā icchā”**tiādi vuttam. Tattha **tatthāti** gedhadosesu. **Ichāti** rāgicchā. **Mucchāti** lobhamohasahagatamohamucchā. **Patthanāti** rāgapatthanā. **Piyāyanāti** taṇhāpiyāyanāva, na mettāpiyāyanā. **Kīlanāti** gedhakīlanā. Etāni hi gedhapariyāyavacanāni. **Tam** gedhasāṅkhātam icchādikaṃ nivārento bhagavā “kāmesu nābhigijjheyyā”ti **evaṃ** visum visum pakārena āha.

Pariyaṭṭhānavighātam dosaṃ nivārento bhagavā “manasānāvīlo siyā”ti evaṃ visum visum pakārena āhāti yojanā. Gedhadosaṃ visum visum nivārento bhagavā dve padāni āhāti vuttam, “tam

kena atthena saddahitabba’’nti vattabbattā “**tathā hi sekho**’’tiādi vuttaṃ. Rajanīyesu **abhigijjhanto** sekho anuppannaṃ lobhapadhānaṃ **kilesaṅca** uppādeti, uppannaṃ kilesaṅca **phātiṃ** abhivaḍḍhanaṃ karoti, pariyoṭṭhānīyesu āvilo sekho anuppannaṃ dosapadhānaṃ kilesaṅca uppādeti, uppannaṃ kilesaṅca **phātiṃ** vaḍḍhanaṃ karoti, iti iminā paṭikkhepaatthena taṃ mama vacanaṃ saddahitabbanti adhippāyo.

“Kiṃ pana anabhigijjhanto, anāvilo ca sekkho agedhadosaṇivāraṇameva karoti, udāhu uttaripi paṭipadaṃ pūreti’’ti pucchitabbattā uttaripi paṭipadaṃ pūretiyevāti dassento “**yo pana anāvilasaṅkappo**’’tiādimāha. Tattha **anāvilasaṅkappoti** natthi āvilakarā saṅkappā byāpādasāṅkappavihiṃsāsaṅkappā etassāti anāvilasaṅkappo, icchādigedhassa abhāvena **anabhigijjhanto vāyamati** kusalavāyāmaṃ pavatteti. “Kathaṃ vāyamati’’ti pucchitabbattā “**so anuppannāna**’’ntiādi vuttaṃ. Tattha **soti** uparibhāvanāmaggabhāvathāya paṭipajjamāno sekkho. **Anuppannānanti**ādīnaṃ attho sakkā aṭṭhakathāvacaneneva (netti. aṭṭha. 15-16) jānitunti na vibhatto.

16. Yenāti asubhādīnaṃ anussaraṇalakkhaṇena indriyena taṇhāmayitavattāhūsu kāmataṇhāya sahaḷātaṃ **vitakkaṃ** vāreti, **idaṃ** asubhādīnaṃ anussaraṇalakkhaṇaṃ indriyaṃ **satindriyaṃ**. **Yena** mahaggatabhāvappattena avikkhepena **byāpādavitakkaṃ** vāreti, **idaṃ** avikkhepasāṅkhātaṃ indriyaṃ **samādhindriyaṃ**. **Yena** sammappadhānena **vihiṃsāvitaṅkaṃ** vāreti, **idaṃ** sammappadhānasāṅkhātaṃ indriyaṃ **vīriyindriyaṃ**. **Yena** sammādiṭṭhisāṅkhātena indriyena uppannuppanne...pe... nādhivāseti, **idaṃ** sammādiṭṭhisāṅkhātaṃ indriyaṃ **paññindriyaṃ**. Imesu catūsu indriyesu saha uppajjamānā yā saddahanā okappanā uppajjati, anāvilabhāvato **idaṃ** saddahanasaṅkhātaṃ indriyaṃ **saddhindriyaṃ**. Imāni sekkhassa pañcindriyāni.

Ekasmiṃyeva visaye jeṭṭhakabhāvaṃ na pāpuṇeyyūṃ, attano visaye jeṭṭhakabhāvaṃ pāpuṇitūṃ arahanti, “katamaṃ indriyaṃ kattha visaye jeṭṭhakabhāvaṃ pavatta’’nti pucchitabbabhāvato idaṃ indriyaṃ imasmiṃ visaye pavattanti dassento “**tattha saddhindriyaṃ kattha daṭṭhabba**’’ntiādimāha. Tattha **tatthāti** tesu indriyesu catūsu sotāpattiyaṅgesu saddhindriyaṃ jeṭṭhakabhāvaṃ pavattanti daṭṭhabbaṃ. Evaṃ sesesupi yojetabbaṃ. Kiṃ nu sekkho paññindriyeva appamatto’’ti bhagavatā vutto thomito, udāhu sabbehi kusalehi dhammehīti pucchitabbattā sabbehi kusalehi dhammehi pañcindriyapamukhehi vutto thomito hotīti dassetuṃ “**evaṃ sekho**’’tiādi vuttaṃ. Tattha **evaṃ** pañcindriyānaṃ nibbattidassanena **sekho** puggalo sabbehi kusalehi dhammehi appamattoti bhagavatā **vutto** thomito anāvilatāya manasāti yojanā. “Sekkhassa anāvilatā kena saddahitabbā’’ti vattabbattā “**tenāha bhagavā manasānāvilo siyā**’’ti vuttaṃ. Bhagavatā “manasānāvilo siyā’’ti vuttattā sekkhassa anāvilatā tumhehi saddahitabbāti.

17. Sekkhassa matthakappattā paṭipadā ācariyena vibhattā, amhehi ca ñātā, “kathaṃ asekkhassa matthakappattā paṭipadā ñātā’’ti vattabbattā asekkhassa matthakappattaṃ paṭipadaṃ vibhajitvā dassetuṃ “**kusalo sabbadhammāna**’’ntiādimāha. Tattha **sabbadhammānanti** sabbesu dhammesu matthakappattāya paṭipadāya asekkho **kusalo** chekataroti bhagavatā **vutto** thomito anāvilatāya manasāti. Asekkhassa sabbadhammesu yaṃ kosallaṃ dassetukāmo, tassa kosallassa visayabhūte sabbadhamme tāva puggalādhiṭṭhānena vibhajitvā dassetuṃ “**loko nāmā**’’tiādimāha. Tattha “**sabbadhammāna**’’nti iminā vuttadhammasāṅkhāto loko nāma kilesaloko, bhavaloko, indriyalokoti tividho hotīti yojanā. Tattha parittadhammaṭṭho kilesajanaṇaṭṭhena kilesa, kusalādiṇaṇaṭṭhena loko cāti **kilesaloko**. Mahaggatadhammaṭṭho bhavanaṇaṭṭhena bhavo, vuttanayena loko cāti **bhavaloko**. Saddhindriyādiḍhammaṭṭho ādhipaccaṭṭhayogavasena indriyabhūto hutvā saddhindriyādiṇaṇaṭṭhena loko cāti **indriyaloko**.

“Tisu lokesu katamena katamo samudāgacchati’’ti pucchitabbattā “**tatthā**’’tiādi vuttaṃ. “Saddhādiindriyāni ko nibbatteti’’ti pucchitabbattā “**so indriyāni nibbatteti**’’ti vuttaṃ. Tattha **soti** yo puggalo kilesalokasaṅkhāte parittadhamme, bhavalokasaṅkhāte mahaggatadhamme ca taṃtaṃsampādanavasena ṭhito, so puggalo saddhindriyādiṇi indriyāni attasantāne nibbatteti.

“Indriyesu attasantānesu punappunam nibbattāpanavasena vuḍḍhāpiyamānesu kā paññā bhavatī” ti pucchitabbatā “**indriyesū**” tiādi vuttam. Tattha **neyyassāti** abhiññeyyassa. **Pariññāti** rūpārūpadhamme salakkhaṇato, paccayato ca pariggahādivasena pavattapaññā. “Sā pariññā katividhena upaparikkhitabbā” ti pucchitabbatā “**sā duvidhenā**” tiādi vuttam. Tattha sā pariññā dassanapariññāya ca bhāvanāpariññāya ca duvidhena viññūhi upaparikkhitvā gahetabbāti. **Dassanapariññāyāti** ca dassanamaggapaññājanikāya nātapaniññāyāti attho gahetabbo. Tena **aṭṭhakathāyam** vuttam “dassanapariññāti nātapaniññā” ti (netti. aṭṭha. 17). **Bhāvanāpariññāyāti** bhāvanāmaggapaññājanikāya tīraṇapariññāya saddhiṃ pahānapariññāyāti attho.

“Sā duvidhenā” tiādinā vutto attho atisaṅkhepo na sakkā viññātum, vitthāretvā kathehī” ti vattabbatā “**yadā hī**” tiādi vuttam. Tattha **yadāti** balavavipassanuppajjanakāle. **Sekhoti** sikkhanasīlatāya kalyāṇaputhujjano ceva sotāpannādiko ca. **Ñeyyanti** nātabbam rūpādikaṃ saṅkhāram. **Parijānāti** pariggahādiññāna pariggahetvā jānāti nibbidāññāsaahagatena. **Tassāti** kalyāṇaputhujjanassa ceva sotāpannādikassa ca. **Dve dhammāti** kalyāṇaputhujjanassa balavavipassanādhammo ceva sotāpannādikassa ca balavavipassanādhammo ca. Yathākkamaṃ **dassanakosallaṃ** sotāpattimaggaññaṇceva **bhāvanākosallaṃ** sakadāgāmimaggaḍḍikaṇca santāne pavattāpanavasena gacchanti.

“Pubbe yaṃ ñāṇaṃ ‘neyyassa pariññā’ ti vuttam, taṃ ñāṇaṃ katividhena veditabba” nti pucchitabbatā “**taṃ ñāṇaṃ pañcavidhena veditabbaṃ...pe... sacchikiriyā**” ti vuttam. “Tāsu vipassanābhedenā bhinnāsu pañcasu abhiññādīsu katamā abhiññā, katamā pariññā, katamaṃ pahānaṃ, katamā bhāvanā, katamā sacchikiriyā” ti pucchitabbatā “**tattha katamā**” tiādi vuttam. Tattha **tatthāti** abhiññādīsu. **Yaṃ dhammānaṃ salakkhaṇa** ñāṇanti rūpadhammānaṃ kakkhaḷādisalakkhaṇa, arūpadhammānaṃ phusanādisalakkhaṇa ārammaṇakaraṇavasena pavattaṃ yaṃ ñāṇaṃ hetuphalajānanahetujānanasaṅkhātā **dhammapaṭisambhidā** ceva hetuphalajānanasaṅkhātā **atthapaṭisambhidā** ca bhavati. **Ayaṃ** salakkhaṇena saddhiṃ hetuphalajānanā paññā **abhiññā** nāma.

Evanti vuttappakārena. Abhiññāñāna **abhijānitvā**. **Yā parijānanāti** adīsu “idaṃ anavajjaṃ **kusalaṃ**, idaṃ sāvajjaṃ **akusalaṃ**, idaṃ akusalavipākajanaṃ **sāvajjaṃ**, idaṃ kusalavipākajanaṃ **anavajjaṃ**, idaṃ saṃkiliṭṭhaṃ **kaṇhaṃ**, idaṃ asaṃkiliṭṭhaṃ **sukkaṃ**, idaṃ kusalaṃ anavajjādikaṃ **sevitabbaṃ**, idaṃ akusalaṃ sāvajjādikaṃ **na sevitaṃ**” nti evaṃ aniccādīto kalāpasammasanādivasena gahitā sammasitā **ime** vipassanāya ārammaṇabhūtā saṅkhata**dhammā** **idaṃ** udayabbayaññādīphalaṃ ānisaṃsaṃ anukkamena nibbattāpenti. Tannibbattavipassanāya uppajjanato upacāraṃ uppādentī, **evaṃ** anukkamena gahitānaṃ pavattitānaṃ **tesaṃ** udayabbayaññādīnaṃ **ayaṃ** saccānubodhapaṭivedho **atthoti** paricchinditvā yā parijānanā pavattā, sā **ayaṃ** parijānanā **pariññā** nāmāti yojetvā, **evaṃ** vuttappakārayā pariññāpaññāya **parijānitvā** pahātabbā, bhāvetabbā, sacchikātabbā ca tayo dhammā avasiṭṭhā bhavanti. “Ye akusalā, te pahātabbā” ti yā parijānanā paññā pavattā, idaṃ pahānaṃ pahānaññaṃ. “Ye kusalā, te bhāvetabbā” ti yā parijānanā paññā pavattā, sā bhāvanāpaññā. “Yaṃ asaṅkhatam, idaṃ sacchikiriyā” nti yā parijānanā paññā pavattā, sā sacchikiriyāpaññāti yojetvā aṭṭhakathādhippāyena aviruddho attho gahetabbo.

Abhiññādayo pañcavidhā paññā ācariyena vibhattā, amhehi ca ñātā, “tāhi pariññāhi jānanto puggalo ‘ki’ nti vuccati thomīyati” ti vattabbatā “**yo eva**” ntiādi vuttam. Tattha **yo** puggalo **evaṃ** vuttappakārena jānāti, **ayaṃ** jānanto puggalo paccayuppannesu dhammesu kusalattā chekattā “atthakusalo” ti **vuccati** thomīyati, paccayadhammesu kusalattā “**dhammakusalo**” ti ca catunnaṃ ekattādīnaṃ nayānaṃ yuttatāya kovidattā “**kalyāṇatākusalo**” ti ca phalasaṃpattīsu kovidattā “**phalatākusalo**” ti ca vaḍḍhīsu kovidattā “**āyakusalo**” ti ca avadḍhīsu kovidattā “**apāyakusalo**” ti ca accāyike kicce vā bhaye vā uppanne sati tassa kiccassa, bhayassa vā tikicchanasamatthe ṭhānuppattiyakāraṇe kovidattā “**upāyakusalo**” ti ca mahantesu abhikkamādīsu satisampajāññāya sampannattā “**mahatā kosallena samannāgato**” ti ca **vuccati** thomīyati. “Tassa asekkhassa atthādīsu kusalabhāvo katham saddahitabbo” ti vattabbatā “**tenāhā**” tiādi vuttam. “Kusalo sabbadhammāna” nti

vuttattā saddahitabboti adhippāyo.

“Kusalo sabbadhammāna”nti padassa attho ācariyena vibhatto, amhehi ca ñāto, “sato bhikkhu paribbaje”ti padassa attho kathaṃ amhehi vitthārato viññāto”ti vattabbattā **“sato bhikkhu paribbaje”**tiādi vuttaṃ. Atha vā “sato bhikkhu paribbaje”ti bhagavatā vuttaṃ, “kattha pavattena satisahitena ñāṇena sampanno sato kimatthaṃ paribbaje”ti pucchitabbattā “imesu pavattena satisahitañāṇena sampanno sato imamatthaṃ paribbaje”ti niyametvā dassento **“sato bhikkhu paribbaje”**tiādimāha. Tattha **tenāti** yo abhikkamādīsu pavattena satisahitañāṇena samannāgato sato asekkhabhikkhu, tena asekkhabhikkhunā pariniṭṭhitasikkhattā aññapayojanābhāvato **diṭṭhadhammasukhavihāratthaṃ** abhikkante...pe... tuṅhībhāvena **satena** satisahitena **sampajānena** ñāṇena **vihātabbaṃ** catuiriyāpathaparivattanasankhātā viharāṇaṃ pavattetabbāṃ.

“Yā sekkhāsekkhapaṭipadā niddiṭṭhā, imā sekkhāsekkhapaṭipadā saṅkhepato katividhā”ti pucchitabbattā imā paṭipadāsankhātā cariyā saṅkhepato puggalavasena dveti dassetuṃ **“imā dve cariyā”**tiādimāha. Tattha yā cariyā bhāvetabbakusalādibhedena vā atthakosallādibhedena vā abhikkamādīsu satisampajāññabhedena vā niddiṭṭhā, imā cariyā dveti bhagavatā **anuññātā** anujānavasena desitā, **visuddhānaṃ** arahantānaṃ **ekā** cariyā, **visujjhantānaṃ** sekkhānaṃ **ekā** cariyāti puggalavasena dveti daṭṭhabbā.

“Asekkhoyeva kasmā ‘sato abhikkamati’tiādinā vuccati thomīyati, kalyāṇaputhujjanopi ‘sato abhikkamati’tiādinā vuccati thomīyati”ti vattabbattā **“katakiccāni hī”**tiādi vuttaṃ. Arahato indriyāni katakiccāni, indriyānaṃ katakiccattā yaṃ pucchāṃ pucchitabbāṃ, taṃ sabbaṃ catubbidhaṃ dukkhassa pariññābhisamayena bojjihitabbāṃ...pe... nirodhassa sacchikiriyābhisamayena bojjihitabbāṃ bhāve. **Catubbidhaṃ idaṃ bojjaṃ** bojjihitabbāṃ yo asekkho sativapullappattattā **evaṃ** pariññābhisamayādinā **jānāti, ayaṃ** asekkho nippariyāyena “rāgassa khayāya, dosassa khayāya, mohassa khayāya sato abhikkamati, sato paṭikkamati”ti **vuccati** thomīyati. Sekkhopi yathāvuttaṃ **bojjaṃ** bojjihitabbāṃ attano pariññābhisamayādinā **jānāti**, tasmā “sato...pe... mohassa”ti **vuccati** thomīyatīti veditabbo. Tena vuttaṃ **“ke visujjhantā? Sekkhā”**ti.

“Kasmā sekkhāsekkhānaṃ satisampajāññena abhikkamanādibhāvo, rāgādīnaṃ khayabhāvo saddahitabbo”ti vattabbattā vuttaṃ **“tenāha bhagavā sato bhikkhu paribbaje”**ti. “Bhagavato sabbaṃ kāyakammaṃ ñāṇapubbaṅgama’ntiādinā (netti. 15) manāpikesu kāmesu nābhigijjanabhāvo, amanāpikesu kāmesu manasā anāvilabhāvo, sabbadhammesu kusalabhāvo, satisampajāññena samannāgatassa paribbajanabhāvo ācariyena niddiṭṭho, so nābhigijjanabhāvādiko kasmā amhehi saddahitabbo”ti pucchitabbattā vuttaṃ **“tenāha kāmesu...pe... paribbaje”**ti. Imissā gāthāyapi pucchāvissajjanavicayo pubbe ekādhiṭṭhānādiddhammādhiṭṭhānādivasena vuttanayānusārena veditabbo.

Vicayahāravibhaṅge ajitasuttaṃ nīharitvā pucchāvissajjanavicayo ācariyena vibhatto, amhehi ca ñāto, “katamo suttantaresu pucchāvissajjanavicayo”ti pucchitabbattā ajitasutte pucchāvissajjanavicayanayānusārena suttantaresupi pucchāvissajjanāni nīharitvā pucchāvicyavissajjanavicayā yojetabbāti dassetuṃ **“evaṃ pucchitabbāṃ, evaṃ vissajjitabba”**nti vuttaṃ. **Aṭṭhakathāyaṃ** pana –

Ettāvatā ca mahāthero vicayahāraṃ vibhajanto ajitasuttavasena pucchāvicyayaṃ, vissajjanavicayaṅca dassetvā idāni suttantaresupi pucchāvissajjanavicayānaṃ nayaṃ dassento evaṃ pucchitabbāṃ, evaṃ vissajjitabba’nti āhā”ti (netti. aṭṭha. 17) –

Vuttaṃ. Tattha **evanti** ajitasutte (su. ni. 1038 ādayo; cūḷani. vatthugāthā 57, ajitamāṇavapucchāniddeśa 1 ādayo) vuttapucchāvicyānusārena pucchāvasena pavattasuttaṃ nīharitvā pucchāvicyo vibhajetabbo, evaṃ ajitasutte (su. ni. 1038 ādayo; cūḷani. vatthugāthā 57 ādayo, ajitamāṇavapucchāniddeśa 1 ādayo) vuttavissajjanavicayānusārena suttantaresupi vissajjanavasena pavattasuttaṃ nīharitvā vissajjanavicayo

vibhajetabbo.

Pucchāvissajjanavicayā ācariyena vibhattā, amhehi ca ñātā, “katamo suttaanugītivicayo”ti pucchitabbattā “**suttassa ca anugīti**”tiādi vuttaṃ. Tattha **suttassāti** nīharitasuttassa. **Anugīti** suttantaradesanāsankhātā anugīti. **Atthato ca byañjanato ca samānetabbāti** tassā anugītiyā atthato, byañjanato ca saṃvaṇṇetabbasuttena samānā sadisī kātābbā, tasmim vā saṃvaṇṇiyamānasutte anugīti suttatthato, byañjanato ca samānetabbā. “Atthato asamāne ko nāma doso āpajjeyyā”ti pucchitabbattā **atthāpagataṃ hi byañjanaṃ samphappalāpaṃ bhavati**”ti vuttaṃ. “Atthato asamāne doso vutto, amhehi ca ñāto, byañjanato asamāne pana ko nāma doso āpajjati”ti pucchitabbattā “**dunnikkhittassa padabyañjanassa atthopi dunnayo bhavati**”ti vuttaṃ. **Tasmā** sadosattā anugītiyā vā suttena atthabyañjanūpetam saṅgāyitabbam.

Anugītivicayo ācariyena vibhatto, amhehi ca ñāto, “katamo suttassa vicayo”ti pucchitabbattā **suttañcā**”tiādi vuttaṃ. Tattha **suttañcāti** niddhāritasuttañca. “**Idaṃ** niddhāritasuttam nāma bhagavatā vuttaṃ **āhaccavacanaṃ** kiṃ, udāhu saṅgāyantehi vuttaṃ **anusandhivacanaṃ** ki”nti pavicinitabbam, “**idaṃ** niddhāritasuttam **nītattham** kiṃ, udāhu **neyyattham** ki”nti pavicinitabbam, “**idaṃ** niddhāritasuttam **saṃkilesabhāgiyaṃ** kiṃ, udāhu **vāsanābhāgiyaṃ** ki”nti pavicinitabbam, “**idaṃ** niddhāritasuttam **niḃbedhabhāgiyaṃ** kiṃ, udāhu **asekkhabhāgiyaṃ** ki”nti pavicinitabbam. Evaṃ pavicinitvā yadi āhaccavacanaṃ bhave, evaṃ sati “āhaccavacana”nti niddhāretvā gahetabbam. Yadi asekkhasuttam bhave, evaṃ sati “asekkhasutta”nti niddhāretvā gahetabbam, ñātanti attho.

“Suttam pavicinitvā suttassa atthabhūtāni sabbāni saccāni niddhāretvā kattha padese passitabbānī”ti pucchitabbattā pucchaṃ ṭhapetvā imasmim padese passitabbānīti dassetum “**kuhiṃ imassa suttassa sabbāni...pe... pariyosāne**”ti vuttaṃ. Tattha **imassa suttassāti** yaṃ suttam vicinitum niddhāritam, imassa suttassa catusaccavinimuttassa suttatthassa abhāvato **sabbāni saccāni** tasseva suttassa **ādimajjhapariyosāne** passitabbānīti attho.

Yathāvuttaṃ suttavicayaṃ nigamento “**evaṃ suttam pavicetabba**”nti āha. “Na yathāvuttapucchādīnaṃ pavicetabbabhāvo amhehi jānitabbo saddahitabbo”ti vattabbabhāvato “**tenāha...pe... anugīti**”ti vuttaṃ. Tattha **tena** yathāvuttapucchādīnaṃ vicetabbabhāvena āyasmā mahākaccāno “yaṃ pucchitañca...pe... anugīti”tiādikaṃ yaṃ vacanaṃ āha, tena vacanena vicetabbabhāvo tumhehi jānitabbo saddahitabbovāti vuttaṃ hoti.

“Yathāvuttappakāro ca vicayo hāro paripuṇṇo kiṃ, udāhu aññopi niddhāretvā yojetabbo atthi ki”nti pucchitabbattā “**niyutto vicayo hāro**”ti vuttaṃ. Tattha pucchāvicyavissajjanavicayapubbāparavicayaanugītivicayasuttavicayā sarūpato vibhattā, tehi avaseso assādādivicayopi yathārahaṃ niddhāretvā **yutto** yuñjitabboti adhippāyo.

Iti vicayahāravibhaṅge sattibalānurūpā racitā

Vibhāvanā niṭṭhitā.

Paṇḍitehi **pana** aṭṭhakathāṭīkānusārena gambhīrattho vitthārato vibhajitvā gahetabboti.

3. Yuttihāravibhaṅgavibhāvanā

18. Yena yena saṃvaṇṇanāvīsesabhūtena vicayahāravibhaṅgena padapañhādayo vicitā, so saṃvaṇṇanāvīsesabhūto vicayahāravibhaṅgo paripuṇṇo, “katamo yuttihāravibhaṅgo”ti pucchitabbattā “**tattha katamo yuttihāro**”tiādi vuttaṃ. Tattha **tatthāti** tesu niddiṭṭhesu soḷasasu hāresu **katamo** saṃvaṇṇanāvīseso **yuttihāro** yuttihāravibhaṅgoti pucchi. “Sabbesaṃ hārāna”ntiādiniddesassa idāni vuccamāno “ayaṃ yuttihāro”tiādiko vitthārasaṃvaṇṇanāvīseso yuttihāravibhaṅgo nāmāti viññeyyo.

Tena vuttam “tatha katamo yuttihārotiādi yuttihāravibhaṅgo” ti (netti. aṭṭha. 18). Ayam yuttihāro **kiṃ** nāma suttattham yuttāyuttivasena **yojayatīti** yuñjītabbam suttattham pucchati. Suttattho pana duvidho atathākārena gayhamāno, tathākārena gayhamāno atthoti. Tattha atathākārena gayhamānova attho yāthāvato yuttiniddhāraṇena yojetabbo, itaro pana bhūtakathanamattena yojetabbo. Yasmā paṇāyam yuttigavesanā nāma saṃvaṇṇanā mahāpadesehi vinā na sambhavati, tasmā yuttihāram vibhajanto tassa yuttihārasa lakkhaṇam paṭhamam upadisitum “**cattāro mahāpadesā**” tiādimāha. Tattha **mahāpadesā**ti mahante buddhādayo apadisitvā vuttāni kāraṇāni, mahantāni vā dhammassa apadesāni patiṭṭhānāni. Apadisīyateti **apadeso**, buddho apadeso etassa kāraṇassāti **buddhāpadeso**. Sesesupi eseva nayo netabbo. “Buddhassa sammukhā etaṃ suttam mayā suta” nti vatvā ābhatassa ganthassa suttavinayehi saṃsandanaṃ dhammo, asaṃsandanaṃ adhammoti vinicchaya kāraṇam mahāpadesoti adhippāyo. “Buddhassa sammukhā mayā ābhatam, saṅghassa sammukhā mayā ābhatam, sambahulattherānaṃ sammukhā mayā ābhatam, ekattherassa sammukhā mayā ābhata” nti vatvā ābhatassa ganthassa yāni byañjanapadaatthapadāni santi, **tāni padabyañjanāni** bhagavatā desite **sutte otarayitabbāni** anuppavesitāni, **vinaye** rāgādivinaye **sandassayitabbāni** saṃsandetabbāni. Dhammatāyam **upanikkhipitabbāni** pakkhipitabbāni. Yadi suttatthena, vinayatthena, dhammatāya ca aviruddhāni honti, evaṃ sati tava ābhatapadabyañjanāni yuttānīti vinicchayantehi vatvā gahetabbānīti adhippāyo.

Suttavinayadhammatāsu otarayitabbāni sandassayitabbāni upanikkhipitabbānīti ācariyena vuttāni, “kattha sutte, kattha vinaye, kattha dhammatāya” nti vattabbatā “**katamasmim sutte**” tiādi vuttam. Tattha **catūsu ariyasaccesu**ti catunnam ariyasaccānaṃ dassanakesu suttasu. Rāgo vinassati vūpasamati etena asubhādīnāti **rāgavinayam**, kiṃ taṃ? Asubhādīnimittam, taṃ assa atthīti **rāgavinayo**, ko so? Asubhādīnimittadassanako suttantaviseso. Esa nayo **dosavinayoti**ādisupi. **Paṭiccasamuppādo** nāma sassatādiṭṭhiucchadadiṭṭhim vivajjetvā ekattanayādīnaṃ dīpanena avijjādisaṅkhārādisabhāvadhammānaṃ paccayapaccayuppannabhāvadīpakoti vuttam “**katamissam dhammatāyam upanikkhipitabbāni? Paṭiccasamuppāde**” ti.

“Suttādīsū avatarante sandissante avilomete kiṃ na janetī” ti vattabbato “**catūsū**” tiādi vuttam. Tattha “buddhādīnaṃ sammukhā mayā ābhata” nti vatvā ābhatagantho catūsu ariyasaccesu yadi avatarati, evaṃ sati ābhatagantho āsave na janeti. Rāgādikilesavinaye yadi sandissati, evaṃ sati ābhatagantho āsave na janeti. Dhammataṅca yadi na vilometi, evaṃ sati ābhatagantho āsave na janetīti attho daṭṭhabbo.

“Kimattham yuttihāravibhaṅge cattāro mahāpadesā ābhatā” ti vattabbatā “**catūhi mahāpadesehi**” tiādimāha. Tattha ābhataganthe **yam yam** atthajātam, **yam yam** dhammajātam vā catūhi mahāpadesehi yujjati, **taṃ taṃ** atthajātam vā **taṃ taṃ** dhammajātam vā saṃvaṇṇetabbasutte gahetabbam. **Yena yena** kāraṇena ca catūhi mahāpadesehi yujjati, **taṃ taṃ** kāraṇam saṃvaṇṇanāvasena saṃvaṇṇetabbasutte gahetabbam. **Yathā yathā** pakārena catūhi mahāpadesehi yujjati, so so pakāro saṃvaṇṇanāvasena saṃvaṇṇetabbasutte gahetabbo. Evaṃ gāhaṇattham cattāro mahāpadesā ābhatāti attho.

19. Catūhi mahāpadesehi yuttam aviruddham taṃ taṃ atthajātam gahetabbanti ācariyena vuttam, “kattha kena yuttiniddhāraṇam kātabba” nti vattabbatā “**pañham pucchitenā**” tiādi vuttam. Pañhe pañham **pucchitena** puggalena yuttiniddhāraṇam kātabbanti. Tattha **pañhanti** pañhitabbam sabhāvadhammam. **Pucchitenā**ti vissajjetum samatthena paṇḍitapuggalena. **Pañheti** pucchāvasena pavattapāṭhe. Padāni **kati** kittakāni hontīti padaso paṭhamam **pariyogāhitabbam** yuttihārena **vicetabbam** vīmaṃsitabbam. “Katham vicetabba” nti pucchitabbatā “**yadi sabbāni**” tiādi vuttam. Tattha **sabbāni padānīti** pucchitapāṭhe niravasesāni padāni **ekam** samānaṃ attham yadi abhivadanti, evaṃ sati atthavasena **eko pañho**. Esa nayo sesesupi. Tena vuttam “tadatthassekassa ñātuṃ icchitattā” ti (netti. aṭṭha. 19).

Ekanti atthavasena ekavidham pañham. **Upparikkhamānena** puggalena **aññātabbam** daḷham jānitabbam. “Ko ājānanākāro”ti pucchitabbattā ājānanākāram dassento “**kiṃ ime dhammā**”tiādimāha. Tattha “ye hi pariyattidhammā samvaṇṇetabbā, ime pariyattidhammā nānatthā honti kiṃ, nānābyañjanā honti kiṃ, udāhu imesaṃ pariyattidhammānam eko attho hoti, byañjanameva nānam hoti ki”nti yuttito vicetvā aññātabbanti yojanā. “Yathāvutto pañho kiṃ bhavē”ti pucchitabbattā yathāvuttam pañham ekadesam dassetuṃ “**yathā kiṃ bhavē**”ti pucchitvā “**yathā sā**”tiādimāha.

Tassam pucchāgāthāyam – coraghātakena manussena coro abbhāhato viya **kena** dhammena satta**loko** sadā abbhāhato, māluvalatāya attano nissitarukkho parivārito ajjhotthaṭṭo viya **kena** dhammena satta**loko** sadā **parivārito** ajjhotthaṭṭo, visappītakhurappena sallena otiṇṇo anupaviṭṭho viya **kena** sallena satta**loko** sadā **otiṇṇo** anupaviṭṭho, **kissa** kena kāraṇena satta**loko** sadā **dhūpāyito** santāpitoti yojanā.

“Imāya pucchāgāthāya kittakāni padānī”ti pucchitabbattā “**imānī**”tiādi vuttam. Tattha **pucchitānī**ti pucchitathāni padāni cattāri honti. “Kittakā pañhā”ti pucchitabbattā “**te tayo pañhā**”ti vuttam.

Bhagavā devatāya **hi** yasmā vissajjeti, iti tasmā vissajjanato “tayopañhā”ti viññāyati. “Katamā vissajjanagāthā”ti pucchitabbattā –

“Maccunābbhāhato loko, jarāya parivārito;
Taṇhāsallena otiṇṇo, icchādhūpāyito sadā”ti. –

Vuttam. Tassam vissajjanagāthāyam – coraghātakena manussena coro abbhāhato viya maccunā satta**loko** sadā abbhāhato, māluvalatāya attano nissitarukkho parivārito ajjhotthaṭṭo viya jarāya satta**loko** sadā **parivārito** ajjhotthaṭṭo, visappītakhurappena sallena otiṇṇo anupaviṭṭho viya taṇhāsallena satta**loko** sadā **otiṇṇo** anupaviṭṭho, icchāya satta**loko** sadā **dhūpāyito** santāpitoti yojanā.

20. “Katamam maccu, katamā jarā”ti pucchitabbattā “**tattha jarā**”tiādi vuttam. Tattha **tatthāti** tissam vissajjanagāthāyam. Dutiyapade vuttā **jarā** ca paṭhamapade vuttam **marañña**ca imāni dve **saṅkhatassa** khandhapañcakassa saṅkhatalakkhaṇāni honti, saṅkhatam khandhapañcakaṃ muñcitvā visum na upalabbhatīti attho. “Saṅkhatalakkhaṇānam jarāmarāṇānam katham bhedo jānitabbo”ti vattabbattā “**jarāyam ṭhitassā**”tiādi vuttam. Tattha **jarāyam ṭhitassa aññathattanti** ṭhitassa khandhappabandhassa yaṃ aññathattam, ayaṃ pākāṭajarā nāma, na khaṇaṭṭhitijarā. **Maraṇam** vayoti sammutimaraṇam cutiyeva hoti, na khaṇikamaraṇam, na samucchadamaraṇam. Tena vuttam “uppādo paññāyati, vayo paññāyati, ṭhitassa aññathattam paññāyati”ti (sam. ni. 3.38; a. ni. 3.47; kathā. 214).

Yadi ṭhitasseva maraṇam siyā, evaṃ sati jarāmarāṇānam nānattham yuttam na siyā, ayutte sati “te tayo pañhā”ti vacanampi ayuttamevāti vattabbato “**tattha jarāya cā**”tiādi vuttam. Tattha **tatthāti** tissam vissajjanagāthāyam vuttāya **jarāya ca** vuttassa **marañassa ca** atthato nānattham yuttam.

“Kena kāraṇena yuttam, katham kāraṇena nānattham sampañcchitabba”nti vattabbattā “**gabbhagatāpi hi mīyanti**”ti vuttam. Jaram appattā gabbhagatāpi sattā **hi** yasmā mīyanti, tasmā nānattham sampañcchitabbam. “Gabbhagatāpi jarappattā bhavēyyu”nti vattabbattā “**na ca te jīṇṇā bhavanti**”ti vuttam. Jarappattāpi ajjñattā jīṇṇajaram appattāva mīyanti, evaṃ idhādhippetassa jīṇṇajarāviraḥitassa marañassa sambhavato aññā jarā, aññam marāṇanti nītabbanti vuttam hoti. “Na gabbhagatānamyeva jīṇṇajaram appattam maraṇam atthi, aññesampi atthī”ti vattabbabhāvato “**atthi ca devānam maraṇa**”nti vuttam. “Devāpi cirakālasambhavato jaram pattā bhavēyyu”nti vattabbattā “**na ca tesam sarīrāni jīranti**”ti vuttam. “Jarāmarāṇānam nānatte kāraṇam ettakamevā”ti vattabbattā aññampi atthīti dassetuṃ “**sakkate vā**”tiādi vuttam. Tattha jīṇṇajarāya paṭikammaṃ kātuṃ sakkateva, marañassa pana paṭikammassa kātuṃ na sakkateva, imināpi kāraṇena jarāmarāṇānam nānattham sampañcchitabbamevāti attho. “Na sakkate marañassa paṭikammaṃ kātu”nti kasmā vuttam, nanu

iddhipādabhāvanāya vasībhāve sati sakkā maraṇassāpi paṭikammaṃ kātunti codanaṃ manasi katvā “**aññatreva iddhimantānaṃ iddhivisayā**”ti vuttaṃ.

Jarāmarāṇānaṃ aññamaññaṃ nānābhāvo ācariyena dassito, amhehi ca ñāto, “kathaṃ pana taṇhāya jarāmarāṇehi nānābhāvo”ti vattabbato tehi taṇhāya nānattaṃ dassetuṃ “**yaṃ panāhā**”tiādi vuttaṃ. Taṇhāya avijjamānāyapi jīrantāpi mīyantāpi vītarāgā yasmā dissanti, tasmā taṇhāya jarāmarāṇehi nānābhāvo sampaṭicchitabbo.

“Taṇhāya jīraṇabhijjanalakkhaṇaṃ atthīti tehi taṇhāya anaññatte ko nāma doso siyā”ti vattabbato dosaṃ dassetuṃ “**yadi cā**”tiādi vuttaṃ. Jarāmarāṇaṃ **yathā** yena jīraṇabhijjanalakkhaṇena pākaṭaṃ, evaṃ jīraṇabhijjanalakkhaṇena taṇhāpi pākaṭā. Yadi ca siyā; evaṃ sante **yobbanatṭhāpi** sabbe māṇavā vigatataṇhā siyuṃ, na ca vigatataṇhā, tasmā nānābhāvo sampaṭicchitabbo. Tato aññopi doso āpajjeyyāti dassetuṃ “**yathā ca taṇhā dukkhassā**”tiādi vuttaṃ. Tattha jarāmarāṇānaṃ taṇhāya anaññatte sati **taṇhāya** bhavataṇhāya dukkhasamudayo hoti, evaṃ jarāmarāṇampi dukkhasamudayo siyā. Yasmā na jarāmarāṇaṃ dukkhasamudayo, tasmā jarāmarāṇehi taṇhāya nānattaṃ veditabbaṃ.

Tehi tāya anaññatte sati evampi doso āpajjeyyāti dassetuṃ “**yathā ca taṇhā maggavajjhā**”tiādi vuttaṃ. Tattha tehi tāya anaññatte sati yathā taṇhā maggavajjhā hoti, evaṃ jarāmarāṇampi maggavajjhaṃ siyā. Yathā jarāmarāṇaṃ maggavajjhaṃ na hoti, evaṃ taṇhāpi maggavajjhā na siyā, tathā ca na hoti pahātabbāpahātabbabhāvato, tasmāpi jarāmarāṇehi taṇhāya nānattaṃ veditabbaṃ.

“Yadi cātiadinā vuttāya yuttiyā upapattiyā eva jarāmarāṇehi taṇhāya aññattaṃ gavesitabba”nti vattabbattā aññehipi kāraṇehi gavesitabbanti dassetuṃ “**imāya yuttiyā**”tiādi vuttaṃ. Tattha **imāya yuttiyāti** yā yutti “yadi cā”tiādinā vuttāya imāya yuttiyā upapattiyā. **Aññamaññehi kāraṇehi** aññehi kāraṇabhūtehi upapattīhi jarāmarāṇehi taṇhāya aññattaṃ gavesitabbanti attho. “Aññamaññehi kāraṇehi gavesitabba”nti kasmā vuttaṃ, nanu yuttiyā, atthato ca aññattaṃ sandissatīti codanaṃ manasi katvā “**yadi ca sandissatī**”tiādimāha. Tattha yuttisamaruḷhaṃ atthato ca marāṇehi taṇhāya ca aññattaṃ yadi ca sandissati, byañjanatopi aññattaṃ gavesitabbamevāti attho.

“Kathaṃ byañjanato aññattaṃ gavesitabba”nti vattabbattā “**salloti vā**”tiādi vuttaṃ. Tattha “sallo”ti vā “dhūpāyana”nti vā dvīhi byañjanehi vuccamānānaṃ **imesaṃ** icchātaṇhāsankhātānaṃ **dhammānaṃ** atthato **ekattaṃ** samānattaṃ yujjati, na aññattaṃ. “Sallo”ti vā “dhūpāyana”nti vā dvīhi byañjanehi avuccamānānaṃ jarāmarāṇānaṃ taṇhāya ekattaṃ na yujjati. Tamevatthaṃ vivarituṃ “**na hi**”tiādi vuttaṃ. Tattha icchāya ca taṇhāya ca atthato aññattaṃ na yujjati, ekattameva yujjatīti yojanā. Icchāya ca taṇhāya ca jīraṇabhijjanasambhavato jarāmarāṇehi taṇhāya ekattaṃ siyā, “kasmā aññattaṃ yutta”nti vattabbato “**taṇhāya adhippāye**”tiādi vuttaṃ. Tattha taṇhāya adhippāye aparipūramāne navasu āghātavatthūsu kodho ca uppajjati, upanāho ca uppajjati. Jarāmarāṇesu aparipūramānesu navasu āghātavatthūsu kodho ca na uppajjati, upanāho ca na uppajjati. Iti imāya yuttiyā jarāya ca maraṇassa ca taṇhāya ca atthato aññattaṃ yujjatiyevāti daṭṭhabbaṃ.

Yadi icchā taṇhāya atthato ekattaṃ yuttaṃ, evaṃ sati kasmā bhagavatā “maccunābbhāhato loko”tiādigāthāyaṃ “taṇhāsallena otiṇṇo, icchādhūpāyito sadā”ti dvidhā vuttāti codanaṃ pariharanto “**yaṃ panidaṃ bhagavatā**”tiādimāha. Tattha “icchā”tipi “taṇhā”tipi dvīhi nāmehi **yaṃ panidaṃ abhilapitaṃ** yaṃ panidaṃ abhilapanāṃ kataṃ, **idaṃ** abhilapanāṃ bhagavatā bāhirānaṃ icchitabbatasitabbānaṃ **vatthūnaṃ** rūpādiārammaṇānaṃ bhedaṇaṃ vasena “icchā”tipi “taṇhā”tipi dvīhi nāmehi **abhilapitaṃ** abhilapanavasena katanti ekattaṃ yuttameva, na nānattanti attho daṭṭhabbo.

“Nāmasasena dvidhā vuttānaṃ icchātaṇhādīnaṃ kena ekattaṃ yuttanti saddahitabba”nti vattabbattā “**sabbāhi**”tiādi vuttaṃ. Tattha nānānāmasasena pabhedā **sabbā** icchādīkā taṇhā ajjhosānalakkhaṇena ekalakkaṇā **hi** yasmā yuttā, tasmā nāmasasena bhinnānampi ekalakkaṇena ekattaṃ yuttanti saddahitabbanti daṭṭhabbaṃ. “Kimiva yutta”nti pucchitabbattā “**yathā sabbo**”tiādi

vuttam. Tattha kaṭṭhaggiādivasena aneko **sabbo aggi** uṇhatalakkhaṇena ekalakkhaṇo yathā, evaṃ ajjhosaṇalakkhaṇena ekalakkhaṇāti yojanā. Sabbassa aggino upādānavasena anekāni nāmāni sarūpato dassetuṃ “**apicā**”tiādi vuttam. Tassattho pākaṭo. Ārammaṇavasena taṇhā aññehi aññehi nāmehi bhagavatā abhilapitā, upādānavasena aggi aññehi aññehi nāmehi abhilapitoti yojanā kātabbā.

“Vissajjanagāthāyaṃ āgatanāmehi eva taṇhā abhilapitā”ti pucchitabbattā anekehi nāmehi abhilapitāti dassetuṃ “**icchāitipi**”tiādi vuttam. Tattha icchitabbāni atthāni rūpādāni ārammaṇāni sattā icchanti etāyāti **icchā**. Tasanti etāyāti **taṇhā**. Sallati pavisati visappītaṃ sallaṃ viyāti **sallā**, santāpaṃ lāti ādadātīti vā **sallā**, santāpaṃ lāti pavattetīti vā **sallā**. Dhūpāyati santāpeti paridahatīti **dhūpāyanā**. Sarati ākaḍḍhati avaharati sīghasotā saritā viyāti **saritā**, sarati sallatīti vā **saritā**. Visaratīti **visattikā**. Pīvasasena sinehatīti **sineho**. Tāsu tāsu gatīsu kilamathaṃ uppādetīti **kilamatho**. Sattā rūpādārammaṇāni maññanti etāyāti **maññanā**. Bhavaṃ bandhatīti **bandho**. Āsīyate patthīyateti **āsā**. Āsīyati patthetīti vā **āsā**. Pipāsīyateti **pipāsā**, ārammaṇarasam pipāsātīti vā **pipāsā**. Abhinandīyateti **abhinandanā**, abhinandatīti vā **abhinandanā**. Vitthārato aṭṭhakathāvasena (netti. aṭṭha. 20) veditabbo.

“Taṇhāya icchādippakāravasena ālapitabhāvo kena saddahitabbo”ti vattabbattā “**yathā ca vevacane**”tiādi vuttam. Vevacanahāravibhaṅge “āsā ca pīhā...pe... vevacana”nti (netti. 37) yā taṇhā **yathā** yena pakārena vuttā, tathā tena pakārena vuttāya taṇhāya icchādippakāravasena ālapitabhāvo saddahitabbo. “Vevacanavibhaṅge ācariyena vuttopi bhagavatā avutte kena saddahitabbo”ti vattabbattā “**yathāha bhagavā**”tiādi vuttam. **Yathā** yena pakārena bhagavā “rūpe tissā”tiādikam yaṃ vacanamāha, tathā tena pakārena vuttana tena vacanena saddahitabbo vāti. **Evaṃ yujjatīti** evaṃ vuttanayena icchātaṇhānaṃ atthato ekattā, jarāya ca maraṇassa ca taṇhāya ca atthato aññattā ca “tayo pañhā”ti yaṃ vacanam vuttam, taṃ vacanam yujjatīti attho gahetabbo.

21. “Kenassubbhāhato lokotiādigāthāya tayo pañhā vuttā”ti pañhattayabhāve yutti ācariyena vibhattā, amhehi ca ñātā. “Tato aññehi pakārehi yutti kathaṃ ñātābbā”ti vattabbabhāvato aññehi pakārehipi yuttigavesanaṃ dassento “**sabbo dukkhūpacāro**”tiādimāha. Tattha sabbo dukkhūpacāro kāmataṇhāsāṅkhāramūlakoti yujjati, sabbo nibbidūpacāro kāmataṇhāparikkhāramūlakoti na yujjati. Vacanatthato pana dukkhassa upacāro pavattīti **dukkhūpacāro**. Kāmataṇhāpaccayā pavatto saṅkhāro mūlam etassāti **kāmataṇhāsāṅkhāramūlako**. Nibbidāya upacāro pavattīti **nibbidūpacāro**. Kāmataṇhāya parikkhārabhūto vatthukāmo mūlam etassāti **kāmataṇhāparikkhāramūlakoti**. Tattha anabhiratisaṅkhātā ukkaṇṭhā nibbidā kāmataṇhāparikkhāramūlikā yujjati, ñāṇanibbidā kāmataṇhāparikkhāramūlikā na yujjati, tasmā sabbo nibbidūpacāro kāmataṇhāparikkhāramūlakoti na pana yujjatīti vuttam.

“Pañhattayabhāve ceva dukkhūpacāranibbidūpacāre ca yā yutti ācariyena vibhattā, sāva yutti sallakkhetabbā kiṃ, udāhu imāya yuttīyā aññāpi yutti gavesitabbā ki”nti vattabbato nayam dassetuṃ “**imāyā**”tiādimāha. Idaṃ vuttam hoti – pañhattayabhāve ceva dukkhūpacāranibbidūpacāre ca yā yutti mayā vibhattā, imāya yuttīyā anusārena aññamaññehi kāraṇehi tesu tesu pāḷippadesesu yuttipi gavesitabbāti.

“Idaṃ nayadassanaṃ samkhittam, na sakkā vitthārato gavesitu”nti vattabbato taṃ nayadassanaṃ vitthārato vibhajitvā dassetuṃ “**yathā hi bhagavā**”tiādi āradhāṃ. Asubhassa jigucchaniyabhāvato rāguppādo na yutto, tasmā **rāgacaritassa puggalassa** asubhadesanā rāgavinayāya yuttā. Mettāya dosapaṭipakkhattā **dosacaritassa puggalassa** mettādesanā dosavinayāya yuttā. Paṭiccasamuppādassa paññāvisayattā **mohacaritassa puggalassa** paṭiccasamuppādadesanā mohavinayāya yuttā. “Rāgacaritassāpi mettādidesanā yujjeyya sabbasattasādhāraṇattā”ti vattabbattā “**yadi hi bhagavā**”tiādi vuttam. Tibbakilesassa rāgacaritassa adhippetattā tādisassa puggalassa mettam cetovimuttim yadi deseyya, evaṃ sati mettāvasenapi rāguppajjanato desanā na yujjati. Sukham paṭipadam vā yadi deseyya, evaṃ sati rāgacaritassa dukkhāpaṭipadāyujjanato desanā na yujjati. Vipassanāpubbaṅgamaṃ pahānaṃ vā yadipi deseyya, evaṃ sati rāgacaritassa asubhānupassanaṃ vajjetvā vipassanāpubbaṅgamassa

pahānassa dukkarato desanā na yujjati yojanā.

“Bhagavā rāgacaritassā” tiādinā niravasesavasena yutti na vibhattā, nayadassanamevāti yo nayo dassito, tena nayena aññāpi gavesitabbāti dassetuṃ “**evaṃ yaṃ kiñci**” tiādi vuttaṃ. Rāgassa yaṃ kiñci anulomappahānaṃ, dosassa yaṃ kiñci anulomappahānaṃ, mohassa yaṃ kiñci anulomappahānaṃ desitaṃ, **taṃ sabbam** anulomappahānaṃ yattakā pālippadesā ñāṇassa bhūmi, tattakesu vicayena hārena vicinitvā yuttihārena yojetabbanti yojanā.

“Rāgādippahānavasena yutti gavesitabbā” ti vattabbabhāvato aññehipi mettādibrahmavihāraphalasangāpattinavānupubbasaṃpattivasābhāvehi vibhajitvā yuttigavesanaṃ dassetuṃ “**mettāvihārissa**” tiādi āradhamaṃ. Tatha **mettāvihārissa** mettāvihāralābhino **sato** saṃvijjamaṇassa puggalassa mettāya byāpādaṃ paṭipakkhattā **byāpādo** cittaṃ pariyādāya ṭhassatīti desanā na yujjati ca, mettāvihārissa sato byāpādo pahānaṃ abbatthamaṃ gacchatīti desanā yujjati. **Karuṇāvihārissa** karuṇāvihāralābhino **sato** saṃvijjamaṇassa puggalassa karuṇāya vihesāya paṭipakkhattā **vihesā** cittaṃ pariyādāya ṭhassatīti desanā na yujjati, karuṇāvihārissa sato vihesā pahānaṃ abbatthamaṃ gacchatīti desanā yujjati. **Muditāvihārissa** muditāvihāralābhino **sato** saṃvijjamaṇassa puggalassa muditāya aratiyā paṭipakkhattā **arati** cittaṃ pariyādāya ṭhassatīti desanā na yujjati, muditāvihārissa sato arati pahānaṃ abbatthamaṃ gacchatīti desanā yujjati. **Upekkhāvihārissa** upekkhāvihāralābhino **sato** saṃvijjamaṇassa puggalassa upekkhāya rāgassa paṭipakkhattā **rāgo** cittaṃ pariyādāya ṭhassatīti desanā na yujjati, upekkhāvihārissa sato rāgo pahānaṃ abbatthamaṃ gacchatīti desanā yujjati.

Animittāvihārissa aniccānupassanā mukhena paṭiladdhaphalasangāpattivihāralābhino **sato** saṃvijjamaṇassa puggalassa nimittānusāri **tena teneva** saṅkhāranimittānusāreneva niccādīsu pahīnena nimittena **viññānaṃ** pavattatīti desanā na yujjati, animittānupassanāya niccādivipallāsapaṭipakkhattā animittāvihārissa sato nimittamaṃ pahānaṃ abbatthamaṃ gacchatīti desanā yujjati. “Asmī” ti maññitaṃ khandhapañcakaṃ attavigātaṃ “ayaṃ khandhapañcako ahaṃ asmī” ti na samanupassāmi, atha ca pana asamanupassane satipi “me kiṃ asmī” ti “kathaṃ asmī” ti vicikicchā kathaṃkathāsallaṃ cittaṃ pariyādāya ṭhassatīti desanā na yujjati, vicikicchāya pahānekaṭṭhabhāvato “ayaṃ khandhapañcako ahaṃ asmī” ti asamanupassantassa vicikicchā kathaṃkathāsallaṃ pahānaṃ abbatthamaṃ gacchatīti desanā yujjati.

“Phalasangāpattivaseneva yutti gavesitabbā ki” nti vattabbattā jhānasamāpattivasenapi yutti gavesitabbāti dassetuṃ “**yathā vā pana paṭhamaṃ jhāna**” ntiādi āradhamaṃ. Atha vā “phalasangāpattivihārissa yutti gavesitabbā ki” nti vattabbattā jhānasamāpattivasenapi yutti gavesitabbāti dassetuṃ “**yathā vā pana paṭhamaṃ jhāna**” ntiādi āradhamaṃ. Tatha yathā paṭhamaṃ jhānaṃ samāpannaṃ phalasangāpattivihārissa yutti gavesitabbā, evaṃ jhānasamāpattivihārissapi yutti gavesitabbā. Kathamaṃ? **Paṭhamaṃ jhānaṃ samāpannaṃ** paṭhamajjhānasamaṅgino **sato** saṃvijjamaṇassa puggalassa nīvaraṇavikkhambhanaṃ **kāmarāgabyāpādā visesāya** dutiyajjhānāya saṃvattantīti desanā na yujjati, kāmarāgabyāpādā jhānassa hānāya saṃvattantīti desanā yujjati. **Vitakkasahagatā saññāmanasikārā** upacāradhammena saha dutiyajjhānadhammā jhānassa hānāya saṃvattantīti desanā na yujjati, vitakkasahagatā saññāmanasikārā **visesāya** uparijhanatthāya saṃvattantīti desanā yujjati.

Dutiyamaṃ jhānaṃ samāpannaṃ **sato** saṃvijjamaṇassa puggalassa **vitakkavicārasahagatā** vā **saññāmanasikārā** upacāradhammena saha paṭhamajjhānadhammā **visesāya** uparijhanatthāya saṃvattantīti desanā na yujjati, vitakkavicārasahagatā saññāmanasikārā avitakkajhānassa hānāya saṃvattantīti desanā yujjati. **Upekkhāsahagatā** vā **saññāmanasikārā** upacāradhammena saha catutthajjhānadhammā jhānassa hānāya saṃvattantīti desanā na yujjati, upekkhāsahagatā saññāmanasikārā **visesāya** uparijhanatthāya saṃvattantīti desanā yujjati. Sesesupi atthānurūpaṃ yojanā kātabbā. Yathāvuttasamāpattīsu vasābhāvena paricitaṃ **kallatāparicitaṃ cittaṃ** nāma.

Ettakameva yuttigavesanaṃ na kātabbaṃ, navavidhasuttantesu yathāladdayuttigavesanampi kātabbanti dassetuṃ “**evaṃ sabbe**”tiādi vuttaṃ. “Sabbesaṃ hārānaṃ yathāvuttabhūmigocarānaṃ vicayahārena vicinitvā yuttihārena yojetabbabhāvo kena saddahitabbo”ti vattabbattā “**tenāhā**”tiādi vuttaṃ. Tattha **tena** yojetabbabhāvena āyasmā mahākaccāno “sabbesa”ntiādikam yaṃ vacanaṃ āha, tena vacanena saddahitabboti vuttaṃ hoti.

Iti yuttihāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭṭhānūsārena gambhīrattho vitthārato vibhajitvā gahetabboti.

4. Padaṭṭhānahāravibhaṅgavibhāvanā

22. Yena yena saṃvaṇṇanāvīsesabhūtena yuttihāravibhaṅgabhūtena pañhāvissajjanādīnaṃ yuttāyuttabhāvo vibhatto, so saṃvaṇṇanāvīsesabhūto yuttihāravibhaṅgo paripuṇṇo, “katamo padaṭṭhānahāravibhaṅgo”ti pucchitabbattā “**tattha katamo padaṭṭhāno hāro**”tiādi āradham. Tattha **tatthāti** tesu niddiṭṭhesu soḷasasu desanāhārādīsu hāresu **katamo** saṃvaṇṇanāvīseso **padaṭṭhāno hāro** padaṭṭhānahāravibhaṅgoti pucchati. “Dhammaṃ desesi jino”tiādiniddesassa idāni mayā vuccamāno “ayaṃ padaṭṭhāno hāro”tiādiko vitthārasaṃvaṇṇanāvīseso padaṭṭhānahāravibhaṅgoti viññeyyo. Tena vuttaṃ – “tattha katamo padaṭṭhāno hārotiādi padaṭṭhānahāravibhaṅgo”ti (netti. aṭṭha. 22). “Ayaṃ idāni vuccamāno vitthārabhūto padaṭṭhāno hāro piṭakattaye desitesu dhammesu kiṃ nāma dhammaṃ desayati saṃvaṇṇetī”ti puccham ṭhapetvā “idaṃ āsannakāraṇaṃ imassa āsannaphalassa padaṭṭhāna”nti niyametvā vibhajituṃ “**ayaṃ padaṭṭhāno**”tiādi vuttaṃ. Tassattho – sabbesu viññeyyadhammesu yāthāvato asampaṭivedho lakkhaṇaṃ etissā avijjāyāti **sabbadhammayāthāvaasampaṭivedhalakkhaṇā**, avijjā, **tassā** avijjāya asubhe “subha”ntiādivipallāsā **padaṭṭhānaṃ** āsannakāraṇaṃ. Vipallāse sati avijjā vattati uparūpari jāyati na hāyati, tasmā vipallāsā avijjāya padaṭṭhānaṃ āsannakāraṇaṃ bhavanti. Avijjāya vaṭṭamūlakattā taṃ ādim katvā padaṭṭhānaṃ vibhattanti daṭṭhabbaṃ.

Tañhāyapi vaṭṭamūlakattā tadanantaram tañhāya padaṭṭhānaṃ vibhajituṃ “**ajjosānalakkhaṇā**”tiādi vuttaṃ. Tattha **piyarūpaṃ sātārūpanti** piyasabhāvaṃ sātasabhāvaṃ cakkhādīdhammajātaṃ. Piyanīyasātānīye cakkhādīke sati tañhā vattati uparūpari jāyati, tasmā piyarūpaṃ sātārūpaṃ tañhāya **padaṭṭhānaṃ** āsannakāraṇaṃ bhavati.

Adinnādāne sati lobho vattati, tasmā **adinnādānaṃ lobhassa padaṭṭhānaṃ** bhavati. Adinnādānañhi ekavāraṃ uppannampi anādīnavadassanato lobhassa āsannakāraṇaṃ bhavatveva.

Kesādīsu asubhesu pavattāyapi subhasaññāya nīlādivaṇṇadīghādīsañṭhānahāsanādībyañjanaggahaṇalakkhaṇattā cakkhundriyādīnaṃ **asaṃvaro subhasaññāya padaṭṭhānaṃ** bhavati.

Dukkhadukkhādīsu pavattāyapi sukhasaññāya sāsavaphassūpagamanalakkhaṇattā rūpādīsu **assādo sukhasaññāya padaṭṭhānaṃ**.

Rūpakkhandhādīsu anicesu pavattāyapi nīcāsāññāya saṅkhatalakkhaṇānaṃ dhammānaṃ asamanupassanalakkhaṇattā rūpakkhandhādīsu nīcaggahaṇaṃ **viññānaṃ nīcāsāññāya padaṭṭhānaṃ**.

Aniccadukkhānattasaṅkhātesu khandhādīsu pavattāyapi attasāññāya aniccāsāññādukkhasaññānaṃ asamanupassanalakkhaṇattā ahaṃmamādivasena pavatto **nāmakāyo attasāññāya padaṭṭhānaṃ**.

Evam avijjādīnaṃ akusalapakkhānaṃ dhammānaṃ padaṭṭhānaṃ dassetvā idāni tappaṭipakkhānaṃ vijjādīnaṃ dhammānaṃ padaṭṭhānaṃ dassetuṃ “**sabbadhammasampañivedhalakkhaṇā**”tiādi vuttaṃ. Sabbesu ñeyyadhammesu pavattāya vijjāya sabbadhammasampañivedhalakkhaṇattā **sabbaṃ neyyaṃ vijjāya padaṭṭhānaṃ**.

Samathassa cittavikkhepasāṅkhātauddhaccaṭṭisaṃharaṇasāṅkhātavikkhambhanalakkhaṇattā paṭibhāganimitabhūtā **asubhā samathassa padaṭṭhānaṃ**. Asubhāya hi taṇhāpaṭipakkhattā, taṇhāya ca abhāve samatho tiṭṭhatīti.

Adinnādānā veramaṇivasena pavattassa alobhassa icchāvacaraṭṭisaṃharaṇalakkhaṇattā **adinnādānā veramaṇī alobhassa padaṭṭhānaṃ**.

Pāṇātipātā veramaṇivasena pavattassa adosassa abyāpajjalakkhaṇattā **pāṇātipātā veramaṇī adosassa padaṭṭhānaṃ**.

Sammāpaṭipattivasena pavattassa amohassa vatthuavippaṭipattilakkhaṇattā **sammāpaṭipatti amohassa padaṭṭhānaṃ**.

Nibbidāvasena pavattāya asubhasaññāya vinīlakavipubbakagahaṇalakkhaṇattā **nibbidā asubhasaññāya padaṭṭhānaṃ**. Nibbidāññāna hi anabhirati pavattati, anabhiratiyā ca asubhasaññā ṭhitīti.

Dukkhavedanāvasena pavattāya dukkhasaññāya sāsavaphassaparijānanalakkhaṇattā **vedanā dukkhasaññāya padaṭṭhānaṃ**.

Uppādavayavasena pavattāya aniccasaññāya saṅkhatalakkhaṇānaṃ dhammānaṃ samanupassanalakkhaṇattā **uppādavayā aniccasaññāya padaṭṭhānaṃ**. Uppādavayañhi samanupassitvā aniccasaññā pavattā.

Dhammamattasaññāvasena pavattāya anattasaññāya sabbadhammaabhiniवेशalakkhaṇattā **dhammasaññā anattasaññāya padaṭṭhānaṃ**.

Kāmarāgassa rūpādipaṅcākāmaguṇārammaṇattā **pañca kāmaguṇā kāmarāgassa padaṭṭhānaṃ**.

Rūpasāṅkhāte kāye ārabha pavattassa rūparāgassa cakkhādipaṅcīndriyānaṃ anusārena pavattanato **pañcīndriyāni rūpāni rūparāgassa padaṭṭhānaṃ**.

Bhavanikantivasena pavattassa **bhavarāgassa chaḷāyatanam padaṭṭhānaṃ**. **Nibbattabhavānupassitīti** “edisam aṇiṭṭham rūpaṃ mā nibbattatu, edisam iṭṭham rūpaṃ nibbattatu edisī dukkhā vedanā mā nibbattatu, edisī sukhā vedanā nibbattatū”ti evamādinā pakārena pavattā rūpābhinandanā, **sā pañcannaṃ upādānakkhandhānaṃ padaṭṭhānaṃ**.

Kammassakataññāṇassa pubbenivāsānussatiññānugattā **pubbenivāsānussatiññānadassanaṃ kammassakataññāṇassa padaṭṭhānaṃ**.

Okappanaṃ lakkhaṇaṃ yassā saddhāyāti **okappanalakkhaṇā** saddhā. Adhimutti paccupaṭṭhānaṃ yassā saddhāyāti **adhimuttipaccupaṭṭhānā** ca saddhā. Anāvilam lakkhaṇaṃ yassa pasādassāti **anāvilalakkhaṇoti** pasādo. Sampasīdanaṃ paccupaṭṭhānaṃ yassa pasādassāti **sampasīdanapaccupaṭṭhāno** ca pasādo. So pana pasādo saddhāya eva avatthāvisesoti veditabbo. **Aveccapasādo** abhipatthiyānalakkhaṇāya saddhāya padaṭṭhānaṃ, **okappanalakkhaṇā** saddhā

anāvilalakkhaṇassa pasādassa padaṭṭhānaṃ, catubbidhaṃ **sammappadhānaṃ** vīriyaṃ ārambhalakkhaṇassa vīriyassa padaṭṭhānaṃ, kāyādisati**paṭṭhānaṃ** apilāpanalakkhaṇāya satiyā padaṭṭhānaṃ, jhānasahitassa samādhissa ekaggalakkhaṇattā vitakkādij**hānāni** samādhissa padaṭṭhānaṃ, paññāya kiccapajānanaārammaṇapajānanalakkhaṇattā **saccāni** paññāya padaṭṭhānaṃ.

“Yesaṃ avijjādīnaṃ padaṭṭhānāni ācariyena vibhattāni, te avijjādayo katamesaṃ dhammānaṃ padaṭṭhānāni” ti pucchitabbattā te avijjādayopi imesaṃ dhammānaṃ padaṭṭhānāni dassetuṃ “**aparo nayo**” tiādi vuttaṃ. **Avijjā** assādamanasikāralakkhaṇassa **ayonisomanasikārassa padaṭṭhānaṃ**. Avijjāya hi ādīnavacchādanato ayonisomanasikāro jātoti. Saccasammohanalakkhaṇā **avijjā** puññāpuññāneñjābhisa**ṅkhārānaṃ padaṭṭhānaṃ**, punabbhavavirohanalakkhaṇā tebhūmakacetanā **saṅkhārā** vipākaviññāṇassa **padaṭṭhānaṃ**, **opapaccayika**saṅkhātēna upapattibhavabhāvena **nibbattilakkhaṇaṃ** paṭisandhiviññāṇaṃ **nāmarūpassa padaṭṭhānaṃ**, nāmakāyarūpakāyasaṅghātalakkhaṇaṃ **nāmarūpaṃ chaḷāyatanassa padaṭṭhānaṃ** sahajātādīpaccayabhāvato, cakkhādīnaṃ channaṃ indriyānaṃ pavattānaṃ lakkhaṇaṃ **chaḷāyatanam** chabbidhassa **phassassa** yathākkamaṃ **padaṭṭhānaṃ** nissayādīpaccayabhāvato, cakkhupasādarūpārammaṇaṃ cakkhuvīññāṇādisannipātalakkhaṇo chabbidho **phasso**, taṃ **vedanāya** tena chabbidhena phassena sahajātāya chabbidhāya vedanāya yathākkamaṃ **padaṭṭhānaṃ** sahajātādīpaccayabhāvato, iṭṭhānubhavanaaniṭṭhānubhavana*iṭṭhāniṭṭhānubhavanalakkhaṇā* tividhā **vedanā**, taṃ **taṇhāya** tāya tividhāya vedanāya vasena pavattāya taṇhāya **padaṭṭhānaṃ** upanissayādīpaccayabhāvato, saparasantānesu ajjhosānalakkhaṇā **taṇhā**, taṃ **upādānassa** tāya taṇhāya vasena pavattassa catubbidhassa upādānassa **padaṭṭhānaṃ** upanissayādīpaccayabhāvato. “So vedanāya” ti ca “sā taṇhāya” ti ca “sā upādānassa” ti ca pāṭhena bhavitabbaṃ, līngavipallāsaniddeso vā siyā.

Yaṃ upādānaṃ **opapaccayikaṃ** upapattikkhandhanibbattaṃ, taṃ **upādānaṃ** duvidhassa **bhavassa padaṭṭhānaṃ**. Yo kammabhavo nāmakāyarūpakāyasambhavanalakkhaṇo, so kammabhavo **jātiyā padaṭṭhānaṃ**. Yā upapattibhūtā jāti khandhapātubhāvalakkhaṇā, taṃ sā **jāti jarāya padaṭṭhānaṃ**. Yā jīṇṇajarā upadhikkhandhaparipākālakkaṇā, taṃ sā jīṇṇajarā **maraṇassa padaṭṭhānaṃ**. Yampi yassa sammutimaraṇaṃ jīvitindriyupacchedalakkhaṇaṃ, tampi tassa sammutimaraṇaṃ **sokassa padaṭṭhānaṃ**. Piyassa maraṇaṃ cintentassa yebhuyyena sokuppajjanato yo soko ñātiādīpiyesu ussukkakārako, taṃ so **soko paridevassa padaṭṭhānaṃ**. Yo paridevo lālappakārako, taṃ so **paridevo kāyikadukkhassa padaṭṭhānaṃ**. Yaṃ kāyikaṃ dukkhaṃ kāyasampīlanalakkhaṇaṃ, taṃ kāyikaṃ **dukkhaṃ domanassassa padaṭṭhānaṃ**. Yaṃ domanassaṃ cittasampīlanalakkhaṇaṃ, taṃ **domanassaṃ upāyāsassa padaṭṭhānaṃ**. Yo upāyāso **odahanakārako** avadahanakārako, taṃ so **upāyāso bhavassa** upāyāsassa nissayasantānabhavassa **padaṭṭhānaṃ**.

Bhavassāti vuttabhavaṃ dassetuṃ “**imāni**” tiādi vuttaṃ. Tattha **bhavaṅgāni** kilesa bhavassa aṅgaṃ kāraṇaṃ kammavaṭṭavipākavaṭṭāni bhava**saṅkhātāni** aṅgāni avayavāni. Yadā paccuppannādikāle samaggāni nibbattāni bhavanti, tadā so kilesavaṭṭakammavaṭṭavipākavaṭṭasaṅkhāto dhammasamūho “bhavassā” ti ettha bhavoti daṭṭhabbo. **Taṃ** bhava**saṅkhātā**ṃ kilesavaṭṭakammavaṭṭavipākavaṭṭattayaṃ **saṃsārassa padaṭṭhānaṃ** purimaṃ purimaṃ jātinipphanna**kilesādivaṭṭena** saṃsārassa abocchinnuppajjanato, yo ariyamaggo niyyānikalakkhaṇo, taṃ so ariyamaggo **nirodhassa** nibbānassa **padaṭṭhānaṃ** sampāpakahetubhāvato.

Bahussuto sabbasissādīnaṃ patiṭṭhānattā titthaṃ viyāti **titthaṃ**, jānātīti **ñū**, titthaṃ ñūti **titthaññū**, titthaññūno bhāvo **titthaññūtā**, sammāpayirupāsana, sā **pītaññūtāya padaṭṭhānaṃ**. Bahussutassa hi sammāpayirupāsanaṃ dhammūpasaṅhitam pāmojjaṃ jāyati, pāmojjena ca kammaṭṭhānabrūhanā jāyatīti sappāyadhammassavanena pītim jānātīti **pītaññū**, pītaññūno bhāvo **pītaññūtā**, kammaṭṭhānassa brūhanā, sā **pattaññūtāya padaṭṭhānaṃ**. Kammaṭṭhānabrūhanāya hi bhāvanāpattajānanatā jāyatīti **pattaññūtā**. Bhāvanāpattajānanatā **attaññūtāya padaṭṭhānaṃ**. Bhāvanāpattajānanatāya hi pañcahi padhāniyaṅgehi samannāgatassa attano jānanatā jāyatīti **attaññūtā pubbekatapuññātāya**

padaṭṭhānaṃ.

Padhāniyaṅgesu samannāgatattajānanatāya hi pubbe puññakaraṇaṃ jātaṃ, **pubbekatapuññatā patirūpadesavāsassa padaṭṭhānaṃ**. Pubbe hi katena puññena patirūpadesavāso laddho, **patirūpadesavāso sappurisūpanissayassa padaṭṭhānaṃ**. Patirūpadesavāsena hi sappurisūpanissayo laddho, **sappurisūpanissayo attasammāpaṇidhānassa padaṭṭhānaṃ**. Sappurisūpanissayena hi attasammāpaṇidhānaṃ jātaṃ, **attasammāpaṇidhānaṃ silānaṃ padaṭṭhānaṃ**. Attasammāpaṇidhānena hi silāni sampatiṭṭhitāni, **silāni avipparisāraṇassa padaṭṭhānaṃ**. Attani hi sampatiṭṭhitaṃ silaṃ paccavekkhantassa vipparisāro natthevāti, avipparisārena pāmojjaṃ jāyati, tasmā **avipparisāro pāmojjassa padaṭṭhānaṃ**. Pāmojjena pīti jāyati, tasmā **pāmojjaṃ pītiyā padaṭṭhānaṃ**. Pītiyā passaddhi jāyati, tasmā **pīti passaddhiyā padaṭṭhānaṃ**. Passaddhiyā sukhaṃ jāyati, tasmā **passaddhi sukhaṃ padaṭṭhānaṃ**. Sukhena samādhī jāyati, tasmā **sukhaṃ samādhissa padaṭṭhānaṃ**. Samādhinā yathābhūtañāṇadassanaṃ jāyati, tasmā **samādhī yathābhūtañāṇassa padaṭṭhānaṃ**. Yathābhūtañāṇadassanena nibbidāñāṇaṃ jāyati, tasmā **yathābhūtañāṇadassanaṃ nibbidāya padaṭṭhānaṃ**. Nibbidāya virāgo jāyati, tasmā **nibbidā virāgassa padaṭṭhānaṃ**. Virāgena vimutti jāyati, tasmā **virāgo vimuttiyā padaṭṭhānaṃ**. Vimuttiyā vimuttiñāṇadassanaṃ jāyati, tasmā **vimutti vimuttiñāṇadassanassa padaṭṭhānaṃ**. **Evam** yathāvuttanayena **yo koci** dhammo upanissayo hoti, **yo koci** dhammo paccayo hoti, sabbo **so** dhammo attano paccayuppannassa dhammassa padaṭṭhānanti daṭṭhabbo.

“Upanissayadhammassa, paccayadhammassa vā paccayuppannadhammassa padaṭṭhānabhāvo kena saddahitabbo”ti vattabbattā **“tenāhā”**tiādi vuttaṃ. Tattha **tenāti** yassa kassaci upanissayadhammassa, paccayadhammassa ca paccayuppannadhammassa padaṭṭhānabhāvena āyasmā mahākaccāno “dhammaṃ deseti jino”tiādikaṃ yaṃ vacanaṃ āha, tena vacanena tesam upanissayadhammapaccayadhammānaṃ padaṭṭhānabhāvo saddahitabboti. “Yathāvutto padaṭṭhāno hāro paripuṇṇo kiṃ, udāhu añño niddhāretvā yojetabbo atthi ki”nti vattabbattā **“niyutto padaṭṭhāno hāro”**ti vuttaṃ. Idha pāliyaṃ avibhattampi yathālābhavasena padaṭṭhāno hāro nīharitvā yutto yujjitabbo, vibhajitabbanti vuttaṃ hoti.

Iti padaṭṭhānahāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭikānusārena gambhīrattho vitthārato vibhajitvā gahetabboti.

5. Lakkhaṇahāravibhaṅgavibhāvanā

23. Yena yena saṃvaṇṇanāvīsesabhūtena padaṭṭhānavibhaṅgena avijjādīnaṃ padaṭṭhānāni vibhattāni, so saṃvaṇṇanāvīsesabhūto padaṭṭhānahāravibhaṅgo paripuṇṇo, “katamo lakkhaṇahāravibhaṅgo”ti pucchitabbattā **“tattha katamo lakkhaṇo hāro”**tiādi vuttaṃ. Tattha **tattha-**saddassa attho vuttova. **Katamo** saṃvaṇṇanāvīseso **lakkhaṇo hāro** lakkhaṇahāravibhaṅgoti pucchati. “Vuttamhi ekadhamme”tiādiniddesassa idāni mayā vuccamāno “ye dhammā”tiādiko vitthārasaṃvaṇṇanāvīseso lakkhaṇo hāro lakkhaṇahāravibhaṅgo nāmāti viññeyyoti. Tena vuttaṃ – “tattha katamo lakkhaṇo hārotiādi lakkhaṇahāravibhaṅgo nāmā”ti (netti. aṭṭha. 23). Ayaṃ idāni vuccamāno vitthārabhūto lakkhaṇo hāro piṭakattaye desitesu dhammesu kiṃ nāma lakkhitabbaṃ dhammaṃ lakkhiyātīti pucchitvā pucchite lakkhaṇahāravīcaye dhamme saṅkhepena dassetuṃ **“ye dhammā”**tiādi vuttaṃ. Tattha **ye dhammā**ti ye samūhā dhammā. **Ekalakkhaṇā**ti samānalakkhaṇā. **Tesaṃ dhammā**nanti samānalakkhaṇānaṃ tesaṃ samūhadhammānaṃ, niddhāraṇe cetam. **Ekasmim dhammeti** samānalakkhaṇe ekasmim dhamme, pāliyaṃ bhagavatā vutte sati vuttadhammato avasiṭṭhasamānalakkhaṇā dhammā samānalakkhaṇena vuttā bhavanti attho.

Lakkhaṇahāraṇisaye dhamme vitthārato imasmim dhamme vutte ime samānalakkhaṇā dhammāpi vuttā bhavanti niyametvā dassetuṃ “**yathā kiṃ bhave**”tiādimāha. Tassattho – **yathā** yena pakārena vuttā bhavanti, so pakāro kiṃ bhaveti pucchati. **Yathā** yena pakārena vuttā bhavanti, so pakāro samānalakkhaṇāti bhāvo bhaveti attho. Kinti bhagavā āha? “Cakkhuṃ bhikkhave”tiādim bhagavā āha. “Cakkhuṃ, bhikkhave, anavaṭṭhita”ntiādimhi vutte “**sotaṃ, bhikkhave, anavaṭṭhita**”ntiādivacanampi vuttameva bhavati.

“Anavaṭṭhitādilakkhaṇena samānalakkhaṇattā vā ajjhattikāyatanabhāvena samānalakkhaṇattā vāti āyatanavaseneva ekalakkhaṇaṃ vattabba”nti vattabbattā khandhavasenevāpi ekalakkhaṇaṃ dassetuṃ “**yathā cāhā**”tiādi vuttaṃ. “Atīte, rādha, rūpe anapekkho hoti, anāgataṃ rūpaṃ mā abhinandi, paccuppanassa rūpassa nibbidāya virāgāya nirodhāya cāgāya paṭinissaggāya paṭipajjā”ti vutte “atītāya, rādha, vedanāya anapekkho hoti, anāgataṃ vedanaṃ mā abhinandi, paccuppanāya vedanāya nibbidāya virāgāya nirodhāya cāgāya paṭinissaggāya paṭipajjā”tiādi vuttaṃ bhave.

“Anapekkhanīyalakkhaṇena samānalakkhaṇattā vā khandhalakkhaṇena samānalakkhaṇattā vāti khandhāyatanavaseneva ekalakkhaṇadhammā vattabbā”ti vattabbattā satipaṭṭhānavasenevāpi vattabbāti dassetuṃ “**yathāhā**”tiādi vuttaṃ. Tattha **yathā** yena ekalakkhaṇattena ca bhagavā āha, tathā ca tena ekalakkhaṇattena ca avuttāpi dhammā vuttā bhavanti attho. Ye vipassakā puggalā pañcasu khandhesu niccaṃ susamāradhā niccaṃ kāyagatāsatiṃ bhāventi, **te** vipassakā **akiccaṃ** subhasukhādikaṃ, kasivāñijjādikammaṃ vā na sevanti, **kiṅce** asubhāsukhādike, kāyādike vā sātaccakārino hontīti bhagavā āhāti yojanā.

Itisaddassa cettha ekassa lopo. **Iti** evaṃ “**yesañcā**”tiādigāthāya kesādike kāye gatāya pavattāya satiyā bhagavatā sarūpena vuttāya vijjamānāya tadavasesā vedanāgatā sati ca cittagatā sati ca dhammagatā sati ca satipaṭṭhānabhāvena ekalakkhaṇattena vuttā bhavanti saṅkhepato niccaṃ susamāradhā niccaṃ vedanāgatā sati ca...pe... niccaṃ cittagatā sati ca...pe... niccaṃ dhammagatā satīti vattabbāti.

“Satipaṭṭhānavaseneva ekalakkhaṇā dhammā vattabbā”ti vattabbattā “**tathā yaṃ kiñci**”tiādi vuttaṃ. Tattha **yaṃ kiñci** rūpāyatanaṃ cakkhuvīññānena diṭṭhaṃ, **yaṃ kiñci** saddāyatanaṃ sotavīññānena suttaṃ, **yaṃ kiñci** gandharasaphoṭṭhabbāyatanaṃ ghānavīññānādittayena viññānena mutaṃ, **iti** evaṃ diṭṭhādittaye bhagavatā sarūpena vutte sati tadavasesaṃ yaṃ kiñci viññātaṃ dhammārammaṇapariyāpannaṃ rūpaṃ bhagavatā ālambitabbabhāvena ekalakkhaṇattā vuttaṃ bhavati attho. Atha vā **yaṃ kiñci** rūpāyatanaṃ diṭṭhaṃ bhagavatā vuttaṃ, tasmim vutte sati tadavasesaṃ sutādikampi vuttaṃ hotīti ādiattho visuṃ visuṃ yojetabbo. Tena vuttaṃ – “**diṭṭhaṃ vā suttaṃ vā mutaṃ vā**”ti.

“Kāyagatāya satiyā vuttāya tadavasesā vedanāgatāsatiādayoyeva vattabbā”ti pucchitabbattā sattatimsabodhipakkhiyadhammāpi vuttā bhavanti dassetuṃ “**yathā cāha bhagavā**”tiādi vuttaṃ. Tattha **yathā** yena niyyānikalakkhaṇena ekalakkhaṇattena ca bhagavā āha, tathā tena ekalakkhaṇattena ca bhagavā āha, tathā tena ekalakkhaṇattena ca vuttā bhavanti attho. “**Tasmā** abhijjhādomanassena abhibhūtattā **iha** mama sāsane, bhikkhu, tvaṃ ātāpī sampajāno satimā hutvā loke abhijjhādomanassaṃ tadanāgappahānena vā vikkhambhanappahānena vā **vineyya** vinayitvā **kāye** kesādirūpakāye **kāyānupassī** kesādirūpakāyānupassī hutvā viharāhi”ti bhagavatā vutte sati “tasmātiha, tvaṃ bhikkhu, vedanāsu vedanānupassī viharāhi ātāpī sampajāno satimā vineyya loke abhijjhādomanassaṃ, tasmātiha, tvaṃ bhikkhu, citte cittānupassī viharāhi...pe... domanassaṃ, tasmātiha, tvaṃ bhikkhu, dhammesu dhammānupassī viharāhi...pe... domanassa”nti vuttaṃ bhavati saṅkhepattho veditabbo. Vitthārattho pana **aṭṭhakathāyaṃ** (netti. aṭṭha. 23) bahudhā vuttoti amhehi na vitthārato.

“Ekasmim satipaṭṭhāne vutte kasmā cattāro satipaṭṭhānā vuttā bhavēyyu”nti vattabbattā “**ātāpīti vīriyindriya**”ntiādi vuttaṃ. Tattha “**ātāpī**”ti iminā padena kāyavedanācittadhammesu pavattaṃ

vīriyindriyaṃ vuttaṃ. **“Sampajāno”**ti padena kāyavedanācittadhammesu pavattaṃ paññindriyaṃ vuttaṃ. **“Satimā”**ti padena kāyavedanācittadhammesu pavattaṃ satindriyaṃ vuttaṃ. **“Vineyya loke abhijjhādomanassa”**nti padena kāyavedanācittadhammesu pavattaṃ samādhindriyaṃ vuttaṃ, na kāyeyeva pavattaṃ. **Evam** pakārena kāye **kāyānupassino** yogāvacarassa cattāro satipaṭṭhānā bhāvanāpāripūriṃ gacchantīti ce vadeyya, evaṃ sati catunnaṃ vīriyapaññāsatisamādhīnaṃ indriyānaṃ catunnaṃ satipaṭṭhānānaṃ sādhakabhāvena ekalakkhaṇattā samānalakkhaṇattā pāripūriṃ gacchantīti yojanā. Tena vuttaṃ **aṭṭhakathāyaṃ** – **“catusatipaṭṭhānasādhane imesaṃ indriyānaṃ sabhāvabhedābhāvato samānalakkhaṇattā”**ti (netti. aṭṭha. 23).

24. **“Evaṃ vuttepi cattāro satipaṭṭhānāyeva vattabbā bhaveyyuṃ, kathaṃ sattatiṃsabodhipakkhiyadhammā vattabbā”**ti vattabbattā **“catūsu satipaṭṭhānesū”**tiādi vuttaṃ. Tattha catūsu satipaṭṭhānesu yena yogāvacarena bhāviyamānesu tassa yogāvacarassa cattāro sammappadhānā bhāvanāpāripūriṃ gacchanti. Evaṃ sesesupi yojanā kātābbā. Catunnaṃ saccānaṃ bujjanānaṃ **bodhaṃ**, ariyamaggañānaṃ, bodhaṃ gacchantīti **bodhaṅgamā**. Bodhassa ariyamaggañānaṃ pakkhe bhavāti **bodhipakkhiyā**.

“Kusalāyeva dhammā ekalakkhaṇabhāvena nīharitā kiṃ, udāhu akusalāpi dhammā”ti pucchitabbattā **“evaṃ akusalāpi”**tiādi vuttaṃ. Tattha kusalā dhammā ekalakkhaṇattena niddhāritā yathā, evaṃ akusalāpi dhammā ekalakkhaṇattena niddhāritabbāyevāti attho. **“Kathaṃ niddhāretabbā”**ti pucchitabbattā pahānekaṭṭhabhāvena niddhāretabbāti dassento **“ekalakkhaṇattā pahānaṃ abbatthaṃ gacchantī”**ti āha. Tattha **ekalakkhaṇattā**ti pahānekaṭṭhabhāvena samānalakkhaṇattā. **“Katamaṃ pahānaṃ abbatthaṃ gacchantī”**ti pucchitabbattā **“catūsu satipaṭṭhānesū”**tiādi vuttaṃ.

Tattha **catūsu...pe... pariññaṃ gacchantīti** kāyāgatāsatiṭṭhāne yogāvacarena bhāviyamāne sati tena yogāvacarena asubhe kesādike rūpakāye **“subha”**nti vipallāso pahīyati, assa yogāvacarassa kabaḷikārāhāro pariññaṃ gacchati, **“āhārasamudayā rūpasamudayo”**ti (saṃ. ni. 3.56) vuttattā rūpakāye chandarāgaṃ pajahantassa tassa samudaye kabaḷikārāhārepi chandarāgo pahīyatīti attho. Vedanāgatāsatiṭṭhāne bhāviyamāne sati dukkhe **“sukha”**nti vipallāso pahīyati, assa yogāvacarassa phassāhāro pariññaṃ gacchati, **“phassapaccayā vedanā”**ti (ma. ni. 3.126; saṃ. ni. 2.1, 39; mahāva. 1; udā. 1; vibha. 225) vuttattā vedanāya chandarāgaṃ pajahantassa tassa paccaye phassāhāre chandarāgo pahīyati. Cittāgatāsatiṭṭhāne bhāviyamāne anicce **“nicca”**nti vipallāso pahīyati, assa yogāvacarassa viññāṇāhāro pariññaṃ gacchati. Dhammagatāsatiṭṭhāne bhāviyamāne anattani **“attā”**ti vipallāso pahīyati, assa yogāvacarassa manosañcetanāhāro pariññaṃ gacchantīti visuṃ visuṃ yojetvā ekekasmim pahātabbe vutte tadavasesā pahātabbā vuttā bhavanti pahātabbabhāvena ekalakkhaṇattāti attho gahetabbo.

“Āhārā cassa pariññaṃ gacchantī”ti vacane āhāresu pavattā kāmāragadosamohā byantīkatā hontīti attho gahito. Kabaḷikārāhārañhi ārabba pavatte kāmārage vijjamāne kabaḷikārāhārassa vijjanānaṃ nattheva, tasmim kāmārage pana pahīne pariḷānaṃ bhavātīti. Sesāhārajānaṃpi eseva nayo. Yassa yogāvacarassa satipaṭṭhānā bhāvitā, vipallāsā pahīnā, āhārapariḷānaṃ uppannā, so yogāvacaro upādānehi anupādāno bhavati. Subhasaññite hi kāye kāmupādānaṃ visesena bhavātīti subhasaññito kāyo kāmupādānaṃ vattu, kāyāgatāya satiyā anusaritabbo asubhasaññito kesādi kāmupādānaṃ vattu na hotveva. Sukhavedanāya assādasena diṭṭhupādānaṃ bhavātīti sukhasaññitā vedanā diṭṭhupādānaṃ vattu, vedanāgatāya pana satiyā anupassitabbā vedanā diṭṭhupādānaṃ vattu na hotveva. **“Cittaṃ nicca”**nti diṭṭhigahaṇavasena tassa tassa attano sīlavatavasena parisuddhīti parāmasanaṃ hotīti cittaṃ sīlabbatupādānaṃ vattu, cittaṃ gatāya pana satiyā anupassitabbā cittaṃ sīlabbatupādānaṃ vattu na hotveva. Dhamme nāmarūpaparicchedena yathābhūtaṃ apassantassa dhammesu attābhīniveso hotīti dhammā attavādupādānaṃ vattu, dhammagatāya pana satiyā anupassitabbā dhammā attavādupādānaṃ vattu na honti eva. Tasmā catūsu satipaṭṭhānesu bhāviyamānesu upādānehi anupādāno bhavātīti vuttanti adhippāyo gahetabbo.

“Yena yogāvacarena satipaṭṭhānā bhāvitā, so yogāvacaro upādānehiyeva anupādāno bhavatī” ti pucchitabbattā yogādīhi pi viṣaṃyutto bhavatīti dassetuṃ **“yogehi ca viṣaṃyutto”**tiādi vuttaṃ. Tatha **yogehi cāti** kāmayogabhavayogadiṭṭhiyogaavijjāyogehi ca. **Viṣaṃyuttoti** tadaṅgappahānavikkhambhanappahānasamucchedappahānavasena vīgato, vimutto ca bhavatīti attho. Subhasaññito hi rūpakāyo kāmarāgassa vatthu hoti, kāyagatāya pana satiyā anupassitabbo kāyo kāmarāgassa vatthu na hotveva. “Sukho”ti vā “sukhahetū”ti vā gahaṇīyo bhavo bhavarāgassa vatthu hoti, vedanāgatāya pana satiyā anupassitabbo bhavo bhavarāgassa vatthu na hoti. “Attā”ti abhinivisitabbaṃ cittaṃ diṭṭhiyogassa vatthu hoti, cittaगतāya pana satiyā anupassitabbaṃ cittaṃ diṭṭhiyogassa vatthu na hoti. Vinibbhogassa dukkarattā, dhammānaṃ dhammamattatāya ca duppaṭivijjhata avinibbhujitabbā, dhammamattatāya appaṭivijjhitaṭṭhā dhammā avijjāyogassa vatthu honti, dhammagatāya pana satiyā anupassitabbā dhammā avijjāyogassa vatthu na honti. Tasmā catusatipaṭṭhānānupassako **“yogehi ca viṣaṃyutto”**ti vutto. Ayaṃ nayo **āsavehi ca anāsavo bhavati, oghehi ca nitthiṇṇo bhavatīti** etthāpi yojetabbo.

Ganthehi ca vippayutto bhavatīti ettha pana subhasaññito rūpakāyo abhijjhākāyaganthassa vatthu, kāyagatāya pana satiyā anupassitabbo rūpakāyo abhijjhākāyaganthassa vatthu na hoti. Dukkhadukkhavipariṇāmadukkhasankhāradukkhabhūtā vedanā byāpādakāyaganthassa vatthu honti, tena vuttaṃ – “dukkhāya vedanāya paṭighānusayo anusetī”ti (ma. ni. 1.465). Vedanāgatāya pana satiyā anupassitabbā vedanā byāpādakāyaganthassa vatthu na hoti. “Cittaṃ nicca”nti abhinivesavasena sassatassa “attano sīlena suddhi, vatena suddhi”ti parāmasanaṃ hoti, tasmā “nicca”nti gahitaṃ cittaṃ sīlabbataparāmāsakāyaganthassa vatthu, cittaगतāya pana satiyā anupassitabbaṃ cittaṃ sīlabbataparāmāsassa vatthu na hoti. Dhammānaṃ sappaccayanāmarūpasabhāvassa adassanato bhavadiṭṭhivibhavaditṭhi hoti, tasmā “idaṃ sacca”nti abhinivisitabbā dhammā idamsaccābhinivesakāyaganthassa vatthu, dhammagatāya pana satiyā anupassitabbā dhammā idamsaccābhinivesakāyaganthassa vatthu na honti, tasmā catusatipaṭṭhānānupassako **“ganthehi ca vippayutto”**ti vutto.

Subhasaññito ca kāyo rāgasallassa vatthu, kāyagatāya pana satiyā anupassitabbo kāyo rāgasallassa vatthu na hoti. Sukhasaññitāya vedanāya doso hoti, tasmā vedanā dosasallassa vatthu, vedanāgatāya pana satiyā anupassitabbā vedanā dosasallassa vatthu na hoti. “Cittaṃ attā”ti gahetvā “attā seyyo”tiādivasena pavattassa mānasallassa cittaṃ vatthu, cittaगतāya pana satiyā anupassitabbaṃ cittaṃ mānasallassa vatthu na hoti. Dhammānaṃ sappaccayanāmarūpasabhāvassa ajānanato dhammā mohasallassa vatthu, dhammagatāya pana satiyā anupassitabbā dhammā mohasallassa vatthu na honti, tasmā catusatipaṭṭhānānupassako **“sallehi ca visallo bhavatī”**ti vutto.

“Āhārā cassa pariññaṃ gacchantī”ti ācariyena vuttaṃ, “kiṃ pana āhārāva assa yogāvacarassa pariññaṃ gacchantī, udāhu aññepī”ti pucchitabbattā viññāṇaṭṭhitiyo ca assa yogāvacarassa pariññaṃ gacchantīti dassetuṃ **“viññāṇaṭṭhitiyo cassa pariññaṃ gacchantī”**ti vuttaṃ. Yena yogāvacarena cattāro satipaṭṭhānā bhāvitā, tassa yogāvacarassa kāyavedanācittadhammāva pariññaṃ gaccheyyūṃ, na viññāṇaṭṭhitiyoti ce vadeyya kāyānupassanādīhi ca kāyavedanācittadhammesu pariññātesu saññāyapi pariññātabbhāvato. Sā hi vedanācittasankhātena dhammesu pariññātesu avinābhāvato pariññātāvāti.

Yena cattāro satipaṭṭhānā bhāvitā, so yogāvacaro upādānehi anupādāno ca, yogehi viṣaṃyutto ca, khandhehi vippayutto ca, āsavehi anāsavo ca, oghehi nitthiṇṇo ca, sallehi visallo ca bhavatīti vutto, “kiṃ pana tathāvidhova hoti, udāhu aññathāpi”ti pucchitabbattā agatimpi na gacchatīti dassento **“agatigamanehi ca na agatiṃ gacchatī”**ti āha. Subhādīsaññite rūpakāye apekkhamāno puggalo chandāgatiṃ gacchatīti subhādīsaññito rūpakāyo viṣesato chandāgatiyā vatthu hoti, kāyānupassanāsatiipaṭṭhānena pana anupassitabbo assāsapassāsādiko kāyo chandāgatiyā vatthu na hoti, tasmā kāyānupassanāsatiipaṭṭhānabhāvanā bhāvento puggalo chandāgatiṃ na gacchati. Sukhavedanāssādavasena vedayamāno tadabhāvena byāpādaṃ āgacchatīti sukhavedanā dosāgatiyā vatthu hoti, vedanānupassanāsatiipaṭṭhānena pana anupassitabbā vedanā dosāgatiyā vatthu na hoti, tasmā

vedanāsatiṭṭhānabhāvanam bhāvento puggalo dosāgatiṃ na gacchati. Santatighanavasena “niccam, dhuva”nti gahitaṃ cittaṃ mohassa vatthu hoti, cittānupassanāsatiṭṭhānena pana anupassitabbam cittaṃ mohassa vatthu na hoti, tasmā cittānupassanāsatiṭṭhānabhāvanam bhāvento puggalo dosāgatiṃ na gacchati. Vibhajitvā dhammasabhāvam aṅānantassa bhayaṃ jāyatīti vibhajitvā aṅāniasabhāvā dhammā bhayassa vatthu honti, dhammānupassanāsatiṭṭhānena pana anupassitabbā vibhajitvā jānitabbā dhammā rāgassa vatthu na honti, tasmā dhammānupassanāsatiṭṭhānabhāvanam bhāvento puggalo bhayāgatiṃ na gacchati. Evaṃ pahātabbabhāvena ekalakkhaṇe akusalepi dhamme nīharitvā idāni nigametuṃ “**evaṃ akusalāpi dhammā ekalakkhaṇattā pahānam abbattham gacchantī**”ti puna vuttam.

Bhāvetabbesu dhammesu ekadesesu vutte tadavasesāpi bhāvetabbā dhammā ekalakkhaṇattā nīharitvā vattabbā, pahātabbesupi dhammesu ekadesē vutte tadavasesāpi dhammā pahātabbā ekalakkhaṇattā nīharitvā vattabbāti ācariyena vuttā, amhehi ca nātā, “aññathāpi yadi vattabbā siyuṃ, tepi vadathā”ti vattabbabhāvato aññenāpi pariyaēna lakkhaṇahārassa udāharaṇāni dassetuṃ “**yattha vā panā**”tiādi vuttam. Tattha **yattha** yassaṃ rūpekadesadesanāyam **rūpindriyam** ruppanalakkhaṇam cakkhundriyādijīvitindriyapariyosānam aṭṭhavidham indriyam rūpekadesam bhagavatā desitam. **Tattheva** tassaṃ rūpekadesadesanāyam **rūpadhātu** ruppanalakkhaṇā cakkhudhātādiphoṭṭhabbadhātupariyosānā dasavidhā rūpadhātu ruppanalakkhaṇena ekalakkhaṇattā desitā. Sabbo **rūpakkhando** ca desito. **Rūpāyanam** ruppanalakkhaṇam cakkhāyanādiphoṭṭhabbāyanapariyosānam dasavidham āyanam ruppanalakkhaṇena ekalakkhaṇattā bhagavatā desitam.

Yattha vā pana yassaṃ vedanekadesadesanāyam sukhā vedanā bhagavatā desitā, **tattha** tassaṃ vedanekadesadesanāyam **sukhindriyaṇca** desitam, **somanassindriyaṇca** desitam, **dukkhasamudayo ariyasaccaṇca** desitam sukhavedanābhāvena ekalakkhaṇattā. **Yattha vā pana** yassaṃ vedanekadesadesanāyam dukkhā vedanā bhagavatā desitā, **tattha** tassaṃ vedanekadesadesanāyam **dukkhindriyaṇca** desitam **domanassindriyaṇca** desitam, **dukkham ariyasaccaṇca** desitam sukhavedanābhāvena ekalakkhaṇattā. **Yattha vā pana** yassaṃ vedanekadesadesanāyam adukkhamasukhā vedanā bhagavatā desitā, **tattha** tassaṃ vedanekadesadesanāyam **upekkhindriyaṇca** desitam, **sabbo paṭiccasamuppādo ca** desitoti yojanā kātābbā.

Yassaṃ desanāyam adukkhamasukhā vedanā desitā, tassaṃ desanāyam upekkhindriyam desitam hotu samānalakkhaṇattā, “kena paṭiccasamuppādo desito bhaveyyā”ti vattabbabhāvato “**kena kāraṇenā**”ti pucchitvā kāraṇam dassetuṃ “**adukkhamasukhāyā**”tiādi vuttam. Tattha adukkhamasukhāya vedanāya **hi** yasmā avijjā anuseti, tasmā avijjā desitā hoti. Avijjāya ca desitāya avijjāmūlako sabbopi paṭiccasamuppādo “avijjāpaccayā saṅkhārā...pe... dukkhakkhandhassa samudayo hotī”ti desitova hotīti adhippāyo daṭṭhabbo.

“Avijjāpaccayā saṅkhārā...pe... samudayo hotī”ti anulomavasena pavatto yo paṭiccasamuppādo desitoti ācariyena vutto, “yadi tathā pavatto so ca paṭiccasamuppādo desito, evaṃ satī sabbo ca paṭiccasamuppādo desito”ti na vattabboti codanam manasi katvā “**so cā**”tiādi vuttam. Tattha yo ca anulomavasena pavatto, **so ca sarāgasadosasamohasamkilesapakkhena hātabbo**. Yo ca paṭilomavasena “avijjāya tveva asesavirāganirodhā saṅkhāranirodho”tiādiko pavatto, **so ca vītarāgavītadosavītamohaariyadhammehi hātabbo**. Yo ca anulomapaṭilomavasena pavatto, so ca tadubhayehi hātabbo. Tasmā “sabbo ca paṭiccasamuppādo desito”ti vattabbovāti adhippāyo gahetabbo.

“Ye dhammā ekalakkhaṇā, tesam dhammānam ekasmiṃ dhamme vutte avasiṭṭhā dhammā vuttā bhavantītiādinā (netti. 23) ācariyena yā lakkhaṇahārayojanā vuttā, sāva kātābbā, na aññathā kātābbā”ti pucchitabbabhāvato aññathāpi lakkhaṇahārayojanā kātābbāyevāti dassetuṃ “**evaṃ ye dhammā**”tiādi vuttam. Tattha **ye** pathavīdayo rūpadhammā, **ye** phassādayo arūpadhammā sandhāraṇādikiccato saṅghaṭṭanādikiccato ekalakkhaṇā, **tesam** rūpārūpadhammānam ekasmiṃ dhamme vutte avasiṭṭhā

rūpārūpadhammā vuttā bhavanti. **Ye** pathavīdayo rūpadhammā, **ye** phassādayo arūpadhammā kakkhaḷāḍḍilakkhaṇato phusanāḍḍilakkhaṇato ekalakkhaṇā, **tesaṃ** rūpārūpadhammānaṃ ekasmiṃ dhamme vutte avasiṭṭhā rūpārūpadhammā vuttā bhavanti. **Ye** dhammā ruppanasāmaññato namanasāmaññato aniccādisāmaññato vā khandhāyatanādisāmaññato vā ekalakkhaṇā, **tesaṃ** saṅkhatadharmānaṃ ekasmiṃ saṅkhatadhamme vutte avasiṭṭhā dhammā vuttā bhavanti. **Ye** saṅkhatadharmā bhaṅguppādato saṅkhatato **cutūpapātato** samānanirodhuppādasāṅkhatato vā **cutūpapātato** ekalakkhaṇā, **tesaṃ** saṅkhatadharmānaṃ ekasmiṃ saṅkhatadhamme vutte avasiṭṭhā saṅkhatadhammā vuttā bhavanti itthi atthayojanā kātābā.

Kiccato ca lakkhaṇato cātiādīsu ca-saddena saha caraṇasamānāhetutādayo saṅgahitāti datṭhabbā. Sahacaraṇādīsu ca yaṃ vattabbaṃ, taṃ “nānattakāyanānattasaññino (dī. ni. 3.341, 357, 359; a. ni. 9.24), nānattasaññānaṃ amanasikārā”tiādīsu saha cārītāya saññāsahagatā dhammā niddhāritātiādīnā vuttameva.

“Ekasmiṃ dhamme sarūpato vutte ekalakkhaṇādito avasiṭṭhadhammānampi vuttabhāvo kena amhehi jānitabbo saddahitabbo”ti vuttabbabhāvato “**tenā**”tiādi vuttaṃ. Tattha **tena** avasiṭṭhadhammānampi vuttabhāvena “vuttamhi ekadhamme”tiādikaṃ yaṃ vacanaṃ āyasmā mahākaccāno āha, tena vacanena tumhehi avasiṭṭhānampi vuttabhāvo jānitabbo saddahitabboti vuttaṃ hoti.

“Ettāvātā ca lakkhaṇahāro paripuṇṇo, añño niyutto natthi”ti vuttabbattā “**niyutto lakkhaṇo hāro**”ti vuttaṃ. Tattha yassaṃ pāḷiyaṃ ekasmiṃ dhamme vutte avasiṭṭhadhammāpi yena lakkhaṇahārena niddhāritā, tassaṃ pāḷiyaṃ so lakkhaṇo hāro **niyutto** niddhāretvā yojitoti attho datṭhabboti.

Iti lakkhaṇahāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭīkānusārena gambhīrattho vitthārato vibhajitvā gahetabboti.

6. Catubyūhahāravibhaṅgavibhāvanā

25. Yena yena saṃvaṇṇanāvīsesabhūtena lakkhaṇahāravibhaṅgena suttatthehi samānatthā vibhattā, so saṃvaṇṇanāvīsesabhūto lakkhaṇahāravibhaṅgo paripuṇṇo, “katamo catubyūhahāravibhaṅgo”ti pucchitabbattā “**tattha katamo catubyūho hāro**”tiādi vuttaṃ. Tattha **tatthā**ti tesu niddiṭṭhesu soḷasasu desanāhārādīsu. **Katamoti** katamo saṃvaṇṇanāvīseso catubyūho hāro catubyūhahāravibhaṅgo nāmāti viññeyyo. Tena vuttaṃ – “tattha katamo catubyūho hāroti catubyūhahāravibhaṅgo”ti (netti. aṭṭha. 25). “Iminā catubyūhahārena katamassa neruttādayo gavesitabbā”ti pucchitabbattā “**byañjanenā**”tiādi vuttaṃ. Tattha **byañjanenā**ti catubyūhahārassa suttassa vīsesato byañjanavicayabhāvato “byañjanā”ti vohāritena iminā catubyūhahārena suttassa neruttañca, suttassa adhippāyo ca, suttassa nidānañca, suttassa pubbāparasandhi ca saṃvaṇṇentehi gavesitabboti attho.

“Catubyūhahārena gavesitabbesu neruttādīsu katamaṃ suttassa gavesitabbaṃ nerutta”nti pucchitabbattā “**tattha katamaṃ nerutta**”ntiādi vuttaṃ. Tassattho – **tattha** tesu iminā catubyūhahārena gavesitabbesu neruttādīsu katamaṃ suttassa **neruttaṃ** nibbācanaṃ nāmāti ce puccheyya? Suttassa yā **nirutti** niddhāretvā vuttā sabhāvapaññatti gavesitabbā, idaṃ sabhāvaniruttibhūtaṃ nibbācanaṃ neruttaṃ nāmāti. “Yā nirutti neruttaṃ nāmāti vuttā, kā pana sā nirutti”ti pucchitabbattā “**padasaṃhitā**”ti vuttaṃ. Padesu saṃhitā yuttā **padasaṃhitā**. Yathā yathā suttattho vattabbo, tathā tathā yā sabhāvanirutti pavattā, sā pavattā sabhāvaniruttieva nirutti nāmāti yojanā. “Kā pana sā sabhāvanirutti”ti pucchitabbattā ca “**yaṃ dhammānaṃ nāmaso ñāṇa**”nti vuttaṃ. **Yaṃ** yāya kāraṇabhūtāya nāmapaññattiyā **dhammānaṃ** neyyānaṃ **nāmaso** pathavīnāmādinā

vā phassanāmādinā vā khandhanāmādinā vā vividhena nāmena atthadhammādīsu kusalassa puggalassa ñāṇaṃ pavattati, sā kāraṇabhūtā nāmapaññatti sabhāvanirutti nāmāti attho. **Yanti** ca līṅgavipallāso, yāyāti attho. ‘Līṅgapakatidhammānaṃ nāmaso pavattamānaṃ ñāṇaṃ vivarivā kathehī’ ti vattabbattā ‘**yadā hī**’ tiādi vuttaṃ. **Aṭṭhakathāyaṃ** pana ‘yadā hi bhikkhūtiādinā ‘dhammānaṃ nāmaso ñāṇa’ nti padassa atthaṃ vivaratī’ ti (netti. aṭṭha. 25) vuttaṃ. Tassattho aṭṭhakathāyaṃ vibhajivā vuttovāti na vicārito.

26. Neruttaṃ ācariyena vibhattaṃ, amhehi ca ñātaṃ ‘katamo sutte gavesitabbo bhagavato adhippāyo’ ti pucchitabbattā ‘**tattha katamo adhippāyo**’ tiādi vuttaṃ. Tassattho pākaṭo. Apica ‘**dhammo have rakkhatī**’ tiādīsu yena puggalena attanā rakkhitena dhammena rakkhitabbabhāvo icchito, so dhammaṃ rakkhissatīti bhagavato adhippāyo. Yo puggalo duggatito muccitukāmo, so dhammaṃ rakkhissatīti bhagavato adhippāyo.

Coro yathā sandhimukhe gahitotiādīsu yo coro ghātanato muccitukāmo, so corakammaṃ na karissatīti bhagavato adhippāyo. Yo puggalo apāyādidukkhato muccitukāmo, so pāpakammaṃ na karissatīti bhagavato adhippāyo.

Sukhakāmānītiādīsu ye puggalā sukhaṃ icchanti, te parahimsanato vivajjissantīti bhagavato adhippāyo.

Middhī yadā hoti mahagghaso cātiādīsu ye puggalā punappunaṃ pavattamānajātijarāmarāṇato muccitukāmā, te bhojane mattaññuno bhavissanti, santuṭṭhā bhavissanti, suddhājīvā bhavissanti, pātīmokkhasaṃvarasīlasampannā bhavissanti, atandino bhavissanti, vipassakā bhavissanti, **sagāravā** sappatissā bhavissantīti bhagavato adhippāyo.

Appamādo amatapadantiādīsu ye puggalā maccuno bhāyanti, nibbānamicchanti, te puggalā dānasīlabhāvanākammesu appamattā bhavissantīti bhagavato adhippāyo.

27. Sutte gavesitabbo adhippāyo ācariyena vibhatto, amhehi ca viññāto, ‘katamaṃ suttassa gavesitabbaṃ nidāna’ nti pucchitabbattā ‘**tattha katamaṃ nidāna**’ ntiādi vuttaṃ. Tattha **nidānanti** phalaṃ nīharivā detīti nidānaṃ. Kiṃ taṃ? Kāraṇaṃ. **Dhaniyoti** dhanavaḍḍhanakāraṇe niyuttoti dhaniyo. **Gopālakoti** gāvo issarabhāvena pāleti rakkhatīti gopālako. **Upadhīti** puttagoṇādīhi (su. ni. aṭṭha. 1.33). **Narassāti** puttimitantassa vā gopālakassa vā narassāti ca padaṭṭhānavasena vā yebhuyyavasena vā gāthāyaṃ āgatavasena vā vuttaṃ, nāriyāpi upadhīhi nandanā athevāti daṭṭhabbā.

Iminā vatthunāti upadhisāṅkhātena imināva puttavādīnā vatthunā. Vasati pavattati nandanā ettha puttagoṇādīketi **vatthu**. Nandanāṃ nīharivā deti puttagoṇādīkanti **nidānanti** atthaṃ gahetvā dhaniyo ‘upadhīhi narassa nandanā’ ti āha. Bhagavā pana ‘vasati pavattati socanā ettha puttagoṇādīkehi **vatthu**, socanaṃ nīharivā deti puttagoṇādīkanti **nidāna**’ nti atthaṃ gahetvā ‘upadhīhi narassa socanā’ ti āha. Pariggahīyateti **pariggahaṃ**. Kiṃ taṃ? Puttagoṇādīkaṃ, taṃ pariggahaṃ ‘upadhī’ ti āha, na kilesūpadhikāyakhandhūpadhīnti.

Upadhīsūti khandhasāṅkhātesu kāyesu. **Kāyaṃ** ‘upadhī’ ti āha, na puttavādīkaṃ, na pariggahaṃ.

Bāhiresu vatthūsūti maṇikuṇḍalaputtadārādīsu vatthūsū.

Kāmasukhanti kāmanīyesu assādasukhavasena pavattā taṇhā. **Bāhiravatthukāya taṇhāyāti** kāmanīyesu bāhiravatthūsū assādasukhavasena pavattāya taṇhāya.

Ajjhattikavatthukāyāti rūpakāyasaṅkhāte ajjhattikavatthumhi abhinandanavasena pavattāya.

Puna **ajjhattikavatthukāyā**ti pañcakkhandhasaṅkhāte ajjhattikavatthumhi sinehavasena pavattāya.

Gavesitabbaṃ nidānaṃ vibhattaṃ, amhehi ca ñātaṃ, “katamo gavesitabbo pubbāparasandhī”ti pucchitabbattā **tattha katamo pubbāparasandhī**”tiādi vuttaṃ. Tattha **tatthā**ti tesu neruttādhippāyanidānapubbāparasandhīsu. **Yathā**ti yena andhakārādinā sabhāvena “kāmandhā...pe... mātara”nti yaṃ kāmataṇḥaṃ bhagavā āha, ayaṃ kāmataṇḥa tathā tena andhakārādinā sabhāvena “kāmandhā...pe... mātara”nti gāthā vuttāti yojanā.

Gāthāttho pana – kāmētīti **kāmo**, kāmataṇḥā, kāmena atthassa ajānanatāya dhammassa, apassanatāya ca andhāti **kāmandhā**. Kāmataṇḥasaṅkhātena jālena atthadhammānaṃ ajānanāpassanena sañchannā paliguṇṭhitāti **jālasañchannā**. Taṇḥasaṅkhātena chadanena tesamyeva atthadhammānaṃ ajānanāpassanena chādītā pihītāti **taṇḥachadanachādītā**. Atthadhammesu **pamattasaṅkhā**tena pamādena bandhanena **baddhā** bandhitabbā puggalā jarāmarāṇaṃ anventi, kumināmukhe pavattā macchā marāṇaṃ anventi iva ca, khīrapako vaccho mātaraṃ anveti iva ca, tathā jarāmarāṇaṃ anventīti gahetabbo.

“Kāmandhā...pe... mātara”nti yāya desanāya, gāthāya vā kāmataṇḥā vuttā, sā desanā, gāthā vā katamena desanābhūtena aparena yujjati”ti pucchitabbattā tathā pucchitvā imāya desanāya, gāthāya vā yujjati dassetuṃ “**sā katamenā**”tiādi vuttaṃ. Tattha **sāti** “kāmandhā...pe... anventi”ti desanā, gāthā vā. **Pubbāparenā**ti tato desanāto pubbena desanāvacanena, gāthāvacanena vā aparena desanāvacanena, gāthāvacanena vā. **Yujjati** yujjanaṃ eti sametīti pucchati.

Yathāti yena andhakarāṇādinā. “**Ratto...pe... nara**”nti yaṃ gāthāvacaṇaṃ bhagavā āha, tena gāthāvacaṇena tathā andhakarāṇādinā yujjati yojanā. Gāthāttho pana – **ratto** rañjanto puggalo **atthaṃ** attahitapayojanaṃ parahitapayojanaṃ na jānāti. **Ratto** rañjanto **dhammaṃ** yathāvuttassa atthassa hetuṃ paññācakkhunā na passati. Rāgo yaṃ naraṃ yadā sahate, tadā tassa narassa **andhaṃ** andhakāraṃ **tamaṃ** aññāṇaṃ hotīti gahetabbo.

Itīti evaṃ. **Andhatāya** andhakarāṇatāya **sañchannatāya** sañchannakarāṇatāya. **Sāyeva taṇhā**ti “kāmandhā...pe... mātara”nti gāthāvacaṇena yā kāmataṇḥā vuttā, sāyeva kāmataṇḥā. **Abhilapitā**ti “ratto...pe... nara”nti aparena gāthāvacaṇena bhagavatā vohāritā voharaṇena ñāpitā, abhilapitassa atthassa samānatā pubbadesanā aparadesanāya yujjati vuttaṃ hoti.

“Dvīsu gāthāsu katamehi padehi sāyeva taṇhā abhilapitā”ti pucchitabbattā imehi abhilapitāti niyamevā dassetuṃ “**yañcāhā**”tiādi vuttaṃ. Tattha paṭhamagāthāyaṃ “kāmandhā...pe... chādītā”ti **yañca** padaṃ āha, dutiyagāthāyañca “ratto...pe... na passati”ti **yañca** padaṃ āha. **Pariyuṭṭhānehi** pariyuṭṭhānadīpakehi **imehi** “kāmandhā...pe... passati”ti padehi **sāyeva** paṭhamagāthāya vuttā kāmataṇḥā ca bhagavatā abhilapitā.

“Yaṃ andhakāraṃ vuttaṃ, katamaṃ taṃ? Yā taṇhā ponobhavikā vuttā, katamā sā”ti pucchitabbattā “**yaṃ andhakāra**”ntiādi vuttaṃ. Tattha andhakāraṃ yaṃ aññāṇaṃ vuttaṃ, ayaṃ dukkhasamudayo bhava. Yā ca taṇhā ponobhavikā vuttā, ayañca dukkhasamudayo bhaveti yojanā.

“**Kāmā**”ti yañca padaṃ bhagavā āha, tena padena ime kilesakāmā vuttā. “**Jālasañchannā**”ti yañca padaṃ bhagavā āha, tena padena **tesamyeva** kilesakāmānaṃ **payogena** samudācārena pariyuṭṭhānaṃ bhagavā dasseti. **Tasmāti** yasmā yasmim̐ santāne taṇhā uppannā, taṃ santānaṃ saṃsārato nissarituṃ adatvā rūpārammaṇādīhi palobhayamānā hutvā cittaṃ kilesehi pariyādāya tiṭṭhati, tasmā taṇhāya cittaṃ pariyādāya santāne tiṭṭhamānattā. **Kilesavasenā**ti vītikkamakilesavasena. **Pariyuṭṭhānavasenā**ti vītikkamanaṃ appatvā uppajjamānavasena. **Yeti**

vuttappakāraṇhāsahitapuggalasadisā. **Teti** te taṇhābandhanabaddhā ca edisakā ca puggalā. **Jarāmarañam anventi** jarāmarañam atikkamituṃ na sakkuṇanti. **Ayanti** jarāmarañānuppavatti “jarāmarañamanventi”ti iminā vacanena bhagavatā dassitāti yojanā.

“Kāmandhā”tiādigāthāya ceva “ratto”tiādigāthāya ca pubbāparasandhi ācariyena vibhatto, amhehi ca ñāto, “katham ‘yassa papañcā t̥hiti cā’tiādigāthāsu pubbāparasandhi amhehi viññātabbo”ti vattabbattā **yassa papañcā**”tiādi vuttaṃ. Tassā gāthāya – **yassa** munino **papañcā** taṇhāmānadiṭṭhī ca natthi, taṇhāmānadiṭṭhī abhisankhatā saṅkhārā ca natthi, **t̥hiti** anusayā taṇhā ca natthi, **sandānasadisam** taṇhāpariyuṭṭhānam natthi, **palighasadisam** moho ca natthi, so muni papañcādikaṃ sabbam **vītivatto** atikkantoti vuccati. **Nittaṇham** nimānam nidiṭṭhim nisandānam nipaligham loke carantaṃ taṃ munim **sadevako** taṇhāsahito loko na vijānātīti attho.

Gāthāyaṃ papañcādayo bhagavatā vuttā, “katame te”ti pucchitabbattā “**papañcā nāmā**”tiādi vuttaṃ. Attano ādhārapuggalam saṃsāre ciram papañcantāpentī taṇhāmānadiṭṭhiyo ca, tāhi taṇhāmānadiṭṭhīhi saḥajātavasena vā upatthambhanavasena vā abhisankhatā saṅkhārā ca **papañcā** nāma. Santāne appahīnaṭṭhena anusayā taṇhā sattānam tiṭṭhanahetuttā **t̥hiti** nāma. Pavattamānāya taṇhāya yaṃ pariyuṭṭhānaṃ chatṭimsataṇhāya jāliniyā yāni vicarītāni ca vuttāni, idaṃ sabbam attano ādhāram puggalam bandhanaṭṭhena sandānasadisattā **sandānam** nāma. Moho attano ādhārassa puggalassa nibbānanagarappavesanassa paṭisedhakattā palighasadisattā **paligho** nāma. “Yassa papañcādayo natthi, so kiṃ vītivatto”ti pucchitabbattā “**ye cā**”tiādi vuttaṃ. **Ye** vuttappakārā papañcā saṅkhārā, **yā ca** vuttappakārā t̥hiti, **yaṃ** vuttappakāram sandānaṃ, **yaṃ** vuttappakāram palighaṃ natthīti vuttā, **sabbam etaṃ** papañcādikaṃ yo muni samatikkanto, **ayaṃ** muni “**nittaṇho**”ti vuccatīti daṭṭhabbo.

28. “Yassa papañcātiādigāthāyaṃ ye papañcādayo vuttā, tesu taṇhāmānadiṭṭhihetukā saṅkhārā kadā katividham phalaṃ denti, taṃsaṅkhārasampayuttā taṇhā kadā katividham phalaṃ deti”ti pucchitabbattā “**tattha pariyuṭṭhānasāṅkhārā**”tiādi vuttaṃ. Tattha **tatthā**ti tesu papañcasāṅkhārādīsu. **Pariyuṭṭhānasāṅkhārā**ti vītikamavasena pavattā pariyuṭṭhānā akusalasaṅkhārā cetanā. **Diṭṭhadhammavedanīyādī**ti diṭṭhe passitabbe dhamme atabhāve vedanīyaṃ phalaṃ detīti **diṭṭhadhammavedanīyā**, diṭṭhe dhamme phalaṃ vedetīti vā **diṭṭhadhammavedanīyā**. Kā sā? Apadussanīyādīsu atidussanādivasena pavattā paṭhamajavanacetanā. Upapajje phalaṃ vedetīti **upapajjavedanīyā**, sattamajavanacetanā. Aparāpariyāye atabhāve phalaṃ vedetīti **aparāpariyāyavedanīyā**, majjhe pavattā pañca javanacetanā. Tiphalaḍānavasena tividhā saṅkhārā. **Evam** imāya tividhāya saṅkhāracetanāya sampayuttā tividhā **taṇhā** tividham phalaṃ **diṭṭhe vā dhamme** atabhāve, **upapajje vā** anantarabhāve, **apare vā pariyāye** bhāve **deti** nibbatetīti evaṃ phalanibbattakasaṅkhāram vā taṃsampayuttaṃ taṇham vā bhagavā āha.

“Yāya desanāya, gāthāya vā phalanibbattakam saṅkhāram āha, sā desanā, gāthā vā katamena desanābhūtena vā aparena yujjati”ti pucchitabbattā “**yaṃ lobhapakatam kammaṃ karoti**”tiādi vuttaṃ. Yā “yassa...pe... loko”ti desanā ca yā “yaṃ lobhapakatam kammaṃ...pe... apare vā pariyāye”ti desanā ca vuttā, bhagavato **idaṃ** desanādvayaṃ aññamaññam **pubbāparena** pubbam aparena aparam pubbena **yujjati** yujjanam eti sameti, yathā gaṅgodakam yamunodakena, yamunodakampi gaṅgodakena saṃsandati sameti. “Yassa...pe... loko”ti desanā “yaṃ lobhapakatam... pe... pariyāye”ti desanāya saṃsandati sameti, “yaṃ lobhapakatam...pe... pariyāye”ti desanāpi “yassa...pe... loko”ti desanāya saṃsandati sametīti attho gahetabbo. “Katham yujjati”ti pucchitabbattā “**tattha pariyuṭṭhāna**”tiādi vuttaṃ, diṭṭhadhammavedanīyādīphalattayanibbattakattāhena yujjatīti vuttaṃ hoti.

Yaṃ yaṃ suttaṃ bhagavatā desitaṃ pubbāparena yujjati, taṃ taṃ suttampi nīharitvā pubbāparasamandanam dassetuṃ “**yathāhā**”tiādi vuttaṃ. Saṃsandanākāro vuttanayānusārena gahetabbo. **Tatthā**ti tesu pariyuṭṭhānasāṅkhāratanhāvicaritesu. **Pariyuṭṭhānanti** rūpārammaṇādīni ayonisomanasikārena ārabha sattasantāne pavattaṃ taṇhācaritaṃ. **Paṭisaṅkhānabalenā**ti

“Namo te purisājañña, namo te purisuttama;
Yassa te nābhijānāma, kiṃ tvaṃ nissāya jhāyasi”ti. (saṃ. ni. 3.79; netti. 104);

“Kenaci aviññāyabhāvo kena suttena vibhāvetabbo”ti pucchitabbattā iminā godhikasuttana (saṃ. ni. 1.159) vibhāvetabboti dassetuṃ **“yathā māro pāpimā”**tiādi vuttaṃ. **Aṭṭhakathāyaṃ** pana “idāni khīṇāsavacittassa katthacipi anissitabhāvaṃ godhikasuttana (saṃ. ni. 1.159) vakkalisuttana (saṃ. ni. 3.87) ca vibhāvetuṃ ‘yathā māro’tiādi vutta’nti (netti. aṭṭha. 28) vuttaṃ. Tattha dānādipuññakārake, puññe vā māreti nivāretīti **māro**, attahitaparahite māretīti vā **māro**. Pāpacittuppādavantaṭṭhāya **pāpimā**. Pubbattabhāve godhassa ghātakattā **“godhiko”**ti laddhanāmassa parinibbāyantassa kulaputtassa parinibbānato uddham paṭisandhādi **viññāṇaṃ** samanvesanto na jānāti na passati. “Paracittajānanako māro kasmā na jānāti”ti vattabbattā **“so hi”**tiādi vuttaṃ. **So** godhiko **hi** yasmā papañcātīto, tasmā taṇhāpahānena diṭṭhinissayopi **assa** godhikassa yasmā natthi, tasmā ca na jānāti.

“Godhikasutteneva vibhāvetabbo”ti pucchitabbattā **“yathā cā”**tiādi vuttaṃ. “Godhikasuttavakkalisuttehi anupādisesāya nibbānadhātuyā anissitabhāvo vibhāvito, evaṃ sati saupādisesanibbānadhātuyā anissitabhāvo kena viññāyatīti attho bhavyeyā”ti vattabbattā tadāpi na viññāyatīyevāti dassetuṃ **“sadevakena lokenā”**tiādi vuttaṃ. Tattha saupādisesāya nibbānadhātuyā phalasaṃpattijhānena **jhāyamānā** ime khīṇāsavā katthaci anissitacittā jhāyantīti sadevakena lokena na ñāyanti samārakena...pe... sadevamanussāya na ñāyantīti yojanā kātabbā. **Anissitacittā na ñāyantīti** ettha hi **na**-kāro ca “jhāyamānā”ti pade na sambandhitabbo “na jhāyamānā”ti atthassa sambhavato. “Na ñāyantī”ti pana sambandhitabbo heṭṭhā **aṭṭhakathāyaṃ** eva “loke kenacipi na ñāyatī”ti vuttattā. **Ayaṃ desanāsandhī**ti godhikasuttavakkalisuttānaṃ aññamaññaṃ atthavasena saṃsandanā niddhāritā viya “na ca pathaviṃ nissāyā”tiādidesanāya ca “na ca imaṃ loka”ntiādidesanāya ca yāya desanāya atthavasena saṃsandanā niddhāritā, tāya desanāya yattha katthaci yaṃ kiñci nissāya jhāyī na jhāyati, nibbānaṃ nissāya jhāyī jhāyatīti atthavasena niddhāritā, ayaṃ saṃsandanā desanāsandhi nāmāti attho gahetabbo.

Desanāsandhi ācariyena vibhattā, amhehi ca ñātā, “katamā niddesasandhī”ti pucchitabbattā **“tattha katamā niddesasandhīti nissitacittā”**tiādi vuttaṃ. Tattha **tatthāti** tesu catūsu atthasandhibyañjanasandhidesanāsandhiniddesasandhīsu yā sandhi “niddesasandhī”ti uddiṭṭhā, sā niddesato katamāti pucchati attho. **Nissitacittāti** taṇhādiṭṭhisahajātavasena vā upanissayavasena vā nissitaṃ cittaṃ yesaṃ puthujjanānanti nissitacittā, puthujjanā puggalā niddisitabbā imāya desanāya puggalādhiṭṭhānattā. Yadi desanā dhammādhiṭṭhānā, evaṃ sati nissitaṃ cittaṃ ettha suttappadesesu desitanti **nissitacittā** nissitacittajānanatthāya desitā suttappadesā. Anissitaṃ cittaṃ yesaṃ ariyapuggalānanti **anissitacittā**, ariyapuggalā niddisitabbā imāya desanāya puggalādhiṭṭhānattā. Dhammādhiṭṭhānāya pana anissitaṃ cittaṃ yattha suttappadesesu desitanti **anissitacittā**, anissitacittajānanatthāya desitā suttappadesā.

“Nissitacittā kena niddesena niddisitabbā, anissitacittā kena niddesena niddisitabbā”ti pucchitabbattā **“nissitacittā akusalapakkhena niddisitabbā”**tiādi vuttaṃ. **Akusalapakkhena** niddesena niddisitabbā. **Kusalapakkhenā**tiādisupi esa nayo yojetabbo. Akusalapakkhasāmaññaakusalapakkhasāmaññehi dassetvā akusalavisesakusalavisesehi dassetuṃ **“nissitacittā saṃkilesenā”**tiādi vuttaṃ. **Ayaṃ niddesasandhī**ti akusalapakkhādikassa purimaniddesassa saṃkilesādikena pacchimena niddesena nissitacittavasena ayaṃ saṃsandanā ca niddesasandhi nāma. Kusalapakkhādikassa purimassa niddesassa vodānādikena pacchimena niddesena anissitacittavasena ayaṃ saṃsandanā ca niddesasandhi nāmāti vibhājitvā veditabbā.

“Catubyūhahārassa neruttamadhippāyanidānapubbāparasandhippabhedena ceva atthabyañjanasandhiniddesasandhidesanāsandhippabhedena ca vibhājitabbabhāvo kena amhehi jānitabbo saddahitabbo”ti vattabbabhāvato **“tenāhā”**tiādi vuttaṃ. Tattha **tena** tathā vibhājitabbabhāvena āyasmā mahākaccāno “neruttamadhippāyo”tiādikaṃ (netti. 4 hārasaṅkhepa) yaṃ

vacanaṃ āha, tena vacanena tumhehi catubyūhahārassa tathā vibhajitabbabhāvo jānitabbo saddahitabboti vuttaṃ hoti.

“Ettāvatā ca catubyūhahāro paripuṇṇo, añño niyutto natthī”ti vattabbattā “**niyutto catubyūho hāro**”ti vuttaṃ. Tatha yassaṃ yassaṃ pāliyaṃ yo yo catubbidho, so so catubyūhahāro ca yathālābhavasena yojito, tassaṃ tassaṃ pāliyaṃ so so catubbidho catubyūhahāro tathā niddhāretvā yutto yojitoti attho daṭṭhabbo.

Iti catubyūhahāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭīkānusāreṇa gambhīrattho vitthārato vibhajitvā gahetabboti.

7. Āvaṭṭahāravibhaṅgavibhāvanā

29. Yena yena saṃvaṇṇanāvīsesabhūtena catubyūhahāravibhaṅgena neruttādayo vibhattā, so... pe... catubyūhahāravibhaṅgo paripuṇṇo, “katamo āvaṭṭo hāravibhaṅgo”ti pucchitabbattā **tattha katamo āvaṭṭo hāro**”tiādi vuttaṃ. Tatha **tatthāti** tesu niddiṭṭhesu soḷasasu desanāhārādīsu **katamo saṃvaṇṇanāvīseso āvaṭṭo hāro** āvaṭṭahāravibhaṅgo nāmāti pucchati. “Ekamhi padaṭṭhāne”ntiādiniddesassa idāni mayā vuccamāno “ārambhathā”tiādiko vitthārasaṃvaṇṇanāvīseso āvaṭṭahāravibhaṅgo nāmāti gahito. “Tattha desanāyaṃ ekasmiṃ padaṭṭhāne desanāruḷhe sesakaṃ padaṭṭhānaṃ pariyesati, pariyesitvā kathaṃ paṭipakkhe āvaṭṭeti”ti vattabbattā –

“Ārambhatha nikkamatha, yuñjatha buddhasāsane;
Dhunātha maccuno senaṃ, naḷāgāraṃva kuñjaro”ti. –

Gāthā vuttā. Idha gāthāyaṃ ekasmiṃ padaṭṭhāne desanāruḷhe sesakaṃ padaṭṭhānaṃ pariyesatīti vuttaṃ hoti. Gāthāttho pana **aṭṭhakathāyaṃ** (netti. aṭṭha. 29) vutto.

“Ārambhathā”tiādigāthāyaṃ katarasmiṃ padaṭṭhāne desanāruḷhe katamaṃ sesakaṃ padaṭṭhānaṃ pariyesatī”ti vattabbattā “**ārambhatha nikkamathāti vīriyassa padaṭṭhāna**”ntiādi vuttaṃ. Tatha “**vīriyassa padaṭṭhāna**”nti sāmāññavasena vuttampi ārambhadhātusāṅkhātaṃ vīriyaṃ nikkamadhātusāṅkhātassa vīriyassa padaṭṭhānaṃ, nikkamadhātusāṅkhātaṃ vīriyaṃ parakkamadhātusāṅkhātassa vīriyassa padaṭṭhānaṃ, parakkamadhātusāṅkhātaṃ vīriyaṃ samathabhāvanāsahitassa vīriyassa padaṭṭhānantiādinā pariyesitabbanti gahetabbam. “**Yuñjathā**”ti iminā vuttaṃ samathabhāvanāsahitaṃ vīriyaṃ “**buddhasāsane**”ti iminā vuttassa mahaggatasamādhissa padaṭṭhānaṃ, desanāruḷhaṃ sukhādikaṃ sesakampi padaṭṭhānaṃ pariyesitabbam. “**Dhunātha maccuno sena**”nti padena gahitaṃ vipassanāsahitaṃ vīriyaṃ kilesadhunane samatthāya paññāya padaṭṭhānaṃ, desanāruḷhaṃ samādhiādikaṃ sesakampi padaṭṭhānaṃ pariyesitabbam.

“Yadi ‘ārambhathā’tiādikaṃ vuttaṃ vīriyaṃ sāmāññabhūtānaṃ vīriyasamādhipaññānaṃyeva padaṭṭhānaṃ siyā, evaṃ sati kathaṃ vaṭṭamūlaṃ chinditvā vivaṭṭaṃ pāpessantī”ti vattabbattā puna “**ārambhatha nikkamathāti vīriyindriyassa padaṭṭhāna**”ntiādi vuttaṃ. Ādhipaccakiccatāya yuttassāpi vīriyādhikassa padaṭṭhānattā ārabhantā yogāvacarapuggalā vaṭṭamūlaṃ chinditvā vivaṭṭaṃ pāpentīti vuttaṃ hoti. “Ārambhathā”tiādikā pana yasmā vīriyārambhavatthuādīdesanā hoti, tasmā ārambhavatthuādīniyeva saṃvaṇṇitāni padaṭṭhānanti codanaṃ manasi katvā āha “**imāni padaṭṭhānāni desanā**”ti. “Ārambhathā”tiādikā yathāvuttapadaṭṭhānāni desanā hoti, na vīriyārambhavatthuādīni, tasmā padaṭṭhānaṃyeva saṃvaṇṇitanti daṭṭhabbam.

Evaṃ “ārambhathā”tiādīdesanāya padaṭṭhānavasena attho vibhatto, amhehi ca ñāto, “kathaṃ

tassāyeva desanāya paṭipakkhavasena attho vibhajitabbo’’ti vattabbattā “**ayuñjantānaṃ vā**’’tiādi vuttaṃ. Tattha **yoge** bhāvanāyaṃ **ayuñjantānaṃ** sattānaṃ aparipakkañāṇānaṃ **yoge** yogahetu vāsanābhāgiyavasena āyatim jānanatthāya “ārambhathā’’tiādidesanā āraddhā. **Yuñjantānaṃ** paripakkañāṇānaṃ sattānaṃ **ārambhe** ārambhahetu diṭṭheva dhamme parijānanatthāya “ārambhathā’’tiādidesanā āraddhā.

Tattha tesu yuñjantāyuñjantesu paripakkāparipakkañāṇesu **ye** aparipakkañāṇā sattā na yuñjanti, **te** aparipakkañāṇā sattā **pamādamūlakā** hutvā yoge bhāvanāyaṃ yena pamādena na yuñjanti, **so pamādo** taṇhāmūlako pamādo, avijjāmūlako pamādoti dubbidho hoti. **Tattha** tasmim dubbidhe pamāde **aññāṇena** nivuto avijjāmūlako satto **yena** pamādena **ñeyyatṭhānaṃ** “ime uppādavayadhammā pañcakkhandhā ñeyyatṭhānaṃ nāmā’’ti nappajānāti, ayaṃ aññāṇahetuko pamādo **avijjāmūlako pamādā** nāma. Yo pamādo taṇhāmūlako, so pamādo tividho anuppanānaṃ bhogānaṃ uppādāya pariyesanto taṇhiko satto yaṃ pamādaṃ āpajjati, ayaṃ pamādo ca, uppanānaṃ bhogānaṃ thitattāya rakkhanto taṇhiko satto ārakkhanimittam yaṃ pamādaṃ āpajjati, ayaṃ pamādo ca, thitam bhogaṃ paribhuñjanto taṇhiko satto paribhoganimittam yaṃ pamādaṃ āpajjati, ayaṃ pamādo cāti **tividho** hoti. Iti loke **ayaṃ** pamādo catubbidho avijjāpadaṭṭhāno ekavidho pamādo, taṇhāpadaṭṭhāno tividho pamādoti **catubbidho** hoti. **Tattha** tāsu avijjātaṇhāsu **nāmakāyo** phassādināmasamūho avijjāya padaṭṭhānaṃ, **rūpakāyo** pathavīdirūpasamūho taṇhāya padaṭṭhānaṃ hoti. Idaṃ vuttaṃ hoti – ārambhadhātunikkamadhātusaṅkhātassa vīriyassa paṭipakkho catubbidho pamādo niddhāretabbo, niddhāretvā ekavidhassa pamādassa avijjā padaṭṭhānaṃ, tividhassa pamādassa taṇhā padaṭṭhānaṃ. Avijjāya nāmakāyo padaṭṭhānaṃ, taṇhāya rūpakāyo padaṭṭhānanti paṭipakkhe āvaṭṭetvā padaṭṭhānaṃ pariyesitabbanti.

“Kasmā nāmakāyo avijjāya padaṭṭhānaṃ bhavati, rūpakāyo taṇhāya padaṭṭhānaṃ bhavati’’ti pucchitabbattā “**taṃ kissa hetū**’’ti pucchitvā “**rūpīsu bhavesu ajjhosānaṃ, arūpīsu sammoho**’’ti vuttaṃ. **Rūpīsu bhavesu** rūpadhammesu ahammādivasena **ajjhosānaṃ** taṇhābhiniveso sattesu paṭiṭṭhito yasmā hoti, tasmā rūpakāyo taṇhāya padaṭṭhānaṃ bhavati. Anamatagge hi saṃsāre itthipurisā aññamaññarūpābhīrāmā bhavanti. **Arūpīsu** phassādīsu sukhumabhāvato sammoho sattesu paṭiṭṭhito yasmā hoti, tasmā nāmakāyo avijjāya padaṭṭhānaṃ bhavati ti yojanā kātābbā. Idaṃ vuttaṃ hoti – rūpakāyanāmakāyesu ārammaṇakaraṇavasena taṇhāya ca avijjāya ca uppajjanato rūpakāyo taṇhāya padaṭṭhānaṃ, nāmakāyo avijjāya padaṭṭhānanti nīharitabbāvāti.

“Katamo rūpakāyo, katamo nāmakāyo’’ti pucchitabbattā “**tattha rūpakāyo rūpakkhando, nāmakāyo cattāro arūpino khandhā**’’ti vuttaṃ. **Tattha** tesu rūpakāyanāmakāyesu **rūpakāyo** rūpasamūho nāma rūpakkhando hoti, **nāmakāyo** nāmasamūho nāma cattāro arūpino khandhāti. Ime pañcakkhandhā avijjātaṇhānaṃ ārammaṇattā saupādānā bhavēyyuṃ, “katamena upādānena saupādānā bhavanti’’ti pucchitabbattā tatheva pucchitvā vissajjētuṃ “**ime pañcakkhandhā katamena upādānena saupādānā? Taṇhāya ca avijjāya cā**’’ti vuttaṃ. Tattha upādānabhūtāya taṇhāya ca upādānabhūtāya avijjāya ca ime pañcakkhandhā saupādānā nāma bhavanti ti yojanā kātābbā.

“Kittakāni upādānāni taṇhā nāma bhavanti, kittakāni upādānāni avijjā nāma bhavanti’’ti pucchitabbattā “**tattha taṇhā dve**’’tiādi vuttaṃ. **Tatthāti** tāsu taṇhāvijjāsu. Kāmupādānañca sīlabbatupādānañca dve upādānāni taṇhā nāma bhavanti. Taṇhāvasena hi “mama sīlam, mama vata’’nti parāmasanaṃ bhavati. Diṭṭhupādānañca attavādupādānañca dve upādānāni avijjā nāma bhavanti. Avijjāvasena hi sassatadiṭṭhi ceva ahammādiditṭhi ca bhavanti. “Imehi catūhi upādānehi saupādānakkhandhā catūsu saccesu kittakam saccam nāmā’’ti pucchitabbattā “**imehi**’’tiādi vuttaṃ. **Ye** lokiyakkhandhā saupādānā khandhā bhavanti, upādānena hi upādānāni pi bhavanti, **idaṃ** saupādānakkhandhapañcakaṃ **dukkham** dukkhasaccaṃ nāma. Yāni cattāri upādānāni dukkhakāraṇāni bhavanti, **ayaṃ** upādānacatukka **samudayo** samudayasaccaṃ nāma bhavati. **Pañcakkhandhāti** saupādānā pañcakkhandhā dukkhavattubhāvato **dukkham**. **Tesanti** saupādānānaṃ pañcakkhandhānaṃ. **Dhammaṃ deseti** “ārambhathā’’tiādikaṃ dhammaṃ veneyyānurūpaṃ bhagavā deseti. Sāmaññena

pubbe vuttampi atthavasena visesaṃ dassetuṃ puna “**dukkhassa pariññāya, samudayassa pahānāya**”ti vuttaṃ.

30. Ārambhapaṭipakkhabhūtapamādasena purimasaccadvayaṃ ācariyena niddhāritaṃ, amhehi ca ñātaṃ, “itarasaccadvayaṃ kathaṃ niddhāritabba”nti vattabbattā taṃ dvayampi pamādamukheneva niddhāritabbanti dassetuṃ “**tattha yo tividho**”tiādi vuttaṃ. Tattha **tatthāti** tesu taṇhāmūlakaavijjāmūlakesu pamādesu. **Tassāti** tividhassa taṇhāmūlakassa pamādassa. **Sampañivedhenāti** assādādīnaṃ pariñānana. **Rakkhaṇāti** attacittassa rakkhaṇasaṅkhātā. **Paṭisaṃharaṇāti** “tassā”ti iminā vuttassa pamādassa paṭipakkhabhūtena appamādānanuyogena saṃharaṇā yā khepanā atthi, **ayaṃ** pamādassa paṭipakkhabhūtena appamādānanuyogena pavattā khepanasaṅkhātā bhāvanā **samatho** nāmāti pamādassa paṭipakkhamukhena puna āvaṭṭetvā samatho niddhāritoti.

“So samatho kathaṃ kena upāyena bhavati”ti pucchitabbattā tathā pucchitvā upāyaṃ dassetuṃ “**so katha**”ntiādi vuttaṃ. Tattha **kathanti** kena upāyena. “Kāmentīti **kāmā**, kāmīyantīti vā **kāmā**”ti vuttānaṃ dvinnaṃ **kāmānaṃ** paṭicca uppajjamānaṃ **assādaṇca**, “appassādā kāmā bahudukkhā”tiādi (ma. nī. 1.235) vacanato appassādānīyānaṃ kāmānaṃ paṭicca uppajjamānaṃ **ādīnaṇca**. **Kāmānanti** ca kammatthe sāmivacanaṃ. Tena vuttaṃ –“kāme paṭiccā”ti (netti. aṭṭha. 30). “Kāmānametaṃ nissaraṇaṃ, yadidaṃ nekkhamma”nti (itivu. 72) vacanato **nissaraṇanti** idha paṭhamajjhānaṃ adhippettaṃ. **Vokāraṇti** ettha **va**-kāro āgamo, o-kāraṃ lāmakabhāvaṃ. **Ānisaṃsanti** catupārisuddhisīlādikaṃ. Yadā jānāti, tadā tena upāyena samatho bhavati attho.

Samatho ācariyena vibhatto, amhehi ca ñāto, “katamā vipassanā”ti pucchitabbattā vipassanaṃ vibhajitūṃ “**tattha yā vīmaṃsā**”tiādi vuttaṃ. Atha vā kāmānaṃ assādādayo yadā jānāti, tadā samatho bhavati vutto, “tasmīṃ samathe bhavamāne sati katamā bhavati”ti pucchitabbattā “**tattha yā vīmaṃsā**”tiādi vuttaṃ. Tattha **tatthāti** tasmīṃ samathe bhavamāne sati assādādīnaṃ **yā** aniccādivīmaṃsā **upaparikkhā** paññā bhavati, **ayaṃ** vīmaṃsā upaparikkhā paññā visesena passanato **vipassanā** nāma. Atha vā tividhassa taṇhāmūlakassa pamādassa sampañivedhena rakkhaṇā paṭisaṃharaṇā, ayaṃ samatho ācariyena vutto, “katamā vipassanā”ti pucchitabbattā “**tattha yā vīmaṃsā**”tiādi vuttaṃ. Tattha **tatthāti** tasmīṃ yathāvutte samathe sati yathāvuttassa pamādassa aniccādivasena **yā vīmaṃsā upaparikkhā** paññā uppannā, **ayaṃ** vīmaṃsā upaparikkhā paññā visesena passanato **vipassanā** nāma. Vīmaṃsāva dubbalā, upaparikkhā balavatīti viseso.

Samatho ceva vipassanā ca dve dhammā ācariyena niddhāritā, “ime niddhāritā dve dhammā kiṃ gacchanti”ti vattabbattā “**ime dve**”tiādi vuttaṃ. Samatho samathabhāvanāpāripūriṃ gacchati, vipassanā vipassanābhāvanāpāripūriṃ gacchati. “Imesu dvīsu dhammesu bhāviyamānesu katame yogāvacarena pahīyanti”ti vattabbattā “**imesū**”tiādi vuttaṃ. Samathe dhamme bhāviyamāne taṇhā yogāvacarena pahīyati, vipassanāya bhāviyamānāya avijjā yogāvacarena pahīyatīti ime dve pahātābbā dhammā pahīyanti taṇhā ceva avijjā ca. “Imesu dvīsu dhammesu pahīyamānesu katame dhammā nirujjhanti”ti pucchitabbattā upādānādayopi nirujjhantīti sakalavaṭṭadukkhanirodhaṃ dassento “**imesu dvīsu dhammesu pahīnesū**”tiādimāha. Tattha taṇhāya samathabhāvanāya pahīyamānāya, avijjāya vipassanābhāvanāya pahīyamānāya imesu dvīsu dhammesu dvīhi bhāvanāhi pahīnesu kāmupādānādīni **cattāri upādānāni** vikkhambhanasamucchedavasena **nirujjhanti**, na bhaṅgakkhaṇavasena.

Etthāha – “taṇhānirodhā upādānanirodho”ti vuttattā “taṇhāya pahīyamānāya upādānāni nirujjhanti”ti vacanaṃ yuttaṃ hotu, kathaṃ avijjāya pahīyamānāya upādānāni nirujjhantīti? “Taṇhānirodhā upādānanirodho”ti pāṭhe avijjāsahitatanhānirodhā upādānanirodhoti atthasambhavato. Yathā hi taṇhāsahitāva avijjā saṅkhāraṇaṃ paccayo, evaṃ avijjāsahitāva taṇhā upādānānaṃ paccayo hotīti avijjāsahitatanhānirodhā upādānanirodhoti attho sambhavatīti gahetabbo. Vikkhambhanasamucchedavasena **upādānanirodhā** tatheva **bhavanirodhoti** esa nayo sesesupi. **Evametassa kevalassa dukkhakkhandhassa nirodhoti** etthāpi taṇhāsahitāvijjānirodhā

sāṅkhāranirodhotiādiko gahitoti daṭṭhabbo. **Iti** evaṃ visabhāgasabhāgadhammānaṃ āvaṭṭanavasena niddhāritāni ca **purimakāni dve saccāni ca, samatho ca vipassanā ca** ime dve dhammā **maggo ca** maggasaccaṅca, **vaṭṭanirodho** vaṭṭanirodhasaccaṅca nibbānanti cattāri saccāni niddhāritāni.

“Vīriyapaṭipakkhabhūtaṃ pamādādidhammassa vasena vā sabhāgabhūtaṃ pamādādidhammassa vasena vā āvaṭṭetvā catunnaṃ saccānaṃ niddhāritabbabhāvo amhehi kena saddahitabbo”ti vattabbattā “**tenāhā**”tiādi vuttaṃ. **Tena** tathā niddhāritabbabhāvena bhagavā “ārambhatha nikkamathā”tiādigāthāvacanaṃ āha, tena “ārambhatha nikkamathā”tiādigāthāvacanena tathā catunnaṃ saccānaṃ niddhāritabbabhāvo tumhehi saddahitabboti vuttaṃ hoti.

“Ārambhatha nikkamathā”tiādinā vodānapakkhamyeva nikkhipitvā tasseva vodānapakkhassa visabhāgadhammasabhāgadhammavaseneva āvaṭṭetvā catusaccaniddhāraṇaṃ kātabba”nti pucchitabbattā saṃkilesapakkhampi nikkhipitvā tasseva saṃkilesassa visabhāgadhammasabhāgadhammavasenapi āvaṭṭetvā catusaccaniddhāraṇaṃ dassento “**yathāpi mūle**”tiādigāthāvacanamāha. **Aṭṭhakathāyaṃ** pana –

“Evaṃ vodānapakkhaṃ nikkhipitvā tassa visabhāgadhammavasena, sabhāgadhammavasena ca āvaṭṭanaṃ dassetvā idāni saṃkilesapakkhaṃ nikkhipitvā tassa visabhāgadhammavasena, sabhāgadhammavasena ca āvaṭṭanaṃ dassetuṃ ‘yathāpi mūle’ti gāthamāhā”ti (netti. aṭṭha. 30) –

Vuttaṃ. Gāthāthopi aṭṭhakathāyaṃ vutto. Tathāpi yatipotānaṃ atthāya aṭṭhakathānusāreneva kathayissāma.

Samūho rukkho mūlati patiṭṭhāti etena avayavena bhūmibhāge ṭhitenāti **mūlaṃ**, kiṃ taṃ? Bhūmibhāge ṭhito mūlasāṅkhāto rukkāvayavo, tasmīṃ mūle. Natthi upaddavo pharasuchedādiantarāyo assa mūlassāti **anupaddavo**. **Daḷheti** upaddavābhāvena sabhāvato thire sati. Chindīyatīti **chinno**, ko so? Bhūmiyaṃ patiṭṭhitamūlasahito rukkāvayavo, na chinditvā gahito rukkāvayavo. Ruhati vaḍḍhatīti **rukkho**. So ca bhūmiyaṃ patiṭṭhitamūlasahito rukkāvayavo rukkhoti vutto yathā “samuddo diṭṭho”ti. **Punareva rūhatīti** puna aṅkuruppādanaṃ sandhāya vuttaṃ. **Tañhānusayeti** atabhāvasāṅkhātassa rukkassa mūle. **Anūhateti** arahattamaggañāṇena anupacchinne sati **idaṃ** atabhāvasāṅkhātaṃ **dukkhaṃ** dukkhahetu **punappunaṃ** abbochinnaṃ **nibbattati na** nirujjhatiyevāti gāthātho.

“Idha gāthāyaṃ yo tañhānusayo anūhatabhāvena dukkhassa nibbattanassa mūlanti vutto, **ayaṃ tañhānusayo** katamassā tañhāya anusayo”ti pucchati, “tañhāya kāmatañhādivasena bahuviddhattā **bhavatañhāya** anusayo”ti vissajjeti bhavassādantañhābhāvato. **Yo** anusayo **etassa** bhavatañhāsāṅkhātassa **dhammassa** paccayo hoti, **ayaṃ** anusayo **avijjānusayo** hoti. “Anusayo bahuviddho, kasmā avijjānusayoti saddahitabbo”ti vattabbattā “**avijjāpaccayā hi bhavatañhā**”ti vuttaṃ. Avijjāya bhavatañhāya paccayattā avijjānusayo saddahitabbo. Avijjāya hi bhavesu ādīnavassa adassanavasena bhavassādantañhā bhavatīti. **Ime dve kilesāti**ādimhi heṭṭhā vuttanayānusārena cattāri saccāni niddhāretvā visabhāgasabhāgadhammāvaṭṭanaṃ viññātabbaṃ, samathavipassanā pana maggasampayuttāva gahetabbā.

“**Sabbapāpassā**”tiādikassa anusandhyattho **aṭṭhakathāyaṃ** (netti. aṭṭha. 30) vutto. **Sabbapāpassāti** kammāpathabhāvappattāpattassa niravasesassa akusalassa. **Akaraṇanti** saparasantānesu anuppādanaṃ. **Kusalassāti** kammāpathabhāvappattāpattassa tebhūmakakusalassa ceva lokuttarakusalassa ca. **Upasampadāti** santāne uppādanavasena sampadā. Sassa attano cittanti **sacittaṃ**, sacittassa pariyaḍāpanaṃ vodānaṃ arahattaphaluppattiyāti **sacittapariyaḍāpanaṃ**. Arahattamagguppādo pana “kusalassa upasampadā”ti padena gahito. **Etam** akaraṇādittayadīpanaṃ **buddhānaṃ** sammāsambuddhānaṃ **sāsaṇaṃ** ovādoti gāthātho.

Gāthāyaṃ yassa pāpassa akaraṇaṃ vuttaṃ, taṃ pāpaṃ duccharitakamma pathavasena vibhajitūṃ “**sabbapāpaṃ nāma**”tiādi vuttaṃ. **Dosasamuṭṭhānanti** yebhuyyavasena vuttaṃ, lobhasamuṭṭhānampi bhavati. **Lobhasamuṭṭhānanti**pi yebhuyyavasena vuttaṃ, dosasamuṭṭhānampi bhavati. **Mohasamuṭṭhānampi** tatheva vuttaṃ. Lobhasamuṭṭhānadosasamuṭṭhānampi sambhavatīti daṭṭhabbaṃ. Sabbapāpo duccharitakamma pathappahedena vibhatto, “ettakeneva vibhajitabbo, udāhu aññena vibhajitabbo”ti pucchitabbattā aññena akusalamūlaagatigamanabhedenapi vibhajitūṃ “**yā abhijjhā**”tiādi vuttaṃ. **Aṭṭhakathāyaṃ** pana “evaṃ duccharitaakusalakamma pathakammavibhāgena ‘sabbapāpa’nti ettha vuttapāpaṃ vibhajitvā idānissa akusalamūlavasena agatigamanavibhāgampi dassetuṃ ‘akusalamūla’ntiādi vutta’nti (netti. aṭṭha. 30) anusandhyattho vutto. Mohavasena sabhāvaṃ ajānantassa bhayasambhavato yaṃ bhayā ca mohā ca agatiṃ gacchati, idaṃ **mohasamuṭṭhānanti** vuttaṃ.

Sabbapāpo ācariyena vibhatto, amhehi ca ñāto, “katamaṃ sabbapāpassa akaraṇa”nti pucchitabbattā **tattha lobho asubhāya**”tiādi vuttaṃ. **Aṭṭhakathāyaṃ** pana –

“Ettāvata ‘sabbapāpassa akaraṇa’nti ettha pāpaṃ dassetvā idāni tassa akaraṇaṃ dassento ‘lobho...pe... paññāyā’ti tīhi kusalamūlehi tiṇṇaṃ akusalamūlānaṃ pahānavasena sabbapāpassa akaraṇaṃ anuppādanamāhā”ti (netti. aṭṭha. 30) –

Vuttaṃ. Subhādhimuttavasena pavatto **lobho asubhāya** asubhabhāvanāya tathāpavattena alobhena tadaṅgavikkhambhanappahānena **pahīyati**, sattesu kujjhanadussanavasena pavatto **doso mettāya** mettābhāvanāya tathāpavattena adosena ca tadaṅgavikkhambhanappahānena **pahīyati**, sattesu ceva saṅkhāresu ca muyhanavasena pavatto **moho paññāya** vicāraṇapaññāya ca bhāvanāmaggapaññāya ca tadaṅgavikkhambhanasamucchedappahānena **pahīyati**.

“Yadi tīhi kusalamūleheva akusalamūlāni pahīyanti, evaṃ sati upekkhākaruṇā muditā niratthakā bhaveyyu”nti vattabbattā “**tathā lobho upekkhāya**”tiādi vuttaṃ. **Upekkhāyati** “sabbe sattā kammassakā”tiādinā bhāvītāya upekkhāya. Muditā aratiṃ vūpasamētvā aratiyā mūlabhūtaṃ mohampi pajahatīti manasi katvā “**moho muditāya pahānaṃ abbattham gacchati**”ti vuttaṃ. “Akusalamūlānaṃ kusalamūlādīhi pahātabbattaṃ kena amhehi saddahitabba”nti vattabbattā “**tenāhā**”tiādi vuttaṃ. **Tena** tathā pahātabbattena bhagavā “sabbapāpassa akaraṇa”nti vacanaṃ āha, tena “sabbapāpassa akaraṇa”nti vacanena tathā pahātabbattaṃ tumhehi saddahitabbanti vuttaṃ hoti.

31. “Ettāvata ca sabbapāpo vibhatto, tassa akaraṇaṇa vibhattaṃ siyā, evaṃ sati aṭṭhamicchattānaṃ akaraṇaṃ anivāritaṃ siyā”ti vattabbattā “**sabbapāpaṃ nāma aṭṭha micchattāni**”tiādi vuttaṃ. **Micchāsati**ti aniccādīsu “nicca”nti anussaraṇacintanādivasena pavattaakusalappavatti.

Sabbapāpassa akaraṇaṃ bahudhā ācariyena vibhattaṃ, amhehi ca viññātaṃ, “kathaṃ kusalassa sampadā vibhajitabbā viññātābbā”ti vattabbattā kusalassa sampadaṃ vibhajitvā dassento “**aṭṭhasu micchatesu pahīnesū**”tiādimāha. **Aṭṭha sammattāni**ti sammādiṭṭhi sammāsaṅkappo sammāvācā sammākammanto sammājīvo sammāvāyāmo sammāsati sammāsamādhīti aṭṭhasammattāni visabhāgaparivattanadhammasavasena **sampajjanti**. **Atītassati** atītena sammāsambuddhena desitassa. Vipassino hi bhagavato ayaṃ pātimokkhuddesagāthā. **Citte pariyodāpiteti** cittapaṭibaddhā pañcakkhandhāpi pariyodāpitā bhavanti. “Cittapariyodāpitena pañcannaṃ khandhānaṃ pariyodāpitabhāvo kathaṃ amhehi saddahitabbo”ti vattabbattā “**evañhi**”tiādi vuttaṃ. **Evaṃ** vuttappakārena bhagavā yaṃ “cetovisuddhattham bhikkhave tathāgate brahmacariyaṃ vussati”ti vacanaṃ āha, tena “ceto...pe... vussati”ti vacanena tumhehi saddahitabboti vuttaṃ hoti. “Pariyodāpanā katividhā bhavanti”ti vattabbattā “**duvidhā hi**”tiādi vuttaṃ. Samathavipassanāya nīvaraṇappahānaṇa ariyamaggabhāvanāya anusayasamugghāto cāti pariyodāpanassa duvidhattā pañcakkhandhā pariyodāpitā bhavanti attho. Pahīnanīvaraṇānusayā hi puggalā pasādanīyavaṇṇā honti.

“Pariyodāpanassa kittikā bhūmiyo”ti pucchitabbattā “**dve pariyodāpanabhūmiyo**”tiādi vuttaṃ. “Sabbapāpassa akaraṇa”ntiādigāthāya desitesu dhammesu katamaṃ dukkhasaccaṃ, katamaṃ samudayasaccaṃ, katamaṃ maggasaccaṃ, katamaṃ nirodhasacca”nti pucchitabbattā “**tattha yaṃ paṭivedhenā**”tiādi vuttaṃ. **Tatthā**ti gāthāya desitesu dhammesu **yaṃ** khandhapañcakaṃ **paṭivedhena** pariññābhīsamayena pariyodāpeti, **idaṃ** khandhapañcakaṃ **dukkhaṃ** dukkhasaccaṃ bhava. **Yato** tañhāsaṃkilesato khandhapañcakaṃ pariyodāpeti, **ayaṃ** tañhāsaṃkilesa **samudayo** samudayasaccaṃ. **Yena** ariyamaggaṅgena pariyodāpeti, **ayaṃ ariyamaggo** maggasaccaṃ. **Yaṃ** asaṅkhatadhātum adhigatena puggalena pariyodāpeti, **ayaṃ** asaṅkhatadhātudhammo **nirodho** nirodhasaccaṃ bhava. **Imāni cattāri saccāni** gāthāya desitadhammānaṃ sabhāgavisabhāgadhammāvaṭṭanavasena niddhāritāni. “**Tenāhā**”tiādikassa attho heṭṭhā vuttanayena veditabbo.

“Sabbapāpassa akaraṇa”ntiādigāthāya desitānaṃ dhammānaṃ sabhāgavisabhāgadhammāvaṭṭanavasena cattāri saccāni ācariyena niddhāritāni, amhehi ca viññātāni.

“Dhammo have rakkhati dhammacāriṃ, chattaṃ mahantaṃ yatha vassakāle;
Esānisamso dhamme suciṇṇe, na duggatiṃ gacchati dhammacārī”ti –

Gāthāya desitānaṃ dhammānaṃ visabhāgasabhāgadhammānaṃ āvaṭṭanavasena kathaṃ cattāri saccāni niddhāritāni”ti vattabbattā “**dhammo have**”tiādimāha. Tāya gāthāya desite dhamme vibhajitvā dassento “**dhammo nāmā**”tiādimāha. Tattha **dhammo nāmā**ti puññadhammo nāma. **Indriyasamvaroti** manacchaṭṭhindriyasamvarasīlādiko sabbo samvaro. Tena vuttaṃ – “indriyasamvarasīsenā cettha sabbampi sīlaṃ gahitanti daṭṭhabba”nti (netti. aṭṭha. 31). Cattāro **apāyā** dukkaṭakammakārīnaṃ gatibhūtattā **duggati**. **Sabbā upapattiyo** pana dukkhadukkhasaṅkhārādukkhavipariṇāmadukkhasamaṅgīnaṃ gatibhūtattā **duggati** nāma.

“Tasmiṃ duvidhe dhamme indriyasamvaradhammo kattha ṭhito, kathaṃ suciṇṇo, kuto rakkhatī”ti pucchitabbattā “**tattha yā samvarasīle**”tiādi vuttaṃ. **Tatthā**ti tasmiṃ duvidhe dhamme. Samvarasīle ṭhitā yā akhaṇḍakāritā hoti, **ayaṃ** akhaṇḍavasena kātabbo samvarasīle ṭhito suṭṭhu āciṇṇapariciṇṇo puññadhammo catūhi **apāyehi** attano ādhāraṃ attānaṃ rakkhantaṃ puggalaṃ ekantikabhāvena **rakkhati**, anekantikabhāvena pana rakkhitamatto puññadhammopi rakkhatīti attho gahetabbo. **Apāyehī**ti ca padhānavasena vuttaṃ, rogādiantarāyatopi rakkhati. Rogādiantarāyo vā ayato apagattā apāyantogadhoti daṭṭhabbo.

“Tathā rakkhatīti kena amhehi saddahitabbo”ti vattabbattā “**evaṃ bhagavā**”tiādi vuttaṃ. **Evaṃ** vuttappakārena lakkhaṇapakāradassanaṃ bhagavā “dvemā, bhikkhave, sīlavato gatiyo devā ca manussā cā”ti yaṃ vacanaṃ āha, tena “dvemā...pe... manussā cā”ti vacanena tumhehi saddahitabboti vuttaṃ hoti. “Samvarasīle ṭhitassa akhaṇḍakātabbassa suciṇṇassa puññadhammassa apāyehi rakkhaṇe ekantikabhāvo kena suttana dīpetabbo”ti vattabbattā “**evaṃ nālandāya**”ntiādi vuttaṃ. Tattha **evaṃcā**ti iminā idāni vuccamānena pakārenapi vuttappakāro attho veditabbo. **Nālandāyanti** nālandanāmake nigame nisīno asibandhakanāmassa putto **gāmaṇi** gāmajetṭhako bhagavantaṃ **etaṃ** vuccamānaṃ “brāhmaṇā, bhante”tiādivacanaṃ avoca.

Brāhmaṇāti bāhirakā brāhmaṇā. **Bhanteti** bhagavantaṃ gāmaṇi ālapati. **Pacchābhūmakā**ti pacchimadisāya nisīnakkā. **Uyyāpentī**ti manussalokato uddhaṃ devalokaṃ yāpenti pāpenti.

Idhassāti idhaloke assa bhavēyya. Puriso pāṇātipātī...pe... micchādiṭṭhiko assa bhavēyyāti yojanā. Sesam pālito ceva vuttānusārena ca ñeyyaṃ.

32. “Visabhāgadhammasabhāgadhammāvaṭṭanavasena catunnaṃ saccānaṃ niddhāritabhāvo kena amhehi saddahitabbo”ti vattabbattā “**tenāha mahākaccāno ekamhi padaṭṭhāne**”ti vuttaṃ.

“Ettāvatā ca āvaṭṭo hāro paripuṇṇo, añño niyutto natthī”ti vattabbattā “**niyutto āvaṭṭo hāro**”ti vuttaṃ. Yassaṃ yassaṃ pāliyaṃ yo yo āvaṭṭo hāro yathālābhavasena yojito, tassaṃ tassaṃ pāliyaṃ so so āvaṭṭo hāro tathā niddhāretvā **yutto** yojitoti attho daṭṭhabbo.

Iti āvaṭṭahāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭīkānusāreneva gambhīrattho vitthārato vibhajitvā gahetabboti.

8. Vibhattihāravibhaṅgavibhāvanā

33. Yena yena saṃvaṇṇanāvīsesabhūtena āvaṭṭahāravibhaṅgena āvaṭṭetabbā padaṭṭhānādayo vibhattā, so saṃvaṇṇanāvīsesabhūto āvaṭṭahāravibhaṅgo paripuṇṇo, “tatha katamo vibhattihāravibhaṅgo”ti pucchitabbattā “**tatha katamo vibhattihāro**”tiādi vuttaṃ. Tattha **tatthā** ti tesu niddiṭṭhesu soḷasasu desanāhārādīsu **katamo** saṃvaṇṇanāvīseso **vibhattihāro** vibhattihāravibhaṅgo nāmāti pucchati. “Dhammañca padaṭṭhānaṃ bhūmiñcā”tiādiniddesassa idāni mayā vuccamāno “dve suttāni”tiādikō vitthārabhūto saṃvaṇṇanāvīseso vibhattihāro vibhattihāravibhaṅgo nāmāti attho gahetabbo.

“Yesu suttasu vuttā dhammapadaṭṭhānabhūmiyo iminā vibhattihārena vibhattā, tāni suttāni kittakānī”ti pucchitabbattā tāni suttāni paṭhamam dassetuṃ “**dve suttāni vāsanābhāgiyañca nibbedhabhāgiyañca**”ti vuttaṃ. Tattha **vāsanābhāgiyanti** puññabhāvanā vāsanā nāma, vāsanāya bhāgo koṭṭhāso **vāsanābhāgo**, vāsanābhāge vācakabhāvena niyuttaṃ suttanti **vāsanābhāgiyaṃ**, katamaṃ taṃ? Yasmiṃ sutte tīṇi puññakiriyavatthūni bhagavatā desitāni, taṃ suttam vāsanābhāgiyaṃ. **Nibbedhabhāgiyanti** lobhakkhandhādīnaṃ nibbijjhaṇaṃ padālanam **nibbedho**, nibbedhassa bhāgo koṭṭhāso **nibbedhabhāgo**, nibbedhabhāge vācakabhāvena niyuttaṃ suttanti **nibbedhabhāgiyaṃ**, katamaṃ taṃ? Yasmiṃ sutte sekkhāsekkhadhammā bhagavatā desitā, taṃ suttam nibbedhabhāgiyaṃ.

“Tesaṃ suttānaṃ paṭiggāhakā puggalā yāhi paṭipadāhi sampajjanti, tā paṭipadā kittikā”ti pucchitabbattā “**dve paṭipadā**”tiādi vuttaṃ. Dānasīlabhāvanāmayapuññabhāge bhavā paṭipadāti **puññabhāgiyā**. Phalabhāge bhavā paṭipadāti **phalabhāgiyā**. “Yesu sīlesu ṭhitā paṭiggāhakā paṭipajjanti, tāni sīlāni kittakānī”ti pucchitabbattā “**dve sīlānī**”tiādi vuttaṃ. Saṃvarati etena saṃvarenāti **saṃvaro**, so saṃvaro pātimokkhasaṃvaro, satsaṃvaro, ñāṇasaṃvaro, khantisaṃvaro, vīriyasaṃvaroti pañcavidho. Sabbopi pāpasamvaraṇato **saṃvaro**, lokiyalokuttarasampattiṭṭhānattā **sīlam** nāma. Pajahati etena pahātabbeti **pahānam**, pajahanaṃ vā **pahānam**, tañca pahānam tadaṅgappahānam, vikkhambhanappahānam, samucchedappahānam, paṭipassaddhippahānam, nissaraṇappahānanti pañcavidham. Tattha nissaraṇappahānam vajjetvā catubbidham pahānam vuttanayena **sīlam** nāma.

“Tesu suttādīsu bhagavā katamaṃ suttam katamāya paṭipadāya desayati, katarasmiṃ sīle ṭhito puggalo katamena sīlena brahmacārī bhavati”ti pucchitabbattā tathā vibhajitvā dassetuṃ “**tatha bhagavā**”tiādi vuttaṃ. **Tattha** tesu vāsanābhāgiyādīsu suttasu vāsanābhāgiyaṃ suttam **tattha** tāsu puññabhāgiyādīpaṭipadāsu puññabhāgiyāya paṭipadāya bhagavā yassa puggalassa desayati, **so** vāsanābhāgiyasuttapaṭiggāhako puggalo tattha saṃvarasīlādīsu **saṃvarasīle ṭhito** hutvā **tena** saṃvarasīlasāṅkhātena **brahmacariyena** seṭṭhacariyena **brahmacārī** seṭṭhācārapūrakō bhavati. **Tattha** tesu vāsanābhāgiyādīsu suttasu nibbedhabhāgiyaṃ suttam **tattha** tāsu puññabhāgiyādīpaṭipadāsu phalabhāgiyāya paṭipadāya yassa puggalassa bhagavā desayati, **so** nibbedhabhāgiyasuttapaṭiggāhako puggalo tattha saṃvarasīlādīsu **pahānasīle** samucchedappassaddhippahānavasena **ṭhito** hutvā **tena** pahānasīlasāṅkhātena vīsesabhūtena maggasaṅkhātena **brahmacariyena** brahmacārī bhavatīti yojanā kātabbā.

“Vāsanābhāgiyasuttādīsū katamaṃ vāsanābhāgiyaṃ sutta”nti pucchitabbattā **“tattha katama”**ntiādi vuttaṃ. Tattha **tatthāti** tesu vāsanābhāgiyasuttādīsū. **Dānakathāti** sappurisadānādānaphalaasappurisadānādānaphalakathā. **Sīlakathāti** pañcasīlādisīlaphalakathā. **Saggakathāti** saggasampattisukhakathā ceva sagge nibbattāpakapuññakathā ca. **Ādīnavoti** ādīnavadassako suttanto. **Ānisamsoti** ānisamsadassako suttanto. Vāsanābhāgiyaṃ suttaṃ nāmāti yojanā.

“**Tattha katama**”ntiādīsū anusandhyattho vuttanayova. Yā desanā catusaccappakāsanā, sā desanā nibbedhabhāgiyaṃ suttaṃ nāmāti yojanā. Evañca sati vāsanābhāgiyasuttassapi nibbedhabhāgiyasuttabhāvo āpajjeyya catusaccappakāsanatoti codanaṃ manasi katvā **“vāsanābhāgiye sutte”**tiādi vuttaṃ. Vāsanābhāgiye sutte **pajānanā** vuṭṭhānagāminivipassanā ariyamaggapadaṭṭhānabhūtā paññā natthi, **maggo** ariyamaggo natthi, **phalaṃ** ariyaphalaṃ natthi. Nibbedhabhāgiye sutte pana pajānanādayo atthi, vāsanābhāgiye sutte natthi. “Pajānanā”tiādinā catusaccappakāsanā dānakathādikā nibbedhabhāgiye sutte antogadhā, itaraṃyeva vāsanābhāgiyasuttanti nāmāti dasseti. Yesu suttasu vuttā dhammapadaṭṭhānabhūmiyo vibhattā, tāni suttāni dveyeva na honti, kasmā “dveyeva suttāni niddhāritāni”ti ce vadeyyuṃ? Asaṅkarato sutte vuttānaṃ dhammapadaṭṭhānabhūmiṇaṃ vibhajitabbānaṃ suviññeyyattā. “Yadi evaṃ saṃkilesabhāgiyaasekkhabhāgiyasuttānipi niddhāritāni asaṅkarattā”ti ce vadeyyuṃ? No niddhāritāni, vāsanābhāgiyasutte niddhārite saṃkilesabhāgiyasuttampi niddhāritaṃ, saṃkilesadhammato nissatṭhadhammaṃyeva vāsanābhāgiyadhammattā nibbedhabhāgiyasutte ca niddhārite asekkhabhāgiyasuttampi niddhāritaṃ anaññattā.

“Yesu suttasu vuttā dhammapadaṭṭhānabhūmiyo vibhattihārena vibhattā, tāni suttāni katamena phalena yojayitabbāni”ti pucchitabbattā **“imāni cattāri suttāni”**tiādi vuttaṃ. Tattha **imāni cattāri suttāni**ti yathāniddhāritāni vāsanābhāgiyanibbedhabhāgiyasuttāni ceva taṃniddhāraṇena niddhāritāni saṃkilesabhāgiyaasekkhabhāgiyasuttāni cāti cattāri suttāni **imesaṃyeva catunnaṃ suttānaṃ desanāya** nayena nītena **phalena sabbato** sabbabhāgena saṃvarasīlappahānasīlena brahmacariyena yojayitabbāni. Yojentena ca **sabbato** sabbabhāgena ca padādivicayena hārena saṃvarasīlādikaṃ phalaṃ **vicinitvā yuttihārena** yuttaṃ phalaṃ gavesitvā “idaṃ phalaṃ imassa puggalassa phalaṃ, idaṃ phalaṃ imassa suttassa phala”nti suttāni visuṃ visuṃ phalena yojayitabbāni attho gahetabbo.

“Kittakena phalena brahmacariyena yojetabbāni”ti pucchitabbattā **“yāvaticā ñāṇassa bhūmi”**ti vuttaṃ. Bhagavatā desitena vāsanābhāgiyasuttena siddhā **yāvaticā** puññabhāgiyā paṭipadādayo vibhajanañāṇassa **bhūmi** ārammaṇā bhavitumarahanti, tāvatikāhi bhūmihi vāsanābhāgiyasuttaṃ yojayitabbāṃ. Nibbedhabhāgiyasuttena siddhā **yāvaticā** phalabhāgiyā paṭipadādayo vibhajanañāṇassa **bhūmi** ārammaṇā bhavitumarahanti, tāvatikāhi bhūmihi nibbedhabhāgiyasuttaṃ yojetabbāṃ. Itaradvayampi suttaṃ yathāsambhavaṃ yojetabbāṃ. Etena ñāṇassa bhūmiṇaṃ suttatthānaṃ bahuvidhattaṃ dasseti.

34. Vāsanābhāgiyasuttādīsū vuttā dhammā vāsanābhāgiyanibbedhabhāgiyabhāvehi ācariyena vibhattā, amhehi ca ñātā, “kathaṃ saṃkilesabhāgiyaasekkhabhāgiyabhāvehi asādhāraṇāsādhāraṇabhāvehi vibhajitabbā”ti pucchitabbattā **“tattha katame dhammā sādharmaṇā”**tiādi āraddhaṃ. **Aṭṭhakathāya** pana –

“Evaṃ vāsanābhāgiyanibbedhabhāgiyabhāvehi dhamme ekadesena vibhajitvā idāni tesam kilesabhāgiyaasekkhabhāgiyabhāvehi sādharmaṇāsādhāraṇabhāvehi vibhajituṃ ‘tattha katame dhammā sādharmaṇā’tiādi āraddha”nti (netti. aṭṭha. 34) –

Vuttaṃ. Tattha **tatthāti** ye dhammā sutte vuttā vibhattihārena vibhajitabbā, tesu dhammesu **katame dhammā sādharmaṇā**ti pucchati, **dve dhammā sādharmaṇā**ti vissajjeti. Te dve dhamme sarūpato dassetuṃ **“nāmasādharmaṇā, vatthusādharmaṇā cā”**ti vuttaṃ. Tattha **nāmasādharmaṇā**ti nāmena nāmapaññattiyā sādharmaṇā samānā, “kusalā”ti nāmena ekavīsati cittuppādā samānā,

“akusalā”tyādināmena dvādasa cittuppādā samānā, kusalādināmapaññattivacanena vacanīyā atthā kusalādināmasādhāraṇāti vuttā. Tena **ṭikāyaṃ** –

“Nāmaṃ nāmapaññatti, tam mukheneva saddato tadatthāvagamo. Saddena ca sāmāññarūpeneva tathārūpassa atthassa gahaṇaṃ, na visesarūpena. Tasmā saddavacanīyā atthā sādharmaṇarūpanāmāyattagahaṇīyatāya nāmasādhāraṇā vuttā”ti –

Vuttaṃ. **Vatthusādhāraṇāti** patiṭṭhānabhūtena vatthunā sādharmaṇā. Yasmiṃ patiṭṭhānabhūte santāne vā cittuppādādīmihi vā ye dhammā pavattanti, te dhammā tena santānena vā vatthunā tena cittuppādādīnā vā sādharmaṇā samānāti attho. Ekasantāne patitattā phusanādisabhāvato bhinnāpi vatthusādhāraṇā samānavatthukāyeva bhavanti vi bhattihārena vibhajitvāti vuttaṃ hoti.

“Kiṃ nāmasādhāraṇavatthusādhāraṇāyeva vibhajitabbā, aññaṃ vibhajitabbā natthī”ti pucchitabbattā **“yaṃ vā panā”**tiādi vuttaṃ. Nāmasādhāraṇavatthusādhāraṇehi aññaṃ yaṃ vā pana kicca sādharmaṇapaccayasādhāraṇapaṭipakkhādisādhāraṇampi dhammajātaṃ **evaṃjātiyaṃ** sādharmaṇajātiyaṃ, tampi sabbaṃ vicayahārena vicinitvā yuttihārena gavesitvā yuttaṃ sādharmaṇaṃ vibhattihārena vibhajitabbanti adhippāyo. “Tesu nāmasādhāraṇādisu katame nāmasādhāraṇā, katame vatthusādhāraṇā”ti pucchitabbattā **“micchattaniyatānaṃ sattāna”**ntiādi vuttaṃ. Mātughātakādīnaṃ channaṃ micchattaniyata kammakarānaṃ sattānaṃca duggatiahetukasugatiahetukaduhetukatihetukānaṃ catunnaṃ puthujjanānaṃ aniyata kammakarānaṃ sattānaṃca santāne pavattā dassanapahātābbā kilesā dassanapahātābbānāmasādhāraṇā samānā bhavanti sakkāyadīṭṭhivicikicchāsīlabbataparāmasanavasena bhinnasabhāvānampi dassanapahātābbānāmanātivattanato. Vuttappakārānaṃ niyatāniyatāsattānaṃ dassanapahātābbānaṃ kilesānaṃ patiṭṭhānavatthubhāvato vatthusādhāraṇā ca samānavatthukāti attho. **Puthujjanassa** duggatiahetukādicatubbidhasattassa, **sotāpanassa** ca santāne pavattā **kāmarāgabyāpādā** kilesā kāmarāgabyāpādanāmasādhāraṇā samānā bhavanti sakadāgāmimaggappahātābbānāgāmimaggappahātābbavasena bhinnasabhāvānampi kāmarāgabyāpādanāmanātivattanato. Vuttappakārassa **puthujjanassa, sotāpanassa** ca kāmarāgabyāpādānaṃ patiṭṭhānavatthubhāvato vatthusādhāraṇā samānavatthukāti attho ca gahetabbo. **Puthujjanassa, anāgāmiassa** ca santāne pavattā **uddhambhāgiyā saṃyojanā** uddhambhāgiyanāmasādhāraṇā samānā bhavanti rūparāgādivasena bhinnasabhāvānampi uddhambhāgiyanāmanātivattanato. **Puthujjanassa, anāgāmiassa** ca uddhambhāgiyānaṃ patiṭṭhānavatthubhāvato vatthusādhāraṇā samānavatthukāti attho ca gahetabbo. Tena vuttaṃ **ṭikāyaṃ** – “dassanapahātābbānaṃhi yathā micchattaniyatāsattā pavattiṭṭhānaṃ, evaṃ aniyatāpi”ti vuttaṃ. Saṅkhepato pana saṃkilesapakkhe pahānekaṭṭhā kilesā nāmasādhāraṇā honti, sahaṃjekaṭṭhā kilesā vatthusādhāraṇāti daṭṭhabbā.

Saṃkilesapakkhe sādharmaṇā ācariyena vibhattā, amhehi ca ñātā, “kathaṃ vodānapakkhe sādharmaṇā vibhattā”ti pucchitabbattā **“yaṃ kiñci ariyasāvako”**tiādi vuttaṃ. Tattha **yaṃ kiñcīti** sāmāññavasena vuttā paṭhamajjhānasamāpattiādikā lokiyā samāpattiyeva gahitā. **Ariyasāvako**ti ariyassa bhagavato sāvako ariyasāvako vattabbo, jhānalābhī ca phalaṭṭho ca puggalo, na maggaṭṭho. Maggaṭṭho hi lokiyaṃ yaṃ kiñci samāpattiṃ na samāpajjati. **Sabbā sā** lokiyasamāpatti rūpāvacarā arūpāvacarā dibbavihāro brahmavihāro paṭhamajjhānasamāpattiṃti evamādihi pariyāyehi sādharmaṇā taṃsamaṅgīhi vītarāgāvītarāgehi sādharmaṇā lokiyasamāpattināmanātivattanato ca vītarāgāvītarāgehi samāpajjitabbato ca. “Ariyasāvako ca lokiyaṃ samāpattiṃ samāpajjanto odhiso odhiso samāpajjati, evaṃ sati kathaṃ vītarāgehi sādharmaṇāti saddahitabbā”ti vattabbattā **“sādharmaṇā hi dhammā”**tiādi vuttaṃ. **Aṭṭhakathāyaṃ** pana – “kathaṃ te odhiso gahitā, atha odhiso gahetabbā, kathaṃ sādharmaṇāti anuyogaṃ manasi katvā taṃ visodhento āha – ‘sādharmaṇā hi dhammā evaṃ aññaṃañña’ntiādi”ti vuttaṃ.

Tattha evaṃ vītarāgāvītarāgehi odhiso odhiso samāpajjitabbā **dhammā param param** pacchā pacchā pavattiyamānaṃ dhammajātaṃ **sakaṃ sakaṃ** pubbe pubbe jātaṃ “lokiyasamāpatti”ti nāmaṃ

niyatavisayaṃ aññamaññaṃ hutvā hi yasmā nātivattanti, tasmā sādharmaṇāti saddahitabbā gahetabbāti attho. “Paraṃ paraṃ samāpajjanto kathaṃ nātivattati”ti vattabbattā nātivattanāṃ pākaṭaṃ kātuṃ “**yopi**”tiādi vuttaṃ. **Yo** ariyasāvako vā avītarāgo vā. **Imehi** lokiyasamāpattidhammehi samannāgato, so ariyasāvako vā avītarāgo vā paraṃ paraṃ samāpajjantopi **taṃ dhammaṃ** lokiyaṃ samāpattidhammaṃ nātivattati, aññaṃ upagantvā nātikkatamāti attho. Yehi lokiyasamāpattidhammehi samannāgato, **ime** lokiyasamāpatti **dhammā** sādharmaṇāvāti daṭṭhabbā.

“Vāsanābhāgiyādisuttesu vuttā ye dhammā iminā vibhattihārena vibhattā, yesu dhammesu katame dhammā asādharmaṇā”ti pucchitabbattā “**tattha katame dhammā asādharmaṇā**”tiādi vuttaṃ. **Tattha** tesu vibhajitabbesu dhammesu **katame dhammā asādharmaṇāti** pucchati, pucchivā yāva desanaṃ upādāya asādharmaṇā dhammā gavesitabbā, “sekkhāsekkhā”ti vā gavesitabbā, “bhabbābhabbā”ti vā gavesitabbā. Atha vā yāva “sekkhāsekkhā bhabbābhabbā”ti desanā vuttā, tāva desanaṃ upādāya asādharmaṇā gavesitabbā. Kathaṃ gavesitabbā? Ariyesu sekkhāsekkhadhammavasena “sekkhā”ti nāmaṃ asekkhena asādharmaṇaṃ, “asekkhā”ti nāmaṃ sekkhena asādharmaṇanti vā, anariyesu “bhabbā”ti nāmaṃ abhabbena asādharmaṇaṃ, “abhabbā”ti nāmaṃ bhabbena asādharmaṇanti vā gavesitabbā. **Kāmarāgabyāpādā** saṃyojanā appahīnattā anusayabhāvena uppajjanārahattā **aṭṭhamakassa** sotāpattimaggaṭṭhassa ca **sotāpannessa** phalaṭṭhassa ca sādharmaṇā bhavanti, **dhammatā** dhammasabhāvo asādharmaṇo. Idaṃ vuttaṃ hoti – “aṭṭhamakassa sotāpattimaggaṭṭhatā sotāpannessa asādharmaṇā, sotāpannessa sotāpannaphalaṭṭhatā ca aṭṭhamakassa sotāpattimaggaṭṭhassa asādharmaṇā. Aṭṭhamakassa vā pahīyamānakilesatā sotāpannessa asādharmaṇā, sotāpannessa pahīnakilesatā ca aṭṭhamakassa asādharmaṇā”ti.

Uddhambhāgiyā saṃyojanā appahīnattā anusayabhāvena uppajjanārahattā **aṭṭhamakassa** maggaṭṭhabhāvena aṭṭhamakasadisassa anāgāmi maggaṭṭhassa ca **anāgāmissa** phalaṭṭhassa ca sādharmaṇā, **dhammatā** dhammasabhāvo asādharmaṇā. Idaṃ vuttaṃ hoti – “aṭṭhamakassa anāgāmi maggaṭṭhatā anāgāmissa phalaṭṭhassa asādharmaṇā, anāgāmissa anāgāmi phalaṭṭhatā ca aṭṭhamakassa asādharmaṇā. Aṭṭhamakassa vā pahīyamānakilesatā anāgāmissa asādharmaṇā, anāgāmissa phalaṭṭhassa pahīnakilesatā ca aṭṭhamakassa asādharmaṇā”ti. “Maggaṭṭhatā phalaṭṭhatāya asādharmaṇā, phalaṭṭhatā ca maggaṭṭhatāya asādharmaṇā”tipi vattum vaṭṭati. **Sabbesaṃ** sattannaṃ **sekkhānaṃ** puggalānaṃ **nāmaṃ** “**sekkhā**”ti **nāmaṃ sādharmaṇaṃ**. **Dhammatā asādharmaṇāti** catunnaṃ maggaṭṭhānaṃ taṃtaṃmaggaṭṭhatā aññamaññaṃ maggaṭṭhānaṃ asādharmaṇā. Heṭṭhimaphalattayaṭṭhānaṃ ca asādharmaṇā, heṭṭhimaphalattayaṭṭhānaṃ taṃtaṃphalaṭṭhatā ca aññamaññaṃ phalaṭṭhānaṃ asādharmaṇā, catunnaṃ maggaṭṭhānaṃ ca asādharmaṇāti attho. “Sekkhānaṃ taṃtaṃmaggaṭṭhatā taṃtaṃphalaṭṭhatāya asādharmaṇā, taṃtaṃphalaṭṭhatā ca taṃtaṃmaggaṭṭhatāya asādharmaṇā”ti vattumpi vaṭṭati. **Sabbesaṃ paṭipannakānanti** phalattāya paṭipajjantīti **paṭipannakā**, tesam maggasamaṅgīnaṃ catunnaṃ puggalānaṃ **nāmaṃ** “paṭipannakā”ti nāmaṃ sādharmaṇaṃ, **dhammatā** taṃtaṃmaggaṭṭhatā asādharmaṇā. **Sabbesaṃ sekkhānaṃ** sattannaṃ puggalānaṃ sekkhānaṃ sīlaṃ sādharmaṇaṃ, **dhammatā** taṃtaṃmaggaṭṭhaphalaṭṭhatā asādharmaṇāti. Vāsanābhāgiyasamkilesabhāgiyasuttesu vuttā dassanenapahātādayo ceva nibbedhabhāgiyaasekkhabhāgiyasuttesu vuttā sekkhādayo ca dhammā sādharmaṇāsādharmaṇabhedenā vibhattihārena vibhajitabbāti adhippāyo veditabbo.

“Aṭṭhamakassā”tiādinā ariyesu puggalesu asādharmaṇā ācariyena vibhattā, amhehi ca ñātā, “kathaṃ anariyesu asādharmaṇā vibhattā”ti pucchitabbattā ariyesu vuttanayānusārena anariyesupi vibhajitvā gavesitabbāti dassetuṃ “**evaṃ visesānupassinā**”tiādi vuttaṃ. **Aṭṭhakathāyaṃ** pana – “evaṃ ‘aṭṭhamakassā’tiādinā ariyapuggalesu asādharmaṇadhammaṃ dassetvā itaresu nayadassanattam ‘evaṃ visesānupassinā’tiādi vutta’nti vuttaṃ. **Evaṃ** ariyesu vuttanayānusārena bhabbābhabbesu anariyesu **visesānupassinā** asādharmaṇato visesaṃ asādharmaṇaṃ anupassinā gavesakena paṇḍitena bhabbābhabbesupi **hīnukkaṭṭhamajjhimaṃ upādāya gavesitabbam**. Kathaṃ? Mātughātādivasena pavattānaṃ paṭighasampayuttaditṭhisampayuttasattamajavanacittuppādānaṃ micchattaniyatānaṃ taṃsamaṅgīnaṃ vā tathāpavattā paṭhamajavanacittuppādādayo aniyatā dhammā paṭighasampayuttādibhāvena sādharmaṇā, micchattaniyatā dhammā ekacittuppādattā asādharmaṇā. Yathā hi

cittam “cittasamsaṭṭha”nti na vattabbaṃ, evaṃ micchattaniyatāpi “micchattaniyatāsādhāraṇā”ti na vattabbā. Micchattaniyatesupi niyatamicchādiṭṭhikānaṃ diṭṭhisampayuttasattamajavanacittuppādasamaṅgīnaṃ aniyatā diṭṭhisampayuttapaṭhamajavanacittuppādādayo dhammā diṭṭhisampayuttādibhāvena sādhāraṇā, niyatamicchādiṭṭhi ekacittuppādasamaṅgībhāvato asādhāraṇā. Tenāha aṭṭhakathācariyo –

“Micchattaniyatānaṃ aniyatā dhammā sādhāraṇa, micchattaniyatā dhammā asādhāraṇā. Micchattaniyatesupi niyatamicchādiṭṭhikānaṃ aniyatā dhammā sādhāraṇā, niyatamicchādiṭṭhi asādhāraṇāti iminā nayena visesānupassinā veditabbā”ti (netti. aṭṭha. 34).

Tattha “**iminā nayenā**”ti iminā micchattaniyatānaṃ uppajjitum bhabbā aniyatā dhammā sādhāraṇā, uppajjitum abhabbā aniyatā dhammā asādhāraṇāti gahitā. Tena vuttaṃ “**bhabbābhabbā**”ti. Tathā hīnassa hīno hīnabhāvena sādhāraṇo, majjhimukkaṭṭhā asādhāraṇā. Majjhimassa majjhimo sādhāraṇo, hīnukkaṭṭhā asādhāraṇā. Ukkaṭṭhassa ukkaṭṭho ukkaṭṭhabhāvena sādhāraṇo, hīnamajjhimā asādhāraṇātipi gavesitabbā. Tenāha – “hīnukkaṭṭhamajjhimaṃ upādāya gavesitabba”nti.

“Tattha katame dhammā sādhāraṇā”tiādinā nānāvidhena vibhattihāranayena dhammā vibhajitvā dassitā, amhehi ca ñātā, “kathaṃ bhūmipadaṭṭhānāni vibhattihāranayena vibhajitvā dassitāni”ti pucchitabbabhāvato dhammavibhajanānantaraṃ bhūmipadaṭṭhānāni vibhajitvā dassento “**dassanabhūmi**”tiādimāha. Tattha **dassanabhūmi**ti dassanaṃ bhavati ettha paṭhamamaggeti dassanabhūmi, sotāpattimaggo. **Niyāmāvakkantiyā**ti niyamaṃ **niyāmo**, ko so? Sampattaniyāmo, avakkaṇaṃ **avakkanti**, sotāpattiphalaṃ, niyāmassa avakkanti **niyāmāvakkanti**, tāya. Dassanabhūmināmakō sotāpattimaggo niyāmāvakkantiṇāmakassa sotāpattiphālassa pattiyā padaṭṭhānaṃ. Paṭhamamaggasamaṅgī puggalo hi niyāmaṃ okkamanto nāma, phalāsamaṅgī pana niyāmaṃ okkanto nāma hoti, tasmā niyāmāvakkantisaddena paṭhamaphaluppatti gahitā. **Bhāvanābhūmi**ti uparimaggattayaṃ. **Uttarikānanti** tassa tassa maggassa uparipavattānaṃ taṃtaṃphalānaṃ pattiyā padaṭṭhānanti paccekaṃ yojetabbaṃ.

Dukkā paṭipadā dandhābhiññā mandapaññassa uppajjanato samathaṃ āvahantī hutvā **samathassa padaṭṭhānaṃ** hoti, **sukhāpaṭipadā khippābhiññā** ñāṇādhikassa uppajjanato vipassanāvahantī hutvā **vipassanāya padaṭṭhānaṃ**, avasesā dve paṭipadāpi nātipaññassa uppajjanato samathassa padaṭṭhānanti gahetabbā. Tena **aṭṭhakathāyaṃ** vuttaṃ – “itarā pana tissopi paṭipadā samathaṃ āvahantī”tiādi (netti. aṭṭha. 34). **Dānamayaṃ puññakiriyavatthu** sayameva ekantena dhammassavanassa padaṭṭhānaṃ na hoti, vandanayācanapañhāpucchānādayopi padaṭṭhānaṃ honti, tasmā tehi kāraṇehi sādhāraṇaṃ hutvā **paratoghossassa** padaṭṭhānaṃ hoti, paratoghoso ca dhammassavanapañhāvissajjanādivasena pavatto. Dātabbavattupariccajanavandanayācanakālesu hi yebhuyyena dhammaṃ desenti, pañhāpucchānādikālesu ca vissajjenti, paṭipucchāsācchādīni vā karonti. **Sīlamayaṃ puññakiriyavatthu** pāmojjapītipassaddhisukhasamādhīhi padaṭṭhānabhāvena sādhāraṇaṃ hutvā **cintāmayiyā paññāya** padaṭṭhānaṃ hoti. Sīlavantassa hi sīlaṃ paccavekkhantassa pāmojjādayo honti, samāhito ca dhammacintane samattho hoti.

Bhāvanāmayayaṃ puññakiriyavatthūti purimā purimā samathabhāvanā ceva vipassanābhāvanā ca puññakiriyavatthudānasīlādīhi kāraṇehi sādhāraṇaṃ hutvā **bhāvanāmayiyā paññāya** pacchimāya pacchimāya samathabhāvanāya ceva vipassanābhāvanāya ca padaṭṭhānaṃ. Tena vuttaṃ **aṭṭhakathāyaṃ** – “sādhāraṇānti na bījaṃ viya ānkurassa, dassanabhūmiādayo viya niyāmāvakkantiādīnaṃ āveṇikaṃ, atha kho sādhāraṇaṃ tadaññakāraṇehipi”ti. “Dānamayasīlamayabhāvanāmayapuññakiriyavatthūnaṃ paratoghossacintāmayibhāvanāmayipaññānaṃ padaṭṭhānabhāvo ācariyena vibhatto, evaṃ sati tesam dānamayādīnaṃ yathākkamaṃ pariyattibāhusaccakammaṭṭhānānuyogamaggasammādiṭṭhīnaṃ padaṭṭhānabhāvo na bhaveyyā”ti vattabbattā tathāpavattaṃ padaṭṭhānabhāvampi dassetuṃ “**dānamayaṃ puññakiriyavatthu parato ca ghossassa sutamayiyā ca paññāyā**”tiādi vuttaṃ. **Aṭṭhakathāyaṃ** pana –

“Idāni yasmā dānaṃ, sīlaṃ, lokiyabhāvanā ca na kevalaṃ
yathāvuttaparatoḡhosādīnaṃyeva, atha kho yathākkamaṃ
pariyattibāhusaccakammaṭṭhānānuyogamaggasammādiṭṭhīnaṃpi paccayā honti, tasmā tampi
nayaṃ dassetuṃ puna ‘dānamaya’ntiādīnā desanaṃ vaḍḍhesī’ ti (netti. aṭṭha. 34) –

Vuttaṃ. Tattha dānamayapuññakiriyavatthuno paratoḡhosassa sādharmaṇapadaṭṭhānabhāvo heṭṭhā
vuttanayena ñātabbo. Dānaṃ pana datvā desanaṃ sutvā sutānusārena vitthāretvā cintentassa
pavattamānāya sutamayiyā paññāya vandanayācanādīhi sādharmaṇaṃ hutvā padaṭṭhānaṃ hoti.
Sīlamayapuññakiriyavatthunopi cintāmayiyā paññāya sādharmaṇapadaṭṭhānabhāvo vuttoyeva.
Parisuddhasīlaṃ pana nissāya “jhānaṃ nibbattessāmi, maggaphalaṃ nibbattessāmi” tiādīnā
paccavekkhantassa pavattamānassa yonisomanasikārassa pāmojjādīhi sādharmaṇaṃ hutvā padaṭṭhānaṃ
hoti. Bhāvanāmayapuññakiriyavatthuno bhāvanāmayiyā paññāya sādharmaṇapadaṭṭhānabhāvopi
vuttoyeva. Samathabhāvanāsāṅkhātaṃ pana jhānaṃ pādakaṃ katvā vā paripākaṃ vipassanābhāvaṃyeva
vā nissāya pavattamānāya sammādiṭṭhiyā parisuddhasīlādīhi sādharmaṇaṃ hutvā padaṭṭhānaṃ hoti.

Dānamayapuññakiriyavatthuādīnaṃ paratoḡhosādīnaṃ padaṭṭhānabhāvo punappunaṃ ācariyena
vibhatto, amhehi ca ñāto, “patirūpadesavāsādayopi imesaṃ dhammānaṃ padaṭṭhānānīti yathā
vibhajitabbā, amhehi ca viññātabbā, tathā vibhajitvā dassethā” ti vattabbattā tepi vibhajitvā dassetuṃ
“**patirūpadesavāso**” tiādīmāha. **Aṭṭhakathāyaṃ** pana “tathā patirūpadesavāsādayo
kāyavivekacittavivekādināṃ kāraṇaṃ hontīti imaṃ nayaṃ dassetuṃ ‘patirūpadesavāso’ tiādīmāhā” ti
(netti. aṭṭha. 34) vuttaṃ. Patirūpadesaṃ nissāya vasantassa kāyavivekacittavivekavaḍḍhanato,
samādhiṇaḍḍhanato ca patirūpadesavāso kāyacittavivekassa ca upacārasamādhiappanāsamādhissa ca
sīlādīhi sādharmaṇaṃ hutvā padaṭṭhānaṃ. **Sappurisūpanissayoti** sappurisasantāne pavatto payirupāsato
ālambitabbo pasādo, tato vā upanissayaṃ labhitvā payirupāsantānaṃ santāne pavatto pubbapasādo
yathāvidho sappurisūpanissayo payirupāsantassa saddhāsampannassa ratanattaye **tiṇṇaṃ**
aveccappasādānaṃ ratanattayaguṇādīhi sādharmaṇaṃ hutvā padaṭṭhānaṃ, **samathassa**
labhananimittadāyakaṃ sappurisaṃ payirupāsitvā tena dinnanaye ṭhatvā pavattetabbassa samathassa
sappurisūpanissayo sīlapāmojjapītādīhi sādharmaṇaṃ hutvā padaṭṭhānaṃ. Attasammāpaṇihitassa
pāpajigucchādīnaṃ sambhavato **attasammāpaṇidhānaṃ** jātivayādipaccavekkhaṇena sādharmaṇaṃ hutvā
hiriyā ca padaṭṭhānaṃ, attasammāpaṇihitassa nibbidādīnaṃ sambhavato sīlādīhi sādharmaṇaṃ hutvā
vipassanāya ca padaṭṭhānaṃ.

Tadaṅgādivasena **akusalapariccāgo** nibbidāñāṇādīhi sādharmaṇaṃ hutvā **kusalavīmaṃsāya**
paṭisaṅkhānupassanāya paññāya ca ariyamaggasamādhindriyassa ca padaṭṭhānaṃ.
Dhammasvākkhātātā svākkhātadhammassavanānusārena pavattakusalāmūlakā lokiyalokuttarasampatti
kusalāmūlaropānā nāma, tāya ca tathāvidhakusalāmūlakāya **phalasaṃpattiyā ca** padaṭṭhānaṃ.
Saṅghasuppaṭipannatā saṅghasutṭhūtaṃ saṅghassa upaṭṭhākānaṃ sutṭhubhāvāya sappatissavāya
vacanasampañchanabhāvāya padaṭṭhānaṃ. **Satthusampadā** satthari ceva dhammādīsu ca
guṇaajānanatāya **appasannānaṃ pasādāya pasannānaṃ** appamattakapasādānaṃ **bhiyyobhāvāya**
vaḍḍhanāya padaṭṭhānaṃ. **Appaṭihatapātimokkhatā** saṅghamajjhe vā parisamajjhe vā
dummaṅkūnaṃ dummaṅkūnaṃ dussīlānaṃ puggalānaṃ niggahāya, **pesalānaṃ**
pātimokkhasaṃvarādīsilasampannānaṃ puggalānaṃ phāsuvihārāya ca padaṭṭhānaṃ hoti. Honto pana
yathānurūpehi aññehi kāraṇehi sādharmaṇaṃ hutvā hotīti veditabbo.

“Vāsānābhāgiyasuttādīsu vuttadhammabhūmipadaṭṭhānānaṃ vibhattihārena vibhajitabbabhāvo
amhehi kena jānitabbo saddahitabbo” ti pucchitabbattā “**tenāhā**” tiādī vuttaṃ. Tassattho
vuttanāyānusārena veditabbo.

“Ettāvātā ca vibhattihāro paripuṇṇo, añño niyutto natthī” ti vattabbattā “**niyutto vibhattihāro**” ti
vuttaṃ. Yattha yattha sutte ye ye dhammādayo vuttā, tattha tattha sutte vuttasu tesu tesu dhammādīsu
yathālabhavasena yo yo vibhattihāro yojito, so so vibhattihāro niddhāretvā **yutto** yojitoti attho

datṭhabbo.

Iti vibhattihāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭīkānusārenea gambhīrattho vitthārato vibhajitvā gahettabboti.

9. Parivattanahāravibhaṅgavibhāvanā

35. Yena yena saṃvaṇṇāvisesabhūtena vibhattihāravibhaṅgena sutte vuttā dhammādayo vibhattā, so saṃvaṇṇāvisesabhūto vibhaṅgo paripuṇṇo, “katamo parivattanahāravibhaṅgo”ti pucchitabbattā “**tattha katamo parivattano hāro**”tiādi vuttaṃ. Tattha **tatthā**ti tesu niddiṭṭhesu soḷasasu desanāhārādīsū **katamo** saṃvaṇṇāviseso **parivattano hāro** parivattanahāravibhaṅgo nāmāti pucchati. “Kusalākusale dhamme”tiādiniddesassa idāni mayā vuccamāno “sammādiṭṭhissa purisapuggalassā”tiādikō vitthārasaṃvaṇṇāviseso parivattano hāro parivattanahāravibhaṅgo nāmāti attho gahettabbo.

“Saṃvaṇṇiyamāne sutte niddiṭṭhassa katamassa bhāvitabbassa kusalassa katamo paṭipakkho, kathaṃ parivattetabbo”ti pucchitabbattā imassa bhāvitabbassa kusalassa ayaṃ paṭipakkho, evaṃ pahātabbabhāvavasena parivattetabboti dassento “**sammādiṭṭhissa purisapuggalassā**”tiādimāha. **Aṭṭhakathāyaṃ** pana –

“Tattha yasmā saṃvaṇṇiyamāne sutte yathāniddiṭṭhānaṃ kusalākusaladhammānaṃ paṭipakkhabhūte akusalakusaladhamme pahātabbabhāvādivasena niddhāraṇaṃ paṭipakkhato parivattanaṃ, tasmā ‘sammādiṭṭhissa purisapuggalassa micchādiṭṭhi nijjiṇṇā bhavati’ tiādi āradha”nti (netti. aṭṭha. 35) –

Vuttaṃ. Pahāyakassa hi dhammassa pahātabbabhāvavasena niddhāraṇaṃ, pahātabbassa ca dhammassa pahāyakabhāvavasena niddhāraṇaṃ paṭipakkhato parivattanaṃ nāma hoti. Tattha **sammādiṭṭhissāti** sammā sundarā pasatthā diṭṭhi yassa puggalassāti sammādiṭṭhi. Puggalapadaṭṭhānā hi ayaṃ desanā. Tena vuttaṃ “purisapuggalassā”ti. Sā pana sammādiṭṭhi kammakammaphalādisaddhanavasena vā aniccādivipassanāvasena vā maggasammādasanavasena vā pavattā niravasesāva gahitā. “Yāya bhāvitāya sammādiṭṭhiyā pahātabbā micchādiṭṭhi nijjiṇṇā bhavati, yadi kevalā micchādiṭṭhiyeva nijjiṇṇā bhavati, evaṃ sati tadavasesā akusalā dhammā ajiṇṇā

Bhaveyyu”nti vattabbattā “**ye cassa micchādiṭṭhipaccayā**”tiādi vuttaṃ. Micchādiṭṭhipaccayā aneke pāpakā akusalāyeva dhammā ca **uppajjeyyūṃ** uppajjanārahā bhaveyyuṃ, **te ca** akusalā dhammā **assa** sammādiṭṭhisampannassa purisapuggalassa **nijjiṇṇā** pahātabbārahā anuppajjanasabhāvā honti. Tenāha bhagavā – “upādānanirodhā bhavanirodho”ti (udā. 2; mahāva. 1).

“Yadi sammādiṭṭhissa purisapuggalassa micchādiṭṭhi, tappaccayā akusaladhammāyeva nijjiṇṇā bhavanti, evaṃ sati sammādiṭṭhipaccayā kusalā dhammā na sambhaveyyu”nti vattabbattā “**sammādiṭṭhipaccayā cā**”tiādi vuttaṃ. **Assa** sammādiṭṭhisampannassa purisapuggalassa uppajjanārahā sammādiṭṭhipaccayā aneke **kusalā** samathavipassanā vā bodhipakkhiyā vā **dhammā** sambhavanti, uppannā ca **te** dhammā **assa** sammādiṭṭhisampannassa purisapuggalassa santāne punappunaṃ pavattanavasena **bhāvanāpāripūriṃ gacchanti**.

Sammādiṭṭhiyā paṭipakkhānaṃ micchādiṭṭhiyā, tappaccayānaṃ akusalānaṃ dhammānaṃ parivattanabhāvo ācariyena vibhatto, amhehi ca nīto, “sammāsaṅkappassa dhammassa paṭipakkho dhammo kathaṃ parivattetabbo”ti vattabbattā “**sammāsaṅkappassa purisapuggalassā**”tiādi vuttaṃ.

Yojanattha ādayo vuttanayānusārena veditabbā. Sammā sundarā pasatthā vācā yassa puggalassāti **sammāvāco**, tassa sammāvācassa. “**Purisapuggalassā**”tiādīnaṃ atthopi vuttanayena veditabbo. Ayam pana visesatthosammā aviparītato vimuttiñāṇadassanaṃ yassa puggalassāti **sammāvimuttiñāṇadassano**, tassa sammāvimuttiñāṇadassanassa paccavekkhaṇañāṇadassanasampannassa purisapuggalassa “avimuttāva samānā vimuttā maya”nti micchābhinivesavasena pavattaṃ **micchāvimuttiñāṇadassanaṃ nijjiṇṇaṃ** vigataṃ bhavati. “**Ye cassā**”tiādīnaṃ anusandhyādiko vuttanayānusārena veditabbo.

36. “Sammādiṭṭhissātiādīnā sammādiṭṭhiādīnaṃ kusalānaṃ paṭipakkhā micchādiṭṭhādīkāyeva akusalā pahātabbabbhāvena parivattetabbā”ti pucchitabbattā pāṇātipātāveramaṇiādīnaṃ kusalānaṃ paṭipakkhā pāṇātipātādīkāpi akusalā pahātabbabbhāvena parivattetabbāti dassetuṃ “**yassa vā pāṇātipātā paṭiviratassā**”tiādī vuttaṃ. **Aṭṭhakathāyaṃ** pana “evaṃ sammādiṭṭhiādīmukhena micchādiṭṭhiādīṃ dassetvā puna pāṇātipātaadinnādānakāmesumicchācārādito veramaṇiyādīhi pāṇātipātādīnaṃ parivattanaṃ dassetuṃ ‘yassā’tiādī āradha”nti (netti. aṭṭha. 36) vuttaṃ. Tadaṅgādivasenapahīno hoti. **Kālavādissāti** vaditabbakāle vaditabbaṃ vadati sīlenāti **kālavādī**, tassa.

“Yathāvuttappakāreneva parivattetabbā”ti pucchitabbattā aññena pakārenapi parivattetabbāti dassetuṃ “**ye ca kho keci**”tiādī vuttaṃ. **Aṭṭhakathāyaṃ** pana “ye ca kho keci”tiādīnā sammādiṭṭhiādīmukheneva micchādiṭṭhiādīhi eva parivattanaṃ pakārentarena dassetī”ti (netti. aṭṭha. 36) vuttaṃ. Tattha **keci** micchādiṭṭhikamicchāsāṅkappādīkāyeva puggalā paresaṃ ariyānaṃ ariyaṃ aṭṭhaṅgikaṃ maggaṃ garahanti. **Sandiṭṭhikā** sandiṭṭhe niyuttā, **sahadhammikā** saha dhammena kāraṇena ye vattanti sahadhammikā. **Gārayhā** garahitabbākāre yuttā. Vādā ca anuvādā ca **vādānuvādā**, te bhavanto sammādiṭṭhiṅca **dhammaṃ** garahanti. **Tena** garahaṇena. **Pujjā** pūjitabbā ca na bhavanti, **pāsaṃsā** pasamsitabbā ca na bhavanti. **Evanti**ādīsu sammāsāṅkappaṃ vā sammāvācādīkaṃ vā visuṃ visuṃ sammāsāṅkappaṅca te bhavanto dhammaṃ garahanti. Tena hi ye micchāsāṅkappikā, te bhavanto na pujjā ca pāsaṃsā ca...pe... sammāvimuttiṅca te bhavanto dhammaṃ garahanti. Tena hi ye micchādiṭṭhivācīkā, te bhavanto na pujjā ca pāsaṃsā ca. Sammāvimuttiñāṇadassanaṅca te bhavanto dhammaṃ garahanti. Tena hi ye micchāvimuttikā, te bhavanto na pujjā ca pāsaṃsā ca. Sammāvimuttiñāṇadassanaṅca te bhavanto dhammaṃ garahanti. Tena hi ye micchāvimuttiñāṇadassanikā, te bhavanto na pujjā ca pāsaṃsā cāti yojanā kātābā. “**Micchāvimuttiñāṇadassanā**”tipi pāṭho atthi.

“Ariyamaggasammādiṭṭhādīnaṃ garahaseneva micchādiṭṭhādayo ca parivattetabbā, nāvasesānaṃ pasamsāvaseṇā”ti vattabbattā kāmādīnaṃ pasamsāvaseṇapi kāmānaṃ paṭipakkhā veramaṇiyādayopi parivattetabbāti dassetuṃ “**ye ca kho keci evamāhaṃsū**”tiādī vuttaṃ. Tattha **bhuñjitabbā kāmā**, **paribhuñjitabbā kāmā**, **āsevitabbā kāmā**, **nisevitabbā kāmā**ti ettha kāmīyanteti **kāmā**ti kammasādhanavasena vatthukāmā gahitā, nātipaṇītā kāmā bhuñjitabbā, atipaṇītā kāmā pari samantato bhuñjitabbā. Atipaṇītatarā kāmā ā bhuso sevitabbā, niyatā sevitabbā. **Bhāvayitabbā kāmā**, **bahulikātābā kāmā**ti ettha pana kāmēntīti **kāmā**ti kattusādhanavasena kilesakāmā gahitā, punappunaṃ uppādanavasena **bhāvayitabbā** vaḍḍhāpetabbā pavattetabbā **kilesakāmā**, bahūnaṃ punappunaṃ uppādanavasena kātābā vaḍḍhāpetabbā **kilesakāmā**ti **ye ca** kāmavasikā puthujjanā keci evamāhaṃsu **tesaṃ** kāmavasikānaṃ puthujjanānaṃ kesaṅci tādisehi **kāmehi veramaṇī** kusalacetanā paṭipakkhavasena **adhammo** asevitabbo nāma āpajjeyyāti adhippāyo gahetabbo.

Antadvayavasena parivattanaṃ dassetuṃ “**ye vā pana keci**”tiādī vuttaṃ. **Attakilamathānuayo** **dhammoti niyyānikoti** ye vā pana pañcātapādīpaṭipannaṅkaṃ tatthiyā evamāhaṃsu, **tesaṃ** pañcātapādīpaṭipannaṅkānaṃ **niyyāniko dhammo** majjhimāpaṭipadāsāṅkhāto vipassanāsahito ariyamaggo **adhammo** aniyyāniko abhāvetabbo nāma āpajjeyyāti. Sukhadukkhasenapi parivattanaṃ dassetuṃ “**ye ca kho**”tiādī vuttaṃ. “Pāpaṃ nijjarāpessāmā”ti attahiṃsanādivasena paṭipannaṅkānaṃ pavatto sarīratāpano **dukkho** dhammo niyyānikoti.

Ye ca tathāpaṭipannakā keci evamāhaṃsu, **tesaṃ** tathāpaṭipannakānaṃ anavajjapaccayaparibhogavasena pavatto sarīradukkhūpasamo **sukho dhammo adhammo** appavattetabbo āpajjeyyāti.

Antadvayādivasena parivattanaṃ ācariyena vibhattaṃ, amhehi ca ñātaṃ, “kathaṃ asubhasaññādivasena parivattetabbo”’ti pucchitabbattā evaṃ asubhasaññādivasena subhasaññādikā parivattetabbāti dassetuṃ “**yathā vā panā**”’tiādi vuttaṃ. **Aṭṭhakathāyaṃ** pana “idāni asubhasaññādimukhena subhasaññādi parivattanaṃ dassetuṃ ‘yathā vā panā’’tiādi vutta’nti (netti. aṭṭha. 36) vuttaṃ. **Sabbasaṅkhāresūti** tebhūmakasaṅkhāresu. Āraddhavipassakassa hi tebhūmakā dhammā kilesāsucipaggharaṇakattā asubhato upaṭṭhahanti.

“Yadi sarūpatoyeva imesaṃ ime paṭipakkhāti aparivattetabbā siyuṃ, evaṃ sati niravasesā ca paṭipakkhā na sakkā parivattetuṃ, kathaṃ sakkā parivattetu’nti vattabbattā parivattanalakkhaṇaṃ dassento “**yaṃ yaṃ vā panā**”’tiādimāha. Tattha kusalaṃ vā akusalaṃ vā **yaṃ yaṃ dhammaṃ parivattetukāmo ācariyo cittaena rocayati** diṭṭhiyā **upagacchati**, kusalassa vā akusalassa vā **tassa tassa** rucikassa upagatassa **dhammassa** yo paṭipakkho, **so** paṭipakkhadhammo asaddhammo **assa** dhammassa **aniṭṭhato** paccanīkato **ajjhāpanno** pariññāto. Iṭṭhaṃ vā aniṭṭhaṃ vā **yaṃ yaṃ dhammaṃ parivattetukāmo ācariyo cittaena rocayati** diṭṭhiyā **upagacchati**, iṭṭhassa vā aniṭṭhassa vā **tassa tassa** rucikassa dhammassa yo paṭipakkho, **so** paṭipakkhadhammo **assa** dhammassa **aniṭṭhato** paccanīkadhammato **ajjhāpanno** pariññāto bhavātīti parivattetukāmena icchitabbadhammānurūpapaṭipakkhavasena parivattanaṃ kātabbanti parivattane paṭipakkhalakkhaṇaṃ vuttaṃ. Tena **aṭṭhakathāyaṃ** vuttaṃ – “paṭipakkhassa lakkhaṇaṃ vibhāvetī”’ti.

“Evaṃ vuttappakāraṃ parivattanaṃ amhehi kathaṃ saddahitabba’nti vattabbatā “**tenāhā**”’tiādi vuttaṃ.

“Ettāvatā parivatto hāro paripuṇṇo, añño niyutto natthī”’ti vattabbattā “**niyutto parivattano hāro**”’ti vuttaṃ. Yasmiṃ sutte kusalākusale niddiṭṭhe paṭipakkhavasena nīharitvā yathāsambhavaṃ yo yo parivattano hāro niyutto, tasmīṃ sutte niddiṭṭhe paṭipakkhavasena nīharitvā so so parivattano hāro **niyutto** niddhāretvā yutto yojitoti attho gahetabboti.

Iti parivattanaḥāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭīkānusārena gambhīrattho vitthārato vibhajitvā gahetabboti.

10. Vevacanaḥāravibhaṅgavibhāvanā

37. Yena yena saṃvaṇṇanāvīsesabhūtena pavattanaḥāravibhaṅgena parivattetabbā suttatthā vibhattā, so saṃvaṇṇanāvīsesabhūto parivattanaḥāravibhaṅgo paripuṇṇo, “katamo vevacanaḥāravibhaṅgo”’ti pucchitabbattā “**tattha katamo vevacano hāro**”’tiādi vuttaṃ. Tattha **tatthāti** tesu niddiṭṭhesu soḷasasu desanāhārādīsū **katamo** saṃvaṇṇanāvīseso **vevacano hāro** vevacanaḥāravibhaṅgo nāmāti pucchati. “Vevacanāni bahūni”’tiādiniddesassa idāni mayā vuccamāno “ekam bhagavā dhamma”’ntiādikō vitthārasaṃvaṇṇanāvīseso vevacano hāro vevacanaḥāravibhaṅgo nāmāti attho gahetabbo. “Yāni vevacanāni niddhāritāni, katamāni tāni vevacanāni”’ti pucchitabbattā “**yathā eka**”’ntiādi vuttaṃ. **Ekam** viññātabbaṃ **dhammaṃ** sabhāvadhammaṃ paññāpetabbaṃ vā **dhammaṃ aññamaññehi yathā** yehi pakārehi ceva vevacanehi ca bhagavā niddisati, tathāpakārāni vevacanāni viññātabbānīti attho. “Tāni vevacanāni kinti bhagavā āhā”’ti vattabbattā “**yathāha bhagavā**”’tiādi vuttaṃ. Yathā yaṃyampakārāni vevacanāni –

“Āsā ca pihā ca abhinandanā ca, anekadhātūsu sarā patiṭṭhitā;
Aññānamūlappabhavā pajappitā, sabbā mayā byantikā samūlikā”ti. –

Bhagavā āha, taṃtaṃpakārāni vevacanāni viññātabbānīti attho.

Ekasseva dhammassa anekehi pariyāyabhūtehi vevacanehi niddisane phalaṃ **aṭṭhakathāyaṃ** (netti. aṭṭha. 37) bahudhā vuttaṃ, tasmā amhehi na dassitaṃ. “Katamā āsā, katamā pihādī”ti pucchitabbattā “**āsā nāma vuccati**”tiādi vuttaṃ. **Yā bhavissassa atthassa āsisanā avassaṃ āgamissatīti** yā āsā **assa** āsīsantassa puggalassa uppajjati, tassa āsisanā “**āsā nāmā**”ti vuccati. Vattamānassa yā patthanā **assa** patthayantassa uppajjati, seyyataraṃ vā aññaṃ disvā “edisō ahaṃ bhaveyya”nti yā pihā **assa** pihayantassa uppajjati, sā patthanā “**pihā nāmā**”ti vuccati. Anāgatattaṃ ārabha pavattā taṇhā “**āsā**”ti vuccati, anāgatapaccuppannatthaṃ ārabha pavattā taṇhā “**pihā**”ti vuccati, tathāpi taṇhābhāvena ekattā eko dhammova atthassa icchitassa nipphatti **atthanipphatti**, paṭipāleti etāya taṇhāyāti **paṭipālanā**, atthanipphattiyā paṭipālanāti **atthanipphattipaṭipālanā**. Yā taṇhā assa pālayantassa puggalassa uppajjati, sā taṇhā “**abhinandanā**”ti vuccati.

“Yā atthanipphatti taṇhāya paṭipāletabbā, katamā sā atthanipphattī”ti pucchitabbattā taṃ atthanipphattiṃ sattato vā saṅkhārato vā vibhajtvā dassento “**piyaṃ vā ñātiṃ, piyaṃ vā dhamma**”ntiādimāha. Tattha “**ñāti**”nti iminā mittabandhavādayopi gahitā. **Dhammaṃ** pana piyarūpārammaṇādikaṃ chabbidhampi yāya taṇhāya taṇhiko abhinandati, sā taṇhā “**abhinandanā nāmā**”ti vuccati. Paṭikkūlaṃ ñātiṃ vā dhammaṃ vā vipallāsavasena appaṭikkūlaṃ ñātiṃ vā dhammaṃ vā sabhāvavasena appaṭikkūlato yāya taṇhāya taṇhiko abhinandati, sā taṇhā vā “**abhinandanā nāmā**”ti vuccatīti yojetvā attho gahetabbo.

“Yāsu anekāsu dhātūsu vuttappakārā taṇhā ‘sarā’ti bhagavatā vuttā, katamā tā dhātuyo”ti pucchitabbattā tā dhātuyo sarūpato dassetuṃ “**cakkhudhātū**”tiādi vuttaṃ.

“Tāsu dhātūsu katamāya dhātuyā katamā sarā patiṭṭhitā pavattā”ti pucchitabbattā imāya dhātuyā ayaṃ sarā patiṭṭhitā pavattāti niyamtvā dassetuṃ “**sarāti keci rūpādhimuttā**”tiādi vuttaṃ. Tattha **kecīti** sarāsaṅkhātāya rūpataṇhāya taṇhikā puggalā. **Rūpādhimuttāti** rūpādhātusaṅkhāte ārammaṇe adhimuttā ajjhositā. Iminā padena rūpataṇhāsaṅkhātā sarā rūpādhātuyā patiṭṭhitā pavattāti gahitā, “**keci saddādhimuttā**”tiādihipi saddataṇhāsaṅkhātādayo sarā saddadhātuyādīsu patiṭṭhitā pavattā sarāva gahitā. **Keci dhammādhimuttāti** ettha dhammaggaṇena cakkhudhātusotadhātughānadhātujivhādhātukāyadhātusattaviññānadhātudhammadhātuyo gahitā, tasmā aṭṭhārasa dhātuyo patiṭṭhānabhāvena gahitāpi chabbidhāva gahitāti daṭṭhabbā. “Rūpādhimuttādīsu kittakāni padāni taṇhāpakke taṇhāya vevacanā”ti pucchitabbattā etādisāni ettakāni padāni taṇhāpakke taṇhāvevacanānīti niyamtvā dassetuṃ “**tattha yāni cha gehasitāni**”tiādi vuttaṃ. **Tatthāti** tesu chasu rūpādīsu. **Cha gehasitāni domanassānīti** chasu rūpādīsu pavattaṃ taṇhāpemaṃ nissāya pavattāni cha domanassāni. Esa nayo sesesupī. “Cha upekkhā gehasitāpi bhagavatā vuttā, kasmā na gahitā”ti vattabbattā “**yā cha upekkhā gehasitā, ayaṃ diṭṭhipakkho**”ti vuttaṃ, diṭṭhipakkhattā na gahitāti attho.

38. “Kathaṃ vuttappakārā taṇhā eva gahitā”ti vattabbattā “**sāyeva patthanākārenā**”tiādi vuttaṃ. **Sā** vuttappakārā eva taṇhā patthanākārena pavattanato āsādi pariyāyena vuttā, rūpādiārammaṇadhammesu nandanato “**dhammanandī**”ti pariyāyena vuttā, rūpādiārammaṇadhammesu gilivā pariniṭṭhapeti viya ajjhosāya tiṭṭhanato “**dhammajjhosāna**”nti pariyāyena vuttā, tasmā taṇhāya vevacanāni honti.

Taṇhāya vevacanāni ācariyena niddiṭṭhāni, amhehi ca ñātāni, “katamāni cittassa vevacanāni”ti pucchitabbattā “**cittaṃ mano**”tiādi vuttaṃ. “Ārammaṇaṃ cintetīti **cittaṃ**. Manati jānātīti **mano**. Vijānātīti **viññāna**”ntiādinā attho pakaraṇesu (dha. sa. aṭṭha. 5) vuttova, tasmā amhehi na vitthārito.

Vevacanāniyeva imāni imassa vevacanānīti ettakāniyeva kathayissāma. **“Paññindriyaṃ paññābala”**ntiādīni paññāvevacanāni.

“Arahaṃ sammāsambuddho”tiādīni buddhassa vevacanāni. **“Tāni kattha desitānī”**ti pucchitabbattā **“yathā ca buddhānussatiyaṃ vutta”**ntiādī vuttam. Buddhānussatidesanāyaṃ **yathā ca** yaṃyampakāraṃ vevacanāṃ bhagavatā **“itipi so bhagavā arahaṃ...pe... bhagavato”**ti vuttam, etaṃpakāraṃ vevacanāṃ buddhānussatiyā vevacanāṃ buddhassa vevacanantī daṭṭhabbaṃ. **“Yathā ca dhammānussatiyaṃ vutta”**ntiādīsipi evameva yojanā kātabbā.

“Tenāhā”tiādīyānusandhyādiattho ceva **“niyutto vevacano hāro”**tiānusandhyādiattho ca vuttanāyānusārena veditabbo.

Iti vevacanahāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭīkānusārena gambhīrattho vitthārato vibhajitvā gahetabboti.

11. Paññattihāravibhaṅgavibhāvanā

39. Yena yena saṃvaṇṇanāvīsesabhūtena vibhaṅgena vevacanāni vibhattāni, so saṃvaṇṇanāvīsesabhūto vibhaṅgo paripuṇṇo, **“katamo paññattihāravibhaṅgo”**ti pucchitabbattā **“tatha katamo paññattihāro”**tiādī vuttam. Tatha **tatthā**ti tesu niddiṭṭhesu soḷasasu desanāhārādīsū **katamo** saṃvaṇṇanāvīseso **paññattihāro** paññattihāravibhaṅgo nāmāti pucchati. **“Ekaṃ bhagavā dhammaṃ paññattīhi vividhāhi deseti”**tiādīniddeṣassa idāni mayā vuccamāno **“yā pakatikathāya desanā”**tiādīko vitthārasaṃvaṇṇanāvīseso paññattihāro paññattihāravibhaṅgo nāmāti gahetabbo.

“Yāhi vividhāhi paññattīhi ekaṃ dhammaṃ bhagavā deseti, katamā tā vividhā paññattīyo”ti pucchitabbattā **“yā pakatikathāyā”**tiādī vuttam. Tatha **pakatikathāyā**ti assādādīpadatthavīsesaṃ aniddhāretvā atthasabhāvena pavattāya kathāya sādhukaṃ manasikāradhammakathāya yā desanā yathādhīpetamattham veneyyasantāne nikkhipati patiṭṭhapeti pakārena ñāpeti, tasmā **nikkhepapaññatti**, tāya paññattiyā dhammaṃ deseti attho. **“Yā paññatti ‘pakatikathāya desanā’**ti vuttā, katamā sā”ti pucchitabbattā tathā pucchitvā vitthārato dassetuṃ **“kā ca pakatikathāya desanā”**tiādī vuttam. **Aṭṭhakathāyaṃ** pana –**“iti ‘pakatikathāya desanā’**ti saṅkhepena vuttamattham vitthārena vibhajitum **‘kā ca pakatikathāya desanā’**ti pucchitvā **‘cattāri saccānī’**tiādīmāhā”ti (netti. aṭṭha. 39) vuttam. Tatha desanādesetabbassa bhedabhāvepi abhedopacārena **“desanā cattāri saccānī”**ti vuttam, catunnaṃ saccānaṃ paññatti desanā nāmāti attho.

“Kathaṃ taṃ saccapaññattim bhagavā āhā”ti pucchitabbattā **“yathā bhagavā āhā”**ti vuttam. **Yathā** yena pakārena bhagavā yaṃ yaṃ paññattim āha, tathā tena pakārena sā paññatti jānitabbā. **“Idaṃ dukkha”**nti yaṃ paññattim bhagavā āha, **ayaṃ** **“idaṃ dukkha”**nti paññatti pañcannaṃ khandhānaṃ nikkhepapaññatti, channaṃ dhātūnaṃ nikkhepapaññatti, aṭṭhārasannaṃ dhātūnaṃ nikkhepapaññatti, dvādasannaṃ āyatanānaṃ nikkhepapaññatti, dasannaṃ indriyānaṃ nikkhepapaññattīti yojanā kātabbā. Khandhadhātuāyatanindriyāni ca lokiyāneva. Pīḷanasāṅkhatasantāpavipariṇāmatthātāsāmaññena ekattaṃ upanetvā **“idaṃ dukkha”**nti vuttā. **Dasannaṃ indriyānantī** cakkhusotaghānājivhākāyāitthipurisajīvitamanavedanindriyānaṃ dasannaṃ. Anubhavanalakkhaṇena ekalakkhaṇattā vedanindriyaṃ ekanti gahitaṃ, saddhindriyādīni pana maggapariyāpannattā na gahitāni.

Kabaḷīkāreti ṭhānūpacārena voharite ojāsāṅkhāte āhāre, rāgo ariyamaggena appahātabbattā anusayavasena, āsāvasena vā patthanāvasena vā **atthi nandī**. **Atthi taṇhā**ti etthāpi eseṃ nayo.

Patiṭṭhitam viruḥanti paṭisandhiākaḍḍhanasamatthatāpattiyā patiṭṭhitattā patiṭṭhitañceva viruḥañcāti gahetabbam. **Saṅkhārānanti** punabbhavanibbattakassa bhavassa abhinibbatti hetukānaṃ saṅkhārānaṃ. **Jātijarāmarāṇanti** abhinibbattanalakkhaṇā jāti, na uppādova, paripākalakkhaṇā jarā, na ṭhītiyeva, bhedanalakkhaṇaṃ marāṇaṃ, na bhaṅgameva. Tena vuttaṃ “**sasokam sadaram saupāyāsa**”nti.

“Phasse ce, bhikkhave, āhāre...pe... manosañcetanāya ce, bhikkhave, āhāre...pe... viññāṇe ce, bhikkhave, āhāre atthi rāgo...pe... vadāmī”ti **ayam** paññatti dukkhassa ca samudayassa ca pabhavassa paññāpanato **pabhavapaññatti** nāma.

Vaṭṭavasena paññattibhedo ācariyena vibhatto, amhehi ca ñāto, “kathaṃ vivaṭṭavasena paññattibhedo vibhatto”ti vattabbattā “**kabaḷikāre ce, bhikkhave, āhāre natthi rāgo**”tiādi vuttaṃ. “Kabaḷikāre...pe... anupāyāsanti vadāmī”ti **ayam** paññatti dukkhassa pariññāya ca paññāpanato **pariññāpaññatti** nāma, samudayassa pahānassa ca paññāpanato **pahānapaññatti** nāma, maggassa bhāvanāya ca paññāpanato **bhāvanāpaññatti** nāma, nirodhassa sacchikiriyaṃ ca paññāpanato **sacchikiriyaṃpaññatti** nāma.

40. Vivaṭṭavasena paññattibhedo ācariyena vibhatto, amhehi ca ñāto, “kathaṃ sammāsanavasena paññattibhedo vibhatto”ti vattabbattā “**samādhim, bhikkhave, bhāvēthā**”tiādi vuttaṃ. “Samādhim, bhikkhave, bhāvētha...pe... yathābhūtaṃ pajānāti”ti **ayam** paññatti maggassa bhāvanāya ca paññāpanato **bhāvanāpaññatti** nāma, dukkhassa pariññāya ca paññāpanato **pariññāpaññatti** nāma, samudayassa pahānassa ca paññāpanato **pahānapaññatti** nāma, nirodhassa sacchikiriyaṃ ca paññāpanato **sacchikiriyaṃpaññatti** nāma.

Sammāsanavasena paññattibhedo ācariyena vibhatto, amhehi ca ñāto, “kathaṃ upādānakkhandhavasena paññattibhedo vibhatto”ti vattabbattā “**rūpaṃ, rādha, vikirathā**”tiādi vuttaṃ. “Rūpaṃ, rādha, vikiratha...pe... nibbāna”nti **ayam** paññatti taṇhāsankhātassa rodhassa nirodhassa ca paññāpanato **nirodhapaññatti** nāma, assādaṃ nibbidāya ca paññāpanato **nibbidāpaññatti** nāma, dukkhassa pariññāya ca paññāpanato **pariññāpaññatti** nāma, samudayassa pahānassa ca paññāpanato **pahānapaññatti** nāma, maggassa bhāvanāya ca paññāpanato **bhāvanāpaññatti** nāma, nirodhassa sacchikiriyaṃ ca paññāpanato **sacchikiriyaṃpaññatti** nāma.

“Rūpavedanāsaññāsankhāravīññāṇāni vikiranto viddhamṣento vikīḷaniyaṃ karonto paññāya taṇhākkhayāya paṭipajjanto kiṃ pajānāti”ti pucchitabbattā “**so ‘idaṃ dukkha’nti yathābhūtaṃ pajānāti**”tiādi vuttaṃ. “So ‘idaṃ dukkha’nti yathābhūtaṃ pajānāti...pe... nirodhagāminipaṭipadāti yathābhūtaṃ pajānāti”ti **ayam** paññatti saccānaṃ paṭivedhassa paññāpanato **paṭivedhapaññatti** nāma, dassanabhūmiyā nikkhepassa ca paññāpanato **nikkhepapaññatti** nāma, maggassa bhāvanāya ca paññāpanato **bhāvanāpaññatti** nāma, sotāpattiphalassa sacchikiriyaṃ ca paññāpanato **sacchikiriyaṃpaññatti** nāma. “So ‘ime āsavā’ti yathābhūtaṃ pajānāti...pe... ‘āsavā asesam nirujjhantī’ti yathābhūtaṃ pajānāti”ti **ayam** paññatti khayeññāssa uppādassa ca paññāpanato **uppādapaññatti** nāma, anuppādeññāssa okāsassa ca paññāpanato **okāsapaññatti** nāma, maggassa bhāvanāya ca paññāpanato **bhāvanāpaññatti** nāma, dukkhassa pariññāya ca paññāpanato **pariññāpaññatti** nāma, samudayassa pahānassa ca paññāpanato **pahānapaññatti** nāma, vīriyindriyassa ārambhassa ca paññāpanato **ārambhapaññatti** nāma, āsāṭikānaṃ āhaṭānāya ca paññāpanato **āhaṭānāpaññatti** nāma, bhāvanābhūmiyā nikkhepassa ca paññāpanato **nikkhepapaññatti** nāma, pāpakānaṃ akusalānaṃ dhammānaṃ abhinighātassa ca paññāpanato **abhinighātapaññatti** nāma.

41. Vaṭṭavasena vā vivaṭṭavasena vā dhammasammāsanavasena vā upādānakkhandhavasena vā pajānanavasena vā saccesu nānāvidho paññattibhedo ācariyena vibhatto, amhehi ca ñāto, “kathaṃ teparivaṭṭavasena saccesu paññattibhedo vibhatto”ti vattabbattā teparivaṭṭavasena saccesu paññattibhedam dassetum “**idaṃ dukkhanti me, bhikkhave**”tiādi āradham. **Aṭṭhakathāyam** pana –

“evaṃ vaṭṭavivaṭṭamukhena sammāsanaupādānakkhandhamukheneva saccesu paññattivibhāgaṃ dassetvā idāni te parivaṭṭavasena dassetuṃ ‘idaṃ dukkhanti me bhikkhave’ tiādi āraddha’ nti (netti. aṭṭha. 41) vuttaṃ. Tatha **pubbe** pari jānanato paṭṭhāya. **Ananussutesūti** pari jānanavasena ananussutesu catūsu saccadhammesu. **Cakkhunti** paṭṭhamaṃ nibbānadassanaṭṭhena cakkhu nāma. Yathāsabhāvato kiccapari jānanaṭṭhena sacchikiriyapari jānanaṭṭhena **ñāṇaṃ** nāma. Yathāsabhāvato kiccapari jānanaṭṭhena paṭivijjhitaṃ pajānanaṭṭhena **paññā** nāma. Tathā viditakaraṇaṭṭhena **vijjā** nāma. Ālokobhāsakaraṇaṭṭhena **āloko** nāma. Idaṃ cakkhādikaṃ sabbaṃ paññāvevacanameva. “Idaṃ dukkhanti me bhikkhave...pe... udapādī” ti **ayaṃ** paññatti saccānaṃ desanāya paññāpanato **desanāpaññatti** nāma, sutamayiyā paññāya nikkhepassa ca paññāpanato **nikkhepapaññatti** nāma, anaññātaññassāmītindriyassa sacchikiriyāya ca paññāpanato **sacchikiriyāpaññatti** nāma, dhammacakkassa pavattanāya ca paññāpanato **pavattanāpaññatti** nāma.

“Taṃ kho panidaṃ dukkhaṃ pariññeyyaṃ...pe... udapādī” ti **ayaṃ** paññatti maggassa bhāvanāya paññāpanato **bhāvanāpaññatti** nāma, cintāmayiyā paññāya nikkhepassa ca paññāpanato **nikkhepapaññatti** nāma, aññindriyassa sacchikiriyāya ca paññāpanato **sacchikiriyāpaññatti** nāma.

“Taṃ kho panidaṃ dukkhaṃ pariññātaṃ...pe... udapādī” ti **ayaṃ** paññatti maggassa bhāvanāya paññāpanato **bhāvanāpaññatti** nāma, bhāvanāmayiyā paññāya nikkhepassa ca paññāpanato **nikkhepapaññatti** nāma, aññātāvino indriyassa sacchikiriyāya ca paññāpanato **sacchikiriyāpaññatti** nāma, dhammacakkassa pavattanāya ca paññāpanato **pavattanāpaññatti** nāma.

Teparivaṭṭavasena saccesu nānāvīdho paññattibhedo ācariyena vibhatto, amhehi ca ñāto, “kathaṃ kusalākusalādivasena desitadhammassa paññattibhedo vibhatto” ti vattabbattā “**tulamātulañca sambhava**” ntiādi vuttaṃ. Atha vā dhammacakkasutte paññattibhedo ācariyena vibhatto, amhehi ca ñāto, “tulamātulañcātiādigāthāya kathaṃ paññattibhedo vibhatto” ti vattabbattā “**tulamātulañcā**” tiādi vuttaṃ. Tulīyati paricchi jīyatīti **tulaṃ**, kāmāvacarakammaṃ, natthi tulaṃ sadisaṃ aññaṃ lokiyakammaṃ assa mahaggatakammasāti **atulaṃ**, rūpārūpāvacarakammaṃ. Punabbhavaṃ sambhavati etena saṅkhārenāti **sambhavo**, taṃ sambhavaṃ. Punabbhavaṃ saṅkharotīti **bhavasāṅkhāro**. Ajjhatte vipassanāvasena ramaṭīti **ajjhatarato**. Samathavasena samādhīyatīti **samāhito**. Attani sambhavatīti **attasambhavo**, taṃ attasambhavaṃ. **Muni** sambuddho sambhavaṃ bhavasāṅkhāraṃ tulañca atulañca avassajī, ajjhatrato samāhito kavacaṃ abhīndi iva, evaṃ attasambhavaṃ **abhīndi** padālayīti yojanā kātābbā. Atha vā **muni** sambuddho “pañcakkhandhā aniccā dukkhā anattā vipariñāmadhammā, nibbānaṃ pana niccaṃ sukhaṃ asaṅkhatāṃ avipariñāmadhammā” nti **tulaṃ** tulayanto **atulaṃ** nibbānaṃ disvā sambhavaṃ bhavasāṅkhāraṃ ariyamaggena avassajī. Kathaṃ avassajī? So hi muni vipassanāvasena ajjhatrato ca hutvā, samathavasena upacārappanāsu samāhito ca hutvā kavacaṃ abhīndi iva, **evaṃ attasambhavaṃ** attani sañjātaṃ kilesaṃ **abhīndi** padālayi, kilesābhāvena kammañca jahīti gāthātho gahetabbo.

“Tulamātulañca sambhava” nti paññatti sabbadhammānaṃ abhiññāya paññāpanato **abhiññāpaññatti** nāma, dhammapaṭisambhidāya nikkhepassa ca paññāpanato **nikkhepapaññatti** nāma, “bhavasāṅkhāramavassajī muni” ti paññatti samudayassa pariccāgassa ca paññāpanato **pariccāgapaññatti** nāma, dukkhassa pariññāya ca paññāpanato **pariññāpaññatti** nāma, “ajjhatrato samāhito” ti paññatti kāyagatāya satiyā bhāvanāya ca paññāpanato **bhāvanāpaññatti** nāma, cittekaggatāya ṭhītiyā ca paññāpanato **ṭhītipaññatti** nāma, “abhīndi kavacamivattasambhava” nti paññatti cittassa abhinibbidāya ca paññāpanato **abhinibbidāpaññatti** nāma, sabbaññūtāya upādānassa ca paññāpanato **upādānapaññatti** nāma, avijjāṇḍakosānaṃ padālanāya ca paññāpanato **padālapaññatti** nāma, “yathāvutto paññattippabhedo kena saddahitabbo” ti vattabbattā “**tenāhā**” tiādi vuttaṃ. Tathāvuttassa paññattippabhedassa sambhavato bhagavā yaṃ “tulamātula” ntiādigāthamāha, tathāsambhavato yathāvuttāya gāthāya yathāvutto paññattippabhedo saddahitabboti.

“Tulamātulañcā” tiādigāthāyaṃ paññattippabhedo ācariyena vibhatto, amhehi ca ñāto.

‘Yo dukkhamaddakkhi yatonidānaṃ, kāmesu so jantu kathaṃ nameyya;
Kāmā hi loke saṅgoti ñatvā, tesam satimā vinayāya sikkhe’ ti. –

Gāthāyaṃ pana kathaṃ paññattibhedo vibhatto’ ti vattabbattā “**yo dukkhamaddakkhi**” tiādi vuttaṃ. Yo āradhavi-passako jantu yatonidānaṃ sabbaṃ tebhūmakam hetuphalaṃ **dukkhaṃ** addakkhi, so āradhavi-passako jantu kāmesu **kathaṃ nameyya** nametuṃ nārahati. Kāmā loke “saṅgo” ti **hi** yasmā passitabbā, tasmā nametuṃ nārahati, iti etaṃ dukkhabhāvaṃ dukkhahe-tubhāvaṃ ñatvā **tesam** kāmānaṃ **vinayāya** vūpasamāya **satimā** kāyagatāsatisampanno tiṇi sikkhāni **sikkhe** sikkheyyāti gāthāttho saṅkhepena viññātabbo. **Aṭṭhakathāyaṃ** (netti. aṭṭha. 41) pana vitthārena samvaṇṇito.

“Yo dukkha” nti paññatti dukkhassa vevacanassa ca pariññāya ca paññāpanato **vevacanapaññatti**, **pariññāpaññatti** ca hoti. “Yatonidāna” nti paññatti samudayassa pabhavassa ca pahānassa ca paññāpanato **pabhavapaññatti** ceva **pahānapaññatti** ca hoti. “Addakkhi” ti paññatti ñāṇacakkhussa vevacanassa ca paṭivedhassa ca paññāpanato **vevacanapaññatti** ceva **paṭivedhapaññatti** ca hoti. “Kāmesu so jantu kathaṃ nameyyā” ti paññatti kāmataṇhāya vevacanassa ca anabhinivissassa ca paññāpanato **vevacanapaññatti** ceva **anabhinivesapaññatti** ca hoti. “Kāmā hi loke saṅgoti ñatvā” ti paññatti kāmānaṃ paccatthikato dassanassa ca paññāpanato **dassanapaññatti** nāma. Kāmā hi anattahājanato paccatthikasadisā.

“Kīdisā hutvā anattahajanakā” ti pucchitabbattā “**kāmā hī**” tiādi vuttaṃ. Kāmā rāgaggiādīhi antodayhanato **aṅgārakāsūpamā** ca, pūtibhāvāpajjanato **maṃsapesūpamā** ca, bahi aññena dayhanato **pāvakakappā** jalitaggikkhandhūpamā ca, paṭiṭṭhānābhāvato **papātūpamā** ca, visasadisehi dosādīhi parahiṃsanato **uragopamā** ca. “Tesam satimā” ti paññatti pahānāya apacayassa ca paññāpanato **apacayapaññatti** nāma, kāyagatāya satiyā nikkhepassa ca paññāpanato **nikkhepapaññatti** nāma, maggassa bhāvanāya ca paññāpanato **bhāvanāpaññatti** nāma. “Vinayāya sikkhe” ti paññattirāgavinayassa dosavinayassa mohavinayassa paṭivedhassa ca paññāpanato **paṭivedhapaññatti** nāma. “Jantū” ti paññatti yogissa vevacanassa ca paññāpanato **vevacanapaññatti** nāma.

“Jantūti sāmāññasattavācako saddo kasmā yogivācakoti viññātabbo” ti vattabbattā “**yadā hī**” tiādi vuttaṃ. Yogī **yadā** yasmim kāle kāmā saṅgoti pajānāti, tadā tasmim kāle **so** yogī kāmānaṃ anuppādāya kusale dhamme kāyagatāsatiādīhi **uppādayati**, so kusale dhamme uppādentō yogī anuppannānaṃ kusalānaṃ dhammānaṃ uppādāya **vāyamati** kusalavīriyaṃ karoti, tasmā yogivācako jantusaddoti viññātabbo. “Jantū” ti **ayaṃ** paññatti **appattassa** kusalassa jhānadhammādikassa pattiyā vāyāmassa ca paññāpanato **vāyāmapaññatti** nāma, oramattikāya asantuṭṭhiyā nikkhepassa ca paññāpanato **nikkhepapaññatti** nāma. “So anuppannānaṃ kusalānaṃ dhammānaṃ uppādāya vāyamati” ti ayaṃ paññatti vāyāmapaññatti, “hetuso uppannānaṃ kusalānaṃ dhammānaṃ ṭhitiyā vāyamati” ti paññatti katamā paññatti” ti pucchitabbattā “**tattha so uppannāna**” ntiādi vuttaṃ. **Tattha** tasmim “anuppannāna” ntiādimhi. “So uppannānaṃ kusalānaṃ dhammānaṃ ṭhitiyā vāyamati” ti **ayaṃ** paññatti bhāvanāya appamādassa ca paññāpanato **appamādapaññatti** nāma, vīriyindriyassa nikkhepassa ca paññāpanato **nikkhepapaññatti** nāma, kusalānaṃ dhammānaṃ ārakkhassa ca paññāpanato **ārakkhapaññatti** nāma, adhicitasikkhāya ṭhitiyā ca paññāpanato **ṭhitipaññatti** nāma. “Kena yathāvuttappakāro paññattippabhedo saddahitabbo” ti vattabbattā “**tenāhā**” tiādi vuttaṃ.

“Yo dukkhamaddakkhi yatonidāna” ntiādigāthāya paññattippabhedo ācariyena vibhatto, amhehi ca ñāto.

“Mohasambandhano loko, bhabbarūpova dissati;
Upadhibandhano bālo, tasmā parivārito;
Assirī viya khāyati, passato natthi kiñcananti. –

Gāthāyaṃ pana kathaṃ paññattippabhedo vibhatto’ ti vattabbattā “**mohasambandhano**” tiādi vuttaṃ.

Tattha **mohasambandhanoti** mohahetukehi saṃyojanehi sambandho. **Lokoti** appahīnasamyojano sattaloko. **Bhābarūpova dissatī** abhābbopi attā bhābarūpova bhābbajātiko viya bālānaṃ avipassakānaṃ dissatī. **Upadhibandhanoti** kilesūpadhīhi bandhitabbo. Yu-paccayo hi kammatthe vihito. Upadhīsu vā kilesānaṃ bandhanaṃ yassa bālāssatī **upadhibandhano**. Dve avaḍḍhiyo lāti gaṇhātīti **bālo**. **Tamasā** sammohena **parivārito** paṭicchādito paṇḍitānaṃ vipassakānaṃ **assirī** viya sirīvirahito viya **khāyati** upaṭṭhāti. **Passato** paññācakkhunā passantassa paṇḍitassa kiñcanaṃ natthīti saṅkhepattho daṭṭhabbo.

“Mohasambandhano loko”ti paññatti mohasīsenā gahitānaṃ vipallāsānaṃ desanāya paññāpanato **desanāpaññatti** nāma. “Bhābarūpova dissatī”ti paññatti lokassa viparītassa viparītākārena upaṭṭhahantassa paññāpanato **viparītapaññatti** nāma. “Upadhibandhano bālo”ti paññatti pāpakānaṃ icchāvacaṇānaṃ pabhavassa paññāpanato **pabhavapaññatti** nāma. “Upadhibandhano bālo”ti paññatti pariyaṭṭhānānaṃ akusalānaṃ dhammānaṃ bandhanakiccassa paññāpanato **kiccapaññatti** nāma. “Upadhibandhano bālo”ti paññatti kilesānaṃ bandhanabalamūhanabalānaṃ paññāpanato **balapaññatti** nāma. “Upadhibandhano bālo”ti paññatti saṅkhārānaṃ viruhanāya paññāpanato **viruhanāpaññatti** nāma. “Tamasā parivārito”ti paññatti avijjandhakārassa desanāya paññāpanato **desanāpaññatti** nāma, avijjandhakārassa vevacanassa ca paññāpanato **vevacanapaññatti** nāma. “Assirī viya khāyatī”ti paññatti dibbacakkhussa dassanakiriyāya paññāpanato **dassanapaññatti** nāma. “Assirī viya khāyatī”ti paññatti paññācakkhussa nikkhepassa paññāpanato **nikkhepapaññatti** nāma. “Passato natthi kiñcana”nti paññatti **sattānaṃ** ariyānaṃ paṭivedhassa paññāpanato **paṭivedhapaññatti** nāma.

“Katamaṃ kiñcana”nti pucchitabbatā “**rāgo kiñcana**”ntiādi vuttaṃ. “Yathāvutto paññattippabhedo kathaṃ amhehi saddahitabbo”ti vattabbatā “**tenāhā**”tiādi vuttaṃ. Yathāvuttassa paññattippabhedassa sambhavato bhagavā yaṃ “**mohasambandhano**”tiādimāha, tathāsambhavato tāya gāthāya yathāvutto paññattippabhedo gāthānusārena saddahitabbo.

“Mohasambandhano loko”tiādigāthāya paññattippabhedo ācariyena vibhatto, amhehi ca ñāto, “atthi, bhikkhave, ajāta”ntiā dipaṭṭhassa paññattippabhedo kathaṃ vibhatto”ti pucchitabbatā “**atthi bhikkhave**”tiā dipālimāha. “Sā pana pāli kimatthaṃ bhagavatā vuttā”ti ce puccheyya? Paramatthato avijjamānattā nibbānaṃ natthi, tasmā “atthi nibbāna”nti vacanaṃ sasavisāṇavacanaṃ viya anattamaṃ, vohāramattametanti vadantānaṃ micchāvādaṃ bhaññitumaṃ bhagavatā vuttāti daṭṭhabbā.

Kutocipi ajātattā abhūtattā **ajātaṃ abhūtaṃ**. Paccayehi akatattā **akataṃ**. Saṅkhatābhāvato **asaṅkhatamaṃ** nibbānaṃ atthi. **Etamaṃ** ajātādikaṃ nibbānaṃ no ce abhaviṣṣa, evamaṃ sati nissaraṇaṃ na paññāyetha, nibbānassa ca ariyamaggaphalānaṃ ārammaṇattā, maggaphalānaṃ kilesānaṃ samucchindanato paṭippassambhanato, samucchindanena ca tividhassa vaṭṭassa apavaṭṭanato ajātādikaṃ nibbānaṃ atthiyevatī daṭṭhabbamaṃ.

“Atthi, bhikkhave, ajātaṃ...pe... asaṅkhata”nti **ayamaṃ** paññatti nibbānassa **desanāpaññatti** ca nibbānassa **vevacanapaññatti** ca hoti. “Nayidha jātassa...pe... paññāyethā”ti **ayamaṃ** paññatti saṅkhatassa **vevacanapaññatti** ca saṅkhatassa **upanayanapaññatti** ca hoti. “Yasmā ca...pe... asaṅkhata”nti **ayamaṃ** paññatti nibbānassa **vevacanapaññatti** ca nibbānassa **jotanāpaññatti** ca hoti. “Yasmā jātassa...pe... paññāyatī”ti **ayamaṃ** paññatti nibbānassa **vevacanapaññatti** ca maggassa saṃsārato **niyyānikapaññatti ca nissaraṇapaññatti** ca hotīti paññattiviseso paṇḍitehi niddhāretvā gahetabbo.

“Yathāvutto nibbānassa paññattippabhedo kena saddahitabbo”ti vattabbatā “**tenāha bhagavā**”tiādi vuttaṃ. “**Tenāha āyasmā**”tiādyānusandhyādiattho ceva “**niyutto paññattihāro**”ti anusandhyādiattho ca vuttanāyānusārena veditabbo.

Iti paññattihāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭṭkānusārena gambhīrattho vitthārato vibhajitvā gahetabboti.

12. Otaṇaṇahāravibhaṅgavibhāvanā

42. Yena yena saṃvaṇṇanāvīsesabhūtena paññattihāravibhaṅgena paññattiyo vibhattā, so saṃvaṇṇanāvīsesabhūto vibhaṅgo paripuṇṇo, “katamo otaṇaṇo hāravibhaṅgo”ti pucchitabbattā “**tattha katamo otaṇaṇo hāro**”tiādi vuttaṃ. Tattha **tatthā**ti tesu niddiṭṭhesu soḷasasu desanāhārādīsu **katamo saṃvaṇṇanāvīseso otaṇaṇo hāro** otaṇaṇahāravibhaṅgo nāmāti pucchati. “Yo ca paṭiccuppādo”tiādiniddesassa idāni mayā vuccamāno “uddhaṃ adho sabbadhi vippamutto”tiādiko vitthārasaṃvaṇṇanāvīseso otaṇaṇo hāro otaṇaṇahāravibhaṅgo nāmāti gahetabbo.

Tattha pāṭhe “katame paṭiccasamuppādādayo niddhāretvā katamehi niddhāritehi dhammehi otaṇatī”ti pucchitabbattā imasmim pāṭhe ime paṭiccasamuppādādayo niddhāretvā imehi niddhāritehi dhammehi otaṇatīti dassetuṃ “**uddhaṃ adho sabbadhi vippamutto**”tiādi vuttaṃ. Tattha **uddhanti** kāmādhātuto uddhaṃ uparibhāge pavattāya rūpadhātuarūpadhātuyā. **Adhoti** rūpadhātuto heṭṭhābhāge pavattāya kāmādhātuyā. **Sabbadhīti** sabbasmim kāmārūpaarūpadhātumhi. **Vippamuttoti** paṭisandhivasena appavattanato vippamutto asekkho. Ayaṃ sekkho dassanamaggena sakkāyadīṭṭhiyā samugghātattā “ahaṃ asmī”ti anānupassī viharati. Evaṃ sekkhāya vimuttiyā ceva asekkhāya vimuttiyā ca sekkho ceva asekkho ca atinṇapubbaṃ oghaṃ apunabbhavāya vimutto udatārīti gāthāttho gahetabbo.

Tasmim gāthāpāṭhe “katame niddhāretvā katamehi otaṇatī”ti pucchitabbattā “**uddhanti rūpadhātū**”tiādi vuttaṃ. **Uddhanti** manussalokato uddhaṃ cātumahārājikādayopi gahitāti atthasambhavato taṃ nivattetuṃ “**rūpadhātu arūpadhātū**”ti vuttaṃ. **Adhoti** manussabhavato adho cattāro apāyabhūmiyo ca gahitāti atthasambhavato taṃ nivattetuṃ “**kāmādhātū**”ti vuttaṃ. **Sabbadhīti** catubhūmiki atthasambhavato “**tedhātuke**”ti vuttaṃ. **Ayaṃ asekkhā vimuttīti** vimuttassa asekkhassa yā virāgatā atthi, ayampi virāgatā asekkhaphalavimutti. “Uddhaṃ adho sabbadhi vippamutto”ti pāṭhe vuttappakārā ayaṃ asekkhā vimutti niddhāritāti attho. Niddhāritāya asekkhāya vimuttiyā yāni saddhādīpañcīndriyāni niddhāritāni, **tāniyeva** asekkhāni pañcīndriyāni bhavanti. **Ayaṃ vuttappakārā** otaṇaṇā **indriyehi** vimuttiyā **otaṇaṇā** nāma pavesanā nāma.

Tāniyeva asekkhāni pañcīndriyāni vijjāya upakārakattā, paññāpadaṭṭhānattā vā **vijjā** bhavanti. **Vijjuppādā** tādisāya vijjāya uppādā uppādahetuto **avijjānirodho** avijjāya nirodho hoti...pe... dukkhakkhandhassa nirodho hoti, **ayaṃ vuttappakārā** otaṇaṇā paṭiccasamuppādehi otaṇaṇā nāma.

Tāniyeva asekkhāni pañcīndriyāni tīhi khandhehi saṅgahitāni saddhāvīriyehi sīlasambhavato, satiyā ca paññānūvattakattā. Sesā vuttanayānusārena veditabbā.

“Uddhaṃ adho sabbadhi vippamutto”ti pāṭhe niddhāretvā otaṇaṇā ācariyena vibhattā, amhehi ca ñātā, “ayaṃ ahasmīti anānupassī”ti pāṭhe “katame niddhāretvā katamehi otaṇaṇehi otaṇatī”ti vattabbattā “**ayaṃ ahasmīti anānupassīti ayaṃ sakkāyadīṭṭhiyā**”tiādi vuttaṃ. Yo ayaṃ sekkho “ahaṃasmī”ti nānupassī, tassa sekkhassa sakkāyadīṭṭhiyā yo samugghāto atthi, yā samugghātasaṅkhātā samugghātavimutti sekkhā vimutti hoti, tassā sekkhāya vimuttiyā yāni saddhādīpañcīndriyāni niddhāritāni, **tāniyeva** sekkhāni pañcīndriyāni bhavanti. **Ayaṃ vuttappakārā** otaṇaṇā indriyehi otaṇaṇā nāma. Sesā vuttanayānusārena veditabbā.

43. “Uddhaṃ adho”tiādigāthāyaṃ otaṇaṇā ācariyena vibhattā, amhehi ca ñātā, “nissitassa calita”ntiādi pāṭhe “katame niddhāretvā katamehi otaṇatī”ti pucchitabbattā “**nissitassa calitaṃ, anissitassa calitaṃ natthī**”tiādi vuttaṃ. **Nissitassa** puggalassa **calitaṃ** calanaṃ atthi, **anissitassa** puggalassa **calitaṃ** calanaṃ natthi. **Calite** calane asati passaddhi bhavati, passaddhiyā **sati** vijjamānāya

nati na hoti, natiyā **asati** avijjamānāya **āgatigati** na hoti, āgatigatiyā **asati** avijjamānāya **cutūpapāto** na hoti, cutūpapāte **asati** avijjamāne **idha** chasu ajjhattikāyatanesu attānaṃ neva passati, **huramaṃ** vā chasu bāhirāyatanesu attānaṃ na passati, **ubhayaṃ antarena** vajjetvā phassādisamudāyesu dhammesu attānaṃ na passati, **esova** paṭiccasamuppādo “avijjānirodhā” tiādiko dukkhassa **anto** avasānaṃ karotīti attho.

Nissitassa calitanti ettha “nissayo katividho” ti pucchitabbattā “**nissitassa calitanti nissayo nāmā**” tiādi vuttaṃ. **Tatthāti** tesu duvidhesu taṇhānissayadiṭṭhinissayesu yā cetanā **rattassa** puggalassa niddhāritā, **ayaṃ** cetanādhammo **taṇhānissayo** nāma. Yā cetanā **mūlhasa** puggalassa niddhāritā. **Ayaṃ** cetanādhammo **diṭṭhinissayo** nāma. Sā duvidhā cetanā pana saṅkhārā nāma. Saṅkhārapaccayā viññānaṃ...pe... sabbo paṭiccasamuppādo niddhārito. **Ayaṃ** vuttappakārā otaraṇā paṭiccasamuppādehi otaraṇā nāma.

Tatthāti tasmim̐ taṇhānissayadiṭṭhinissaye yā vedanā **rattassa** puggalassa niddhāritā, **ayaṃ sukhā vedanā**. Yā cetanā **sammūlhasa** puggalassa niddhāritā, **ayaṃ adukkhamasukhā vedanā**. Yebhuyyena sesā vuttanayānusārena veditabbā.

44. “Nissitassa calita” ntiādipāṭhe otaraṇā ācariyena vibhattā, amhehi ca ñātā.

“Ye keci sokā paridevitā vā...pe...
Piyamaṃ na kayirātha kuhiñci loke” ti. –

Gāthāpāṭhe “katame niddhāretvā katamehi otarati” ti pucchitabbattā “**ye keci sokā**” tiādi vuttaṃ. Ye keci sokā vā yā kāci paridevitā vā anekarūpā yā kāci dukkhā vā lokasmim̐ sambhavanti. **Ete** sokādayo piyamaṃ paṭicca pabhavanti, piye asante **ete** sokādayo na bhavanti. **Tasmā** piye asante sokādīnaṃ abhāvato **yesamaṃ** vītasokānaṃ kuhiñci lokepi natthi, te vītasokā sukhino bhavanti. **Tasmā** vītasokānaṃ sukhasampannattā asokamaṃ virajamaṃ **patthayāno** sappuriso kuhiñci loke piyamaṃ na kayirāthāti gāthāttho.

“**Ye keci sokā paridevitā vā, dukkhā ca lokasmimanekarūpā piyamaṃ paṭicca pabhavanti ete**” ti ettha pāṭhe yā vedanā niddhāritā, **ayaṃ dukkhā vedanā**. Sesā vuttanayānusārena veditabbā.

“Ye keci sokā” tiādigāthāpāṭhe otaraṇā ācariyena vibhattā, amhehi ca ñātā, “kāmaṃ kāmayaṃānassā” tiādigāthāpāṭhe “katame niddhāretvā katamehi otarati” ti vattabbattā “**kāmaṃ kāmayaṃānassā**” tiādi vuttaṃ. Tassamaṃ gāthāyamaṃ attho heṭṭhā vuttova.

Tatthāti tasmim̐ “pītimano hoti” ti pāṭhe yā pītimanatā vuttā niddhāritā, **ayaṃ pītimanatā anunayo** hoti. “**Sallaviddhova ruppati**” ti pāṭhe yamaṃ ruppanamaṃ āha, **idamaṃ** ruppanamaṃ **paṭighamaṃ** hoti, anunayo ca paṭighaṇca niddhāritāti attho.

“Anunaye ca paṭighe ca niddhārite katamo dhammo niddhārito” ti vattabbattā “**anunayo paṭighaṇca pana taṇhāpakkho**” ti vuttaṃ. **Taṇhāpakkhoti** taṇhāpakkhattā taṇhā niddhāritā. “Anunayo taṇhāpakkho hotu, paṭighamaṃ pana taṇhāpakkhamaṃ na siyā” ti ce vadeyya? Paṭighassa attasinehavasena pavattanato paṭighampi taṇhāpakkhamaṃ hoti. “Taṇhāya niddhāritāya katamo niddhārito” ti vattabbattā “**taṇhāya ca panā**” tiādi vuttaṃ. Dasannaṃ rūpāyatanānaṃ taṇhāya padaṭṭhānattā dasa rūpāni āyatanāni niddhāritāni. **Ayaṃ** vuttappakārā otaraṇā āyatanehi otaraṇā nāma. Sutte āgatā paṭiccasamuppādādayo tena saṃvaṇṇanāvīsesena nayena niddhāritā, suttatthamukhena vā niddhāritā, tena...pe... nayena niddhāritesu paṭiccasamuppādādīsu yo saṃvaṇṇanāyavīseso tadatthavācākasena vā tadatthāñāpakavasena vā otarati pavisati samosarati, so saṃvaṇṇanāyavīseso otaraṇo hāro nāmāti adhippāyo daṭṭhabbo. Sesesupi vuttanayānusārena otaraṇā gahetabbā. “**Tenāha āyasmā**” tiādyānusandhyādiattho ceva “**niyutto otaraṇo hāro**” ti anusandhyādiattho ca vuttanayānusārena veditabbo.

Iti otaraṇahāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭīkānusārena gambhīrattho vitthārato vibhajitvā gahetabboti.

13. Sodhanahāravibhaṅgavibhāvanā

45. Yena yena saṃvaṇṇanāvīsesabhūtena otaraṇahāravibhaṅgena otaretabbā suttatthā vibhattā, so saṃvaṇṇanāvīsesabhūto vibhaṅgo paripuṇṇo, “katamo sodhanahāravibhaṅgo”ti pucchitabbattā “**tattha katamo sodhano hāro**”tiādi vuttaṃ. Tattha **tatthā**ti tesu niddiṭṭhesu soḷasasu desanāhārādīsu **katamo saṃvaṇṇanāvīseso sodhano hāro** sodhanahāravibhaṅgo nāmāti pucchati. “Vissajjitamhi pañhe”tiādiniddesassa idāni mayā vuccamāno “yathā āyasmā ajito”tiādiko vitthārasaṃvaṇṇanāvīseso sodhanahāravibhaṅgo nāmāti gahetabbo. “Kathaṃ tattha pañhe sodhano hāro viññātabbo”ti vattabbattā “**yathā āyasmā**”tiādi vuttaṃ. **Yathā** yena pakārena āyasmā ajito pārāyane bhagavantam pañham pucchati, tathā tena pakārena vissajjitamhi pañhe ayam sodhano hāro viññātabboti. “Niyamtvā vibhajehi”ti vattabbattā niyamtvā vibhajitum “**kenassū**”tiādi vuttaṃ. Gāthāttho vuttova.

“Kenassu nivuto loko, kenassu nappakāsati;
Kissābhilepanam brūsi, kiṃsu tassa mahabbhaya”nti. –

Pucchāvasena pavattagāthāyañca –

“Avijjāya nivuto loko, (ajitāti bhagavā,
Vivicchā pamādā nappakāsati;
Jappābhilepanam brūmi, dukkhamassa mahabbhaya”nti. –

Vissajjanavasena pavattagāthāyañcāti imāsu dvīsu gāthāsu “**kenassu nivuto loko**”ti iminā padena **pañhe** pucchite “**avijjāya nivuto loko**”ti iminā padena bhagavā “kenassu nivuto loko”ti padaṃ tadatthe aññāṇasaṃsayādimalānaṃ apanayanena sodheti. Tadatthe hi vissajjite aññāṇasaṃsayādīnaṃ abhāvato attho sodhito nāma, atthe ca sodhite padampi sodhitamyeva. Tenāha **aṭṭhakathāyam** – “tadatthassa vissajjanato”ti (netti. aṭṭha. 45), **ṭīkāyañca** “tabbisayaaññāṇasaṃsayādimalāpanayanena sodheti”ti vuttaṃ. **No ca ārambhanti** pucchitum ārabhitabbaṃ sabbagāthāpadaṃ, gāthāttham vā, ñātum icchitassa sabbassa atthassa vissajjanavasena apariyositattā bhagavā “avijjāya nivuto loko”ti ettakeneva padena sodheti. Sesesupi esa nayo.

“**Kiṃsu tassa mahabbhaya**”nti iminā padena pañhe pucchite “**dukkhamassa mahabbhaya**”nti padena bhagavatā **ārambho** ñātum icchito attho **suddho** sodhito hoti. Sesagāthāsupi eseva nayo.

Yattha pañhe **evam** niravasesavissajjanavasena ārambho **suddho** sodhito bhavati, so pañho **vissajjito** sodhito bhavati. **Yattha** pañhe **evam** niravasesavissajjanavasena ārambho yāva **asuddho** asodhito bhavati, tāva so pañho **vissajjito** sodhito na bhavatīti yojanā. “**Tenāha**”tiādyānusandhyādyattho ceva “**niyutto sodhano hāro**”ti anusandhyādyattho ca vuttanāyānusārena veditabbo.

Iti sodhanahāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭīkānusārena gambhīrattho vitthārato vibhajitvā gahetabboti.

14. Adhiṭṭhānahāravibhaṅgavibhāvanā

46. Yena yena saṃvaṇṇanāvīsesabhūtena vibhaṅgena pañhādayo sodhitā, so saṃvaṇṇanāvīsesabhūto paripuṇṇo, “katamo adhiṭṭhānahāravibhaṅgo”ti pucchitabbattā “**tattha katamo adhiṭṭhāno hāro**”tiādi vuttaṃ. Tattha **tatthā**ti tesu niddiṭṭhesu soḷasasu desanāhārādīsu **katamo** saṃvaṇṇanāvīseso paṭiniddesato **adhiṭṭhāno hāro** adhiṭṭhānahāravibhaṅgo nāmāti pucchati. “Ekattatāya dhammā, yepi ca vemattatāya niddiṭṭhā”tiādiniddesassa idāni mayā vuccamāno “ye tattha niddiṭṭhā, tathā te dhārayitabbā”tiādiko vitthārasaṃvaṇṇanāvīseso adhiṭṭhānahāravibhaṅgo nāmāti gahetabbo.

“Ye dhammā suttesu ekattatāya ca vemattatāya ca niddiṭṭhā, te dhammā kiṃ pana tatheva dhārayitabbā, udāhu aññathāpi vikappayitabbā”ti pucchitabbattā “**ye tatthā**”tiādi vuttaṃ. **Tattha** tesu suttantesu **ye** dukkhasaccādayo dhammā ekattatāya ca vemattatāya ca niddiṭṭhā, **te** dukkhasaccādayo dhammā **tathā** ekattatāya ca vemattatāya ca **dhārayitabbā** upalakkhitabbā, na aññathā vikappayitabbā.

“Sāmaññakappanāya vohārabhāvena anavaṭṭhānato katamā ekattatā, katamā vemattatā”ti pucchitabbattā “**dukkhanti ekattatā**”tiādi vuttaṃ. **Dukkanti** jātiādivīsesamanapekkhitvā yā dukkhasāmaññatā vuttā, sā ayaṃ dukkhasāmaññatā dukkhassa **ekattatā** nāma. “Tattha katamaṃ dukkha”nti pucchitā “jāti dukkhā, jarā dukkhā...pe... viññānaṃ dukkha”nti jātiādivīsesamanapekkhitvā yā dukkhavīsesatā vuttā, sā **ayaṃ** dukkhavīsesatā dukkhassa **vemattatā** nāma. **Tatthā**ti ye dukkhādayo dhammā sutte vuttā, tattha tesu dukkhādīsu atthesu.

Dukkhasamudayoti “taṇhā ponobhavikā”ti vīsesamanapekkhitvā yā samudayasāmaññatā vuttā, sā ayaṃ samudayasāmaññatā samudayassa **ekattatā** nāma. “Tattha katamo samudayo”ti pucchitvā “yāyaṃ taṇhā...pe... vibhavataṇhā”ti vīsesaṃ apekkhitvā yā samudayavīsesatā vuttā, sā **ayaṃ** samudayavīsesatā samudayassa **vemattatā** nāma.

Dukkhanirodhoti “tassāyeva taṇhāya asesavirāganīrodho”ti vīsesamanapekkhitvā yā nirodhasāmaññatā vuttā, sā ayaṃ nirodhasāmaññatā nirodhassa **ekattatā** nāma. “Tattha katamo dukkhanīrodho”ti pucchitvā “yo tassāyeva taṇhāya asesavirāganīrodho cāgo paṭinissaggo mutti anālayo”ti vīsesamanapekkhitvā yā nirodhavīsesatā vuttā, sā **ayaṃ** nirodhavīsesatā nirodhassa **vemattatā** nāma.

Dukkhanīrodhagāminī paṭipadāti? Paṭipadāti sammādiṭṭhiādivīsesamanapekkhitvā yā nirodhagāminīpaṭipadāsāmaññatā vuttā, sā ayaṃ nirodhagāminīpaṭipadāsāmaññatā maggassa **ekattatā** nāma. “Tattha katamā dukkhanīrodhagāminī paṭipadā”ti pucchitvā “ayameva ariyo...pe... sammāsamādhī”ti sammādiṭṭhiādivīsesamanapekkhitvā yā vīsesadukkhanīrodhagāminīpaṭipadatā vuttā, sā **ayaṃ** vīsesadukkhanīrodhagāminīpaṭipadatā maggassa **vemattatā** nāma.

Maggoti nirayagāminīmaggādivīsesamanapekkhitvā yā sāmāññamaggatā vuttā, sā ayaṃ sāmāññamaggatā maggassa **ekattatā** nāma. “Tattha katamo maggo”ti pucchitvā “nirayagāminī maggo...pe... nibbānagāminī maggo”ti nirayagāminīmaggādivīsesaṃ apekkhitvā yā vīsesamaggatā vuttā, sā **ayaṃ** vīsesamaggatā maggassa **vemattatā** nāma.

Nirodhoti paṭisaṅkhānīrodhādivīsesaṃ anapekkhitvā yā sāmāññanīrodhatā vuttā, sā ayaṃ sāmāññanīrodhatā nirodhassa **ekattatā** nāma. “Tattha katamo nirodho”ti pucchitvā “paṭisaṅkhānīrodho...pe... sabbakilesanīrodho”ti paṭisaṅkhānīrodhādivīsesaṃ apekkhitvā yā vīsesanīrodhatā vuttā, sā **ayaṃ** vīsesanīrodhatā nirodhassa **vemattatā** nāma.

Rūpanti cātumahābhūtikādivīsesamanapekkhitvā yā sāmāññarūpatā vuttā, sā ayaṃ sāmāññarūpatā rūpassa **ekattatā** nāma. “Tattha katamaṃ rūpa”nti pucchitvā “cātumahābhūtikaṃ...pe... vāyodhātuyā

cittam virājeti’ ti cātumahābhūtikādivisesamapekkhitvā yā visesarūpatā vuttā, sā **ayam** visesarūpatā rūpassa **vemattatā** nāma.

48. Avijjāti dukkheaññādivisesamanapekkhitvā yā avijjāsāmaññatā vuttā, sā ayam avijjāsāmaññatā avijjāya **ekattatā** nāma. “Tattha katamā avijjā” ti pucchitvā “dukkhe aññāṇam, dukkhasamudaye aññāṇam...pe... avijjālaṅghī moho akusalamūla” nti dukkheaññādivisesamapekkhitvā yā avijjāvisesatā vuttā, sā ayam avijjāvisesatā avijjāya **vemattatā** nāma.

Vijjāti dukkheññādivisesamanapekkhitvā yā vijjāsāmaññatā vuttā, sā ayam vijjāsāmaññatā vijjāya **ekattatā** nāma. “Tattha katamā vijjā” ti pucchitvā “dukkhe ñāṇam, dukkhasamudaye ñāṇam...pe... dhammavicayasambojjhaṅgo maggaṅgam maggaparīyāpanna” nti dukkheññādivisesamapekkhitvā yā vijjāvisesatā vuttā, sā **ayam** vijjāvisesatā vijjāya **vemattatā** nāma.

Samāpattīti saññāsamāpatyādivisesam anapekkhitvā yā sāmāññasamāpattitā vuttā, sā sāmāññasamāpattitā samāpattiyā **ekattatā** nāma. “Tattha katamā samāpattī” ti pucchitvā “saññāsamāpattī asaññāsamāpattī...pe... nirodhasamāpattī” ti saññāsamāpatyādivisesam apekkhitvā yā visesasamāpattitā vuttā, sā **ayam** visesasamāpattitā samāpattiyā **vemattatā** nāma.

Jhāyīti sekkhajhāyīdivisesam anapekkhitvā yā jhāyīsāmaññatā vuttā, sā jhāyīsāmaññatā jhāyino **ekattatā** nāma. “Tattha katamo jhāyī” ti pucchitvā “atthi sekkho jhāyī, atthi asekkho jhāyī...pe... paññuttaro jhāyī” ti sekkhajhāyīsekkhajhāyīdivisesamapekkhitvā yā jhāyīvisesatā vuttā, sā **ayam** jhāyīvisesatā jhāyino **vemattatā** nāma.

Samādhīti saraṇasamādhīdivisesamanapekkhitvā yā samādhisāmaññatā vuttā, sā ayam samādhisāmaññatā samādhino **ekattatā** nāma. “Tattha katamo samādhī” ti pucchitvā “saraṇo samādhī, araṇo samādhī...pe... micchāsamādhī, sammāsamādhī” ti saraṇasamādhīdivisesamapekkhitvā yā samādhīvisesatā vuttā, sā **ayam** samādhīvisesatā samādhino **vemattatā** nāma.

Paṭipadāti āgāḷhapaṭipadādivisesamanapekkhitvā yā paṭipadāsāmaññatā vuttā, ayam paṭipadāsāmaññatā paṭipadāya **ekattatā** nāma. “Tattha katamā paṭipadā” ti pucchitvā “āgāḷhapaṭipadā, nijjhāmapaṭipadā...pe... sukhā paṭipadā khippābhiññā” ti āgāḷhapaṭipadādivisesamapekkhitvā yā paṭipadāvisesatā vuttā, sā **ayam** paṭipadāvisesatā paṭipadāya **vemattatā** nāma.

Kāyoti nāmakāyādivisesamanapekkhitvā yā kāyasāmaññatā vuttā, sā ayam kāyasāmaññatā kāyassa **ekattatā** nāma. “Tattha katamo kāyo” ti pucchitvā “nāmakāyo rūpakāyo...pe... ayam nāmakāyo” ti nāmakāyādivisesamapekkhitvā yā kāyāvisesatā vuttā, sā **ayam** kāyāvisesatā kāyassa **vemattatā** nāmāti yojanā kātābbā. Padatthādiko viseso **aṭṭhakathāyam** (netti. aṭṭha. 47) vitthārato vutto.

Vuttappakārassa dukkhasamudayādikassa dhammassa ekattatādilakkhaṇam nigamanavasena dassetuṃ “**evam yo dhammo**” tiādi vuttaṃ. Tattha **evanti** iminā mayā vuttena “dukkhanti ekattatā. Tattha katamaṃ dukkhaṃ? Jāti dukkhā, jarā dukkhā” tiādivacanena. **Yo dhammoti** yo koci jātījarābyādhyādivisesadhammo. **Yassa dhammassāti** tato jātīdivisesadhammato aññassa jarādivisesadhammassa. **Samānabhāvoti** jātīdivisesadhammena jarādivisesadhammassa dukkhabhāvena samānabhāvo. **Tassa dhammassāti** jarādivisesadhammassa. **Ekattatāyāti** dukkhasamudayatādisamānatāya dukkhasamudayādībhāvānaṃ ekībhāvena. **Ekībhavatīti** jātīdivisesabhedena anekopi “dukkhasamudayo” tiādinā ekasaddābhidheyyatāya ekībhavati. **Yena yena vā pana vilakkhaṇo, tena tena vemattaṃ gacchati.** Yassa jātīdidhammassa yena yena abhinibbattanaparipācanādisabhāvena yo jātīdidhammo jarādidhammena vilakkhaṇo visadiso hoti, tassa jātīdidhammassa tena tena abhinibbattanaparipācanādisabhāvena so jātīdidhammo jarādidhammena vemattataṃ visadisattaṃ gacchati, dukkhasamudayādībhāvena samānopi

jātiādīdhammo jarādīdhammassa viṣiṭṭhatam gacchatīti attho daṭṭhabbo.

Dukkhasamudayādīdhammassa ekattavemattatā ācariyena vibhattā, amhehi ca ñātā, “tāya ekattavemattatāya kattha pucchite sati adhiṭṭhānaṃ vīmaṃsitabba”nti pucchitabbattā suttādiḷe pucchite sati vīmaṃsitabbanti dassetum “**evaṃ sutte vā**”tiādi vuttam. Tattha **evaṃ** iminā vuttappakārena sutte vā pucchite, veyyākaraṇe vā pucchite, gāthāyaṃ vā pucchitāyaṃ sati adhiṭṭhānaṃ vīmaṃsitabbaṃ. “Kiṃ vīmaṃsitabba”nti puccheyya “ekattatāya pucchati kiṃ, udāhu vemattatāya pucchati ki”nti vīmaṃsitabbanti yojanā. **Aṭṭhakathāyaṃ** pana – “idāni tāva ekattavemattatāvisaye niyojetvā dassetum ‘sutte vā veyyākaraṇe vā’tiādi vutta”nti (netti. aṭṭha. 48) vuttam. “Katham pucchitam, katham viṣṣajjitabba”nti vattabbattā “**yadi ekattatāya**”tiādi vuttam. “**Tenāhā**”tiādyānusandhyādiko ca “**niyutto adhiṭṭhāno hāro**”ti imassa anusandhyādiko ca vuttanāyānusārena veditabbo.

Iti adhiṭṭhānahāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭīkānusārena gambhīrattho vitthārato vibhajitvā gahetabboti.

15. Parikkhārahāravibhaṅgavibhāvanā

49. Yena yena saṃvaṇṇanāvīsesabhūtena vibhaṅgena dukkhasaccādīnaṃ ekattatādayo vibhattā, so saṃvaṇṇanāvīsesabhūto paripuṇṇo, “katamo parikkhārahāravibhaṅgo nāmā”ti pucchitabbattā “**tattha katamo parikkhāro hāro**”tiādi vuttam. Tattha **tatthā** tesu niddiṭṭhesu soḷasasu desanāhārādīsu **katamo** saṃvaṇṇanāvīseso **parikkhāro hāro** parikkhārahāravibhaṅgo nāmāti pucchati. “Ye dhammā yaṃ dhammaṃ janayanti”tiādiniddesassa idāni mayā vuccamāno “yo dhammo yaṃ dhammaṃ janayati, tassa so parikkhāro”tiādiko parikkhārabhūtassa hetuno ceva paccayassa ca vitthārasaṃvaṇṇanāvīseso parikkhāravibhaṅgo nāma.

“Katamo saṃvaṇṇetabbo parikkhāro”ti pucchitabbattā “**yo dhammo**”tiādi vuttam. Tattha **yo** hetupaccayappakāro **dhammo yaṃ** phalabhūtaṃ **dhammaṃ janayati** janeti, **tassa** phaladhammassa **so** hetupaccayappakāro dhammo **parikkhāro** nāma. “Kiṃlakkhaṇo parikkhāro”ti pucchitabbattā tathā pucchitvā lakkhaṇavīsesaṃ dassetum “**kiṃlakkhaṇo**”tiādi vuttam. **Aṭṭhakathāyaṃ** pana – “tattha ‘yo dhammo yaṃ dhammaṃ janayati, tassa so parikkhāro’ti saṅkhepato parikkhāralakkhaṇaṃ vatvā taṃ vibhāgena dassetum ‘kiṃlakkhaṇo’tiādi vutta”nti (netti. aṭṭha. 49) vuttam. “Kittakā dhammā janayanti”ti pucchitabbattā “**dve dhammā janayanti hetu ca paccayo cā**”ti vuttam. “Hetupi kāraṇaṃ, paccayopi kāraṇaṃ, tasmā kāraṇāyeva kena lakkhaṇena dvidhā vuttā”ti vattabbattā “**tattha kiṃlakkhaṇo**”tiādi vuttam. Janitabbaphalato aññehi phalehi **asādhāraṇalakkhaṇo hetu**, sabbaphalehi **sādhāraṇalakkhaṇo paccayo**, iminā vīsesalakkhaṇena dvidhā vattabbāti attho. “Sādhāraṇāsādhāraṇavīseso kīdiso bhava”ti pucchitabbattā “**yathā kiṃ bhava**”ti pucchitvā “**yathā aṅkurassā**”tiādi vuttam. Yathā yo sādhāraṇāsādhāraṇavīseso atthi, tathā so sādhāraṇāsādhāraṇavīseso kiṃ viya bhaveti attho. **Aṅkurassa nibbattiyā bījaṃ asādhāraṇaṃ** yathā, tathā **hetu** phalassa **nibbattiyā asādhāraṇo** bhava. **Pathavī ca āpo ca** aṅkurassa **nibbattiyā sādhāraṇā** bhavanti yathā, tathā **paccayo** phalassa **nibbattiyā sādhāraṇo** bhava. Sabbaphalassa paccayattā aṅkurassa bījaṃ asādhāraṇaṃ janakaṃ hetu. “Katham pathavī, āpo ca sādhāraṇā janakāti saddahitabbā”ti pucchitabbattā “**aṅkurassa hī**”tiādi vuttam. Samaṃ samānaṃ phalaṃ bhavāpetīti **sabhāvo**, ko so? Bījaṃ hetuyeva. “Kiṃ hetupaccayānaṃ vīseso bījaṅkuropamāyeva dassetabbo, udāhu aññūpamāyapi dassetabbo”ti vattabbattā aññāya upamāyapi vīsesaṃ dassetum “**yathā vā panā**”tiādi vuttam. Imāya upamāyapi hetupaccayānaṃ vīseso vijānitabboti adhippāyo.

Bījaṅkurādīsu bhāiresu parikkhārabhūtānaṃ hetupaccayānaṃ vīseso ācariyena vibhatto, amhehi ca ñāto, “katham ajjhattikesu vibhatto”ti pucchitabbattā “**ayañhi saṃsāro**”tiādi vuttam. Atha vā

“bāhiresu parikkhārabhūto hetupaccayo yutto hotu, kathaṃ ajjhattikesu yutto”ti vattabbattā “**ayañhi saṃsāro**”tiādi vuttaṃ. **Aṭṭhakathāyaṃ** pana – “evaṃ bāhiraṃ hetupaccayavibhāgaṃ dassetvā idāni ajjhattikaṃ dassetuṃ ‘ayañhi saṃsāro’tiādi vutta”nti (netti. aṭṭha. 49) vuttaṃ. Hetupaccayehi saha saṃsāro bhavatīti **sahetupaccayo**. Ayaṃ saṃsāro hi yasmā sahetupaccayo hutvā nibbatto, tasmā ajjhattikepi parikkhārabhūto hetupaccayo yutto yevāti daṭṭhabboti adhippāyo.

So imassa saṃsārassa sahetupaccayattaṃ yadi bhagavatā vuttaṃ, evaṃ sati amhehi saddahitabbaṃ, “kathaṃ saddahitabba”nti vattabbattā “**evañhi**”tiādi vuttaṃ. **Evanti** iminā avijjādinā hetupaccayena sabbo paṭiccasamuppādo saṃsāroti nibbattoti bhagavatā saṃsārassa sahetupaccayattaṃ vuttaṃ, tasmā saddahitabbaṃ. Avijjādayo saṅkhārādīnaṃ paccayo hotu, “katamo avijjāya hetū”ti pucchitabbattā “**iti avijjā avijjāya hetū**”ti vuttaṃ. “Katamo avijjāya paccayo”ti pucchitabbattā “**ayoniso manasikāro paccayo**”ti vuttaṃ. “Katamā avijjā katamāya avijjāya hetū”ti pucchitabbattā “**purimikā avijjā pacchimikāya avijjāya hetū**”ti vuttaṃ. “Katamā purimikā avijjā katamā pacchimikā avijjā”ti pucchitabbattā “**tatthā**”tiādi vuttaṃ. “Avijjāpariyuṭṭhānassa hetubhūto purimo avijjānusayo samanantarova kiṃ, udāhu paramparahetupi hotī”ti pucchitabbattā “**bijaṅkuro viyā**”tiādi vuttaṃ. **Bijaṅkuroti** bījānaṃ aṅkuroti bijaṅkuro, bījānaṃ **samanantarahetutāya** aṅkuro nibbattati **viya**. **Yattha** rukkhādike yaṃ phalaṃ nibbattati, tasmīṃ rukkhādike nibbattassa **assa** phalassa **idaṃ** bijaṃ pana **paramparahetutāya hetubhūtaṃ** bhavati.

“Bijaṃ pana ekaṃyeva hoti, kathaṃ dvidhā vattabba”nti vattabbattā “**duvidho hi**”tiādi vuttaṃ, samanantarakālaparamparakālabhedena hetupi duvidho hotiyevāti attho. Bijaḥhūto hetu duvidho yathā, evaṃ avijjāya hetubhūto avijjānusayopi samanantarahetu ca paramparahetu cāti kālabhedena duvidho bhavati, samanantaro avijjānusayo samanantarassa avijjāpariyuṭṭhānassa samanantarahetu hoti. Purimataro avijjānusayo pacchimataraṃ avijjāpariyuṭṭhānassa paramparahetu hoti. Iti bijaḥhūto asādhāraṇo hetu, pathavīpādiko sādāhāraṇo paccayoti viseso pākaṭo yathā, evaṃ avijjānusayo asādhāraṇo **hetu**, ayonisomanasikāro sādāhāraṇo **paccayoti** viseso daṭṭhabbo.

“Ettakeneva hetupaccayānaṃ viseso vattabbo”ti vattabbattā “**yathā vā pana thālakañcā**”tiādi vuttaṃ. **Aṭṭhakathāyaṃ** pana – “yathā vā panātiādināpi hetupaccayavibhāgameva dasseti”ti vuttaṃ. Tattha paḍīpassa paccayabhūtaṃ thālakañca vaṭṭi ca telañca paḍīpassa **sabhāvahetu** samānahetu na hotīti yojanā. “Paḍīpassa paccayabhūtampi thālakādikaṃ sabhāvahetu na hotīti kasmā saddahitabba”nti vattabbattā “**na hi sakkā**”tiādi vuttaṃ. Paḍīpassa paccayabhūtaṃ **anaggikaṃ** aggirahitaṃ thālakañca vaṭṭiñca telañca **dīpetuṃ** jāletuṃ **hi** yasmā na sakkā, tasmā purimo paḍīpo pacchimassa paḍīpassa sabhāvahetu hoti viya, evaṃ thālakādikaṃ sabhāvahetu na hoti. **Iti** evaṃpakāro **sabhāvo** samāno paḍīpo hetu hoti yathā, **parabhāvo** asamāno thālakādiko paccayo hoti yathā ca, tathā ajjhattiko sabhāvo **hetu** hoti, bāhiro asamāno **paccayo** hoti. **Janako** avijjānusayo avijjāpariyuṭṭhānassa **hetu** hoti, **pariggāhako** upatthambhako **paccayo** hoti. Aññehi phalehi **asādhāraṇo hetu** hoti, sabbehi phalehi **sādāhāraṇo paccayo** hotīti yojetvā paḍīpopamāyapi hetupaccayānaṃ pākaṭo viseso daṭṭhabboti adhippāyo.

Hetupaccayappabhedam kāraṇaṃ parikkhāroti ācariyena vuttaṃ, tassa kāraṇassa kāraṇabhāvo ca phalāpekkho hoti, tasmā “yo kāraṇabhāvo yenākārena hoti, katamo so kāraṇabhāvo, katamo so ākāro”ti pucchitabbattā ca “yaṃ phalaṃ yena visesena hoti, katamaṃ taṃ phalaṃ, katamo so viseso”ti pucchitabbattā ca “kāraṇaphalānaṃ yo sambandho hoti, katamo so sambandho”ti pucchitabbattā ca taṃ sabbaṃ vibhāvetuṃ “**avupacchedattho**”tiādi vuttaṃ. Ayamanusandhyattho ca **aṭṭhakathāyaṃ** “idāni yasmā kāraṇaṃ ‘parikkhāro’ti vuttaṃ, kāraṇabhāvo ca phalāpekkhāya, tasmā kāraṇassa yo kāraṇabhāvo yathā ca so hoti, yañca phalaṃ, yo ca tassa viseso, yo ca kāraṇaphalānaṃ sambandho, taṃ sabbaṃ vibhāvetuṃ ‘avupacchedattho’tiādi vutta”nti (netti. aṭṭha. 49) iminā vuttoti daṭṭhabbo.

Tattha avupacchinnassa hetupaccayasāṅkhātassa kāraṇassa yo anupacchedattho atthi, so anupacchedattho **santatiattho** hoti phalena sambandhattā, yañca kāraṇaṃ attano phalassa janakaṃ upatthambhakaṃ hutvā nirujjhati, so anupacchinno eva nāma hotīti. Yañca phalaṃ aññassa kāraṇaṃ

hutvā nirujjhati, tasmim anupacchinne tassa ca santatiattho hoti. Yaṃ pana phalaṃ aññassa phalassa kāraṇaṃ ahutvā nirujjhati, taṃ upacchinnaṃ hoti, yathā taṃ arahato cuticcinti. Kāraṇato nibbattassa phalassa yo **nibbattiattho** atthi, so nibbattiattho **phalatto** hoti. Paṭisandhikkhandhānaṃ yo **paṭisandhiattho** paṭisandhanattho atthi, so paṭisandhiattho **punabbhavattho** punabbhavanattho hoti. Kilesānaṃ yo **palibodhattho** santāne uppajjanattho atthi, so palibodhattho **pariyuṭṭhānattho** hoti. Kilesānaṃ maggena yo asamugghātattho atthi, so asamugghātattho **anusayattho** hoti. Avijjāya catunnaṃ saccānaṃ yo **asampaṭivedhattho** atthi, so asampaṭivedhattho **avijjattho** hoti. Arahattamaggena yo **apariññātattho** atthi, so apariññātattho **viññāṇassa** paṭisandhiviññāṇassa **bijatto** hoti.

Ettāvatā kāraṇabhāvo ca kāraṇākāro ca phalañca phalaviseso ca ācariyena vibhatto, amhehi ca ñāto, “katamo paramparahetupaccayattho, katamo ca sambandhattho”ti pucchitabbatā “**yattha avupacchedo**”tiādi vuttaṃ. **Yattha** yassaṃ rūpārūpapavattiyāṃ avupacchinnaṃ hetupaccayappabhedassa kāraṇassa yo **avupacchedo** atthi, so avupacchedo **tattha** tissaṃ rūpārūpapavattiyāṃ **santati** hoti. **Yattha** yassaṃ rūpārūpapavattiyāṃ yā **santati** atthi, sā santatit**attha** rūpārūpapavattiyāṃ **nibbatti** hotītiādinā yojetvā paramparahetuādiko viññātabbo.

Sīlakkhandhoti parisuddhasīlakkhandho. **Samādhikkhandhassāti** mahaggatakkhandhassa, samādhipatṭhāno hi mahaggatadhammo. **Paññākkhandhoti** maggaphalapaññāpadhānakkhandho. So hi vimuttiñānadassanasāṅkhātassa paccavekkhaṇañānakkhandhassa paccayo hoti. **Titthaññutādinā** attho padaṭṭhānahāravibhaṅgavaṇṇanāyaṃ vuttova.

Sabhāvo hetūti ācariyena vutto, “kīdiso so sabhāvo hetū”ti pucchitabbatā “**yathā vā pana cakkhuñca paṭicca**”tiādi vuttaṃ. Cakkhuviññāṇaṃ **cakkhuñca** cakkhundriyañca **paṭicca** nissayaṃ katvā rūpe **paṭicca** ārammaṇaṃ katvā uppajjati. **Tattha** cakkhādīsū cakkhundriyaṃ **ādhipateyyapaccayatāya** indriyapaccayatāya cakkhuviññāṇassa paccayo, rūpārammaṇaṃ purejātārammaṇapaccayatāya paccayo, āloko **sannissayatāya** upanissayatāya paccayo hoti. So paccayo honto phalena cakkhuviññāṇena asamānattā sabhāvo hetu na hoti, paccayo ca hoti manasikāro. Kiriyaṇanodhātu pana phalena cakkhuviññāṇena viññāṇabhāvena samānattā sabhāvo hetu hoti yathā, evaṃ **saṅkhārā** nāmakkhandhabhāvena samānattā **viññāṇassa** paccayā hontā **sabhāvo hetu** honti. **Viññāṇaṃ** nāmarūpena ekasantativasena samānattā **nāmarūpassa paccayo** hontaṃ **sabhāvo hetu** hoti. Iminā nayena “**nāmarūpaṃ saḷāyatanassā**”tiādisupi attho vedītabbo. **Evaṃ** vuttappakāro **hetu, paccayo** janako, upatthambhako ca yo koci **upanissayo** balavapaccayo hoti, **sabbo so** hetupaccayo janakaupatthambhako janitabbupatthambhiyassa phalassa parikkharaṇato abhisāṅkharaṇato nippariyāyato **parikkhāro** nāma.

“Vuttappakāro hetupaccayo parikkhāro nāmāti kena amhehi saddahitabbo”ti vattabbatā “**tenāhā**”tiādi vuttaṃ. **Tena** kāraṇabhūtena sabbassa hetupaccayassa parikkhārabhāvena āyasmā mahākaccāno “**ye dhammā yaṃ dhammaṃ janayantī**”ti yaṃ vacanaṃ āha, tena vacanena saddahitabbo, “ye dhammā yaṃ dhammaṃ janayantī”ti vacanaṃ nissāya tumhehi sallakkhetabboti adhippāyo.

“Ettakova parikkhāro hāro yuñjitabbo”ti vattabbatā “**niyutto parikkhāro hāro**”ti vuttaṃ, yo yo parikkhāro hāro yuñjitabbo, so so parikkhāro hāro nīharitvā **yutto** yuñjitabboti.

Iti parikkhārahāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭīkānusārena gambhīrattho vitthārato vibhajitvā gahetabboti.

16. Samāropanahāravibhaṅgavibhāvanā

50. Yena yena saṃvaṇṇanāvīsesabhūtena parikkhārahāravibhaṅgena suttatthānaṃ hetupaccayo vibhatto, so...pe... vibhaṅgo paripuṇṇo, “katamo samāropanahāravibhaṅgo”ti pucchitabbattā “**tattha katamo samāropano hāro**”tiādi vuttaṃ. **Tattha** tesu niddiṭṭhesu soḷasasu desanāhārādīsu **katamo** saṃvaṇṇanāvīseso **samāropano hāro** samāropanahāravibhaṅgo nāmāti pucchati. “Ye dhammā yaṃmūlā”tiādiniddesassa idāni mayā vuccamāno “ekasmiṃ padaṭṭhāne yattakāni padaṭṭhānāni otarantī”tiādiko vitthārasaṃvaṇṇanāvīseso samāropanahāravibhaṅgo nāma.

“Kittake padaṭṭhāne sutte vutte kittakāni padaṭṭhānāni samāropayitabbānī”ti pucchitabbattā “**ekasmiṃ padaṭṭhāne**”tiādi vuttaṃ. **Ekasmiṃ padaṭṭhāne** sutte vutte sati avuttāni yattakāni padaṭṭhānāni **otaranti** samosaranti, **sabbāni tāni** avuttāni padaṭṭhānāni sutte vuttāni viya niddhāraṇavasena ānetvā desanāya āropayitabbāni. “Kāni viya samāropayitabbānī”ti vattabbattā “**yathā āvaṭṭe**”tiādi vuttaṃ. **Āvaṭṭe** hāre ekasmiṃ padaṭṭhāne sutte vutte sati sutte avuttāni **bahukāni** padaṭṭhānāni otaranti, tāni bahukāni padaṭṭhānāni pariyesitabbāni yathā, evaṃ samāropane hārepi bahukāni padaṭṭhānāni desanāya samāropayitabbānīti attho.

“Kevalaṃ pana padaṭṭhānavaseneva samāropanā kātabbā kiṃ, udāhu aññavasenāpi samāropanā kātabbā ki”nti vattabbattā aññavasenāpi samāropanā kātabbā; tasmā samāropanā catubbidhā kātabbāti dassento “**tattha samāropanā catubbidhā**”tiādimāha. Tattha **tatthāti** tāsū samāropayitabbasamāropanāsu **padaṭṭhānaṃ** padaṭṭhānasamāropanā, **vevacanaṃ** vevacanasamāropanā, **bhāvanā** bhāvanāsamāropanā, **pahānaṃ** pahānasamāropanā, **iti** iminā pabhedena **samāropanā catubbidhā** kātabbā.

“Tāsū catubbidhāsu samāropanāsu katamā padaṭṭhānasamāropanā”ti pucchitabbattā tathā pucchitvā padaṭṭhānasamāropanaṃ dassetuṃ “**tattha katamā**”tiādi vuttaṃ. Sutte vuttena padaṭṭhānena sutte avuttānaṃ padaṭṭhānānaṃ samāropanā katamāti pucchati.

Sabbapāpassa akusalassa yaṃ **akaraṇaṃ** akaraṇahetu sāsanaṃ atthi, **etaṃ** sāsanaṃ buddhānaṃ **sāsanaṃ** ovādo hoti, atha vā **akaraṇaṃ** akaraṇatthāya yaṃ sāsanaṃ atthi, etaṃ buddhānaṃ **sāsanaṃ** ovādo hoti, na yassa kassaci sāsanaṃ attho. **Akaraṇanti** hi sampadānatthe pavattaṃ paccattavacanaṃ yathā “kissa atthāya kimattha”nti. Kusalassa **sampadā** sampadāya yaṃ sāsanaṃ atthi, etaṃ buddhānaṃ sāsanaṃ. **Sacittapariyodāpanaṃ** sacittapariyodāpanatthaṃ yaṃ sāsanaṃ atthi, etaṃ buddhānaṃ sāsanaṃ hoti.

Iti evampakārena vuttassa **tassa** sāsanaṃ **kiṃ** padaṭṭhānanti visesassa visesapadaṭṭhānaṃ puna pucchati. **Idaṃ** sucaritattayaṃ sāsanaṃ ovādassa **padaṭṭhānaṃ** sucaritattayena hetunā sāsanaṃ atthi daṭṭhabbaṃ yathā “annena vasatī”tiādi. “Sucaritattaye padaṭṭhāne vutte katamaṃ padaṭṭhānaṃ samāropayitabba”nti pucchitabbattā “**tattha yaṃ kāyikañcā**”tiādi vuttaṃ. **Idaṃ** khandhattayaṃ sāsanaṃ **padaṭṭhānaṃ** samāropayitabbaṃ, “khandhattaye padaṭṭhāne samāropayite katamaṃ samāropayitabba”nti pucchitabbattā “**tattha silakkhandho cā**”tiādi vuttaṃ. **Idaṃ** samathavipassanādvayaṃ sāsanaṃ **padaṭṭhānaṃ** samāropayitabbaṃ. “Samathavipassanādvaye padaṭṭhāne samāropayite katamaṃ padaṭṭhānaṃ samāropayitabba”nti pucchitabbattā “**tattha samathassa phala**”ntiādi vuttaṃ. **Idaṃ** phaladvayaṃ sāsanaṃ **padaṭṭhānaṃ** samāropayitabbaṃ.

Sāsanaṃ padaṭṭhānāni samāropayitabbānīti ācariyena niddhāretvā vibhattāni, amhehi ca ñātāni, “idāni katamassa katamaṃ padaṭṭhānaṃ samāropayitabba”nti pucchitabbattā “**vanam vanathassa**”tiādi vuttaṃ. **Idaṃ** kāmagaṇapañcakaṃ **vanam** taṇhābhūtassa **vanathassa padaṭṭhānaṃ** taṇhāvattubhāvato, “itthī”ti vā “puriso”ti vā nimittagāhasaṅkhātaṃ **idaṃ vanam** “aho cakkhu, aho sotam, aho ghānaṃ, aho jivhā, aho kāyo”ti **tesam tesam aṅgapaccaṅgānaṃ** anubyañjanagāhasaṅkhātassa **vanathassa padaṭṭhānaṃ** samāropayitabbaṃ. Apariññātaṃ

dvādasāyatanaśāṅkhātamaṃ **idaṃ vanaṃ** saṃyojanasaṅkhātassa **vanathassa padaṭṭhānaṃ** samāropayitabbaṃ, āyatanamaṃ paṭicca saṃyojanuppajjanato anusayasāṅkhātamaṃ **idaṃ vanaṃ** pariyaṭṭhānaśāṅkhātassa **vanathassa padaṭṭhānaṃ** samāropayitabbaṃ. “Pañcakāmaguṇādīnaṃ vanabhāvo ca taṇhādīnaṃ vanathabhāvo ca kena amhehi saddahitabbo”ti vattabbattā **“tenāha bhagavā”**tiādi vuttaṃ. **Tena** pañcakāmaguṇādīnaṃ vanabhāvena ca taṇhādīnaṃ vanathabhāvena ca bhagavā **“chetvā vanañca vanathañcā”**ti yaṃ vacanaṃ āha, tena bhagavato vacanena vacanānusārena saddahitabboti. **Ayanti** ayaṃ “ekasmiṃ padaṭṭhāne”tiādisaṃvaṇṇanā. **Padaṭṭhānenā**ti ekekena padaṭṭhānena. **Samāropanā**ti tadaññapadaṭṭhānānaṃ samāropanā. Samāropenti samāropayitabbāni etāya saṃvaṇṇanāyāti **samāropanā**ti viggahoti. (1)

51. Padaṭṭhānena samāropanā ācariyena niddiṭṭhā, amhehi ca ñātā, “katamā vevacanena samāropanā”ti pucchitabbattā **“tattha katamā vevacanenā”**tiādi vuttaṃ. **Tatthā**ti tāsū catūsū padaṭṭhānasamāropanādīsū samāropanāsū **vevacanena** ekekena rotadaññavevacanānaṃ **samāropanā katamā**ti pucchati. **“Rāgavirāgā”**ti ca **“cetovimuttī”**ti ca **“sekkhaphala”**nti ca idaṃ vacanattayaṃ anāgāmiṃ phalattattā anāgāmiṃ phalassa vevacanamaṃ. **“Avijjāviraṅgā”**ti ca **“paññāvimuttī”**ti ca **“asekkhaphala”**nti ca idaṃ vacanattayaṃ arahattaphalattattā arahattaphalassa vevacanamaṃ. Iminā nayena sesesu yojanā kātabbā. (2)

Vevacanena samāropanā ācariyena niddiṭṭhā, amhehi ca ñātā, “katamā bhāvanāya samāropanā”ti pucchitabbattā **“tattha katamā bhāvanāyā”**tiādi vuttaṃ. **Tatthā**ti tāsū catūsū padaṭṭhānasamāropanādīsū katamāya desitāya **bhāvanāya** katamesānaṃ adesitānaṃ bhāvanāropanā **katamā**ti pucchati. **Yathā** yena pakārena yaṃ bhāvanaṃ **bhagavā** “tasmātiha, tvaṃ bhikkhu, kāye kāyānupassī viharati, ātāpī sampajāno satimā vineyya loke abhijjhādomanassa”nti (saṃ. ni. 5.369, 371, 395, 415) āha, tathā tena pakārena tāya bhāvanāya tadaññabhāvanāpi samāropayitabbāti attho.

“Tasmātihā”tiādiṃ paṭhe “kiṃ bhāvanaṃ bhagavā āhā”ti pucchitabbattā **“ātāpī”**tiādi vuttaṃ. **“Ātāpī”**ti vacanena **vīriyindriyaṃ** bhagavā āha. **“Sampajāno”**ti vacanena **paññindriyaṃ** bhagavā āha. **“Satimā”**ti vacanena **satindriyaṃ** āha. **“Vineyya loke abhijjhādomanassa”**nti vacanena **samādhindriyaṃ** āha. “Evaṃ vutte katamā bhāvanā samāropayitabbā”ti pucchitabbattā **“evaṃ kāye kāyānupassino viharato cattāro satipaṭṭhānā bhāvanāpāripūriṃ gacchantī”**ti vuttaṃ. Evaṃ vuttāya vīriyindriyādibhāvanāya cattāro satipaṭṭhānā samāropayitabbāti attho. **Kena kāraṇena** bhāvanāpāripūriṃ gacchantīti pucchati. **Catunnaṃ indriyānaṃ** indriyabhāvena, bhāvetabbabhāvena vā **ekalakkaṇattā** bhāvanāpāripūriṃ gacchantīti vissajjeti. “Tesū samāropitesu katame samāropayitabbā”ti pucchitabbattā **“catūsū”**tiādi vuttaṃ. Catūsū satipaṭṭhānesu bhāviyamānesu samāropayitabbesu cattāro sammappadhānā bhāvanāpāripūriṃ gacchantīti samāropayitabbāti attho. Sesesuṃ evameva samāropayitabbā.

Bhāvanāya samāropanā ācariyena vibhattā, amhehi ca ñātā, “katamā pahānena samāropanā”ti pucchitabbattā **“tattha katamā”**tiādi vuttaṃ. **Tatthā**ti tāsū catūsū padaṭṭhānasamāropanādīsū katamena desitena **pahānena** katamesaṃ adesitānaṃ pahānānaṃ **katamā samāropanā**ti pucchati. **“Kāye kāyānupassī viharanto asubhe ‘subha’nti vipallāsaṃ pajahatī”**ti desitena “subha”nti vipallāsappahānena kabalīkārāhārapariññāya paribandhakilesakāmupādānappahānādayopi samāropayitabbā.

“Vedanāsu vedanānupassī viharanto dukkhe ‘sukha’nti vipallāsaṃ pajahatī”ti desitena “sukha”nti vipallāsappahānena phassāhārapariññāya paribandhakilesabhavupādānappahānādayopi samāropayitabbā.

“Citte cittānupassī viharanto anicce ‘nicca’nti vipallāsaṃ pajahatī”ti desitena “nicca”nti vipallāsappahānena viññāṇāhārapariññāya paribandhakilesadiṭṭhupādānappahānādayopi samāropayitabbā.

“**Dhammesu dhammānupassī viharanto anattani ‘attā’ ti vipallāsaṃ pajahatī**” ti desitena “attā” ti vipallāsappahānena manosañcetanāhārapariññāya? Manosañcetanāhārapariññāya paribandhakilesaattavādupādānappahānādayopi samāropayitabbāti adhippāyo. (4)

Pahānahāro pana lakkhaṇahāravibhaṅgavaṇṇanāyaṃ vutttoyevāti idha na vadāma.

“Sutte desitena ekekena padaṭṭhānādikena adesitānaṃ padaṭṭhānādīnaṃ samāropanabhāvo kena amhehi vijānitabbo saddahitabbo” ti vattabbattā “**tenāha āyasmā**” tiādimāha. **Tena** tathā samāropanabhāvena āyasmā mahākaccāno –

“Ye dhammā yaṃmūlā, ye cekatthā pakāsītā muninā;
Te samāropayitabbā, esa samāropano hāro” ti –

Yaṃ vacanaṃ **āha**, tena vacanena vacanānusārena tathā samāropanabhāvo tumhehi vijānitabbo saddahitabboti vuttaṃ hoti.

“Kiṃ pana ettāvatā samāropano hāro paripuṇṇo, añño niyutto natthī” ti vattabbattā “**niyutto samāropano hāro**” ti vuttaṃ. Sutte desitena nayena padaṭṭhānādikena adesitāni padaṭṭhānāni samāropayitabbāni bhavanti, tena tena padaṭṭhānādikena adesitānaṃ padaṭṭhānādīnaṃ samāropano hāro **niyutto** niddhāretvā yuñjītabboti attho daṭṭhabbo.

Iti samāropanahāravibhaṅge sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭīkānusārena gambhīrattho vitthārato vibhajitvā gahetabbo.

Ime yathāvuttā soḷasa saṃvaṇṇanāvīsesā saṃvaṇṇetabbatthesu aññāṇasaṃsayānaṃ haraṇato apanayanato **hārā** nāmāti.

Niṭṭhitā hāravibhaṅgavāravibhāvanā.

1. Desanāhārasampātavibhāvanā

52. Yena yena saṃvaṇṇanāvīsesabhūtena desanāhāravibhaṅgādihāravibhaṅgena assādādayo nānāsuttatthā vibhattā, so saṃvaṇṇanāvīsesabhūto desanāhāravibhaṅgādihāravibhaṅgo paripuṇṇo.

“Soḷasa hārā paṭṭhamaṃ, disālocanato disā viloketvā;
Saṅkhipiya aṅkusena hi, nayehi tīhi niddise sutta” nti. (netti. 4 nayasankhepa) –

Gāthā niddesavāre ācariyena vuttā, tassā gāthāya niddeso hāravibhaṅgavārassa ādimhi na vibhatto, “kuhiñci vibhatto, hārasampāte vā vibhatto kiṃ, udāhu nayasamuṭṭhānahāre vā vibhatto ki” nti pucchitabbattā “hārasampāte vibhatto” ti tumhehi daṭṭhabboti viññāpanatthaṃ “**soḷasa hārā paṭṭhama**” ntiādi vuttaṃ.

Atha vā suparikammakatabhūmisadisesu saṃvaṇṇetabbesu nānāsuttappadesesu nānāvaṇṇasugandhapupphasadise soḷasa hāre saṃvaṇṇanābhāvena yojetvā soḷasa hārā ācariyena vibhattā, tathā susikkhitasippācariyasu vicāritajambunadābharaṇasadisesu saṃvaṇṇetabbesu nānāsuttappadesesu nānāvīdharaṃsijālavidhamaṇiratanasadise soḷasa hāre saṃvaṇṇanābhāvena yojetvā soḷasa hārā vibhattā, mahāpathaviṃ parivattetvā pappāṭakojassa khādāpanaṃ atidukkaraṃ

viya, nānāvidhesu saṃvaṇṇetabbesu suttappadesesu paramatthojāya soḷasahi hārehi atidukkarakhādāpanasadisaṃ viññāpanaṃ karontena ca yojanikamadhugaṇḍaṃ pīletvā sumadhurasassa pāyāpanaṃ atidukkaraṃ viya nānāvidhesu saṃvaṇṇetabbesu suttappadesesu paramatthamadhurasassa soḷasahi hārehi atidukkaraṃ pāyāpanasadisaṃ viññāpanaṃ karontena ca ācariyena anekesu saṃvaṇṇetabbasuttappadesesu soḷasa hāre saṃvaṇṇanābhāvena yojetvā soḷasa hārā vibhattā, amhehi ca ñātā, “nānāvidhasuttappadesesu te saṃvaṇṇanābhāvena yojetvā soḷasa hārā vibhattā kiṃ, udāhu ekasmimpi saṃvaṇṇetabbasuttappadesu saṃvaṇṇanābhāvena yojetvā soḷasa hārā vibhattā ki’nti vattabbattā ekasmimpi saṃvaṇṇetabbasuttappadesu saṃvaṇṇanābhāvena yojetvā soḷasa hārā vibhattāyevāti tathā vibhajanto “**soḷasa hārā paṭhama**”ntiādikaṃ hārasampātavāraṃ āha.

Nanu hārasampātavāraṃ kathetukāmena ācariyena “tattha katamo desanāhārasampāto”tiādivacanaṃ vattabbaṃ, atha kasmā “soḷasa hārā paṭhama”ntiādi vattabbanti ce? Niddese vuttaṃ “soḷasa hārā paṭhama”ntiādikaṃ gāthaṃ hāravibhaṅgavāro nappayojeti vipparikkhāvisayattā ca nayavicārassa ca antaritattā. Hārasampātavāro pana taṃ gāthaṃ payojeti avipparikkhāvisayattā. Tasmā taṃ gāthaṃ paccāmasitvā hārasampātavāre tassā gāthāya niddeso daṭṭhabboti viññāpanatthaṃ “soḷasa hārā paṭhama”ntiādi vattabbaṃyevāti. **Aṭṭhakathāyaṃ** pana –

Evam suparikammakatāya bhūmiyā nānāvaṇṇāni muttapupphāni pakiranto viya, susikkhitasippācariyavicāritesu surattasuvaṇṇālaṅkāresu nānāvidharamsijālasamujjalāni vividhāni maṇiratanāni bandhanto viya, mahāpathaviṃ parivattetvā pappātaḷaṃ khādāpentō viya, yojanikamadhugaṇḍaṃ pīletvā sumadhurasassa pāyento viya ca āyasmā mahākaccāno nānāsuttappadesu udāharanto soḷasa hāre vibhajitvā idāni te ekasmiṃyeva sutte yojetvā dassento hārasampātavāraṃ ārabhi. Ārabhanto ca yāyaṃ niddesavāre –

“Soḷasa hārā paṭhamaṃ, disālocanato disā viloketvā;
Sāṅkhipiya āṅkusena hi, nayehi tīhi niddese sutta”nti. –

Gāthā vuttā. Yasmā taṃ hāravibhaṅgavāro nappayojeti vipparikkhāvisayattā, nayavicārassa ca antaritattā. Anekehi suttappadesehi hārānaṃ vibhāgadassanameva hi hāravibhaṅgavāro. Hārasampātavāro pana taṃ payojeti ekasmiṃyeva suttappadesu soḷasa hāre yojetvāva tadanantaraṃ nayasamuṭṭhānassa kathitattā. Tasmā “soḷasa hārā paṭhama”nti gāthaṃ paccāmasitvā “**tassā niddeso kuhiṃ daṭṭhabbo? Hārasampāte āhā**”ti –

Vuttaṃ. Gāthātho niddesavibhāvanāyaṃ vuttova. “Soḷasa...pe... sutta”nti yā gāthā niddese ācariyena vuttā, **tassā** gāthāya **niddeso kuhiṃ daṭṭhabbo**, hāravibhaṅgassa ādimhi ācariyena na vibhatto, hārasampāte vā paccāmasitvā vibhattoti daṭṭhabbo kiṃ, udāhu nayasamuṭṭhāne vā paccāmasitvā vibhattoti daṭṭhabbo kinti pucchati. **Hārasampāte** paccāmasitvā vibhattoti daṭṭhabboti vissajjanā.

Hārasampāte tassā gāthāya niddeso daṭṭhabboti ācariyena vutto, so hārasampāto desanāhārasampātabhedena soḷasavidho, “tattha katamo hārasampāto desanāhārasampāto”ti pucchitabbattā imasmiṃ sutte saṃvaṇṇetabbe saṃvaṇṇanābhāvena mayā vibhajiyamāno hārasampātabhūto saṃvaṇṇanāviseso desanāhārasampāto nāmāti tathā vibhajitvā “**tattha katamo desanāhārasampāto**”tiādi vuttaṃ. **Tatthāti** tasmīṃ soḷasavidhe desanāhārasampātdike hārasampāte. **Katamo** hārasampātabhūto saṃvaṇṇanāviseso **desanāhārasampāto** nāmāti pucchati.

“Arakkhitena cittaṇa, micchādiṭṭhihatena ca;
Thinamidhābhībhūtena, vasaṃ mārasa gacchati”ti. –

Sutte “**arakkhitena cittaṇāti kiṃdesayati**”ti pucchitvā “**pamādaṃ desayati**”tiādisaṃvaṇṇanāviseso desanāhārasampāto nāmāti vuttaṃ hoti. Gāthātho **aṭṭhakathāyaṃ** (netti. aṭṭha. 52) vibhatto. Yojanātho pana **arakkhitena cittaṇa** arakkhitacittasamaṅgī puggalo **mārasa** maccuno vasaṃ gacchati.

Micchādiṭṭhihatena vipallāsena vipallāsasamaṅgī puggalo mārassa vasaṃ gacchati.
Thinamiddhābhūtena sasaṅkhārikacittena kusītacittena taṃcittasamaṅgī puggalo **mārassa**
 kilesādimārassa vasaṃ gacchatīti.

“Arakkhitena cittenā”ti padena desitaṃ taṃ pamādadhammajātaṃ kassa pada”nti vattabbattā
“taṃ maccuno pada”nti vuttaṃ. “Arakkhitena cittenā”ti iminā suttappadesena desito attho ācariyena
 vibhatto, amhehi ca ñāto, “micchādiṭṭhihatena cāti suttappadesena desito attho kathaṃ vibhatto”ti
 vattabbattā **“micchādiṭṭhihatena cā”**tiādi vuttaṃ. Yena vipallāsena yadā anicce “nicca”nti passati,
 tadā pavatto so vipallāso “micchādiṭṭhihataṃ nāmā”ti vuccati. “So pana vipallāso kiṃlakkhaṇo”ti
 pucchitabbattā tathā pucchivā **“viparītaggāhalakkhaṇo vipallāso”**ti vuttaṃ.

Viparītaggāhalakkhaṇoti asubhādīnaṃyeva subhādiviparītaggāhalakkhaṇo vipallāso
 “vipallāsayaṭī”ti kārītatthasambhavato. Kiṃ vipallāso viparītaggāhalakkhaṇo? So vipallāso saññaṃ
 vipallāsayaṭī, cittampi vipallāsayaṭī, diṭṭhimpi vipallāsayaṭī. Iti tayo dhamme vipallāsayaṭīti
 vipallāsetabbānaṃ tividdhattā vipallāsāpi tividdhā honti. Tesu saññāvipallāso muduko dubbalo
 subhādivasena upaṭṭhitākāraggaṇamattattā, cittavipallāso saññāvipallāsato balavā subhādivasena
 upaṭṭhahantānaṃ rūpakkhādhādīnaṃ subhādivasena sanniṭṭhānaṃ katvā gahaṇato. Diṭṭhivipallāso
 saññāvipallāsacittavipallāsehi balavato, yaṃ yaṃ ārammaṇaṃ subhādiākārena upaṭṭhāti. Taṃ taṃ
 ārammaṇaṃ sassatādivasena abhinivisitvā gahaṇato. Tasmā saññāvipallāso paṭhamam vutto,
 tadanantaram cittavipallāso, tadanantaram diṭṭhivipallāso vutto. Vitthārato pana ekekassa
 subhasukhaattaniccaggaṇavasena catubbiddhattā dvādasavidhā honti.

Vipallāsā ācariyena vibhattā, amhehi ca ñātā, “katame vipallāsapavattiṭṭhānavisayā”ti
 pucchitabbattā imāni attabhāvavattūni vipallāsapavattiṭṭhānavisayānīti dassetuṃ **“so kuhiṃ**
vipallāsayaṭī catūsu attabhāvavattūsu”ti vuttaṃ. **Catūsu** rūpakāyavedanācittadhammasaṅkhātesu
 attabhāvavattūsu so sabbo vipallāso saññācittadiṭṭhiyo vipallāsayaṭī. “Kathaṃ samanupassantassa
 vipallāsayaṭī”ti pucchitabbattā **“rūpaṃ attato samanupassati”**tiādi vuttaṃ. Yo puggalo rūpaṃ vā
 attato samanupassati, rūpavantaṃ attānaṃ vā attato samanupassati, attani rūpaṃ vā attato
 samanupassati. Rūpasmim attānaṃ vā attato samanupassati, evaṃ tassa samanupassantassa puggalassa
 vipallāso rūpakāye saññācittadiṭṭhiyo vipallāsayaṭī. Eseva nayo vedanādīsipi.

“Tesu rūpakāyādīsū katamaṃ katamassa vipallāsassa vatthū”ti pucchitabbattā evaṃ
 pavattamānassa vipallāsassa idaṃ imassa vatthūti vibhajitum **“tattha rūpa”**ntiādi vuttaṃ. **Tatthāti** tesu
 rūpādīsū catūsu **paṭhamam vipallāsavatthu rūpaṃ “asubhe subha”**nti evaṃ pavattamānassa
 vipallāsassa vatthu hotīti vibhajitvā gahetabbaṃ. Esa nayo sesesupi. Evaṃ “asubhe
 subha”ntiādippakārena vipallāsā catubbiddhā bhavanti.

Idaṃ imassa vatthūti ācariyena vibhajitvā dassitā, amhehi ca ñātā, “tesam vipallāsānaṃ katame
 mūlakāraṇadhammā”ti pucchitabbattā **“dve dhammā”**tiādi vuttaṃ. Cittassa saṃkilesā, taṇhā ca avijjā
 ca – ime dve dhammā vipallāsānaṃ mūlakāraṇabhūtā bhavanti.

“Ime dve dhammā ekato vipallāsānaṃ mūlakāraṇaṃ kiṃ honti, udāhu visuṃ visu”nti vattabbattā
 visuṃ visuṃ vibhajitum **“taṇhānivuta”**ntiādi vuttaṃ. Avijjārahitā taṇhā nāma natthi, tasmā
 “taṇhāavijjānivuta”nti vattabbanti? Na, taṇhāya sātīsayapaccayattā. Sātīsayāya hi taṇhāya asubhepi
 “subha”nti, dukkhepi “sukha”nti samanupassanti. “Taṇhā ca avijjā cā”ti vuttattā “avijjānivuta”nti
 vattabbaṃ, kasmā “diṭṭhinivuta”nti vuttanti? Avijjāya diṭṭhi bhavati diṭṭhisīsenā avijjānaṃ gahetvā
“diṭṭhinivuta”nti vuttaṃ, avijjānivutanti attho gahetabbo. “Avijjānivuta”nti vutte pana diṭṭhirahitā
 avijjāpi gahitā siyā, diṭṭhisahitāya hi avijjāya aniccepi “nicca”nti, anattaniyepi “attā”ti samanupassanti.

“Kathaṃ taṇhāmūlako vipallāso pavatto, kathaṃ diṭṭhisahitāvijjāmūlako vipallāso pavatto”ti
 vattabbattā **“tattha yo diṭṭhivipallāso”**tiādi vuttaṃ. **Tatthāti** tesu

taṇhāmūlakadiṭṭhisahitāvijjāmūlakesu. **Diṭṭhivipallāsoti** diṭṭhisahitāvijjāmūlakavipallāso. **Atītaṃ rūpaṃ attato samanupassatīti** adabbabhūtopi dabbabhūto viya vutto. **Taṇhāvipallāsoti** diṭṭhisahitataṇhāmūlako vipallāso **anāgataṃ rūpaṃ** diṭṭhibhinandanavasena **abhinandatīti**. Evaṃ atītasamanupassanaanāgatābhinandanabhedena pavattiviseso daṭṭhabbo. “Cittassa saṃkilesa taṇhāvijjāyeva dve dhammā na honti, atha kho dasa kilesāpi, kasmā dveyeva vuttā”ti vattabbattā **“dve dhammā cittassa upakkilesā”**tiādi vuttaṃ. Taṇhā ca avijjā ca – ime dveyeva dhammā paramasāvajjassa vipallāsassa mūlakāraṇattā. **Tāhi** taṇhāvijjāhi visujjhantaṃ cittaṃ sabbehi kilesehi **visujjhati**, tasmā ca visesato cittassa upakkilesā hontīti dve dhammā vuttā. Na hi tāsū taṇhāvijjāsu arahattamaggena pahīnasu koci saṃkilesa appahīno nāma natthīti.

“Vuttappakārā taṇhāvijjā vuttappakārānaṃ vipallāsānaṃyeva mūlakāraṇaṃ honti kiṃ, udāhu sakalassa vaṭṭassāpi mūlakāraṇaṃ honti ki”nti vattabbattā vuttappakārā taṇhāvijjā vuttappakārānaṃ mūlakāraṇaṃ honti yathā, evaṃ sakalassa vaṭṭassāpi mūlakāraṇaṃ hontīti dassetuṃ **“tesa”**ntiādi vuttaṃ. Tattha yesaṃ puggalānaṃ cittaṃ arakkhitaṃ, micchādiṭṭhihataṅca hoti, **tesaṃ** puggalānaṃ. Yesaṃ avijjānīvaraṇānaṃ taṇhāsamojanānaṃ pubbakoti na paññāyati, tehi avijjānīvaraṇehi taṇhāsamojanehi saṃsāre **sandhāvantaṃ saṃsarantaṃ** puggalānaṃ **sakiṃ nirayaṃ** māravasagamanena sandhāvanaṃ saṃsaraṇaṃ hoti, **sakiṃ tiracchānayoṇiṃ** sandhāvanaṃ saṃsaraṇaṃ hoti, **sakiṃ pettivisaṃsaṃ** sandhāvanaṃ saṃsaraṇaṃ hoti, **sakiṃ asurakāyaṃ** sandhāvanaṃ saṃsaraṇaṃ hoti, **sakiṃ deve** sandhāvanaṃ saṃsaraṇaṃ hoti, **sakiṃ manusse** sandhāvanaṃ saṃsaraṇaṃ hotīti attho.

“Micchādiṭṭhihataṅca cā”ti suttappadesena desito attho ācariyena vibhatto, amhehi ca ñāto, “thinamiddhābhibhūtenāti suttappadesena desito attho kathaṃ vibhatto”ti vattabbattā **“thinamiddhābhibhūtenā”**tiādi vuttaṃ. **Cittassa** viññānakkhandhassa yā **akallatā** akammaniyatā atthi, idaṃ akallattaṃ akammaniyattaṃ **thinaṃ** nāma. Yaṃ **kāyassa līnattaṃ** vedanādikkhandhattayalīnattaṃ atthi, idaṃ kāyassa līnattaṃ **middhaṃ** nāmāti thinamiddhasarūpameva vuttaṃ. Tehi thinamiddhehi cittassa abhibhūtabhāvādiko pana suviññeyyattā na vutto, avuttepi yesaṃ puggalānaṃ cittaṃ thinamiddhehi abhibhūtaṃ, tesāṃ puggalānaṃ tena cittaṃ cittaṃsena saṃyojanena saṃsāre māravasagamanena sandhāvanaṃ saṃsaraṇaṃ pariyosānasabhāvo vitthāretvā gahetabbo.

“Vasaṃ māraṃsa gacchatīti suttappadesena desito attho kathaṃ vibhatto”ti vattabbattā **“vasaṃ māraṃsa gacchatī”**ti vuttaṃ. Tattha **kilesamāraṃsāti** kilesa dānādipuññe māreti nivāretīti atthena **māro**ti kilesamāro. Iminā kilesamāraṃ nissāya pavattattā abhisankhāramārahandaṃmāramaccumārā ca gahitā, **ca-saddena** vā gahitāti veditabbā. **Sattamāraṃsāti** devaputtamāraṃsa. Atha vā “devaputtamāraṃsā”ti avatvā “sattamāraṃsā”ti vuttattā yo yo rājacorādiko dānādīni vā issariyabhogādīni vā māreti, so so rājacorādikopi gahito, tasmā yassa kassaci sattamāraṃsāti attho. **Vasanti** icchaṃ lobhaṃ adhippāyaṃ ruciṃ ākaṅkhaṃ āṇaṃ āṇattim. **Gacchatīti** upagacchati upeti anuvattati anugacchati nātikkaṃmatīti attho. “Kasmā vasaṃ gacchatī”ti vattabbattā **“so hi”**tiādi vuttaṃ. Yo satto arakkhitacittena ca micchādiṭṭhihatacittena ca thinamiddhābhibhūtacittena ca samannāgato hoti, **so** satto avijjānīvaraṇādīhi **nivuto** hutvā saṃsārābhimukho **hi** yasmā hoti, na visankhārābhimukho, tasmā māraṃsa vasaṃ gacchatīti attho.

“Arakkhitenātiādikassa yassa suttassa attho vibhatto, tena ‘arakkhitenā’tiādikena suttena kittakāni saccāni desitāni”tivattabbattā **“imāni bhagavatā”**tiādi vuttaṃ. “Arakkhitenā”tiādisuttena bhagavatā imāni dve saccāni desitāni dukkhaṃ, samudayo cāti. Kathaṃ desitāni? Abhidhammanissitāya kathāya ceva suttanissitāya kathāya ca desitāni. Tāsū kathāsu abhidhammanissitāya kathāya desite sati “arakkhitenā cittaṃ”ti iminā padena arakkhitaṃ rattampi cittaṃ, arakkhitaṃ duṭṭhampi cittaṃ, arakkhitaṃ mūlhampi cittaṃ bhagavatā desitaṃ ñāpitaṃ. Tattha rattacittaṃ lobhasahagatacittuppādavasena aṭṭhavidhaṃ, duṭṭhacittaṃ paṭiṅhasampayuttacittuppādavasena dubbidhaṃ, mūlhacittaṃ momūhacittuppādavasena dubbidhanti veditabbā. Imesaṃhi cittuppādānaṃ vasena yā cakkhundriyādīnaṃ agutti anārakkhā uppannā, tāya aguttiyā anārakkhāya cittaṃ arakkhitaṃ

hoti phalūpacārenāti.

“Micchādiṭṭhihatenā”ti iminā padena micchādiṭṭhisamsaṭṭhaṃ cittaṃ desitaṃ, taṃ diṭṭhisampayuttacittuppādasena catubbidhanti veditabbaṃ. Tañhi micchādiṭṭhiyā samsaṭṭhabhāvena micchādiṭṭhiwasānugatattā micchādiṭṭhihataṃ nāmāti. “Thinamiddhābhībhūtenā”ti iminā padena thinamiddhena samsaṭṭhaṃ cittaṃ desitaṃ, taṃ sasāṅkhārikacittuppādasena pañcavidhanti veditabbaṃ. Tañhi thinamiddhena samsaṭṭhabhāvena thinamiddhavasānugatattā thinamiddhābhībhūtaṃ nāmāti evaṃ ye dvādasākusalā **cittuppādakaṇḍe** “katame dhammā akusalā? Yasmiṃ samaye akusalaṃ cittaṃ uppannaṃ hotī”tiādina (dha. sa. 365) vitthārato vattabbā, te dvādasākusalacittuppādā tīhi padehi bhagavatā desitāti veditabbā. “Mārassā”ti padena pañca mārā gahitā. Tesu kilesamāro “cattāro āsavā, cattāro oghā, cattāro yogā, cattāro ganthā, cattāri upādānāni, aṭṭha nīvaraṇā, dasa kilesā”ti (dha. sa. 1102 ādayo) desito. Abhisāṅkhāramāro pana “kusalā cetanā (vibha. 226) akusalā cetanā (vibha. 226) kusalaṃ kammaṃ akusalaṃ kamma”ntiādina desito. Khandhamāro pana “attabhāvo pañcakkhandhā”tiādina desito. Maccumāro pana “cuti cavanatā”tiādina (vibha. 193) desito. Evaṃ tāvettha abhidhammanissitāya kathāya desito attho daṭṭhabbo.

Suttantaniissitāya pana kathāya desite sati “cakkhunā rūpaṃ disvā nimittaggāhī hoti anubyañjanaggāhī, yatvādihikaraṇaṃ cakkhundriyaṃ asaṃvutaṃ viharantaṃ abhihādōmanassā pāpakā akusalā dhammā anvāsaveyyuṃ, tassa saṃvarāya na paṭipajjati, na rakkhati cakkhundriyaṃ, cakkhundriye na saṃvaram āpajjati...pe... sotindriye na saṃvaram āpajjati... ghānindriye na saṃvaram āpajjati... jivhindriye na saṃvaram āpajjati... kāyindriye na saṃvaram āpajjati... manindriye na saṃvaram āpajjati”ti (ma. ni. 1.347) evaṃ puggalādhiṭṭhānena yaṃ chadvārikacittaṃ vuttaṃ, taṃ chadvārikacittaṃ “arakkhiteṇa cittenā”ti iminā padena desitaṃ. Yā micchādiṭṭhiyo pubbantakappanavasena vā aparantakappanavasena vā pubbantāparantakappanavasena vā micchā abhinivisantaṃ ayoniso ummujjantaṃ “sassato loko”ti vā “asassato loko”ti vā “na hoti tathāgato paraṃ maraṇā”ti vā uppannā, tāhi diṭṭhīhi vā, yā ca diṭṭhiyo “imā cattāro sassatavādā...pe... paramadiṭṭhadhammanibbānavādā”ti **brahmajālasuttā**disu (dī. ni. 1.30 ādayo) vuttā, tāhi diṭṭhīhi vā sampayuttaṃ yaṃ cittaṃ “micchādiṭṭhihatena cā”ti iminā padena desitaṃ.

“Thinaṃ nāma cittassa akammaññatā, middhaṃ nāma vedanādikkhandhattayassa akammaññatā”ti vā “thinaṃ anussāhasamsīdanam, middhaṃ ussāhasattivighāto”ti vā yāni thinamiddhāni vuttāni, tehi thinamiddhehi yaṃ cittaṃ abhibhūtaṃ ajjhotthataṃ, taṃ cittaṃ “thinamiddhābhībhūtenā”ti iminā padena desitaṃ.

“Vaso nāma icchā lobho adhippāyo ruci ākaṅkhā āṇā āṇattī”ti yo vaso vutto, so vaso “vasa”nti iminā padena desito. “Pañca mārā – khandhamāro abhisāṅkhāramāro maccumāro devaputtamāro kilesamāro”ti yo māro vutto, so māro “mārassā”ti iminā desito. “Gacchati, upagacchati, upeti, anuvattati, anugacchati, nātikkamati”ti yo puggalo vutto, so puggalo “gacchati”ti iminā desitoti. Evaṃ desitesu dhammesu akusalā samudayasaccaṃ, “vasaṃ mārassa gacchati”ti iminā padena ye pañcupādānakkhandhe upādāya paññatto puggalo vutto, te pañcupādānakkhandhā dukkhasaccanti dve saccāni desitāni. “Kimatthāya dve saccāni desitāni”ti pucchitabbattā “**tesaṃ bhagavā**”tiādi vuttaṃ. **Tesaṃ** dvinnam saccānam **pariññāya ca pahānāya ca** “arakkhiteṇā”tiādi **dhammaṃ bhagavā deseti**, tāni dve saccāni “arakkhiteṇā”tiādikena ñāpetīti attho.

“Tesu dvīsu saccesu kassa saccassa pariññāya, kassa saccassa pahānāya deseti”ti pucchitabbattā “**dukkhassa pariññāya, samudayassa pahānāya**”ti vuttaṃ. “Pariññāpahānehi katamāni saccāni desitāni”ti vattabbattā “**yena cā**”tiādi vuttaṃ. **Yena** arahattamaggena pariñānāti, **yena** arahattamaggena pajahati ca, **ayaṃ** arahattamaggo maggasaccaṃ nāma. **Yaṃ** nibbānadhammaṃ ārabha taṇhāya, avijjāya ca pahānam jātam, **ayaṃ** nibbānadhammo **nirodho** nirodhasaccaṃ nāmāti. Evaṃ cattāri saccāni bhagavatā desitāni.

“Catunnaṃ saccānaṃ desitabhāvo kena viññātabbo”ti vattabbattā “**tenāhā**”tiādi vuttaṃ. Tesu catūsu saccesu samudayasaccena assādo gahito, dukkhasaccena ādīnavo gahito, maggasaccanīrodhasaccehi nissaraṇaṃ gahitaṃ, samudayappahānavasena sabbagatipajhanaṃ jātaṃ, sabbagatipajhanaṃ phalanti gahitaṃ. Yena rakkhitaṃcittatādikena sabbagatipajhanaṃ jātaṃ, so rakkhitaṃcittatādiko upāyoti gahito, arakkhitaṃcittatādikassa paṭisedhanamukhena rakkhitaṃcittatādikassa niyojanaṃ bhagavato āṇattīti gahitanti desanāhārena nānāsuttesu dassitā assādādayo “arakkhiteṇā”tiādike ekasmiṃyeva sutte nīharitvā dassitā.

“Assādādīnaṃ nīharitvā dassitabhāvo kena viññātabbo saddahitabbo”ti vattabbattā “**tenāhā**”tiādi vuttaṃ. Ettha ca yena saṃvaṇṇanāvīsesena nānāsuttesu assādādayo nīharitvā dassitā, so saṃvaṇṇanāvīseso desanāhāravibhaṅgo nāma. Yena saṃvaṇṇanāvīsesena ekasmiṃyeva sutte assādādayo nīharitvā dassitā, so saṃvaṇṇanāvīseso desanāhārasampāto nāmāti viseso daṭṭhabbo.

“Ettakova desanāhārasampāto paripuṇṇo”ti vattabbattā “**niyutto desanāhārasampāto**”ti vuttaṃ. Ekekasmiṃyeva sutte assādādayo yena yena saṃvaṇṇanāvīsesabhūtena desanāhārasampātena nīharitvā yathārahaṃ dassitā, so so saṃvaṇṇanāvīsesabhūto desanāhārasampāto **niyutto** yathārahaṃ niddhāretvā yujjitabboti attho gahito.

Iti desanāhārasampāte sattibalānurūpā racitā

Vibhāvanā niṭṭhitā.

Paṇḍitehi pana...pe... gahetabboti.

2. Vicayahārasampātavibhāvanā

53. Yena desanāhārasampātena assādādayo ācariyena vibhattā, amhehi ca nītā, so desanāhārasampāto paripuṇṇo, “katamo vicayahārasampāto”ti pucchitabbattā “**tattha katamo vicayo hārasampāto**”tiādi vuttaṃ. **Tatthāti** tesu desanāhārasampātādīsu soḷasasu hārasampātesu **katamo** saṃvaṇṇanāvīseso **vicayahārasampāto** nāmāti pucchati. Imesu dhammesu ayaṃ dhammo yena saṃvaṇṇanāvīsesena vicayitabbo, so saṃvaṇṇanāvīseso vicayahārasampāto nāmāti niyametvā vibhajitum “**tattha taṇhā**”tiādi vuttaṃ. **Aṭṭhakathāyaṃ** pana –

“Evaṃ desanāhārasampātaṃ dassetvā idāni vicayahārasampātaṃ dassento yasmā desanāhārapadatthavicayo vicayahāro, tasmā desanāhāre vipallāsahetubhāvena niddhāritāya taṇhāya kusalādivibhāgapavicayamukhena vicayahārasampātaṃ dassetum ‘tattha taṇhā duvidhā’tiādi āradhā”nti (netti. aṭṭha. 53) –

Vuttaṃ. Tattha **tatthāti** tasmim “arakkhitena cittenā”tiādisuttatthe desanāhārasampātena saṃvaṇṇite akusaladhamme “taṇhā”ti niddhāritā sabbataṇhā. **Kusalāpīti** catubhūmake kusale uddissa pavattā taṇhāpi. **Akusalāpīti** akusaladhamme uddissa pavattā taṇhāpīti duvidhā hotīti vicayitabbā. Tena vuttaṃ **ṭīkāyaṃ** – “kusaladhammārammaṇāti kusalaḍḍhamme uddissa pavattamattaṃ sandhāya vuttaṃ, na tesam ārammaṇapaccayataṃ, idha ‘kusalā dhammā’ti lokuttaradhammānampi adhippetattā”ti.

“Kusalā taṇhā kiṃgāminī, akusalā taṇhā kiṃ gāminī”ti pucchitabbattā “**akusalā saṃsāragāminī**”tiādi vuttaṃ. Atha vā “katamo kusalākusalataṇhānaṃ viseso”ti pucchitabbattā “**akusalā saṃsāragāminī**”tiādi vuttaṃ. “Taṇhā nāma saṃsāragāminī hotu, kathaṃ apacayagāminī”ti vattabbattā “**pahānataṇhā**”ti vuttaṃ, pahānassa hetubhūtaṃ taṇhā **pahānataṇhāti** attho, pahātabbataṇhaṃ āgamma yaṃ pahānaṃ pavattetabbaṃ, tena pavattetabbena pahānena apacayaṃ gacchatīti vuttaṃ hoti.

“Kiṃ pana taṇhāyeva kusalākusalāti dubbidhā, udāhu aññopi kusalākusalāti dubbidho”ti vattabbattā “**mānopi**”tiādi vuttaṃ. “Katamo māno kusalo, katamo māno akusalo”ti pucchitabbattā “**yaṃ mānaṃ nissāya mānaṃ pajahati, ayaṃ māno kusalo. Yo pana māno dukkhaṃ nibbattayati, ayaṃ māno akusalo**”ti vuttaṃ. Tattha **yaṃ mānaṃ...pe... kusaloti** yaṃ mānaṃ nissāya upanissāya pahānaṃ pavattitaṃ, tena pahānena santāne uppajjanārahaṃ mānaṃ pajahati, ayaṃ upanissayapaccayabhūto māno phalūpacārena kusalo. **Yo pana...pe... akusaloti** yo pana māno parahimsanādivasena pavattamāno hutvā attano ca parassa ca dukkhaṃ nibbattayati, ayaṃ māno akusaloti vicayitvā veditabbo.

“Samsārāpacayagāminīsu tāsū taṇhāsu katamā apacayagāminī taṇhā kusalā”ti pucchitabbattā “kusalā”ti vuttāya taṇhāya sarūpaṃ dassetaṃ “**tattha yaṃ nekkhammasita**”ntiādi vuttaṃ. **Tatthāti** tāsū samsārāpacayagāminīsu taṇhābhūtāsū kusalākusalāsū. Ayaṃ taṇhā kusalāti sambandho. “**Ariyā** puggalā **santaṃ āyatanam yaṃ** ariyaphaladhammaṃ sacchikatvā upasampajja viharanti, **taṃ āyatanam** ariyaphaladhammaṃ ahaṃ kudāssu sacchikatvā viharissa”nti patthayantassa **tassa** kulaputtassa tasmim ariyaphale **pihā** uppajjati, pihāpaccayā yaṃ domanassaṃ uppajjati, idaṃ domanassaṃ “**nekkhammasita**”nti vuccati. Ayaṃ ariyaphale pihāsankhātā taṇhā kusalā anavajjā anavajjaariyaphaladhammaṃ uddissa pavattattāti vicayitabbam.

“Kathaṃ pavattā”ti vattabbattā “**rāgavirāgā**”tiādi vuttaṃ. Yā **rāgavirāgā cetovimutti** pattabbā. **Tadārammaṇā** taṃ cetovimuttiṃ āgamma pavattā taṇhā **kusalā** anavajjā, yā **avijjāvirāgā paññāvimutti** pattabbā, tadārammaṇā taṃ paññāvimuttiṃ āgamma pavattā taṇhā kusalā anavajjāti vicayitabbā. Tāya paññāvimuttiyā vasena bhagavatā –

“Tasmā rakkhitacittassa, sammāsaṅkappagocaro;
Sammādiṭṭhipurekkhāro, ñatvāna udayabbayaṃ;
Thinamiddhābhībhū bhikkhu, sabbā duggatiyo jahe”ti. (udā. 32; netti. 31, 65, 78) –

Gāthāyaṃ “sabbā duggatiyo jahe”ti padaṃ vuttaṃ, “tassā paññāvimuttiyā yo pavicayo kātabbo, katamo so pavicayo”ti pucchitabbattā “**tassā ko pavicayo**”tiādi vuttaṃ. **Tassā** paññāvimuttiyā ko pavicayoti ce puccheyya “aṭṭha maggaṅgāni – sammādiṭṭhi sammāsaṅkappo sammāvācā sammākammanto sammājīvo sammāvāyāmo sammāsati sammāsamādhī”ti pavicayo veditabbo. “So pavicayo kattha daṭṭhabbo”ti pucchitabbattā “**so katthā**”tiādi vuttaṃ. **So** paññāvimuttiyā pavicayo **kattha** kasmim dhamme daṭṭhabboti pucchati. Catutthe jhāne **pāramitāya** ukkaṃsagatāya catutthajjhānabhāvanāya so pavicayo daṭṭhabbo.

“Catutthe jhāne pāramitāyā”ti vuttamatthaṃ vivaritaṃ “**catutthe hi jhāne**”tiādi vuttaṃ. Yo so catutthajjhānalābhī puggalo catutthe jhāne parisuddhaṃ pariyodātaṃ anaṅgaṇaṃ vigatūpakkilesaṃ mudu kammaniyaṃ ṭhitaṃ āneñjappattaṃ, iti aṭṭhaṅgasamannāgataṃ cittaṃ bhāvayati, **so** catutthajjhānalābhī puggalo **tattha** catutthe jhāne aṭṭhavidhaṃ vijjācaraṇaṃ adhigacchati. Katamaṃ aṭṭhavidhaṃ? Cha abhiññā, dve ca visese vā adhigacchatīti yojanā. Iddhividhādayo pañca, lokiyābhiññā ceva arahattamaggapaññā cāti **cha abhiññā**. Manomayiddhi ceva vipassanāññāñcāti **dve ca visesā** honti.

“Taṃ catutthajjhānacittaṃ kuto parisuddhaṃ...pe... kuto āneñjappatta”nti pucchitabbattā “**taṃ cittaṃ yato parisuddha**”ntiādi vuttaṃ. Taṃ cittaṃ **yato** upekkhāsati parisuddhibhāvato **parisuddhaṃ, tato** upekkhāsati parisuddhibhāvato **pariyodātaṃ** hoti. Sukhādīnaṃ paccayaghātena **yato** vītarāgādanāṅgaṇabhāvato **anaṅgaṇaṃ, tato** vītarāgādanāṅgaṇabhāvato **vigatūpakkilesaṃ. Yato** subhāvitabhāvato **mudu, tato** subhāvitabhāvato **kammaniyaṃ. Yato** parisuddhādīsu ṭhitabhāvato **ṭhitaṃ, tato** parisuddhādīsu ṭhitabhāvato **āneñjappattaṃ** hotītipi yojanā yuttā **aṭṭhakathāyaṃ** (netti. aṭṭha. 53) yugaḷato āgatattā. Saddhāvīriyasatisamādhipaññāobhāsehi pariggahitabhāvato **āneñjappattaṃ**. Saddhāya hi pariggahitaṃ cittaṃ paṭipakkhe assaddhiye na iñjati na calati, vīriyena

pariggahitaṃ cittaṃ paṭipakkhe kosajje na iñjati, satiyā pariggahitaṃ cittaṃ paṭipakkhe pamāde na iñjati, samādhinā pariggahitaṃ cittaṃ paṭipakkhe uddhacce na iñjati, paññāya pariggahitaṃ cittaṃ paṭipakkhāya avijjāya na iñjati, obhāsagataṃ cittaṃ kilesandhakāre na iñjati. Iti imehi chahi dhammehi pariggahitaṃ catutthajjhānacittaṃ āneñjappattaṃ hoti. Evaṃ aṭṭhaṅgasamannāgatattā catutthajjhānacittaṃ channaṃ abhiññāñāṇānañca manomayiddhivipassanāñāṇānañca adhigamūpāyo hoti, tasmā so paññāvimuttiparicayo catutthajjhāne daṭṭhabboye vāti saṅkhepattho. Vitthārato pana **aṭṭhakathāyaṃ** (netti. aṭṭha. 53) “tatha upekkhāsati pārisuddhibhāvenā” tiādinā vā “aparo nayo” tiādinā vā vuttoye vāti amhehi na vutto.

“Yesaṃ rāgādiāṅgaṇānaṃ abhāvena anaṅgaṇaṃ, yesaṃ abhijjhādiupakkilesānaṃ abhāvena vigatūpakkilesaṃ, yāya cittaṃsa ṭhitiyā abhāvena ṭhitaṃ, iñjanāya abhāvena āneñjappattaṃ, te rāgādiāṅgaṇādayo katamāya pakkhā” ti pucchitabbattā “**tattha aṅgaṇā**” tiādi vuttaṃ. **Tatthā** ti tesu rāgādiāṅgaṇādīsu **aṅgaṇā** ca rāgādiāṅgaṇā ca **upakkilesā** abhijjhādiupakkilesā ca santi, **tadubhayaṃ** rāgādiāṅgaṇā abhijjhādiupakkilesadvayaṃ **taṇhāpakkho** rāgādiāṅgaṇānaṃ taṇhāsabhāvattā, abhijjhādiupakkilesānañca taṇhāya anulomattā. Yā **iñjanā** phandaṇā yā ca cittaṃsa **aṭṭhiti** anavaṭṭhānaṃ atthi, **ayaṃ** iñjanā aṭṭhiti **diṭṭhipakkho** iñjanāya ca aṭṭhitiyā ca micchābhinivesahetubhāvatoti pavicayo kātabbo.

“Kiṃ pana catutthajjhānacittaṃ aṭṭhaṅgasamannāgatattāyeva channaṃ abhiññāñāṇānañca **manomayiddhivipassanāñāṇānañca adhigamūpāyo hoti**” ti pucchitabbattā “**cattāri indriyāni**” ti vuttaṃ. “Tassa catutthajjhānalābhino, dukkhindriyaṃ domanassindriyaṃ sukhindriyaṃ somanassindriyaṃ iti cattāri indriyāni catutthajjhāne nirujjhanti, tassa catutthajjhānalābhino upekkhindriyaṃ avasiṭṭhaṃ bhavati, tasmāpi catutthajjhānacittaṃ vuttappakāraṇaṃ aṭṭhannaṃ ñāṇānaṃ adhigamūpāyo hoti, so ca adhigamūpāyabhāvo ciṅṇavasībhāvasseva bhavēyya, kathaṃ catutthajjhānamattalābhino ciṅṇavasībhāvo siyā” ti vattabbattā so catutthajjhānalābhī catutthajjhāneyeva aṭṭhatvā arūpasamāpattiyopi **evaṃ katvā nibbatteti bhāveti, tasmā ciṅṇavasībhāvo hoti ti dassetuṃ** “**so uparimaṃ samāpatti**” ntiādi vuttaṃ. Tassattho **aṭṭhakathāyaṃ** (netti. aṭṭha. 53) vitthārato vutto, tasmā yojanamattaṃ karissāma.

So rūpāvacaracatutthajjhānalābhī yogāvacaro rūpāvacaracatutthajjhānasamāpattito **uparimaṃ ākāsañācāyatana samāpattiṃ santato** santatarato manasi karoti. Yathāvuttaṃ uparimaṃ samāpattiṃ santato **manasi karoto tassa** catutthajjhānalābhino yogāvacarassa catutthajjhāne **saññā** saññāpadhānā samāpatti oḷārikā viya hutvā saṅṭhahati, paṭighasaññā ca **ukkaṇṭhā** anabhirati hutvā saṅṭhahati, **so** yathāvuttena vidhinā manasi karonto yogāvacaro **sabbaso** niravasesato rūpasaññānaṃ samatikkamā paṭighasaññānaṃ atthaṅgamā nānattasaññānaṃ amanasikārā “ākāsaṃ ananta” nti manasi katvā pavattamānaṃ **ākāsañācāyatana samāpattiṃ** sacchikatvā upasampajja viharati. **Rūpasaññā** rūpāvacarasaññā pañcavidha **abhiññābhinihāro** hoti. **Nānattasaññā** nānārammaṇesu **vokāro** akusalo pavattati. Evaṃ rūpāvacarajjhāne ādīnavadassī hutvā tā rūpasaññānānattasaññāyo ārammaṇe samatikkamati, **assa** yogāvacarassa paṭighasaññā ca abbatthaṃ gacchati. **Evaṃ** iminā vuttanayena samatikkamena **samāhitassa**, santavuttinā arūpāvacarasamādhinā **samāhitassa** yogāvacarassa **obhāso** rūpāvacarajjhānobhāso antaradhāyati. **Rūpānaṃ** kasiṇarūpānaṃ jhānacakkhunā dassanañca antaradhāyatīti yojanā.

“Yena samādhinā samāhitassa, samāhitassa obhāso ca rūpānaṃ dassanañca antaradhāyati, so samādhī kittakehi aṅgehi samannāgato, kathaṃ paccavekkhitabbo” ti pucchitabbattā “**so samādhī**” tiādi vuttaṃ. **So samādhī** ti yena rūpārūpāvacarasamādhinā samāhito, so duvidhopi samādhī anabhijjhāyāpādavīriyārambhehi tīhi upakāraaṅgehi ca passaddhisatīhi dvīhi parikkhāraaṅgehi ca avikkhittena ekena sabhāvaṅgena ca chahi aṅgehi samannāgatoti **paccavekkhitabbo** punappunaṃ cintetabbo sallakkhetabbo. “Kathaṃ kattha paccavekkhitabbo” ti pucchitabbattā “**anabhijjhāsahagataṃ me mānaṃ sabbaloke**” tiādi vuttaṃ. “Tesu chasu aṅgesu kittako samatho, kittakā vipassanā” ti pucchitabbattā ettako samatho, ettakā vipassanāti vibhajitūṃ “**tattha yañcā**” tiādi

vuttam.

54. “Paññāvimuttī” ti vuttassa arahattaphalassa samādhissa samathavipassanāsāṅkhātā pubbabhāgapaṭipadā samādhimukhena ācariyena vibhattā, “tāya paṭipadāya labhitabbo arahattaphalassamādhī kittakena vedītabbo” ti pucchitabbattā “**so samādhī pañcavidhena vedītabbo**” ti vuttam. Yo arahattaphalassamādhī samathavipassanāpaṭipadāya labhitabbo, so arahattaphalassamādhī **pañcavidhena** ñāṇadassanena vedītabbo.

“Katham pañcavidhāñāṇadassanaṃ paccupaṭṭhitam bhavati” ti vattabbattā “**ayaṃ samādhī**” tiādi vuttam. **Ayaṃ** arahattaphalassamādhī appitappitakkhaṇe phalassamāpattisukhattā **paccuppannasukho** hoti, **iti** paccavekkhantassa **assa** arahato paccattameva ñāṇadassanaṃ paccupaṭṭhitam bhavati. **Ayaṃ** arahattaphalassamādhī āyatim samāpajjitabbassa arahattaphalassamādhissa upanissayapaccayattā **āyatim sukhavipāko** hoti, **iti** paccavekkhantassa...pe... bhavati. **Ayaṃ** arahattaphalassamādhī kilesārīhi ārakattā **ariyo**, kāmāmisavaṭṭāmisalokāmisānaṃ abhāvato **nirāmisō** ca hoti, **iti** paccavekkhantassa...pe... bhavati. **Ayaṃ** arahattaphalassamādhī akāpurisehi sammāsambuddhapaccekaḥabbuddhasāvakaḥabbuddhehi sevītabbattā **akāpurisasevito** hoti, **iti** paccavekkhantassa...pe... bhavati. **Ayaṃ** arahattaphalassamādhī aṅgasantakilesadarathasantattā **santo ceva** divasampi samāpajjantassa atittikaraṇato **pañito ca** paṭippassaddhakilesena arahatā puggalena laddhattā **paṭippassaddhiladdho ca** arahattamaggassamādhissāṅkhātēna ekodibhāvena adhigatattā **ekodibhāvādhigato ca** sasaṅkhārena sapayogena adhigatattā, nīvaraṇādīpaccanīkadhamme niggayha anadhigatattā, aññe kilese vāretvā anadhigatattā, arahattamaggaphalabhāveneva pavattattā **nasasaṅkhāraniggayhavāritagato** hoti, **iti** paccavekkhantassa **assa** arahato paccattameva ñāṇadassanaṃ paccupaṭṭhitam bhavati ti pañcavidhena ñāṇadassanena so arahattaphalassamādhī vicayitvā vedītabboti.

“Paccuppannasukhādīsu samādhīsu kittako samatho, kittakā vipassanā” ti pucchitabbattā “**tattha yo ca samādhī paccuppannasukho**” tiādi vuttam. **Samatho, vipassanā** ti ca arahattaphalassamathavipassanāva adhippetā, na pubbabhāgasamathavipassanāti. Arahattaphalassamādhī pañcavidhena vedītabboti ācariyena vutto, “tassa arahattaphalassamādhissa pubbabhāgapaṭipadāyaṃ vutto samādhī kittakena vedītabbo” ti pucchitabbattā “**so samādhī pañcavidhena vedītabbo**” ti vuttam. Yo rūpāvacaracatutthajjhānasamādhī pubbabhāgapaṭipadāyaṃ vutto, so rūpāvacaracatutthajjhānasamādhī pañcavidhena pakārena vedītabbo. “Katamenā” ti pucchitabbattā “**pītipharaṇatā**” tiādi vuttam. Paṭhamadutiyajjhānesu paññā **pītipharaṇatā** hoti. Paṭhamadutiyatīyajjhānesu paññā **sukhapharaṇatā** hoti. Catutthajjhāne cetopariyapaññā **cetopharaṇatā** hoti. Dibbacakkhupaññā **ālokapharaṇatā** hoti. Jhānaṃ paccavekkhitvā pavattamānapaññā **paccavekkhānīmīttam** hoti. Iti pañcavidhena paññāpakārena vicayitvā vedītabboti. “Tesu pañcavidhesu pakāresu kittako samatho, kittakā vipassanā” ti pucchitabbattā “**tattha yo ca pītipharaṇo**” tiādi vuttam.

55. Sampayogavasena samādhī ācariyena vibhatto, amhehi ca ñāto, “katham ārammaṇavasena vibhatto” ti pucchitabbattā “**dasa kasiṇāyatanāni**” tiādi vuttam. Imehi dasahi ārammaṇehi kasiṇehipi samādhī vicīnitvā vedītabboti. “Tesu dasasu kittako samatho, kittakā vipassanā” ti pucchitabbattā “**tattha yañcā**” tiādi vuttam. **Kasiṇanti** ca kasiṇamaṇḍalampi parikkammampi paṭibhāganīmīttampi tasmim paṭibhāganīmītte uppannajjhānampi vuccati, idha pana sasampayuttajjhānameva adhippetam.

“Kim pana vuttappakāro samādhīyeva samathavipassanāya yojetabbo, udāhu aññopi yojetabbo” ti vattabbattā satipaṭṭhānādīpubbabhāgapaṭipadābhedenā anekabhedabhinno niravaseso ariyamaggopi vicayitvā yojetabboti dassetuṃ “**evaṃ sabbo**” tiādi vuttam. Tattha **evanti** mayā vuttanayena vuttanayānusārena **sabbo** niravaseso satipaṭṭhānādīpubbabhāgapaṭipadābhedenā anekabhedabhinno **ariyo maggo** yojetabbo. Katham? **Yena yena** anabhijjhādiākārena paccuppannasukhatādiākārena samādhī mayā vutto, **tena tena** anabhijjhādiākārena paccuppannasukhatādiākārena yo yo ariyamaggo

samathena yojetuṃ sambhavati, so so ariyamaggo samathena vicayitvā yojayitabbo. Yo yo ariyamaggo vipassanāya yojetuṃ sambhavati, so so ariyamaggo vipassanāya yojayitvā yojayitabboti attho gahetabbo.

“Yehi samathādhiṭṭhānehi vipassanādhammehi yojayitabbo, te samathādhiṭṭhānā vipassanādhammā katamehi dhammehi saṅgahitā”ti pucchitabbattā “**te tīhi dhammehi saṅgahitā aniccatāya dukkhatāya anattatāyā**”ti vuttaṃ, te samathādhiṭṭhānā vipassanādhammā “aniccatāya paññāya dukkhatāya paññāya anattatāya paññāyā”ti tīhi anupassanādhammehi saṅgahitā gaṇhitāti attho. Aniccatādinā saḥcaraṇato anupassanāpaññāpi “aniccatā dukkhatā anattatā”ti vuccati.

“Yo yogī puggalo samathādhiṭṭhānaṃ vipassanaṃ bhāvayamāno hoti, so yogī puggalo kiṃ bhāvayati”ti pucchitabbattā “**so samathavipassanaṃ bhāvayamāno**”tiādi vuttaṃ.

Samathavipassanādīni bhāvayamāno puggalo rāgacarito dosacarito mohacaritoti tividho, “tattha katamo puggalo katamena katamena vimokkhamukhena niyyāti, katamāyaṃ katamāyaṃ sikkhanto, katamaṃ katamaṃ pajahanto, katamaṃ katamaṃ anupagacchanto, katamaṃ katamaṃ parijānanto, katamaṃ katamaṃ pavāhento, katamaṃ katamaṃ niddhunanto, katamaṃ katamaṃ vamento, katamaṃ katamaṃ nibbāpento, katamaṃ katamaṃ uppāṭento, katamaṃ katamaṃ vijaṭento niyyāti”ti pucchitabbattā “**rāgacarito puggalo**”tiādi vuttaṃ. **Aṭṭhakathāyaṃ** pana “idāni yesaṃ puggalānaṃ yattha sikkhantānaṃ visesato niyyānamukhāni, yesaṅca kilesānaṃ paṭipakkhabhūtāni tīṇi vimokkhamukhāni, tehi saddhiṃ tāni dassetuṃ ‘rāgacarito’tiādi vutta’nti vuttaṃ. Tassatthopi **aṭṭhakathāyaṃ** (netti. aṭṭha. 55) vuttoyeva.

“Kasmā tīṇi vimokkhamukhāni bhāvayanto tayo khandhe bhāvayati”ti vattabbattā “**tattha suññatavimokkhamukha**”ntiādi vuttaṃ. **Tatthāti** tesu tīsu vimokkhamukhesu. **Suññatavimokkhamukhaṃ paññākkhandho** anattānupassanāya paññāpadhānattā. **Animittavimokkhamukhaṃ samādhikkhandho** aniccānupassanāya samādhipadhānattā. **Appaṇihitavimokkhamukhaṃ silakkhandho** dukkhānupassanāya silāpadhānattā. Iti tīhi vimokkhamukhehi tiṇṇaṃ khandhānaṃ saṅgahitattā tīṇi vimokkhamukhāni bhāvayanto so yogī puggalo tayo khandhe bhāvayatiyevāti paññāpadhānādibhāvo **aṭṭhakathāyaṃ** (netti. aṭṭha. 55) vutto. **Tayo khandhe bhāvayanto ariyaṃ aṭṭhaṅgikaṃ maggaṃ bhāvayati**. “Kasmā bhāvayati”ti vattabbattā kāraṇaṃ dassetuṃ “**tattha yā**”tiādi vuttaṃ.

Tiṇṇaṃ khandhānaṃ ariyaṭṭhaṅgikamaggabhāvo vibhatto, amhehi ca jānito, “kathaṃ samathavipassanābhāvo jānitabbo”ti vattabbattā tiṇṇaṃ khandhānaṃ samathavipassanābhāvaṃ dassetuṃ “**tattha silakkhandho cā**”tiādi vuttaṃ. “Yo yogī puggalo samathavipassanaṃ bhāveti, tassa yogino puggalassa bhavaṅgāni katamaṃ bhāvanaṃ gacchanti”ti pucchitabbattā “**yo samathavipassanaṃ bhāveti, tassā**”tiādi vuttaṃ. Kāyo ca cittaṅca **dve bhavaṅgāni** upapattibhavassa aṅgāni **bhāvanaṃ** vaḍḍhanaṃ gacchanti. Sīlaṅca samādhī ca **dve padāni** dve padā bhavanirodhagāmini paṭipadā **bhāvanaṃ** vaḍḍhanaṃ gacchanti.

“Kathaṃ gacchanti”ti vattabbattā “**so hoti bhikkhū**”tiādi vuttaṃ. **Bhāvitakāyoti** bhāvito kāyo kāyaābhisamācāriko, kāyasaṃvaro vā yena bhikkhunāti bhāvitakāyo. Sesesupi esa nayo. **Kāye** kāyaābhisamācārike, kāyasaṃvare vā **bhāviyamāne** sati sammākammanto, sammāvāyāmo ca dve dhammā bhāvanaṃ gacchanti kāyasamācārasīlattā. **Sīle** vācāsaṃvaraājīvasaṃvaravasena pavatte sīle **bhāviyamāne** sati sammāvācā ca sammāājīvo ca dve dhammā bhāvanaṃ gacchanti vācādisaṃvarasīlattā. **Citte** cittasaṃvaravasena pavatte citte **bhāviyamāne** sati sammāsati ca sammāsamādhī ca dve dhammā bhāvanaṃ gacchanti cittasaṃvarasīlattā. Paññāya bhāviyamānāya sati sammādiṭṭhi ca sammāsaṅkappo ca dve dhammā bhāvanaṃ gacchanti samānattā, upakārakattā ca. Sammāsaṅkappena hi punappunaṃ saṅkappantassa paññā vaḍḍhatīti.

“Sammākammanto ca sammāvāyāmo ca dve dhammā kāyavaseneva vibhattā vicetabbā kiṃ, udāhu cittavasena vibhattā vicetabbā ki”nti pucchitabbattā “**tattha yo ca sammākammanto**”tiādi vuttaṃ. Kāyasucaritacetanābhūto yo ca sammākammanto, taṃsahito yo ca sammāvāyāmo siyā kāyiko, viratībhūto yo ca sammākammanto, taṃsahito yo ca sammāvāyāmo siyā cetasiko, **tattha** tesu kāyikacetasikabhūtesu sammākammantasammāvāyāmesu **yo** sammākammantasammāvāyāmo kāyasaṅgaho, **so** sammākammantasammāvāyāmo **kāye** kāyāābhisamācārike, kāyasaṃvare vā **bhāvite** sati bhāvanam gacchati. **Yo** sammākammantasammāvāyāmo cittasaṅgaho, **so** sammākammantasammāvāyāmo **citte** cittaṃvare **bhāvite** sati bhāvanam gacchati yojanā.

“Samathavipassanam bhāvayanto so yogī puggalo kittakam adhigamam gacchati”ti vicayitabbattā “**so samathavipassanam bhāvayanto**”tiādi vuttaṃ. Pañcavidham ariyamaggādhigamam dassetuṃ “**khippādhigamo cā**”tiādi vuttaṃ. Tassattho **aṭṭhakathāyam** (netti. aṭṭha. 55) vibhatto. “Kena katamo adhigamo hoti”ti pucchitabbattā “**tattha samathenā**”tiādi vuttaṃ.

56. “Arakkhitena cittenā”tiādisuttattho veneyyānam arahattaphalavimuttimukhena ācariyena vicayito vibhatto, amhehi ca ñāto, “desakassa dasabalasamannāgatassa dasa balāni katham vicayitabbānī”ti pucchitabbattā “**tattha yo desayati, so dasabalasamannāgato**”tiādi vuttaṃ. **Aṭṭhakathāyam** pana –

“Iti mahāthero ‘tasmā rakkhitacittassā’ti gāthāya vasena arahattaphalavimuttimukhena vicayahārasampātam niddisanto, desanākusalatāya anekehi suttappadesehi tassā pubbhāgapaṭipadāya bhāvanāvisesānam bhāvanānisamsānañca vibhajanavasena nānappakārato vicayahāram dassetvā, idāni dasanam tathāgatabalānampi vasena tam dassetuṃ ‘tattha yo desayati’tiādimāhā’”ti –

Vuttaṃ. Tattha **tatthā**ti tesu samathavipassanam bhāvayantesu sāsitabbasāsakesu. Dasabalasamannāgato **yo** desako sathā “arakkhitena cittenā”tiādidhammam deseti, ovādena sāvake na viṣamvādayati, tassa desakassa sathuno dasa balāni vicayitabbānīti yojanā.

“Kinti deseti”ti pucchitabbattā “**so tividha**”ntiādi vuttaṃ. Tesu dasasu tathāgatabalesu ṭhānāṭṭhānaññam paṭhamam tathāgatabalam nāma, “tam balam katham vicayitabba”nti pucchitabbattā “**so tathā ovadito**”tiādi vuttaṃ. Attho **aṭṭhakathāyam** (netti. aṭṭha. 56) vutto, pālivasenapi pākaṭo. “Etam ṭhānam na vijjati”ti jānanam aṭṭhānaññam nāma, “etam ṭhānam vijjati”ti jānanam ṭhānaññam nāmāti ṭhānāṭṭhānaññam jānanaññam paṭhamam tathāgatabalam vicayitabbanti adhippāyo veditabbo. (1)

57. Ṭhānāṭṭhānaññam paṭhamam tathāgatabalam ācariyena vicayitam vibhattam amhehi ca ñātam, “katham sabbatthagāminipaṭipadāññam dutiyatathāgatabalam vicayitabba”nti pucchitabbattā “**iti ṭhānāṭṭhānatā**”ti vuttaṃ. “Ayam paṭipadā imasmiṃ bhava gāminī, ayam paṭipadā imasmiṃ bhava gāminī”ti sabbattha gāminiyā paṭipadāya jānanaññam **sabbatthagāminipaṭipadāññam** nāmāti sabbatthagāminipaṭipadāññam dutiyam tathāgatabalam vicayitabbanti adhippāyo. (2)

59. Sabbatthagāminipaṭipadāññam dutiyam tathāgatabalam ācariyena vicayitam, amhehi ca ñātam, “katham anekadhātunādhātuññam tatiyam tathāgatabalam vicayitabba”nti pucchitabbattā “**iti sabbatthagāminī paṭipadā**”tiādi vuttaṃ. “Ayam dhātu ca ayam dhātu ca **anekadhātu** nāma, ayam dhātu ca ayam dhātu ca **nānādhātu** nāmā”ti anekadhātunādhātunam jānanaññam **anekadhātunādhātuññam** nāmāti anekadhātunādhātuññam tatiyam tathāgatabalam vicayitabbanti. (3)

60. Anekadhātunādhātuññam tatiyam tathāgatabalam ācariyena vicayitam vibhattam, amhehi ca ñātam, “katham sattānam nānādhimuttikatāññam catuttham tathāgatabalam vicayitabba”nti pucchitabbattā “**iti anekadhātunādhātukassa lokassā**”tiādi vuttaṃ. “Ime sattā evam adhimuttā,

ime sattā evaṃ adhimuttā”ti sattānaṃ adhimuccanānaṃ jānanaññaṃ sattānaṃ **nānādhimuttikatāññaṃ** nāmāti sattānaṃ nānādhimuttikatāññaṃ catutthaṃ tathāgatabalaṃ vicayitabbanti. (4)

Sattānaṃ nānādhimuttikatāññaṃ catutthaṃ tathāgatabalaṃ ācariyena vibhattaṃ, amhehi ca ñātaṃ, “kathaṃ vipākavemattatāññaṃ pañcamaṃ tathāgatabalaṃ vicayitabba”nti pucchitabbattā “**iti te yathādhimuttā cā**”tiādi vuttaṃ. “Evaṃ adhimuttānaṃ sattānaṃ idaṃ kammaṃ kaṇhaṃ, imassa kaṇhakammaṃ ayaṃ vipāko. Idaṃ kammaṃ sukkaṃ, imassa sukkakammaṃ ayaṃ vipāko”ti evamādīhi vipākānaṃ nānattajānanaññaṃ **vipākavemattatāññaṃ** nāmāti vipākavemattatāññaṃ pañcamaṃ tathāgatabalaṃ vicayitabbanti.

62. Vipākavemattatāññaṃ pañcamaṃ tathāgatabalaṃ ācariyena vicayitaṃ, amhehi ca ñātaṃ, “kathaṃ jhānānaṃ saṃkilesavodānavuṭṭhānaññaṃ chaṭṭhaṃ tathāgatabalaṃ vicayitabba”nti pucchitabbattā “**iti tathā samādhinnāna**”ntiādi vuttaṃ. “Evaṃ samādhinnānaṃ kammānaṃ jhānānaṃ vimokkhānaṃ samādhīnaṃ samāpattīnaṃ ayaṃ saṃkilesa, idaṃ vodānaṃ, idaṃ vuṭṭhānaṃ, evaṃ saṃkilissati, evaṃ vodāyati, evaṃ vuṭṭhahati”ti jhānānaṃ saṃkilesavodānavuṭṭhānaññaṃ anāvaraṇaññaṃ **jhānānaṃ saṃkilesavodānavuṭṭhānaññaṃ** nāmāti jhānānaṃ saṃkilesavodānavuṭṭhānaññaṃ chaṭṭhaṃ tathāgatabalaṃ vicayitabbanti. (5)

63. Jhānānaṃ saṃkilesaññaṃ chaṭṭhaṃ tathāgatabalaṃ ācariyena vicayitaṃ, “kathaṃ indriyaparopariyattavemattatāññaṃ sattamaṃ tathāgatabalaṃ vicayitabba”nti pucchitabbattā “**iti tasseva samādhissā**”tiādi vuttaṃ. “Evaṃ ādhipateyyaṭṭhena indriyāni, evaṃ akampiyatṭhena balānī”ti jānanena saha “ayaṃ mudindriyo, ayaṃ majjhindriyo, ayaṃ tikkhindriyo”ti parasattānaṃ parapuggalānaṃ indriyabalānaṃ amudumajjhādhimattatājānanaññaṃ amudumajjhādhimattatājānanaññaṃ **indriyaparopariyattavemattatāññaṃ** nāmāti indriyaparopariyattavemattatāññaṃ sattamaṃ tathāgatabalaṃ vicayitabbanti. (6)

64. Indriyaparopariyattaññaṃ sattamaṃ tathāgatabalaṃ ācariyena vicayitaṃ, “kathaṃ pubbenivāsānussatiññaṃ aṭṭhamaṃ tathāgatabalaṃ vicayitabbaṃ, kathaṃ dibbacakkhuññaṃ navamaṃ tathāgatabalaṃ vicayitabba”nti pucchitabbattā “**iti tattha yaṃ anekavihita**”ntiādi vuttaṃ. “Ekaṃ jāti”ntiādinā jātivasena vā “evaṃnāmo”tiādinā nāmagottavaṇṇāhārasukhadukkhaṭṭhapaṭisaṃvedanāya pariyantavasena vā sākārassa sauddesassa anekavihitapubbenivāsassa taṃtaṃbhavassa asesato jānanaññaṃ **pubbenivāsānussatiññaṃ** nāmāti pubbenivāsānussatiññaṃ aṭṭhamaṃ tathāgatabalaṃ vicayitabbanti. (7)

Cavamānaupapajjamānahīnapañītasuvaṇṇadubbaṇṇasugataduggatayathākammūpagānaṃ sattānaṃ asesato cutūpapātānaṃ jānanaññaṃ **dibbacakkhuññaṃ** nāmāti dibbacakkhuññaṃ navamaṃ tathāgatabalaṃ vicayitabbanti. (8-9)

Pubbenivāsādiatṭhamanavamaṃ tathāgatabalaṃ ācariyena vicayitaṃ vibhattaṃ, “kathaṃ sabbāsavakkhayaññaṃ dasamaṃ tathāgatabalaṃ vicayitabba”nti pucchitabbattā “**iti tattha ya**”ntiādi vuttaṃ. Bodhimūle saṃkilesamāraṇaṇaṃ ññaṃ uppannaṃ, idaṃ kilesamāraṇaṇaṃ ññaṃ **sabbāsavakkhayaññaṃ** nāmāti sabbāsavakkhayaññaṃ dasamaṃ tathāgatabalaṃ vicayitabbanti ayaṃ saṅkhepattho. Vitthārato pana pālito ca aṭṭhakathāto ca yatipotānampi pākāto bhavēyyāti maññitvā na dassito.(10)

“Ettakova vicayahārasampāto paripuṇṇo”ti vattabbattā “**niyutto vicayo hārasampāto**”ti vuttaṃ. Ye ye suttappadesatthā vuttā, te te suttappadesatthā yena yena saṃvaṇṇanāvīsesabhūtena vicayahārasampātena vicayitabbā, so so saṃvaṇṇanāvīsesabhūto vicayahārasampāto **niyutto** yathārahaṃ nīharitvā yujjitabboti attho gahetabboti.

Iti vicayahārasampāte sattibalānurūpā racitā

Vibhāvanā niṭṭhitā.

Paṇḍitehi pana...pe... gahetabboti.

3. Yuttihārasampātavibhāvanā

65. Yena yena vicayahārasampātena suttappadesatthā ācariyena vicayitabbā, amhehi ca ñātā, so vicayahārasampāto paripuṇṇo, “katamo yuttihārasampāto”ti pucchitabbattā “**tattha katamo yuttihārasampāto**”tiādi vuttaṃ. **Aṭṭhakathāyaṃ** pana – “evaṃ nānāyehi vicayahārasampātaṃ vitthāretvā idāni yuttihārasampātādīni dassetuṃ ‘tattha katamo yuttihārasampāto’tiādi āraddha’nti (netti. aṭṭha. 65) vuttaṃ. **Tatthāti** tesu desanāhārasampātādīsu soḷasasu hārasampātesu **katamo** saṃvaṇṇanāvīseso **yuttihārasampāto** nāmāti pucchati, pucchitvā yasmiṃ suttappadesa vuttānaṃ atthānaṃ yuttibhāvo vicāretabbo, taṃ suttappadesaṃ nīharituṃ –

“Tasmā rakkhitaṭṭhassa, sammāsaṅkappagocaro;
Sammādiṭṭhipurekkhāro, ñatvāna udayabbayaṃ;
Thinamiddhābhībhū bhikkhu, sabbā duggatiyo jahe”ti. (udā. 32; netti. 31, 78) –

Vuttaṃ. Tassaṃ gāthāyaṃ **tasmā** arakkhitacittassa māravasānugatattā satisaṃvaraindriyasaṃvarādivasena bhikkhu **rakkhitacitto assa** bhaveyya, **tasmā** kāmavitakkādīmicchāsaṅkappagocarassa māravasānugatattā nekkhammasaṅkappādivasena bhikkhu **sammāsaṅkappagocaro assa** bhaveyya, **tasmā** micchādiṭṭhihatacittassa māravasānugatattā yonisomanasikārena bhikkhu udayabbayaṃ ñatvāna **sammādiṭṭhipurekkhāro assa** bhaveyya, **tasmā** thinamiddhena hatacittassa māravasānugatattā vīriyavasena bhikkhu **thinamiddhābhībhū assa** bhaveyya, tādiso bhikkhu sabbā duggatiyo **jahe** jahissatīti attho veditabbo.

“Tassaṃ gāthāyaṃ kathaṃ yuttibhāvo vicāretabbo”ti vattabbattā “**tasmā rakkhitaṭṭhassa**”tiādi vuttaṃ. Rakkhitaṭṭhassa sammāsaṅkappagocaro bhavissatīti attho yujjati eva, no na yujjati. Micchāsaṅkappānampi jahitattā sammādiṭṭhipurekkhāro hutvā viharanto udayabbayaṃ paṭivijjhissatīti attho yujjati sammādiṭṭhipurekkhārassa udayabbayānupassanāsambhavato. Udayabbayaṃ paṭivijjhanto sabbā duggatiyo jahissatīti attho yujjati udayabbayānupassanānukkamena ariyamaggasambhavato. Sabbā duggatiyo jahanto sabbāni duggativinipātabhayāni samatikkamissatīti attho yujjati sabbesaṃ duggativinipātabhayānaṃ anuppajjanato.

“Ettakova yuttihārasampāto paripuṇṇo”ti vattabbattā “**niyutto yuttihārasampāto**”ti vuttaṃ. Yena yena saṃvaṇṇanāvīsesabhūtena yuttihārasampātena suttappadesatthānaṃ yuttibhāvo vicāretabbo, so so saṃvaṇṇanāvīsesabhūto yuttihārasampāto **niyutto** yathārahaṃ niddhāretvā yujjitabboti attho gahetabboti.

Iti yuttihārasampāte sattibalānurūpā racitā

Vibhāvanā niṭṭhitā.

Paṇḍitehi pana...pe... gahetabboti.

4. Padaṭṭhānahārasampātavibhāvanā

66. Yena yena yuttihārasampātena suttappadesatthānaṃ yuttibhāvo ācariyena vibhāvito, amhehi ca

ñāto, so yuttihārasampāto paripuṇṇo, “katamo padaṭṭhānahārasampāto”ti pucchitabbattā “**tattha katamo padaṭṭhāno hārasampāto**”ti pucchati.

Pucchitvā yasmim suttappadesa vuttāni padaṭṭhānāni nīharitāni, taṃ suttappadesaṃ nīharitum “**tasmā rakkhitacittassa, sammāsaṅkappagocaroti gāthā**”ti vuttā. Gāthātho vuttova. “Katame gāthāthā katamesaṃ dhammānaṃ padaṭṭhānāni”ti pucchitabbattā “**tasmā rakkhitacittassā**”tiādi vuttaṃ. “**Tasmā rakkhitacittassā**”ti suttappadesassa atthabhūtā indriyesu guttadvārātā tiṇṇaṃ sucaritānaṃ padaṭṭhānaṃ nāma sucaritapāripūriyā āsanna-kāraṇattā. “**Sammāsaṅkappagocarō**”ti suttappadesassa atthabhūtā nekkhammasaṅkappādayo sammāsaṅkappā samathassa padaṭṭhānaṃ nāma kāmaccandaadinīvaraṇavikkhambhanassa āsanna-kāraṇattā. “**Sammādiṭṭhipurekkhāro**”ti suttappadesassa atthabhūtā kammassakatāsammādiṭṭhi ca sappaccayanāmarūpadassanasammādiṭṭhi ca vipassanāya padaṭṭhānaṃ nāma aniccānupassanādīnaṃ viśesakāraṇattā. “**Ñatvāna udayabbaya**”nti suttappadesassa atthabhūtā udayabbayānupassanāpaññā dassanabhūmiyā padaṭṭhānaṃ nāma paṭhamamaggādhiḡamaṃ āsanna-kāraṇattā. “**Thinamiddhābhībhū bhikkhū**”ti suttappadesassa atthabhūtaṃ thinamiddhābhībhavanaṃ vīriyassa padaṭṭhānaṃ nāma āsanna-kāraṇattā. “**Sabbā duggatiyo jahe**”ti suttappadesassa atthabhūtā pahātabbajahanabhāvanāya ariyamaggabhāvanāya padaṭṭhānaṃ nāma pahātabbappahānena ariyamaggabhāvanāpāripūrisambhavato.

“Ettakova padaṭṭhānahārasampāto paripuṇṇo”ti vattabbattā “**niyutto padaṭṭhāno hārasampāto**”ti vuttaṃ. Yena yena saṃvaṇṇanāvīśesabhūtena padaṭṭhānahārasampātabhūtena suttappadesatthāni padaṭṭhānāni nīharitāni, so so saṃvaṇṇanāvīśesabhūto padaṭṭhānahārasampāto **niyutto** yathārahaṃ niddhāretvā yujjitabboti attho gahetabboti.

Iti padaṭṭhānahārasampāte sattibalānurūpā racitā

Vibhāvanā niṭṭhitā.

Paṇḍitehi pana...pe... gahetabboti.

5. Lakkhaṇahārasampātavibhāvanā

67. Yena yena padaṭṭhānahārasampātena suttappadesatthāni padaṭṭhānāni ācariyena niddhāritāni, amhehi ca ñātāni, so padaṭṭhānahārasampāto paripuṇṇo, “katamo lakkhaṇahārasampāto”ti pucchitabbattā “**tattha katamo lakkhaṇo hārasampāto**”tiādi vuttaṃ. **Tattha** tesu desanāhārasampātādīsu soḷasasu hārasampātesu **katamo** saṃvaṇṇanāvīśeso **lakkhaṇahārasampāto** nāmāti pucchati.

“Katamehi suttatthehi samānalakkhaṇā katame dhammā gahitā”ti pucchitabbattā “**tasmā**”tiādi vuttaṃ. “**Tasmā rakkhitacittassa, sammāsaṅkappagocarō**”ti suttappadesena vuttaṃ **idaṃ** rakkhaṇaṃ satindriyaṃ gahitaṃ, satindriye gahite saddhādīpañcīndriyāni gahitāni bhavanti indriyatthēna samānalakkhaṇattā. “**Sammādiṭṭhipurekkhāro**”ti suttappadesena vuttā sammādiṭṭhi gahitā, sammādiṭṭhiyā gahitāya ariyo atṭhaṅgiko maggo gahito bhavati. **Taṃ kissa hetūti** kāraṇaṃ pucchati. Pucchitvā kāraṇamāha “**sammādiṭṭhito hi**”tiādinā. Sammādiṭṭhihetuto sammāsaṅkappo **hi** yasmā pabhavati, tasmā, sammāsaṅkappato sammāvācā **hi** yasmā pabhavati, tasmā, sammāvācāto sammākammanto **hi** yasmā pabhavati, tasmā, sammākammantato sammāājīvo **hi** yasmā pabhavati, tasmā, sammāājīvato sammāvāyāmo **hi** yasmā pabhavati, tasmā, sammāvāyāmato sammāsati**hi** yasmā pabhavati, tasmā, sammāsati to sammāsamādhi **hi** yasmā pabhavati, tasmā, sammāsamādhitō sammāvimutti **hi** yasmā pabhavati, tasmā, sammāvimuttitō sammāvimuttīñānadassanaṃ **hi** yasmā pabhavati, tasmā, ariyo atṭhaṅgiko maggo gahito bhavati.

“Ettakova lakkhaṇahārasampāto paripuṇṇo”ti vattabbattā “**niyutto lakkhaṇo hārasampāto**”ti

vuttaṃ. Yena yena saṃvaṇṇanāvisesabhūtena lakkhaṇahārasampātena suttappadesatthā samānalakkhaṇena gahitā bhavanti, so so saṃvaṇṇanāvisesabhūto lakkhaṇahārasampāto **niyutto** yathārahaṃ niddhāretvā yujjitabboti attho gahitoti.

Iti lakkhaṇahārasampāte sattibalānurūpā racitā

Vibhāvanā niṭṭhitā.

Paṇḍitehi pana...pe... gahetabboti.

6. Catubyūhahārasampātavibhāvanā

68. Yena yena lakkhaṇahārasampātena suttappadesatthā samānalakkhaṇena gahitā, so lakkhaṇahārasampāto paripuṇṇo, “katamo catubyūhahārasampāto”ti pucchitabbatā “**tattha katamo catubyūho hārasampāto**”tiādi vuttaṃ. **Tattha** tesu desanāhārasampātādīsu soḷasasu hārasampātesu **katamo** saṃvaṇṇanāviseso **catubyūhahārasampāto** nāmāti pucchati.

“Katamasmimṃ sutte katame nirutyādhippāyanidānapubbāparānusandhayo niddhāritā”ti pucchitabbatā “**tasmā**”tiādi vuttaṃ. “Tasmā rakkhitaṃcittassā”ti suttappadeso “rakkhīyate **rakkhita**”nti niruttiṃ “**paripāliyatī**”ti iminā pariyaṇena dasseti, itisaddassa ādyatthattā “cintetīti **cittaṃ**, attano santānaṃ cinotīti **cittaṃ**, paccayehi citanti **cittaṃ**, cittavicittaṭṭhena **cittaṃ**, cittakaraṇaṭṭhena **cittaṃ**, rakkhitaṃ cittaṃ yassāti **rakkhitacitto**. Sammā saṅkappetīti **sammāsaṅkappo**, gāvo caranti etthāti **gocaro**, gocaro viyāti **gocaro**, sammāsaṅkappo gocaro assāti **sammāsaṅkappagocaro**. Sammā passatīti **sammādiṭṭhi**, sammādiṭṭhi purekkhāro assāti **sammādiṭṭhipurekkhāro**. Jānātīti **ñatvāna**. Udayo ca vayo ca **udayabbayaṃ**. Thinaṅca middhaṅca **thinamiddhaṃ**, abhibhavatīti **abhibhū**, thinamiddhaṃ abhibhūti **thinamiddhābhibhū**. Bhikkhatīti **bhikkhū**”ti niruttipi nīharitā. Tenāha – “iti-saddo ādyattho”ti (netti. aṭṭha. 68). **Esā** vuttappakārā paññatti **nirutti** nāmāti nīharitā.

Idha suttappadeso bhagavato ko adhippāyoti ce puccheyya, **ye** sappurisā sabbāhi **duggatīhi** parimuccitukāmā bhavissanti, **te** sappurisā **dharmacārino** rakkhitaṃcittā bhavissantīti ayaṃ adhippāyo. **Ettha** “tasmā rakkhitaṃcittassā”tiādisuttappadeso bhagavato **adhippāyoti** nīharitabbo.

“Katamaṃ nidāna”nti ce puccheyya, kokāliko sārīputtamoggallānesu theresu cittaṃ arakkhitvā padosayitvā mahāpadumaniraye yasmā upapanno, yasmā bhagavā ca satīarakkhena samannāgato sabbā duggatiyo jahati, tasmā ca sabbā duggatiyo jahitukāmo bhikkhu sappuriso rakkhitaṃcitto assa bhaveyyāti **nidānaṃ** nīharitabbam.

“Katamo pubbāparasandhī”ti ce puccheyya, suttamhi “**satiyā cittaṃ rakkhitaṃ**”nti yaṃ vacanaṃ vuttaṃ, tena pubbavacanaena ayaṃ “tasmā rakkhitaṃcittassa...pe... sabbā duggatiyo jahe”ti suttappadeso anusandhī saṃsandati sametīti **pubbāparānusandhi** niddhāritabboti.

“Ettakova catubyūhahārasampāto paripuṇṇo”ti vattabbatā “**niyutto catubyūho hārasampāto**”ti vuttaṃ. Yena yena saṃvaṇṇanāvisesabhūtena catubyūhahārasampātena nirutyādhippāyanidānapubbāparānusandhi niddhāritabbo, so so saṃvaṇṇanāvisesabhūto catubyūhahārasampāto **niyutto** yathārahaṃ niddhāretvā yujjitabboti attho gahetabboti.

Iti catubyūhahārasampāte sattibalānurūpā racitā

Vibhāvanā niṭṭhitā.

Paṇḍitehi pana...pe... gahetabboti.

7. Āvaṭṭahārasampātavibhāvanā

69. Yena yena catubyūhahārasampātena nirutyādhippāyanidānapubbāparānusandhayo vibhattā, so catubyūhahārasampāto paripuṇṇo, “katamo āvaṭṭahārasampāto”ti pucchitabbattā “**tattha katamo āvaṭṭo hārasampāto**”tiādi vuttaṃ. Tattha **katamo** saṃvaṇṇanāviseso **āvaṭṭahārasampāto** nāmāti pucchati.

“Katame suttatthā katham āvaṭṭetabbā”ti pucchitabbattā “**tasmā**”tiādi vuttaṃ. Nekkhammasaṅkappasaṅkhātasammāsaṅkappabahulo kasiṇādivasena, avihimsāsaṅkappasaṅkhātasammāsaṅkappabahulo mettādivasena adhigatāya cittelkaggatāya cittaṃ ṭhapento saṅkilesato **rakkhitacitto** nāma hoti, “**tasmā rakkhitacittassa, sammāsaṅkappagocaro**”ti iminā rakkhitacitte vutte sati yā ekaggatā āvaṭṭetabbā, sā ayaṃ ekaggatā **samatho**. “**Sammādiṭṭhipurekkhāro**”ti iminā sammādiṭṭhipurekkhāre vutte sati yā paññā āvaṭṭetabbā, sā ayaṃ paññā **vipassanā**. “**Ñatvāna udayabbaya**”nti iminā udayabbayañānasamannāgate vutte sati yā dukkhaparijānanā āvaṭṭetabbā, sā ayaṃ dukkhaparijānanā **dukkhapariññā**. “**Thinamiddhābhībhū bhikkhū**”ti iminā puggalādiṭṭhānena yaṃ thinamiddhābhībhavanam vuttaṃ, idaṃ thinamiddhābhībhavanam **samudayappahānam**. “**Sammā duggatiyo jahe**”ti iminā yo sabbaduggatijahanasaṅkhāto anuppādo vutto, so ayaṃ anuppādo **nirodho**. Iti dukkhapariññāya pariññetabbam dukkhasaccam āvaṭṭetabbam, samudayappahānena pahātabbam samudayasaccam āvaṭṭetabbam, nirodhena nirodhasaccam āvaṭṭetabbam, samathavipassanāhi maggasaccam āvaṭṭetabbanti imāni cattāri saccāni āvaṭṭetabbānti.

“Ettakova āvaṭṭo hārasampāto paripuṇṇo”ti vattabbattā “**niyutto āvaṭṭo hārasampāto**”ti vuttaṃ. Yena yena saṃvaṇṇanāvisesabhūtena āvaṭṭahārasampātena samathādayo āvaṭṭetabbā, so saṃvaṇṇanāvisesabhūto āvaṭṭahārasampāto **niyutto** yathāraham niddhāretvā yujjitabboti attho gahetabboti.

Iti āvaṭṭahārasampāte sattibalānurūpā racitā

Vibhāvanā niṭṭhitā.

Paṇḍitehi pana...pe... gahetabboti.

8. Vibhattihārasampātavibhāvanā

70. Yena yena āvaṭṭahārasampātena suttatthā āvaṭṭetabbā, so āvaṭṭahārasampāto paripuṇṇo, “katamo vibhattihārasampāto”ti pucchitabbattā “**tattha katamo vibhattihārasampāto**”tiādi vuttaṃ. Tattha **katamo** saṃvaṇṇanāviseso **vibhattihārasampāto** nāmāti pucchati.

“Katame suttatthā kattha vibhattā”ti pucchitabbattā “**tasmā rakkhitacittassā**”tiādi vuttaṃ. Yā “tasmā...pe... gocaro”ti gāthā vuttā, tissaṃ gāthāyaṃ vutto kusalapakkho dhammo kusalapakkhena dhammena satisaṃvaro dhammo **niddisitabbo** vibhajitabbo, akusalapakkhena dhammena **niddisitabbo** vibhajitabbo.

Katham? “**Rakkhitacittassā**”ti padena vutto kusalapakkho satisaṃvaro dhammo “cakkhudvārasaṃvaro...pe... manodvārasaṃvaro”ti chabbidhena kusalapakkhena dhammena niddisitabbo vibhajitabbo. “**Sammāsaṅkappo**”ti padena vutto kusalapakkho sammāsaṅkappo dhammo “nekkhammasaṅkappo abyāpāda-saṅkappo avihimsāsaṅkappo”ti tividhena kusalapakkhena dhammena

vibhajitabbo. “**Sammādiṭṭhipurekkhāro**”ti padena vuttā kusalapakkhā dhammajāti “dukkhe ñāṇaṃ, dukkhasamudaye ñāṇaṃ, dukkhanirodhe ñāṇaṃ, dukkhanirodhagāminipaṭipadāya ñāṇaṃ, pubbante ñāṇaṃ, aparante ñāṇaṃ, pubbantāparante ñāṇaṃ, idappaccayatāpaṭiccasamuppannesu dhammesu ñāṇa”nti (dha. sa. 1063) aṭṭhavidhena kusalapakkhena dhammena vibhajitabbā. “**Ñatvāna udayabbaya**”nti padena vuttaṃ kusalapakkhaudayabbayañāṇaṃ dhammajātaṃ paññāsavidhena udayabbayañāṇena kusalapakkhena vibhajitabbaṃ. “**Thinamiddhābhībhū**”ti padena vuttaṃ thinamiddhābhībhavanaṃ kusalapakkhaṃ dhammajātaṃ “sotāpattimaggābhībhavanaṃ sakadāgāmimaggābhībhavanaṃ anāgāmimaggābhībhavanaṃ arahattamaggābhībhavana”nti catubbidhena kusalapakkhena vibhajitabbaṃ.

Satisaṃvaro kusalapakkho “lokiyo satisaṃvaro, lokuttaro satisaṃvaro”ti dubbidhena vibhajitabboti. Lokiyō satisaṃvaro kāmāvacarovāti ekavidhena vibhajitabbo. Lokuttarā satisaṃvaro “dassanabhūmi, bhāvanābhūmi”ti dubbidhena vibhajitabbo. Kāmāvacaro satisaṃvaro “kāyānupassanāsatisaṃvaro vedanānupassanāsatisaṃvaro cittānupassanāsatisaṃvaro dhammānupassanāsatisaṃvaro”ti catubbidhena vibhajitabbo. Lokuttaro satisaṃvaropi tathā catubbidhena vibhajitabbo. Sammāsaṅkappasammādiṭṭhiyopi lokiyalokuttaravasena dubbidhātibhedena vibhajitabbā. Padaṭṭhānenapi padaṭṭhānahārasampāte vuttanayena vibhajitabbā.

Akusalapakkhena “**arakkhītena cītenā**”ti padena vutto asaṃvaro “cakkhuasaṃvaro ...pe... kāyaasaṃvaro, copanakāyaasaṃvaro, vācāsaṃvaro, manoasaṃvaro”ti aṭṭhavidhena vibhajitabbo. “**Micchādiṭṭhihatenā**”ti padena gahito micchāsaṅkappo “kāmavitakko byāpādavitaṅko vihiṃsāvitaṅko”ti tividhena vibhajitabbo. “**Micchādiṭṭhi**”ti padena vuttā micchādiṭṭhi “dukkhe aññāṇaṃ...pe...idappaccayatāpaṭiccasamuppannesu dhammesu aññāṇa”nti aṭṭhavidhena vibhajitabbā, dvāsaṭṭhidīṭṭhividhenapi vibhajitabbā. Thinamiddhaṃ pañcavidhena saṅkhārikavidhena vibhajitabbaṃ.

“Ettakova vibhattihārasampāto paripuṇṇo”ti vattabbattā “**niyutto vibhattihārasampāto**”ti vuttaṃ. Yena yena saṃvaṇṇanāvīsesabhūtena vibhattihārasampātena suttappadesatthā vibhattā, so saṃvaṇṇanāvīsesabhūto vibhattihārasampāto **niyuttoti** yathāraha niddhāretvā yujjitabboti attho gahetabboti.

Iti vibhattihārasampāte sattibalānurūpā racitā

Vibhāvanā niṭṭhitā.

Paṇḍitehi pana...pe... gahetabboti.

9. Parivattanahārasampātavibhāvanā

71. Yena yena vibhattihārasampātena suttappadesatthā vibhattā, so vibhattihārasampāto paripuṇṇo, “katamo parivattanahārasampāto”ti pucchitabbattā “**tattha katamo parivattano hārasampāto**”tiādi vuttaṃ.

“Katame suttappadesatthā kathaṃ parivattetabbā”ti pucchitabbattā “**tasmā**”tiādi vuttaṃ. Yā “tasmā...pe... gocarō”ti gāthā vuttā, tāya gāthāya yā samathavipassanā niddhāritā, tāya samathavipassanāya bhāvītāya akusalānaṃ nirodho **phalaṃ** payojanaṃ hoti, pariññātaṃ dukkhaṃ hoti, samudayo pahīno hoti, maggo bhāvito hotīti parivattetabbo. Paṭipakkhena pana samathavipassanāya abhāvītāya akusalānaṃ anirodho, apariññātaṃ dukkhaṃ, samudayo appahīno, maggo abhāvito hotīti parivattetabbo.

“Ettakova parivattanahārasampāto paripuṇṇo”ti vattabbattā “**niyutto parivattano**

hārasampāto’ti vuttaṃ. Yena yena saṃvaṇṇanāvīsesabhūtena parivattanahārasampātena suttappadesatthā parivattetabbā, so so saṃvaṇṇanāvīsesabhūto parivattanahārasampāto **niyutto** yathārahaṃ nīharitvā yujjitabboti attho gahetabboti.

Iti parivattanahārasampāte sattibalānurūpā racitā

Vibhāvanā niṭṭhitā.

Paṇḍitehi pana...pe... gahetabboti.

10. Vevacanaḥārasampātavibhāvanā

72. Yena yena parivattanahārasampātena suttappadesatthā parivattetabbā, so parivattano hārasampātoti paripuṇṇo, “katamo vevacano hārasampāto”ti pucchitabbattā **“tattha katamo vevacano hārasampāto”**tiādi vuttaṃ.

“Katamesaṃ suttappadesatthānaṃ, suttapadānaṃ vā katamāni vevacanāni”ti pucchitabbattā **“tasmā”**tiādi vuttaṃ. Yā “tasmā...pe... gocaro”ti gāthā vuttā, tāya gāthāya “rakkhitacittassā”ti padena vuttassa cittassa, “rakkhitacittassā”ti ettha **cittassa** padassa vā **“cittaṃ...pe... vijānitatta”**nti yaṃ vacanaṃ vuttaṃ, **idaṃ** vacanaṃ vevacanaṃ, “mānasaṃ hadaya”ntiādivacanampi (dha. sa. 17, 63) cittassa vevacanaṃ. “Sammāsaṅkappagocaro”ti ettha sammāsaṅkappassa **“nekkhammasaṅkappo abyāpādasāṅkappo avihimsāsaṅkappo”**ti yaṃ vacanaṃ vuttaṃ, **idaṃ** vacanaṃ vevacanaṃ, “takko vitakko”tiādi (dha. sa. 7) vacanampi sammāsaṅkappassa vevacanaṃ. “Sammādiṭṭhipurekkhāro”ti ettha sammādiṭṭhipadassa **“sammādiṭṭhi nāma paññasatthaṃ paññākhaggo paññāratanaṃ paññāpatodo paññāpāsādo”**ti yaṃ vacanaṃ vuttaṃ, **idaṃ** vacanaṃ vevacanaṃ, “paññā pajānanā vicayo”tiādi (dha. sa. 16) vacanampi sammādiṭṭhipadassa vevacanaṃ. “Thinaṃ thiyanā thiyitattaṃ cittassa, cittassa akallatā akammaññatā onāho pariyoṇāho antosaṅkoco”ti (dha. sa. 1162-1163) yaṃ vacanaṃ vuttaṃ, **idaṃ** vacanaṃ thinassa vevacanaṃ. “Kāyassa akallatā akammaññatā kāyālasiyaṃ soppaṃ supanā suppitatta”nti (dha. sa. 1163) yaṃ vacanaṃ vuttaṃ, **idaṃ** vacanaṃ middhassa vevacanaṃ. “Bhikkhako bhikkhū”tiādikam (pārā. 45; vibha. 510) yaṃ vacanaṃ vuttaṃ, **idaṃ** vacanaṃ bhikkhupadassa vevacanaṃ. “Duggati apāyo vinipāto vaṭṭadukkhāṃ saṃsāro”tiādikam yaṃ vacanaṃ vuttaṃ, **idaṃ** vacanaṃ duggatipadassa vevacanaṃ. Iti vevacanāni nīharitāni.

“Ettakova vevacanaḥārasampāto paripuṇṇo”ti vattabbattā **“niyutto vevacano hārasampāto”**ti vuttaṃ. Yena yena saṃvaṇṇanāvīsesabhūtena vevacanaḥārasampātena vevacanāni nīharitāni, so so saṃvaṇṇanāvīsesabhūto vevacanaḥārasampāto **niyutto** yathāsambhavaṃ nīharitvā yujjitabboti attho gahitoti.

Iti vevacanaḥārasampāte sattibalānurūpā racitā

Vibhāvanā niṭṭhitā.

Paṇḍitehi pana...pe... gahetabboti.

11. Paññattihārasampātavibhāvanā

73. Yena yena vevacanaḥārasampātena vevacanāni niddhāritāni, so vevacanaḥārasampāto paripuṇṇo, “katamo paññattihārasampāto”ti pucchitabbattā **“tattha katamo paññattihārasampāto”**tiādi vuttaṃ.

“Katamā suttappadesabhūtā paññatti katamesaṃ dhammānaṃ paññattī”ti pucchitabbattā “**tasmā**”tiādi vuttaṃ. “**Tasmā rakkhitacittassā**”ti paññatti satiyā padaṭṭhānassa rakkhitabbassa cittassa paññāpanato satiyā **padaṭṭhānapaññatti** nāma. Satiyā hi rakkhitabbaṃ cittaṃ satiyā padaṭṭhānaṃ adhiṭṭhānaṃ nāma. Tenāha **aṭṭhakathāyaṃ** – “adhiṭṭhahitvā rakkhantiyā satiyā rakkhiyamānaṃ cittaṃ tassā adhiṭṭhānaṃ viya hotī”ti. “**Sammāsaṅkappagocaro**”ti paññatti samathassa bhāvanāya paññāpanato samathassa **bhāvanāpaññatti** nāma. “**Sammādiṭṭhipurekkhāro, ṇatvāna udayabbaya**”nti paññatti dassanabhūmiyā nikkhepassa paññāpanato **nikkhepapaññatti** nāma. “**Thinamidhābhībhū bhikkhū**”ti samudayassa anavasesappahānassa paññāpanato **anavasesappahānapaññatti** nāma. “**Sabbā duggatiyo jahe**”ti paññatti **maggassa** ariyamaggassa bhāvanāya paññāpanato **bhāvanāpaññatti** nāma.

“Ettakova paññattihārasampāto paripuṇṇo”ti vattabbattā “**niyutto paññattihārasampāto**”ti vuttaṃ. Yena yena saṃvaṇṇanāvīsesabhūtena paññattihārasampātena paññattippabhedā niddhāritā, so so saṃvaṇṇanāvīsesabhūto paññattihārasampāto **niyutto** yathārahaṃ niddhāretvā yujjitabboti attho gahetabboti.

Iti paññattihārasampāte sattibalānurūpā racitā

Vibhāvanā niṭṭhitā.

Paṇḍitehi pana...pe... gahetabboti.

12. Otaṇaḥārasampātavibhāvanā

74. Yena yena paññattihārasampātena paññattippabhedā niddhāritā, so paññattihārasampāto paripuṇṇo, “katamo otaṇo hārasampāto”ti pucchitabbattā “**tattha katamo otaṇo hārasampāto**”tiādimāha.

“Tattha tissaṃ gāthāyaṃ katamāni indriyāni niddhāretvā katamehi niddhāritehi dhammehi otaṇatī”ti pucchitabbattā “**tasmā**”tiādi vuttaṃ. Yā “tasmā rakkhitacittassā”tiādigāthā vuttā, tissaṃ gāthāyaṃ “**tasmā...pe... purekkhāro**”ti suttappadesena sammādiṭṭhi gahitā, sammādiṭṭhiyā gahitāya **pañcindriyāni** saddhādipaṅcindriyāni gahitāni bhavanti.

Tāniyeva saddhādipaṅcindriyāni vijjāya upakārattā vā padaṭṭhānattā vā **vijjā** bhavanti, **vijjuppādā** tādisāya vijjāya uppādā uppādahetuto avijjānirodho sambhavati, avijjānirodhā saṅkhāranirodho **sambhavati...pe... jātinirodhā jarāmaṇanirodho sambhavatīti**. **Ayaṃ** otaṇā paṅcicasamuppādena paṅcindriyānaṃ otaṇā nāma.

Tāniyeva paṅcindriyāni sīlakkhandhena samādhikkhandhena paññākkhandhena tīhi khandhehi saṅgahitāni bhavanti saddhāvīriyehi sīlasambhavato, satiyā ca paññānuvattakattā. **Ayaṃ** otaṇā khandhehi paṅcindriyānaṃ otaṇā nāma.

Tāniyeva paṅcindriyāni saṅkhārapariyāpannāni bhavanti. Ye saṅkhārā anāsavā bhavanti, **bhavaṅgā** bhavahetū no bhavanti, **te** anāsavā saṅkhārā dhammadhātusaṅgahitā bhavanti dhammadhātuyā antogadhattā. **Ayaṃ** otaṇā dhātūhi paṅcindriyānaṃ otaṇā nāma.

Sā anāsavā dhammadhātu dhammāyatanapariyāpannā bhavati, yaṃ āyatanaṃ anāsavaṃ bhavati, **bhavaṅgaṃ** bhavahetu no bhavati. **Ayaṃ** otaṇā āyatanehi dhammadhātuyā otaṇā nāma.

“Ettakova otaṇo hārasampāto paripuṇṇo”ti vattabbattā “**niyutto otaṇo hārasampāto**”ti

vuttaṃ. Yena yena saṃvaṇṇanāvīsesabhūtena otaraṇahārasampātena suttaṃpadesatthā otaritabbā, so so saṃvaṇṇanāvīsesabhūto otaraṇo hārasampāto **niyutto** yathārahaṃ niddhāretvā yujjitabboti attho gahetabboti.

Iti otaraṇahārasampāte sattibalānurūpā racitā

Vibhāvanā niṭṭhitā.

Paṇḍitehi pana...pe... gahetabboti.

Ito paṭṭhāya “tattha katamo” tiādiānusandhyattho ca pariyosāne “niyutto” tiādiānusandhyattho ca vuttanayānusāreneva viññātabbo. Katthaci katthaci pāṭhe apākaṭaṃyeva yathābalaṃ kathayissāma.

13. Sodhanahārasampātavibhāvanā

75. **Yatthāti** yasmim pañhe. **Ārambho** attho **suddho** paripuṇṇo, so pañho niravasesato vissajjito bhavati. **Yattha** pañhe pana **ārambho** attho **na suddho** aparipuṇṇo koci vissajjetabbo avasiṭṭho, so pañho tāva vissajjito na bhavati.

15. Parikkhārahārasampātavibhāvanā

77. “**Tasmā rakkhītacittassā**” ti padena yo satsaṃvaro vutto, ayaṃ satsaṃvaro samathassa parikkhāro. “**Sammāsaṅkappagocaro**” ti padena yo sammāsaṅkappo vutto, so sammāsaṅkappo vipassanāya parikkhāroti vibhajitvā yojetabbo.

16. Samāropanahārasampātavibhāvanā

78. “**Tasmā rakkhītacittassā**” ti padena yaṃ rakkhītacittaṃ vuttaṃ, taṃ rakkhītacittaṃ tiṇṇaṃ **sucaritānaṃ** kammānaṃ padaṭṭhānaṃ. Sammādiṭṭhiyā bhāvitāya ariyo aṭṭhaṅgiko maggo bhāvito bhavati ekato bhāvitabbattā, padaṭṭhānakāraṇatā ca. Tena vuttaṃ – “**sammādiṭṭhito hi**” tiādi. Yassa arahato samādhivimutti bhavati, ayaṃ arahā **anupādiseso puggalo**, ayaṃ samādhivimutti **anupādisesā nibbānadhātu**.

“Desanāhārasampāṭadiko hārasampāto yena soḷasappabhedabhāvena suttaṃpadesatthe niddhāretvā yujjito, soḷasappabhedabhāvo kena amhehi saddahitabbo” ti vattabbattā “**tenāhā**” tiādi vuttaṃ. **Tena** soḷasappabhedabhāvena āyasmā mahākaccāno “**soḷasa...pe... sutta**” nti yaṃ vacanaṃ āha, tena vacanena soḷasappabhedabhāvo tumhehi saddahitabbo.

“Ettakova hārasampāto paripuṇṇo” ti vattabbattā “**niyutto hārasampāto**” ti vuttaṃ. Yena yena saṃvaṇṇanāvīsesabhūtena desanāhārasampātena suttaṃpadesatthā niddhāritā, so so saṃvaṇṇanāvīsesabhūto desanāhārasampāṭadihārasampāto **niyutto** yathārahaṃ niddhāretvā yujjitabboti attho gahetabbo, **aṭṭhakathāya**ñca (netti. aṭṭha. 73, 76) tathā niddhāretvā yujjitoti.

Iti desanāhārasampāṭadihārasampāte sattibalānurūpā

Racitā vibhāvanā niṭṭhitā.

Paṇḍitehi pana aṭṭhakathāṭikānusārena gambhīrattho vitthārato vibhajitvā gahetabboti.

Nayasamuṭṭhānavibhāvanā

79. Yena yena saṃvaṇṇanāvīsesabhūtena desanāhārasampātādinā hārasampātena ekasuttappadesatthā niddhāretvā vibhattā, so saṃvaṇṇanāvīsesabhūto desanāhārasampātādihārasampāto paripuṇṇo, “katamaṃ nayasamuṭṭhāna”nti pucchitabbattā **“tattha katamaṃ nayasamuṭṭhāna”**ntiādi āradhama. **Aṭṭhakathāyaṃ** pana –“evaṃ nānāsuttavasena, ekasuttavasena ca hāravīcāraṃ dassetvā idāni nayavīcāraṃ dassetuṃ ‘tattha katamaṃ nayasamuṭṭhāna’ntiādi āradhā”nti (netti. aṭṭha. 79) vuttaṃ. “Tattha katamo nandiyāvaṭṭanayo”tiādiṃ anārabhitvā “tattha katamaṃ nayasamuṭṭhāna”ntiādiārambhane kāraṇaṃ **aṭṭhakathāyaṃ** vuttameva. Tattha **tatthāti** tesu hārādīsu yo atthanayo saṃvaṇṇanāyena niddiṭṭho, tasseva atthanayassa samuṭṭhānaṃ bhūmiṃ pucchati **“katamaṃ nayasamuṭṭhāna”**nti.

Kiñcāpi saṃvaṇṇanāyā niddiṭṭhā, tathāpi atthanayasamvaṇṇanāyānaṃ vīsesassa pākāṭaṃ kātuṃ puna kathayissāma. Taṇhāvijjāhi saṃkilesapakkhassa suttatthassa catusaccayojanamukhena nayanalakkhaṇo saṃvaṇṇanāvīseso ceva samathavipassanāhi vodānapakkhassa suttatthassa catusaccayojanamukhena nayanalakkhaṇo saṃvaṇṇanāvīseso ca **nandiyāvatto nayo** nāma. Tīhi akusalamūlehi lobhādīhi saṃkilesapakkhassa suttatthassa catusaccayojanamukhena nayanalakkhaṇo saṃvaṇṇanāvīseso ceva tīhi kusalamūlehi alobhādīhi vodānapakkhassa suttatthassa catusaccayojanamukhena nayanalakkhaṇo saṃvaṇṇanāvīseso ca **tipukkhalo nayo** nāma. Catūhi subhasaññādīhi vipallāsehi sakalasaṃkilesapakkhassa suttatthassa catusaccayojanamukhena nayanalakkhaṇo saṃvaṇṇanāvīseso ceva catūhi asubhasaññādīhi avipallāsehi satipaṭṭhānehi, saddhindriyehi vā vodānapakkhassa suttatthassa catusaccayojanamukhena nayanalakkhaṇo saṃvaṇṇanāvīseso ca **sīhavikkīlito nayo** nāmāti vuttā nayā **saṃvaṇṇanāyā** nāma. Tesam saṃvaṇṇanāyānaṃ samuṭṭhānaṃ pucchati “katamaṃ nayasamuṭṭhāna”nti.

Nayā pana nānāsuttato niddhāritehi taṇhāvijjādīhi mūlapadehi catusaccayojanāya nayato anubujjhiyamāno dukkhādiattho. So hi maggañānaṃ nayati sampāpetīti **“nayo”**ti vutto, so **atthanayo** nāma. Tasseva atthanayassa samuṭṭhānaṃ pucchati “katamaṃ nayasamuṭṭhāna”nti? Tasmā catusaccayojanāya nayaggāhato nīyati anupucchīyatīti **nayo**, ko so? Suttatthabhūto dukkhādiko attho. Nayati maggañānaṃ pāpetīti vā **nayo**, dukkhādiko atthova. Tenāha – “anubujjhiyamāno dukkhādiattho. So hi maggañānaṃ nayati sampāpetīti nayo”ti (netti. aṭṭha. 79). Samuṭṭhahanti nayā etenāti **samuṭṭhānaṃ**, kiṃ taṃ? Avijjātaṇhādikāraṇaṃ, taṃdīpanā saṃvaṇṇanā ca. Avijjātaṇhādinā hi dukkhādiatthanayā sambhavanti. Atha vā avijjātaṇhādīhi catusaccayojanā **samuṭṭhānaṃ** nāma. Tena vuttaṃ – “kiṃ pana taṃ? Taṃtaṃmūlapadehi catusaccayojanā”ti (netti. aṭṭha. 79). Evaṃ atthe gayhamāne sati saṃvaṇṇanāyāpi gahitā honti, nayānaṃ samuṭṭhānaṃ **nayasamuṭṭhānaṃ**, tasmīṃ nayasamuṭṭhāne.

“Katamaṃ nandiyāvaṭṭanayasamuṭṭhāna”nti pucchitabbattā paṭhamam nandiyāvaṭṭanayasamuṭṭhānaṃ dassetuṃ **“pubbā koṭi na paññāyati”**tiādi vuttaṃ. Nandiyāvaṭṭanayasamuṭṭhānabhūtāya avijjāya ca taṇhāya ca pubbā koṭi “asukassa buddhassa bhagavato uppajjanakāle uppannā, asukassa cakkavattino uppajjanakāle uppannā”ti na paññāyati koṭiyā abhāvatoti yojanā. “Avijjātaṇhāsu katamā nīvaraṇaṃ, katamā saṃyojana”nti pucchitabbattā **“tattha avijjā nīvaraṇaṃ taṇhā saṃyojana”**nti vuttaṃ. **Tatthāti** tāsu avijjātaṇhāsu. Ādīnavapaṭicchādikattā **avijjā nīvaraṇaṃ**. Bhavesu saṃyojanato **taṇhā saṃyojanaṃ**. “Avijjānīvaraṇā sattā kathaṃ vicaranti, kathaṃ vuccanti, taṇhāsaṃyojanā sattā kathaṃ vicaranti kathaṃ vuccanti”ti pucchitabbattā **“avijjānīvaraṇā sattā”**tiādi vuttaṃ. Avijjānīvaraṇametesamattāhi **avijjānīvaraṇā**. Avijjāya saṃyuttā viya pavattā avijjāya abhinivisavattāsu saṃyuttā viya pavattā sattā **avijjāpakkhena** vipallāseṇa niccādiabhinivesavattābhūte rūpādiārammaṇe **vicaranti** vividhā caranti pavattanti, **te** niccādiabhinivisantā vicarantā sattā **“diṭṭhacaritā”**ti vuccanti. Taṇhāsaṃyojanametesanti **taṇhāsaṃyojanā**. Taṇhāya saṃyuttā viya pavattā, taṇhāya vā ārammaṇabhūte vatthukāme saṃyuttā viya pavattā sattā **taṇhāpakkhena** aṭṭhasatataṇhāvīcaritena ārammaṇabhūte vatthusmiṃ **vicaranti** pavattantīti attho.

“Dīṭṭhīcaritā sattā kaṃ paṭipattim anuyuttā viharanti, taṇhācaritā sattā kaṃ paṭipattim anuyuttā viharanti”ti pucchitabbattā “**dīṭṭhīcaritā**”tiādi vuttam. Dīṭṭhīcaritā sattā **ito** sāsanato bahiddhā pabbajitā hontāpi “sukhena adhigantabbaṃ sukhaṃ natthi, dukkhena adhigantabbaṃ sukhaṃ pana atthi”ti manasi karontā attakilamathānuyogaṃ pañcātapādiṭṭhīcaritā anuyuttā viharanti. Taṇhācaritā sattā **ito** sāsanato bahiddhā pabbajitā hontāpi “kāme paṭisevantaṃ lokaṃ vaḍḍhāpentā bahum puññaṃ vaḍḍhāpentī”ti manasi karontā kāmesu kāmasukhallikānuyogaṃ paṭipattim anuyuttā viharanti.

“Kasmā dīṭṭhīcaritā tathāvidhaṃ paṭipattim anuyuttā viharanti, kasmā taṇhācaritā tathāvidhaṃ paṭipattim anuyuttā viharanti”ti pucchitabbattā “**tattha kiṃ kāraṇa**”ntiādi vuttam. **Tatthāti** tattha tesu dīṭṭhīcaritātaṇhācaritesu. **Yaṃ** yasmā kāraṇā viharanti, taṃ kāraṇaṃ kinti pucchati. **Itto** sāsanato bahiddhā yesaṃ puggalānaṃ saccavavattānaṃ natthi, catusaccappakāsanā kuto ca atthi, samathavipassanākosallaṃ vā upasamasukhappatti vā kuto atthi, **te** puggalā upasamasukhassa anabhiññā viparītacetā hutvā evaṃ āhaṃsu “sukhena adhigantabbaṃ sukhaṃ natthi, dukkhena adhigantabbaṃ sukhaṃ nāma atthi”ti. Te evaṃsaññī evaṃdīṭṭhī dukkhena sukhaṃ patthayamānā hutvā attakilamathānuyogamanuyuttā viharanti. **Itto** sāsanato bahiddhā yesaṃ puggalānaṃ saccavavattānaṃ natthi, catusaccappakāsanā kuto ca atthi, samathavipassanākosallaṃ vā upasamasukhappatti vā kuto atthi, **te** puggalā upasamasukhassa anabhiññā viparītacetā hutvā evaṃāhaṃsu “yo kāme paṭisevati, so lokaṃ vaḍḍhayati, yo lokaṃ vaḍḍhayati, so bahum puññaṃ pasavati”ti. Te evaṃsaññī evaṃdīṭṭhī kāmesu sukhasaññī hutvā kāmasukhallikānuyogaṃ anuyuttā ca viharantīti yojanā kātabbā.

“Tathā viharantā kiṃ vaḍḍhayanti”ti pucchitabbattā “**te tadabhiññā santā rogameva vaḍḍhayanti**”ti vuttam. “Tathā vaḍḍhayantā rogādīnaṃ bhesajjaṃ samathavipassanaṃ vaḍḍhayanti ki”nti pucchitabbattā “**te rogābhitunnā gaṇḍapaṭipīlītā sallānuviddhā nirayatiracchānayanipetāsuresu ummujjanimujjāni karontā ugghātanigghātaṃ paccanubhontā rogagaṇḍasallabhesajjaṃ na vindanti**”ti vuttam. Atho pana **aṭṭhakathāyaṃ** (netti. aṭṭha. 79) vutto. “Katame saṃkilesavodānā, katame rogādayo, katamaṃ bhesajja”nti pucchitabbattā “**tattha attakilamathānuyogo**”tiādi vuttam. **Tatthāti** tesu saṃkilesavodānarogabhesajjādīsu. Attakilamathānuyogo ca kāmasukhallikānuyogo ca **saṃkilesa** hoti, samathavipassanā **vodānaṃ** hoti, attakilamathānuyogo ca **rogo** hoti, samathavipassanā **roganigghātakabhesajjaṃ**...pe... samathavipassanā **salluddhāraṇabhesajjaṃ** hoti.

“Katamo katamaṃ sacca”nti pucchitabbattā “**tattha saṃkilesa dukkha**”ntiādi vuttam. **Tatthāti** tesu saṃkilesādīsu saṃkilesa ekadesavasena **dukkhaṃ** dukkhasaccaṃ hoti. **Tadabhisāṅgoti** tasmim saṃkilesa abhisāṅgo viya pavatto lokiyadhammo niravasesavasena dukkhasaccaṃ hoti. Atha vā tasmim dukkhe abhisāṅgo viya pavattā taṇhā **dukkhasamudayo** samudayasaccaṃ hoti. Taṇhānirodho **dukkhanirodho** nirodhasaccaṃ hoti. Samathavipassanā dukkhanirodhagāminī paṭipadā maggasaccaṃ hoti. Imāni cattāri saccāni niddhāretvā yojetabbāni. “Tesu catūsu saccesu katamaṃ pariññeyyaṃ, katamo pahātabbo, katamo bhāvetabbo, katamo sacchikātabbo”ti pucchitabbattā “**dukkhaṃ pariññeyya**”ntiādi vuttam.

80. Dīṭṭhīcaritātaṇhācaritānaṃ attakilamathānuyogādivasena cattāri saccāni niddhāritāni, “kathaṃ dīṭṭhīcaritātaṇhācaritānaṃ sakkāyadassane pavattibhedavasena cattāri saccāni niddhāritāni”ti pucchitabbattā “**tattha dīṭṭhīcaritā**”tiādi vuttam. Atha vā “dīṭṭhīcaritātaṇhācaritānaṃ sakkāyadassane katamo pavattibhedo”ti pucchitabbattā imesaṃ sakkāyadassane ayaṃ pavattibhedoti vibhajivā dassetuṃ “**tattha dīṭṭhīcaritā**”tiādi vuttam. Tena vuttam – “idāni dīṭṭhīcaritātaṇhācaritānaṃ sakkāyadīṭṭhīdassane pavattibhedam dassetuṃ ‘dīṭṭhīcaritā’tiādi vutta”nti. **Tatthāti** tesu dīṭṭhīcaritātaṇhācaritesu. **Dīṭṭhīcaritā** puggalā **rūpaṃ** “attā”ti attato upagacchanti...pe... **viññānaṃ** “attā”ti attato upagacchanti dīṭṭhīcaritānaṃ attābhīnivesassa balavabhāvato, taṇhācaritā pana rūpaṃ vā “attā”ti **rūpavantaṃ attānaṃ** upagacchanti **attani vā rūpaṃ, rūpasmim vā** “attā”ti **attānaṃ** upagacchanti...pe... **viññānasmim vā** “attā”ti attānaṃ upagacchanti taṇhācaritānaṃ attaniyābhīnivesassa balavabhāvato. Pañcasu upādānakkhandhesu ekekaṃ nissāya catubbidhattā

vīsativatthukā ayam micchādiṭṭhi “sakkāyadiṭṭhī”ti vuccati. Evaṃ diṭṭhicaritatanhācaritānaṃ sakkāyadassane pavattibhedo viññātabboti attho.

“Sakkāyadiṭṭhiyā katamo paṭipakkho”ti pucchitabbattā **“tassā paṭipakkho”**tiādi vuttaṃ. Tassā sakkāyadiṭṭhiyā pajahanavasena lokuttarā sammādiṭṭhi paṭipakkho, tassā sammādiṭṭhiyā **anvāyikā** anugunabhāvena pavattanakā dhammā ca sakkāyadiṭṭhiyā pajahanavasena paṭipakkhā bhavanti. “Katame dhammā anvāyikā”ti pucchitabbattā **“sammāsaṅkappo”**tiādi vuttaṃ. Sammāsaṅkappo... pe... sammāsamādhi ime dhammā anvāyikā honti. **Ayam** sammādiṭṭhiādiko ariyo aṭṭhaṅgiko maggo tassā sakkāyadiṭṭhiyā paṭipakkho hoti pahāyakattā. “Te sammādiṭṭhiyādayo dhammā khandhato kittakā hontī”ti pucchitabbattā **“te tayo khandhā”**tiādi vuttaṃ. “Katamo khandho samatho, katamo khandho vipassanā”ti pucchitabbattā **“sīlakkhandho samādhikkhandho ca samatho, paññākkhandho vipassanā”**ti vuttaṃ. “Sakkāyādīsu katamo katamaṃ saccaṃ, katamo katamaṃ sacca”nti pucchitabbattā **“tattha sakkāyo”**tiādi vuttaṃ.

“Diṭṭhicaritatanhācaritānaṃ sakkāyadiṭṭhitappaṭipakkhavasena cattāri saccāni niddhāritāni, kathaṃ antadvayamajjhimaṭṭipadā niddhāritā”ti vattabbattā **“tattha ye rūpaṃ attato”**tiādi vuttaṃ. **Tatthā** tesu diṭṭhicaritatanhācaritesu **ye** diṭṭhicaritā puggalā **rūpaṃ** “attā”ti attato upagacchanti...pe... **viññānaṃ** “attā”ti attato upagacchanti. **Ime** diṭṭhicaritā puggalā “rūpādayo ca attā, rūpādīnaṃ aniccattā, attassāpi aniccattā attā ucchijjati, attā vinassati, attā paraṃ maraṇā na hotī”ti abhinivisanato **“ucchedavādino”**ti vuccanti. **Ye** tanhācaritā puggalā rūpaṃ vā “attā”ti **rūpavantaṃ** attānaṃ upagacchanti...pe... viññānaṃ vā “attā”ti **viññānavantaṃ** attānaṃ upagacchanti. Attāni vā viññānaṃ, viññānaṃsmiṃ vā attānaṃ upagacchanti. **Ime** tanhācaritā puggalā “rūpādīhi attā añño aññattā attā nicco sassato”ti abhinivisanato **“sassatavādino”**ti vuccanti.

Tattha tesu ucchedavādīsassatavādīpuggalesu pavattā ucchedavādasassatavādā **ubho antā** antadvayaṭṭipadā honti. **Ayam** antadvayaṭṭipadā saṃsārapavattanassa hetubhāvato **saṃsārapavatti** hoti, **tassa** antadvayassa paṭipajjanassa pajahanavasena majjhimaṭṭipadāsaṅkhātova ariyo aṭṭhaṅgiko maggo paṭipakkho hoti pahāyakattā. **Ayam** maggo saṃsāranivattanassa hetubhāvato **saṃsāranivatti** hoti. **Tattha** saṃsārapavattisaṃsāranivattīsu **pavatti** saṃsārapavatti **dukkhaṃ** dukkhasaccaṃ, **tadabhisāṅgo** tasmim dukkhe abhisāṅgo tanhā **samudayo** samudayasaccaṃ, tanhānirodho **dukkhanirodho** nirodhasaccaṃ, ariyo aṭṭhaṅgiko **maggo** dukkhanirodhagāminī ṭṭipadā maggasaccaṃ, iti imāni cattāri saccāni niddhāritāni. **“Dukkhaṃ pariññeyya”**ntiādimhi vuttanayova attho.

“Ucchedasassatassa kittako pabhedo, maggassa kittako”ti pucchitabbattā **“tattha ucchedasassata”**ntiādi vuttaṃ. **Tattha** ucchedasassataariyamaggesu ucchedasassatadassanaṃ **samāsato** saṅkhepato vīsativatthukā sakkāyadiṭṭhi. Ucchedo pañcupādānakkhandhe nissāya pavattattā pañcavidho, sassatadassanaṃ ekekasmim tidhā uppajjanato pannarasavidhanti vīsatividhaṃ hoti. **Vitthārato dvāsaṭṭhi diṭṭhigatāni**. Katamāni? Cattāro sassatavādā, cattāro ekaccasassatavādā, cattāro antānantavādā, cattāro amarāvikkhepavādā, dve adhiccasamuppannavādā, soḷasa saññivādā, aṭṭha asaññivādā, aṭṭha nevasaññināsaññivādā, satta ucchedavādā, pañca diṭṭhadhammanibbānavādāti dvāsaṭṭhi diṭṭhigatāni veditabbāni. Vitthārato pana **brahmajālasutte** (dī. ni. 1.30 ādayo) āgatāni. **Tesaṃ** ucchedasassatadassanānaṃ tecattālīsaṃ bodhipakkhiyadhammā paṭipakkho maggo. Katame tecattālīsaṃ? “Aniccasaññā dukkhasaññā anattasaññā”ti tisso saññā ca “pahānasaññā virāgasaññā nirodhasaññā”ti tisso saññā cāti cha saññā ca “cattāro satipaṭṭhānā, cattāro sammappadhānā, cattāro iddhipādā, pañcendriyāni, pañca balāni, satta bojjhaṅgā, aṭṭha maggaṅgāni”ti tecattālīsaṃ bodhipakkhiyadhammā vipassanāvasena paṭipakkho maggo nāma.

“Samathavasena katamo paṭipakkho”ti vattabbattā **“aṭṭha vimokkhā”**tiādi vuttaṃ. **Aṭṭha vimokkhā pākāṭā**. **Dasa kasiṇāyatanāni** samathavasena paṭipakkho maggo nāma. “Katamaṃ ṇānaṃ katamassa dhammassa padālana”nti pucchitabbattā **“dvāsaṭṭhi diṭṭhigatāni”**tiādi vuttaṃ. Diṭṭhicarite pavattāni **diṭṭhigatāni**, moho. Tanhācarite pavattāni **diṭṭhigatāni**, jālaṃ. **Anādivasena** pavatto moho.

Anidhanavasena pavattaṃ jālaṃ. Aṭṭha samāpattiyo samāpajjitvā tejetvā tikkhaṃ vipassanāñāṇaṅca ariyamaggañāṇaṅcañāṇavajiraṃ nāma bodhipakkhiyadhammānaṃ ñānapadaṭṭhānattā. Moho ca jālaṅca **mohajālaṃ**. Padāletīti **padālanam**, kattari yupaccayo, mohajālassa padālananti **mohajālapadālanam**. Padālanāñhi duvidhaṃ vikkhambhanapadālanam samucchadapadālananti. Pubbhāge samathavipassanāvasena **vikkhambhanapadālanam**, maggakkhaṇe **samucchadapadālanam** eva daṭṭhabbam. **Tatthāti** tasmim mohajāle avijjā moho, bhavataṅhā jālaṃ. Attano ādhāraṃ puggalaṃ dukkhādīsu aṭṭhasu ṭhānesu mohetīti **moho**. Paṭhamam jālaṃ jaṭam layitvā jaṭavasena lāti pavattatīti **jālam**, attani jātam macchasakuṇādikam lāti gaṇhāti, lāpeti gaṇhāpetīti vā **jālam**, jālam viyāti **jālam**. Tena vuttam – “atītādibhedabhinnesu rūpādīsu, sakaattabhāvādīsu ca saṃsibbanavasena pavattanato jālam bhavataṅhā”ti (netti. aṭṭha. 80). “Avijjātaṅhāhi attakilamathānuyogādīnam kilesapakkhānam niddhāraṇam kataṃ kathaṃ kena saddahitabba”nti vattabbattā “**tena vuccati ‘pubbā koṭi na paññāyati avijjāya ca bhavataṅhāya cā’ti’**” vuttam.

81. “Ito sāsanaṭo bahiddhā diṭṭhacaritatanhācaritānam paṭipadādayo niddhāritā, sāsane diṭṭhacaritatanhācaritānam paṭipadādayo kathaṃ niddhāritabbā”ti vattabbattā “saṃkilesapakkhā suttatthā ācariyena dassitā, vodānapakkhasuttatthā kathaṃ dassitabbā”ti vattabbattā vā “**tattha diṭṭhacarito asmiṃ sāsane**”tiādi vuttam. **Tatthāti** tesu diṭṭhacaritatanhācaritesu. **Diṭṭhacarito** puggalo asmiṃ sāsane pabbajito hutvā catūsu paccayesu sallekhanusantatavutti bhavati. Kasmā? Yasmā sallekhe tibbagāraṇo, tasmā sallekhe tibbagāravattā. **Taṅhācarito** puggalo asmiṃ sāsane pabbajito hutvā sikkhānusantatavutti bhavati. Kasmā? Yasmā sikkhāya tibbagāraṇo, tasmā sikkhāya tibbagāravattā. **Diṭṭhacarito** puggalo sammattaniyāmaṃ okkamanto hutvā **dhammānusārī** puggalo bhavati. Kasmā? Diṭṭhiyā diṭṭhivisaye paññāsadisapavattanato. **Taṅhācarito** puggalo sammattaniyāmaṃ okkamanto hutvā saddhānusārī bhavati. Kasmā? Taṅhāvasena micchādhimokkhattā. **Diṭṭhacarito** puggalo sukhāya paṭipadāya, dandhābhiññāya ca niyyāti, sukhāya paṭipadāya, khippābhiññāya ca niyyāti sukhena kilesehi vikkhambhituṃ samatthattā. **Taṅhācarito** puggalo dukkhāya paṭipadāya, dandhābhiññāya ca niyyāti, dukkhāya paṭipadāya, khippābhiññāya ca niyyāti dukkhena kilesehi vikkhambhituṃ samatthattā.

“Tathā kasmā niyyāti”ti pucchitabbattā “**tattha kiṃ kāraṇam ya**”ntiādi vuttam. **Yaṃ** yena kāraṇena niyyāti, taṃ **kāraṇam** kinti pucchati. **Tassa** taṅhācaritassa kāmā sukhena apariccattā **hi** yasmā bhavanti, tasmā kāmānaṃ sukhena apariccattattā tathā niyyāti. **So** taṅhācarito **kāmehi** vatthukāmakilesakāmehi viveciyamāno dukkhena paṭinissarati, dandhaṅca **dhammaṃ** catusaccadhammaṃ ājānāti. **Yo pana ayaṃ** puggalo diṭṭhacarito hoti, so **ayaṃ** diṭṭhacarito puggalo **ādito** ādimhiyeva **kāmehi** kilesakāmavattukāmehi anattiko bhavati. **So** diṭṭhacarito **tato** tehi kāmehi viveciyamāno khippaṅca sukhena paṭinissarati, khippaṅca dhammaṃ ājānāti.

“Taṅhācarito dukkhāya paṭipadāya dandhābhiññāya niyyāti, diṭṭhacarito sukhāya paṭipadāya khippābhiññāya niyyāti ekekāya paṭipadāya bhavitabba”nti vattabbattā “**dukkhāpi paṭipadā duvidhā dandhābhiññā ca khippābhiññā ca, sukhāpi paṭipadā duvidhā dandhābhiññā ca khippābhiññā cā**”ti vuttam. “Evaṃ sati ekova dvīhi dvīhi paṭipadāhi niyyātīti āpajjati”ti vattabbattā “**sattāpi**”tiādi vuttam. Taṅhācaritā sattāpi duvidhā mudindriyāpi tikkhindriyāpi, diṭṭhacaritā sattāpi duvidhā mudindriyāpi tikkhindriyāpīti yojanā kātābbā. **Ye** taṅhācaritadiṭṭhacaritā mudindriyā bhavanti, **te** taṅhācaritadiṭṭhacaritā dandhaṅca paṭinissaranti, dandhaṅca dhammaṃ ājānanti. **Ye** taṅhācaritadiṭṭhacaritā tikkhindriyā bhavanti, **te** taṅhācaritadiṭṭhacaritā khippaṅca paṭinissaranti, khippaṅca dhammaṃ ājānanti, tasmā ekekasseva ekekā paṭipadā yuttāvāti. “Imāhi paṭipadāhi niyyantiyeva, na niyyimṣu niyyissantīti āpajjeyya vattamānavibhattiyā niddiṭṭhattā”ti vattabbattā “**imā catasso**”tiādi vuttam. Atītepi imāhi catūhi paṭipadāhi niyyimṣu, paccuppannesupi niyyanti, anāgatepi niyyissantīti attho gahetabbo yathā “pabbato tiṭṭhati”ti.

Evanti evaṃ vuttappakārena. Ariyapuggalā catukkamaggaṃ paṭipadaṃ paññāpentī. “Kimatthaṃ paññāpentī”ti vattabbattā “**abudhajanasevitāyā**”tiādi vuttam. **Ayaṃ vuccati nandiyāvattassa**

nayassa bhūmīti taṇhāavijjānaṃ vasena saṃkilesapakkhe dvidisā catusaccayojanāpi samathavipassanānaṃ vasena vodānapakkhe dvidisā catusaccayojanāpi dassitā. Ayaṃ catubbidhā catusaccayojanā nandiyāvaṭṭassa nayassa samuṭṭhānaṃ bhūmi samuṭṭhānabhāvatoti. “Tathāvidhāya catusaccayojanāya nandiyāvaṭṭassa nayassa samuṭṭhānabhūmibhāvo kena saddahitabbo”ti vattabbattā “**tenāhā**”tiādi vuttaṃ.

82. “Nandiyāvaṭṭassa nayassa samuṭṭhānabhūtā bhūmi dassitā, tassa nandiyāvaṭṭassa nayassa kattha katamā disā kittakena upaparikkhitabbā”ti vattabbattā “**veyyākaraṇesu hī**”tiādi vuttaṃ. **Hi**-saddo pakkhantaratho. **Ye** disābhūtā āhārādayo dhammā veyyākaraṇesu “kusalākusalā”ti vuttaṃ, **te** disābhūtā āhārādayo dhammā duvidhena “ime akusalā dhammā saṃkilesadhammā, ime kusalā vodānadhammā”ti duvidhena **upaparikkhitabbā** ālocitabbā. “Katamena duvidhenā”ti pucchitabbattā “**lokavaṭṭānusārī ca lokavivaṭṭānusārī cā**”ti vuttaṃ. “Katamaṃ vaṭṭaṃ, katamaṃ vivaṭṭa”nti pucchitabbattā “**vaṭṭaṃ nāma saṃsāro, vivaṭṭaṃ nibbāna**”nti vuttaṃ. “Saṃsārassa katamo hetū”ti pucchitabbattā “**kammakilesā hetu saṃsārassā**”ti vuttaṃ. “Katamaṃ kammaṃ nāma, cetanāyeva kammaṃ nāma kiṃ, udāhu cetasikañca phaladānasamatthāsamatthampi kammaṃ ki”nti pucchitabbattā “**tattha kamma**”ntiādi vuttaṃ. **Tatthā**ti tesu kammakilesesu. “**Taṃ kammaṃ kathaṃ** kena pakārena daṭṭhabba”nti ce vadeyya, yathā yena upacayena katamaṃ kammaṃ phaladānasamatthamaṃ hoti, tasmim upacaye taṃ kammaṃ daṭṭhabbaṃ. “Te kilesā katamehi dhammehi niddisitabbā”ti ce puccheyya, sabbepi kilesā catūhi vipallāsehi niddisitabbā. “Te kilesā kattha daṭṭhabbā”ti ce puccheyya, dasavattuke kilesapuñje te kilesā daṭṭhabbā.

“Katamāni dasa vatthūni”ti ce puccheyya, cattāro āhārā, cattāro vipallāsā, cattāri upādānāni, cattāro yogā, cattāro ganthā, cattāro āsavā, cattāro oghā, cattāro sallā, catasso viññāṇaṭṭhitiyo, cattāri agatigamanānīti dasa vatthūnīti veditabbāni catunnaṃ kiccavasena ekattā. Ettha ca kilesānaṃ paccayo vatthukāmopi kilesopi kilesavatthu hoti purimānaṃ purimānaṃ kilesānaṃ pacchimānaṃ pacchimānaṃ kilesānaṃ paccayabhāvato.

“Katamo katamo katamassa katamassa vatthū”ti pucchitabbattā “**paṭhame āhāre**”tiādi vuttaṃ. Ālambitabbe paṭhame kabaḷīkārāhāre paṭhama “rūpaṃ subha”nti **vipallāso** ārammaṇakaraṇavasena pavattati. Ālambitabbe dutiye phassāhāre dutiyo “phassapaccayā vedanā sukhā”ti **vipallāso** pavattati. Ālambitabbe tatiye cittāhāre tatiyo “cittaṃ nicca”nti **vipallāso** pavattati, ālambitabbe catutthe manosañcetanāhāre “dhammo attā”ti **vipallāso** ārammaṇakaraṇavasena pavattati. Ālambitabbe paṭhame “rūpaṃ subha”nti **vipallāso** paṭhamaṃ kāmupādānaṃ ārammaṇakaraṇavasena pavattati. Sesesupi yathārahaṃ nayānusārena yojetvā attho veditabbo.

83. “Tesu āhārādīsu katamo katamassa puggalassa upakkilesa”ti vattabbattā “**tattha yo cā**”tiādi vuttaṃ. **Tatthā**ti tesu āhārādīsu, taṇhācaritadiṭṭhicaritesu vā. Taṇhācaritassa rūpavedanāsu tibbacchandarāgassa uppajjanato yo ca kabaḷīkāro āhāro, yo ca phassāhāro pavattati, **ime** kabaḷīkārāhāraphassāhārā taṇhācaritassa puggalassa upakkilesā bhavanti. Diṭṭhicaritassa dhammacittesu balavaattaniccābhinivesassa uppajjanato yo ca manosañcetanāhāro, yo ca viññāṇāhāro pavattati, **ime** manosañcetanāhāravīññāṇāhārā diṭṭhicaritassa puggalassa upakkilesā bhavanti. “**Tattha yo ca asubhe subha**”ntiādisupi vuttanayānusārena attho gahetabboti. Purimānaṃ dvinnaṃ dvinnaṃ taṇhāpadhānattā ceva taṇhāsabhāvattā ca, pacchimānaṃ dvinnaṃ dvinnaṃ diṭṭhipadhānattā ceva diṭṭhisabhāvattā cāti.

84. “Katamasmiṃ paṭhamādike āhāre katamo paṭhamādiko vipallāso pavattati”ti pucchitabbattā “**tattha kabaḷīkāre āhāre**”tiādinā nāmavasena niyametvā pubbe vuttatthameva dasseti. “Katamasmiṃ vipallāse ṭhito katamaṃ upādiyati”ti pucchitabbattā “**paṭhame vipallāse ṭhito**”tiādi vuttaṃ. Paṭhame vipallāse **ṭhito** puggalo kāme yena upādānena upādiyati, **idaṃ** upādānaṃ “kāmupādānaṃ nāmā”ti vuccati. Sesesu iminā nayena yojanā kātabbā.

“Yena kāmupādānena kāmehi puggalo saṃyujjati, ayaṃ kāmupādānadhammo ‘kāmayogo’ti

vuccatī”tiādinaṃ yojanā kātabbā. Sesānaṃ yojanatthādayo pālito, aṭṭhakathāto ca pākaṭā.

85. “Āhārādīsu katame katamā disā”ti pucchitabbattā **“tattha imā catasso disā”**tiādi vuttaṃ. **Tattha** tesu āhāracatukkādīsu dasasu catukkesu paṭhamo paṭhamo kabaḷīkārāhārādiko paṭhamā disā, dutiyo dutiyo phassāhārādiko dutiyā disā, tatiyo tatiyo viññāṇāhārādiko tatiyā disā, catuttho catuttho manosañcetanāhārādiko catutthā disāti veditabbā.

“Tāsu catūsu disāsu tesu kabaḷīkārāhārādīsu dhammesu katame dhammā katamassa upakkilesā”ti pucchitabbattā ime āhārādayo dhammā imassa puggalassa upakkilesāti vibhattāti dassetuṃ **“tattha yo ca kabaḷīkāro āhāro...pe... ime diṭṭhacaritassa udattassa upakkilesā”**ti vuttaṃ. **Aṭṭhakathāyaṃ** pana – ‘kabaḷīkārāhāro āhārotiādi āhārādīsu ye yassa puggalassa upakkilesā, taṃ vibhajitvā dassetuṃ āradha”nti (netti. aṭṭha. 85) vuttaṃ. **Dasannaṃ suttānanti** ekadesabhūtaṃ dasannaṃ suttānaṃ. **Atthoti** sabhāvadhammo. Saddattho hi asamānoti. **“Byañjanameva nāna”**nti etena ca saddatthassa nānattaṃ dasseti.

“Kabaḷīkārāhārādīsu katame āhārādayo katamena vimokkhamukhena pariññaṃ pahānaṃ gacchantī”ti pucchitabbattā **“tattha yo ca kabaḷīkāro”**tiādi vuttaṃ.

Itīti evaṃ vuttappakārā. **Sabbeti** sabbe āhārādayo dhammā lokavaṭṭānusārino bhavanti. **Teti** te sabbe āhārādayo dhammā. **Lokāti** lokato vaṭṭato. **Tīhi vimokkhamukhehi** aniccānupassanādīhi niyyanti.

86. Saṃkilesapakkhe disābhūtā āhāracatukkādayo dasa catukkā dhammā ācariyena niddhāretvā dassitā, amhehi ca ñātā, “vodānapakkhe katame disābhūtā dhammā”ti pucchitabbattā vodānapakkhe disābhūte dhamme dassetuṃ **“catasso paṭipadā”**tiādi vuttaṃ. **Cattāro viharāti** dibbavihārā brahmavihārā ariyavihārā āneñjavihārāti cattāro viharā. Tesu rūpāvacarasamāpattiyo **dibbavihārā**, catasso appamaññāyo **brahmavihārā**, catasso phalasaṃpattiyo **ariyavihārā**, catasso arūpasamāpattiyo **āneñjavihārā cattāro acchariyā abbhutā dhammāti** mānapahānaṃ ālayasaṃmugghāto avijjāpahānaṃ bhavūpasamoti cattāro acchariyaabbhutadhammā. **Cattāri adhiṭṭhānānti** saccādhīṭṭhānaṃ cāgādhīṭṭhānaṃ paññādhīṭṭhānaṃ upasaṃmādhīṭṭhānanti cattāri adhiṭṭhānāni. **Catasso samādhībhāvanāti** chandasamādhībhāvanā vīriyasamādhībhāvanā cittaśamādhībhāvanā vīmaṃsāśamādhībhāvanāti catasso samādhībhāvanā. **Cattāro sukhabhāgiyāti** indriyasamvaro tapo bojjhaṅgo sabbūpadhipaṭinissaggoti cattāro sukhabhāgiyā. Avasesā pākaṭā.

“Catūsu catūsu paṭipadādīsu katamo paṭipadādiko paṭhamo satipaṭṭhānādiko bhavati”ti pucchitabbattā **“paṭhamā paṭipadā paṭhamam satipaṭṭhāna”**ntiādi vuttaṃ. “Paṭipadādayo paññāpadaṭṭhānādīkā, satipaṭṭhānādayo pana satipadaṭṭhānādīkā, tasmā ‘paṭhamā paṭipadā paṭhamam satipaṭṭhāna’ntiādiyojanā kātabbā”ti vattabbattā **“paṭhamā paṭipadā bhāvitā bahulīkatā paṭhamam satipaṭṭhānam pūreti”**tiādi vuttaṃ, pūrapapūretabbabhāvato tathā yojanā kātabbāti adhippāyo. Atha vā “bhāvitā bahulīkatā katame paṭipadādayo katame satipaṭṭhānādīke pūrentī”ti pucchitabbattā **“paṭhamā paṭipadā bhāvitā bahulīkatā paṭhamam satipaṭṭhānam pūreti”**tiādi vuttaṃ.

87. “Tesu dasasu paṭipadācatukkādīsu katame dhammā katamā disā, katame dhammā katamā disā”ti pucchitabbattā **“tattha imā catasso disā paṭhamā paṭipadā, paṭhamo satipaṭṭhāno”**tiādi vuttaṃ. **Tatthāti** tesu dasasu paṭipadācatukkādīsu. **Imā** mayā vuccamānā paṭhamā paṭipadādayo disā catasso disā bhavanti.

“Tesu catūsu disābhūtesu paṭipadācatukkādīsu katamo disābhūto attho katamassa puggalassa bhesajja”nti pucchitabbattā **“tattha paṭhamā paṭipadā...pe... diṭṭhacaritassa udattassa bhesajja”**nti vuttaṃ.

“Tesu dasasu paṭipadādicatukkesu dhammesu katamo katamo katamaṃ katamaṃ vimokkhamukha”nti pucchitabbattā **“tattha dukkhā ca paṭipadā”**tiādi vuttaṃ. Attho pana **ṭīkāyaṃ** vitthārena vutto pākaṭo. Saṃkilesapakkhe disābhūtā āhāracatukkādayo dasa catukkā samatikkamitabbapahātabbhāvena niddhāritā, vodānapakkhe pana disābhūtā paṭipadācatukkādayo dasa catukkā samatikkamapahāyakabhāvena niddhāritā.

“Tesam āhāracatukkādīnaṃ dasannaṃ catukkānaṃ samatikkamanapahānasaṅkhātāya yaṃ vikkīlitaṃ tesam paṭipadācatukkādīnaṃ dasannaṃ catukkānaṃ bhāvanāsaṅkhātāya yaṃ vikkīlitaṃ sacchikiriyāsaṅkhātāya yaṃ vikkīlitaṃ atthi, taṃ tividhaṃ vikkīlitaṃ katamesaṃ puggalānaṃ vikkīlitaṃ bhavati”ti pucchitabbattā **“tesam vikkīlita”**nti vuttaṃ. Atha vā “yathāvuttappakārehi vimokkhamukhehi ye buddhapaccekabuddhasāvakaṃ vimuccimsu, tesu buddhasseva vikkīlitaṃ bhavati kiṃ, paccekabuddhasseva vikkīlitaṃ bhavati kiṃ, sāvakasessa vikkīlitaṃ bhavati kiṃ, udāhu sabbesaṃ buddhapaccekabuddhasāvakaṃ vikkīlitaṃ bhavati ki”nti vicāraṇāya sambhavato **“tesam vikkīlita”**nti vuttaṃ. Yathāvuttappakārehi vimokkhamukhehi ye buddhapaccekabuddhasāvakaṃ muccimsu, **tesam** buddhapaccekabuddhasāvakaṃ **vikkīlitaṃ**. Yaṃ āhāracatukkādīnaṃ dasannaṃ catukkānaṃ saparasantāne samatikkamanapahānaṃ yaṃ paṭipadācatukkādīnaṃ dasannaṃ catukkānaṃ saparasantāne bhāvanāsaṅkhātānaṃ, sacchikiriyāsaṅkhātānaṃ ca atthi, idaṃ sabbam vikkīlitaṃ nāma bhavati attho.

“Sabbesaṃ āhāracatukkādīnaṃ dasannaṃ catukkānaṃ sabbe paṭipadācatukkādayo dasa catukkā paṭipakkhā honti kiṃ, udāhu yathākkamaṃ catukkānaṃ catukkā paṭipakkhā honti ki”nti vicāraṇāya sambhavato yathākkamaṃ catukkānaṃ catukkā paṭipakkhā honti pahātabbapahāyakabhāvenāti dassento **“cattāro āhārā tesam paṭipakkho catasso paṭipadā”**tiādimāha. **Aṭṭhakathāyaṃ** pana – “idāni āhārādīnaṃ paṭipadādihi yena samatikkamaṃ, taṃ nesaṃ paṭipakkhabhāvaṃ dassento ‘cattāro āhārā tesam paṭipakkho catasso paṭipadā’tiādimāhā”ti (netti. aṭṭha. 87) vuttaṃ. Tattha saṃkilesapakkhe cattāro ye āhārā niddhāritā, tesam catunnaṃ āhārānaṃ vodānapakkhe yā catasso paṭipadā niddhāritā, tā catasso paṭipadā paṭipakkho āhārānaṃ pahātabbattā, paṭipadānaṃ pana pahāyakattā. Satipi āhārānaṃ appahātabbabhāve vipassanārammaṇattā āhārapaṭibaddhachandarāgappahānavasena pahātabbabhāvo vuttoti evamādiyōjanā kātabbā.

Sīhāti sīhasadisā buddhā ca sīhasadisā paccekabuddhā ca sīhasadisā sāvakaṃ cāti sīhasadisā visuṃ visuṃ yojetabbā. Sāvakaṃ pana ahatarāgadosamohāpi santi, tepi “sīhā”ti maññeyyunti taṃ nivattāpanatthaṃ **“hatarāgadosamohā”**ti vuttaṃ. Hanitabbāti **hatā**, rāgo ca doso ca moho ca **rāgadosamohā**, hatā rāgadosamohā etehi sāvakehīti **hatarāgadosamohā**, sāvakaṃ yojanā kātabbā sāvakaṃ yaṃ byabhiṅgārasambhavatoti. **Tesam** sīhānaṃ buddhānaṃ, **tesam** sīhānaṃ paccekabuddhānaṃ, **tesam** sīhānaṃ sāvakaṃ **bhāvanā** vodānapakkhe bhāvitabbānaṃ bodhipakkhiyadhammānaṃ bhāvanā vaḍḍhanā ca, **sacchikiriyā** vodānapakkheyaṃ sacchikātabbānaṃ phalanibbānaṃ sacchikiriyā ca, **byantīkiriya** saṃkilesapakkhe pahātabbānaṃ pahānasaṅkhātā byantīkiriya ca **vikkīlitaṃ** nāma bhavati.

Indriyādhiṭṭhānanti saddhindriyādīnaṃ indriyānaṃ adhiṭṭhānaṃ pavattanaṃ bhāvanā, sacchikiriyā ca. **Vipariyāsānadhiṭṭhānanti** vipallāsānaṃ adhiṭṭhānaṃ pahānavasena appavattanaṃ, anuppādānaṃ saṅkhepato **vikkīlitaṃ** nāmāti gahitaṃ. **Indriyāni** saddhindriyādīni **saddhammagocaro** saddhammassa vodānapakkhassa gocaro pavattanahetūti adhippetāni. **Vipariyāsā** vipallāsā **kilesagocaro** saṃkilesapakkhassa gocaro pavattihetūti adhippetā.

“Cattāro āhārātiādinā saṃkilesapakkhe āhāracatukkādīnaṃ dasannaṃ catukkānaṃ taṇhācaritādīnaṃ catunnaṃ puggalānaṃ upakkilesavibhāvanāmukhena yā niddhāraṇā ācariyena katā, ‘catasso paṭipadā’tiādinā ca vodānapakkhe paṭipadācatukkādīnaṃ dasannaṃ catukkānaṃ taṇhācaritādīnaṃ catunnaṃ puggalānaṃ vodānavibhāvanāmukhena yā niddhāraṇā ācariyena katā, sā ayaṃ niddhāraṇā katamassa nayassa samuṭṭhānaṃ bhūmīti vuccati”ti pucchitabbattā **“ayaṃ vuccati**

sīhavikkīlitassa nayassa bhūmī’ti vuttaṃ. Tattha **ayanti** yā ayam vuttanayena dvippakārā niddhāraṇā katā, sā ayam dvippakārā niddhāraṇā sīhavikkīlitassa nayassa **bhūmi** pavattiṭṭhānaṃ samuṭṭhānanti nayasamuṭṭhānakosallehi puggalehi vuccatīti yojanā kātabbāti.

“Vuttappakārāya niddhāritāya nayassa bhūmibhāvo kasmā viññāyatī”ti vattabbattā **“tenāhā”**tiādi vuttaṃ. **Tena** vuttappakārāya niddhāraṇāya nayabhūmibhāvena **“yo neti...pe... kusalāti cā”**ti yaṃ vacanaṃ ācariyo āha, tena vacanena viññāyatīti.

Sīhavikkīlitanayabhūmi ācariyena vibhāvītā, amhehi ca ñātā, “katamā tipukkhalanayabhūmī”ti pucchitabbattā tipukkhalanayabhūmiṃ vibhāvetukāmo **“tattha ye dukkhāya paṭipadāyā”**tiādimāha. Evaṃ sati “ayam saṃkilesa, tīṇi akusalamūlāni”tiādivacanameva ācariyena vattabbaṃ, kasmā pana “tattha ye dukkhāya paṭipadāyā”tiādivacanaṃ vattabbanti? Saccam, tipukkhalanayabhūmibhāvanā pana ugghaṭitaññuādipuggalattayavasena pavattā, tasmā ugghaṭitaññuādipuggalattayaṃ vibhāvetuṃ “tattha ye dukkhāya paṭipadāyā”tiādivacanaṃ vuttaṃ. Evamapi “tattha yo sukhāya paṭipadāyā khippābhiññāya niyyāti, ayam ugghaṭitaññū”tiādivacanameva vattabbaṃ, kasmā pana “tattha ye dukkhāya paṭipadāyā”tiādivacanaṃ vattabbanti? Saccam, ugghaṭitaññuādipuggalattayaṃ pana sīhavikkīlitanayato tipukkhalanayassa niggacchanato nikkhamanato sīhavikkīlitanayabhūmivibhāvanāyaṃ paṭipadāvibhāgato vibhāvītapuggalacatukkato niddhāritam, sīhavikkīlitanayabhūmivibhāvanāyaṃ paṭipadāvibhāgato vibhāvītam puggalacatukkaṃ paṭhamam vibhāvetuṃ **“tattha ye dukkhāya paṭipadāyā”**tiādi vuttaṃ. **Tatthāti** yo paṭipadācatukko sīhavikkīlitanayabhūmivibhāvanāyaṃ niddhārito, tasmim paṭipadācatukke. **Yeti** ye dandhaudattā diṭṭhacaritapuggalā yathākkamaṃ sukhāya paṭipadāya dandhābhiññāya ca sukhāya paṭipadāya khippābhiññāya ca niyyanti, iti niyyakā dve puggalā ca niddhāritā. “Tesaṃ catunnaṃ puggalānaṃ katamo saṃkilesa”ti pucchitabbattā “tesaṃ catunnaṃ puggalānaṃ ayam saṃkilesa”ti vissajjētuṃ **“tesaṃ catunnaṃ puggalānaṃ ayam saṃkilesa”**tiādi vuttaṃ. Cattāro āhārā niddhāritā...pe... cattāri agatigamanāni niddhāritāni, iti ayam dasavidho āhāracatukkādicatukko tesaṃ catunnaṃ puggalānaṃ saṃkilesa hoti. Tesaṃ catunnaṃ puggalānaṃ saṃkilesa ācariyena niddhārito, “katamaṃ vodāna”nti pucchitabbattā **“tesaṃ catunnaṃ puggalānaṃ idaṃ vodāna”**ntiādi vuttaṃ. Catasso paṭipadā niddhāritā, catasso appamāṇā niddhāritā, **iti** idaṃ dasavidham paṭipadācatukkādicatukkabhūtam dhammajātam tesaṃ catunnaṃ puggalānaṃ vodānaṃ hoti.

88. “Tesu catūsu puggalesu katamo puggalo ugghaṭitaññū, katamo puggalo vipaṇcitaññū, katamo puggalo neyyo”ti pucchitabbattā **“tattha ye”**tiādi vuttaṃ. “Pubbepi ‘tattha ye’tiādinā cattāro puggalā niddhāritā, kasmā pana puna ‘tattha ye’tiādinā cattāro puggalā niddhāritā”ti ce vadeyya? Pubbe saṃkilesavodānaṃ sāmibhāvena niddhāritā, pacchā pana ugghaṭitaññuādīnaṃ avayavānaṃ samūhabhāvena niddhāritāti visesattho gahetabbo. **Tattha ye...pe... ime dve puggalāti** ettha yojanattho heṭṭhā vuttasadisova. **Tatthāti** tesu catūsu puggalesu. **Yoti** udatto diṭṭhacarito. **Ayanti** ayam niyato udatto diṭṭhacarito. Puna **yoti** udattova taṇhācarito ca mando diṭṭhacarito ca. **Sādhāraṇāyāti** dukkhāya paṭipadāya khippābhiññāya ca sukhāya paṭipadāya dandhābhiññāya ca.

“Ugghaṭitaññuādāyo tayo puggalā ācariyena niddhāritā, tesu tīsu puggalesu katamassa katamassa katamaṃ katamaṃ bhagavā upadisatī”ti pucchitabbattā **“tattha bhagavā”**tiādi vuttaṃ. Atha vā “paṭipadābhedenā puggalabhedo ācariyena vibhāvito, kathaṃ desanābhedenā puggalabhedo vibhāvito”ti vattabbattā desanābhedenapi puggalabhedaṃ vibhāvetuṃ **“tattha bhagavā”**tiādi vuttaṃ. **Tatthāti** tesu tīsu ugghaṭitaññuādīsū puggalesu. “Samathadesanāvīpassanādesanābhedenēva puggalabhedo vibhāvito”ti vattabbattā mududhammadesanātikkhadhammadesanābhedenapi puggalabhedaṃ vibhāvetuṃ **“tattha bhagavā”**tiādi vuttaṃ. Sesesupi evameva anusandhyattho vattabbo.

Viṣuṃ viṣuṃ paṭipadābhedenā cattāro hutvā viṣuṃ ca sampiṇḍitā ca paṭipadābhedenā ceva desanābhedenā ca tayo hontīti vibhāvetuṃ **“tattha ye”**tiādim puna vatvā **“iti kho cattāri hutvā tīṇi**

bhavantī’ti vuttaṃ. Tattha **cattāri tīṇi**ti liṅgavipallāsaniddeso, “cattāro tayo”ti pana pakatiliṅganiddeso kātabbova.

“Tesaṃ tiṇṇaṃ puggalānaṃ katamo saṃkilesa”ti pucchitabbattā **“tesaṃ tiṇṇaṃ puggalānaṃ ayaṃ saṃkilesa”**tiādi vuttaṃ. Tattha **ayaṃ saṃkilesoti** “tīṇi akusalamūlāni...pe... sīlavipatti diṭṭhivipatti ācāravipatti”ti niddhāritānaṃ akusalānaṃ dhammānaṃ iti ayaṃ samūho saṃkilesa hoti. “Tesaṃ tiṇṇaṃ puggalānaṃ saṃkilesa ācariyena niddhārito, kathaṃ vodānaṃ niddhāritabba”nti vattabbattā **“tesaṃ tiṇṇaṃ puggalānaṃ idaṃ vodāna”**ntiādi vuttaṃ. Tattha **idaṃ vodānanti** “tīṇi kusalamūlāni...pe... tīṇi vimokkhamukhāni suññataṃ animittaṃ appaṇihita”nti niddhāritānaṃ kusalahammānaṃ samūhabhūtaṃ iti idaṃ dhammajātaṃ vodānaṃ hoti.

“Vuttappakārena cattāro hutvā tayo puggalā bhavanti ācariyena vibhāvitā, tayo hutvā kittakā puggalā bhavanti”ti vattabbabhāvato **“iti kho cattāri hutvā tīṇi bhavanti, tīṇi hutvā dve bhavanti taṇhācarito ca diṭṭhacarito cā”**tiādi vuttaṃ. Iti heṭṭhā vuttappakārena **cattāri** cattāro hutvā **tīṇi** tayo bhavanti. **Tīṇi** tayo hutvā taṇhācarito ca diṭṭhacarito cāti **dve** puggalā bhavanti.

“Tesaṃ dvinnaṃ puggalānaṃ katamo saṃkilesa”ti vattabbabhāvato **“tesaṃ dvinnaṃ puggalānaṃ ayaṃ saṃkilesa”**tiādi vuttaṃ. Tattha **ayaṃ saṃkilesoti** “taṇhā ca avijjā ca...pe... sassatadiṭṭhi ca ucchedadiṭṭhi cā”ti niddhāritānaṃ akusaladhammānaṃ iti ayaṃ samūho saṃkilesa hoti.

“Tesaṃ dvinnaṃ puggalānaṃ saṃkilesa ācariyena niddhārito, kathaṃ vodāna”nti vattabbabhāvato **“tesaṃ dvinnaṃ puggalānaṃ idaṃ vodāna”**ntiādi vuttaṃ. **Idaṃ vodānanti** “samatho ca vipassanā ca...pe... saupādisesā ca nibbānadhātu, anupādisesā ca nibbānadhātū”ti niddhāritānaṃ kusalahammānaṃ samūhabhūtaṃ iti idaṃ dhammajātaṃ vodānaṃ hoti.

“Tīṇi akusalamūlāni”tiādinā saṃkilesapakkhe akusalamūlatikādīnaṃ dvinnaṃ dvādasannaṃ tikānaṃ, tiṇṇaṃ ugghaṭitaññuādi puggalānaṃ saṃkilesavibhāvanāmukhena yā niddhāraṇā katā, “tīṇi kusalamūlāni”tiādinā vodānapakkhe kusalamūlatikādīnaṃ dvinnaṃ dvādasannaṃ tikānaṃ, tiṇṇaṃ ugghaṭitaññuādi puggalānaṃ vodānavibhāvanāmukhena yā niddhāraṇā katā, **ayaṃ** vuttappakāraniddhāraṇā tipukkhalassa ca nayassa, aṅkusassa ca nayassa **bhūmi** samuṭṭhānaṃ pavattihetu nāmāti yojetvā “taṇhā ca avijjā cā”tiādinā saṃkilesapakkhe taṇhāvijjādukādīnaṃ pannarasannaṃ dukānaṃ, dvinnaṃ taṇhācaritadiṭṭhacaritānaṃ puggalānaṃ vodānavibhāvanāmukhena yā niddhāraṇā katā, “samatho ca vipassanā cā”tiādinā vodānapakkhe samathavipassanādukādīnaṃ ekūnavīsaticānaṃ, dvinnaṃ taṇhācaritadiṭṭhacaritānaṃ puggalānaṃ vodānavibhāvanāmukhena yā niddhāraṇā katā, ayaṃ vuttappakārā nandiyāvaṭṭassa nayassa bhūmitipi nīharitvā yojetabbā. Puggalādhiṭṭhānavasena hi nandiyāvaṭṭanayato sīhavikkīṭitanayassa sambhavo, sīhavikkīṭitanayato ca tipukkhalanayassa sambhavo hoti. Dhammādhiṭṭhānavasena pana sīhavikkīṭitanayato tipukkhalanayassa sambhavo, tipukkhalanayato ca nandiyāvaṭṭanayassa sambhavo hoti. Tenāha **aṭṭhakathāyaṃ** “ante ‘taṇhā ca avijjā cā’tiādinā samathassa nayassa bhūmi dassitā. Teneva hi ‘cattāri hutvā tīṇi bhavanti, tīṇi hutvā dve bhavanti’ti vutta”nti (netti. aṭṭha. 88).

“Kasmā pana ayaṃ vuttappakārāya niddhāraṇāya tipukkhalassa ca nayassa, aṅkusassa ca nayassa bhūmibhāvo viññāyatī”ti vattabbabhāvato **“tenāha”**tiādi vuttaṃ. **Tena** yathāvuttassa niddhāraṇāya bhūmibhāvena ācariyo **“yo akusale...pe... disālocanēti cā”**ti yaṃ vacanaṃ āha, tena vacanena vuttappakārāya niddhāraṇāya tipukkhalā...pe... yassa bhūmibhāvo viññāyatīti attho.

“Ettāvatā nayasamuṭṭhānaṃ paripuṇṇaṃ hoti, aññaṃ natthī”ti vattabbattā **“niyuttaṃ nayasamuṭṭhāna”**nti vuttaṃ. Yena yena nayasamuṭṭhānena saṃkilesapakkhe vā akusalā dhammā niddhāritā, vodānapakkhe vā kusalā dhammā niddhāritā, taṃ taṃ nayasamuṭṭhānaṃ **niyuttaṃ** yathārahaṃ niddhāretvā yujjitabbanti attho gahetabbo.

Nayakkamena pana saṅkhepato dassayissāmi – dve puggalā, tayo puggalā, cattāro puggalāti puggalā tikoṭṭhāsā bhavanti, catudisā, chadisā, aṭṭhadisāti disāpi tikoṭṭhāsā bhavanti. Tattha **dve puggalāti** taṇhācarito puggalo, diṭṭhacarito puggaloti dve puggalā bhavanti. **Tayo puggalāti** ugghaṭṭitaññupuggalo, vipaṅcitaññupuggalo, neyyapuggaloti tayo puggalā bhavanti. **Cattāro puggalāti** dukkhāpaṭipadādandhābhiññādibhedena bhinnā mudindriyo taṇhācarito puggalo, mudindriyo diṭṭhacarito puggalo, tikkhindriyo taṇhācarito puggalo, tikkhindriyo diṭṭhacarito puggaloti cattāro puggalā bhavanti. **Catudisāti** saṅkilesapakkhe dve dve disā, vodānapakkhe dve dve disāti catudisā bhavanti. **Chadisāti** saṅkilesapakkhe tisso tisso disā, vodānapakkhe tisso tisso disāti chadisā bhavanti. **Aṭṭhadisāti** saṅkilesapakkhe catasso catasso disā, vodānapakkhe catasso catasso disāti aṭṭhadisā bhavanti. Tesu dve dve taṇhācaritadiṭṭhacarite puggale, catudisā ca nissāya nandiyāvaṭṭanayasamuṭṭhānaṃ bhavati. Tayo ugghaṭṭitaññuvipaṅcitaññuneyyapuggale ca chadisā ca nissāya tipukkhalanayasamuṭṭhānaṃ bhavati. Dukkhāpaṭipadādandhābhiññādibhedena bhinne cattāro mudindriyataṇhācaritattikkhindriyataṇhācaritamudindriyadiṭṭhacaritattikkhindriyadiṭṭhacarite puggale ca aṭṭhadisā ca nissāya sīhavikkīḷitanayasamuṭṭhānaṃ bhavati. Ekekasmimṃ nayasamuṭṭhāne vibhajite disālocanaaṅkusanayasamuṭṭhānāni pi vibhajitāni bhavanti.

“Kathaṃ nandiyāvaṭṭanayasamuṭṭhānaṃ bhavati” ti ce vadeyya? “Taṇhā ca avijjā ca ahirikaṅca anottappaṅca assati ca asampajaññaṅca ayonisomanasikāro ca kosajjaṅca dovacassaṅca ahaṃkāro ca mamaṅkāro ca assaddhā ca pamādo ca asaddhammassavanaṅca asaṃvaro ca abhijjhā ca byāpādo ca nīvaraṅca saṃyojanaṅca kodho ca upanāho ca makkho ca paḷāso ca issā ca maccheraṅca māyā ca sāṭṭheyyaṅca sassatadiṭṭhi ca ucchedadiṭṭhi cā” ti (netti. 88) dukadukavasena desito ayam disābhūto akusaladhammasamūho dvinnam taṇhācaritadiṭṭhacaritānaṃ puggalānaṃ saṅkilesa hotīti saṅkilesapakkhe saṅkilesasāmaññabhāvena yojetvā “imesu pannarasasu dukadukavasena desitesu disābhūtesu akusaladhammesu katamo akusaladhammo katamassa puggalassa disā” ti manasāva disādhammabhāvena oloketvā “ayam ayam paṭhamo paṭhamo akusaladhammo taṇhācaritassa puggalassa saṅkilesapakkhe paṭhamā disā nāma, ayam ayam dutiyo dutiyo akusaladhammo diṭṭhacaritassa puggalassa saṅkilesapakkhe dutiyā disā nāmā” ti visuṃ visuṃ yojetvā samudayasaccadukkhasaccāni yathārahaṃ nīharitvā vibhajitabbadhammasabhāvo ca yena saṃvaṇṇanāvisesena dassito, so saṃvaṇṇanāviseso ca nandiyāvaṭṭanayasamuṭṭhānaṃ bhavati, tassa olokanā ca yena saṃvaṇṇanāvisesena dassitā, so saṃvaṇṇanāviseso ca disālocananayasamuṭṭhānaṃ bhavati, tathā oloketvā disāvisesabhūtaṃ dhammavisesassa puggalānaṃ nayanaṅca yena saṃvaṇṇanāvisesena nayati, so saṃvaṇṇanāviseso ca aṅkusanayasamuṭṭhānaṃ bhavati.

“Samatho ca vipassanā ca, hirī ca ottappaṅca, sati ca sampajaññaṅca, yonisomanasikāro ca vīriyārambho ca, sovacassaṅca dhamme ñāṅca anvaye ñāṅca, khaye ñāṅca anuppāde ñāṅca, saddhā ca appamādo ca, saddhammassavanaṅca saṃvaro ca, anabhijjhā ca abyāpādo ca, rāgavirāgā ca cetovimutti, avijjāvirāgā ca paññāvimutti, abhisamayo ca appicchatā ca, santuṭṭhi ca akkodho ca, anupanāho ca amakkho ca, apaḷāso ca issāpahānaṅca macchariyappahānaṅca vijjā ca, vimutti ca saṅkhatārammaṇo ca vimokkho, asaṅkhatārammaṇo ca vimokkho, saupādisesā ca nibbānadhātu, anupādisesā ca nibbānadhātū” ti (netti. 88) tikadukavasena desitam idam disābhūtam kusalasamūhadhammajātam dvinnam taṇhācaritadiṭṭhacaritānaṃ puggalānaṃ vodānaṃ hotīti vodānapakkhe vodānasāmaññabhāvena yojetvā “imesu ekūnavīsatiyā dukadukavasena vā desitesu disābhūtesu dhammesu katamo katamo kusaladhammo katamassa katamassa puggalassa disā” ti manasāva disādhammabhāvena oloketvā “ayam paṭhamo paṭhamo kusaladhammo taṇhācaritassa puggalassa vodānapakkhe paṭhamā disā nāma, ayam dutiyo dutiyo kusaladhammo diṭṭhacaritassa puggalassa vodānapakkhe dutiyā disā nāmā” ti visuṃ visuṃ yojetvā maggasaccanīrodhasaccāni yathārahaṃ nīharitvā vibhajitabbadhammabhāvo ca yena saṃvaṇṇanāvisesena dassito, so saṃvaṇṇanāviseso ca nandiyāvaṭṭanayasamuṭṭhānaṃ bhavati, tassa olokanā ca yena saṃvaṇṇanāvisesena dassitā, so saṃvaṇṇanāviseso ca disālocananayasamuṭṭhānaṃ bhavati, tathā oloketvā disāvisesabhūtaṃ dhammavisesassa puggalānaṃ nayanaṅca yena saṃvaṇṇanāvisesena nayati, so saṃvaṇṇanāviseso ca aṅkusanayasamuṭṭhānaṃ bhavati.

“Kathaṃ tipukkhalanayasamuṭṭhānaṃ bhavati”ti ce puccheyya, “tīṇi akusalamūlāni – lobho akusalamūlaṃ, doso akusalamūlaṃ, moho akusalamūlaṃ. Tīṇi duccharitāni – kāyaduccharitaṃ, vacīduduccharitaṃ, manoduccharitaṃ. Tayo akusalavitakkā – kāmavitakko, byāpādavitaṃ, vihiṃsāvitaṃ. Tisso akusalasaññā – kāmasaññā, byāpādasaññā, vihiṃsāsaññā. Tisso viparītasaññā – niccasaññā, sukhasaññā, attasaññā. Tisso vedanā – sukhā vedanā, dukkhā vedanā, adukkhamasukhā vedanā. Tisso dukkhatā – dukkhadukkhatā, saṅkhāradukkhatā, vipariṇāmadukkhatā. Tayo aggī – rāgaggi, dosaggi, mohaggi. Tayo sallā – rāgasallo, dosasallo, mohasallo. Tisso jaṭā – rāgajaṭā, dosajaṭā, mohajaṭā. Tisso akusalūpaparikkhā – akusalaṃ kāyakammaṃ, akusalaṃ vacīkammaṃ, akusalaṃ manokammaṃ. Tisso vipattiyo – sīlavipatti, diṭṭhivipatti, ācāravipatti”ti (netti. 88) tikavasena desito ayaṃ disābhūto akusaladhammasamūho tiṇṇaṃ ugghaṭitaññuvipaṇcitaññuneyyapuggalānaṃ saṃkilesa hotīti saṃkilesapakkhe saṃkilesasāmaññabhāvena yojetvā “imesu dvādasasu tikaṭikavasena desitesu disābhūtesu akusaladhammesu katamo katamo akusalo dhammo katamassa katamassa puggalassa disā”ti manasāva disādhammabhāvena oloketvā “ayaṃ ayaṃ paṭhamo paṭhamo akusaladhammo ugghaṭitaññupuggalassa saṃkilesapakkhe paṭhamā disā nāma. Ayaṃ ayaṃ dutiyo dutiyo akusaladhammo vipaṇcitaññupuggalassa saṃkilesapakkhe dutiyā disā nāma. Ayaṃ ayaṃ tatiyo tatiyo akusaladhammo neyyassa puggalassa saṃkilesapakkhe tatiyā disā nāmā”ti visuṃ visuṃ yojetvā samudayasaccadukkhāsaccāni yathārahaṃ nīharitvā vibhajitabbadhammasabhāvo ca yena saṃvaṇṇanāvīsesena dassito. So saṃvaṇṇanāvīseso ca tipukkhalanayasamuṭṭhānaṃ bhavati. Tassa olokanā ca yena saṃvaṇṇanāvīsesena dassitā, so saṃvaṇṇanāvīseso ca disālocananayasamuṭṭhānaṃ bhavati tathā oloketvā disāvīsesabhūtassa dhammavīsesassa puggalānaṃ nayanañca yena saṃvaṇṇanāvīsesena nayati, so saṃvaṇṇanāvīseso añkusanayasamuṭṭhānaṃ bhavati.

“Tīṇi kusalamūlāni – alobho kusalamūlaṃ, adoso kusalamūlaṃ, amoho kusalamūlaṃ. Tīṇi succharitāni – kāyasuccharitaṃ, vacīsuccharitaṃ, manosuccharitaṃ. Tayo kusalavitakkā – nekkhammavitakko, abyāpādavitaṃ, avihīmsāvitaṃ. Tayo samādhī – savitaṃ savicāro samādhī, avitaṃ vicāramatto samādhī, avitaṃ avicāro samādhī. Tisso kusalasaññā – nekkhammasaññā, abyāpādasaññā, avihīmsāsaññā. Tisso aviparītasaññā – aniccasaññā, dukkhasaññā, anattasaññā. Tisso kusalūpaparikkhā – kusalaṃ kāyakammaṃ, kusalaṃ vacīkammaṃ, kusalaṃ manokammaṃ. Tīṇi soceyyāni – kāyasoceyyaṃ, vacīsoceyyaṃ, manosoceyyaṃ. Tisso sampattiyo – sīlasampatti, samādhisampatti, paññāsampatti. Tisso sikkhā – adhisīlasikkhā, adhicitasikkhā, adhipaññāsikkhā. Tayo khandhā – sīlakkhandho, samādhikkhandho, paññākkhandho. Tīṇi vimokkhamukhāni – suññataṃ, animittaṃ, appaṇihita”nti (netti. 88) tikaṭikavasena desitaṃ idaṃ disābhūtaṃ kusalasamūhadhammajātaṃ tiṇṇaṃ ugghaṭitaññuvipaṇcitaññuneyyapuggalānaṃ vodānaṃ hotīti vodānapakkhe vodānasāmaññabhāvena yojetvā “imesu dvīsū dvādasasu tikaṭikavasena desitesu disābhūtesu kusaladhammesu katamo katamo kusaladhammo katamassa katamassa puggalassa disā”ti manasāva disādhammabhāvena oloketvā “ayaṃ ayaṃ paṭhamo paṭhamo kusaladhammo ugghaṭitaññupuggalassa vodānapakkhe paṭhamā disā nāma. Ayaṃ ayaṃ dutiyo dutiyo kusalo dhammo vipaṇcitaññupuggalassa vodānapakkhe dutiyā disā nāma. Ayaṃ ayaṃ tatiyo tatiyo kusaladhammo neyyapuggalassa vodānapakkhe tatiyā disā nāmā”ti visuṃ visuṃ disābhāvena yojetvā maggasaccanīrodhasaccāni yathārahaṃ nīharitvā vibhajitabbadhammasabhāvo ca yena saṃvaṇṇanāvīsesena dassito. So saṃvaṇṇanāvīseso ca tipukkhalanayasamuṭṭhānaṃ bhavati. Tassa olokanā ca yena saṃvaṇṇanāvīsesena dassitā, so saṃvaṇṇanāvīseso ca disālocananayasamuṭṭhānaṃ bhavati. Tathā oloketvā disāvīsesabhūtassa dhammassa puggalānaṃ nayanañca yena saṃvaṇṇanāvīsesena nayati, so saṃvaṇṇanāvīseso ca añkusanayasamuṭṭhānaṃ bhavati.

“Kathaṃ sīhavikkīṭitanayasamuṭṭhāna”nti ce puccheyya, “cattāro āhārā, cattāro vipallāsā, cattāri upādānāni, cattāro yogā, cattāro ganthā, cattāro āsavā, cattāro oghā, cattāro sallā, catasso viññāṇaṭṭhitiyo, cattāri agatigamanāni”ti (netti. 87) catukkacatukkavasena desito ayaṃ disābhūto catukko catukko akusaladhammo “dukkhāya paṭipadāya dandhābhiññāya niyyakassa mudindriyassa taṇhācaritassa ca dukkhāya paṭipadāya khippābhiññāya niyyakassa tikkhindriyassa taṇhācaritassa ca sukhāya paṭipadāya dandhābhiññāya niyyakassa mudindriyassa diṭṭhīcaritassa ca sukhāya paṭipadāya

khippābhiññāya niyyakassa tikkhindriyassa diṭṭhacaritassa cā’’ti catunnaṃ puggalānaṃ saṃkilesoti saṃkilesapakkhe saṃkilesasāmaññabhāvena yojetvā ‘‘imesu catukkacatukkavasena desitesu dasasu catukkesu dhammesu katamo katamo akusaladhammo katamassa katamassa puggalassa disā’’ti manasāva saṃkilesapakkhe disādhammabhāvena oloketvā ‘‘ayaṃ ayaṃ paṭhamo paṭhamo akusaladhammo dukkhāya paṭipadāya dandhābhiññāya niyyakassa mudindriyassa taṇhācaritassa puggalassa paṭhamā disā nāma. Ayaṃ ayaṃ dutiyo dutiyo akusaladhammo dukkhāya paṭipadāya khippābhiññāya niyyakassa tikkhindriyassa taṇhācaritassa puggalassa dutiyā disā nāma. Ayaṃ ayaṃ tatiyo tatiyo akusaladhammo sukhāya paṭipadāya dandhābhiññāya niyyakassa mudindriyassa diṭṭhacaritassa puggalassa tatiyā disā nāma. Ayaṃ ayaṃ catuttho catuttho akusaladhammo sukhāya paṭipadāya khippābhiññāya niyyakassa tikkhindriyassa diṭṭhacaritassa puggalassa catutthā disā nāmā’’ti visuṃ visuṃ disābhāvena yojetvā, samudayasaccadukkhāsaccāni yathārahaṃ nīharitvā, vibhajitabbadhammasabhāvo ca yena saṃvaṇṇanāvīsesena dassito. So saṃvaṇṇanāvīseso ca sīhaviikkīṭitanayasamuṭṭhānaṃ bhavati. Tassa olokanā ca yena saṃvaṇṇanāvīsesena dassitā, so saṃvaṇṇanāvīseso ca disālocananayasamuṭṭhānaṃ bhavati. Tathā oloketvā disāvīsesabhūtassa dhammassa puggalānaṃ nayanañca yena saṃvaṇṇanāvīsesena nayati, so saṃvaṇṇanāvīseso ca aṅkusanayasamuṭṭhānaṃ bhavati.

‘‘Catasso paṭipadā, cattāro satipaṭṭhānā, cattāri jhānāni, cattāro vihārā, cattāro sammappadhānā, cattāro acchariyā abbhutā dhammā, cattāri adhiṭṭhānāni, catasso samādhibhāvanā, cattāro sukhabhāgiyā dhammā, catasso appamāṇā’’ti (netti. 86) catukkacatukkavasena desitaṃ idaṃ disābhūtaṃ kusalasamūhadhammajātaṃ ‘‘dukkhāya paṭipadāya dandhābhiññāya niyyakassa mudindriyassa taṇhācaritassa ca dukkhāya paṭipadāya khippābhiññāya niyyakassa tikkhindriyassa taṇhācaritassa ca sukhāya paṭipadāya dandhābhiññāya niyyakassa mudindriyassa diṭṭhacaritassa sa sukhāya paṭipadāya khippābhiññāya niyyakassa tikkhindriyassa diṭṭhacaritassa cā’’ti catunnaṃ puggalānaṃ vodānaṃ hotīti vodānapakkhe vodānasāmaññabhāvena yojetvā ‘‘imesu catukkacatukkavasena desitesu dasasu catukkesu kusalahammesū katamo katamo kusalahammo katamassa katamassa puggalassa disā’’ti manasāva disādhammabhāvena oloketvā, ‘‘ayaṃ ayaṃ paṭhamo paṭhamo kusalahammo dukkhāya paṭipadāya dandhābhiññāya niyyakassa mudindriyassa taṇhācaritassa puggalassa paṭhamā disā nāma. Ayaṃ ayaṃ dutiyo dutiyo kusalahammo dukkhāya paṭipadāya khippābhiññāya niyyakassa tikkhindriyassa taṇhācaritassa puggalassa dutiyā disā nāma. Ayaṃ ayaṃ tatiyo tatiyo kusalahammo sukhāya paṭipadāya dandhābhiññāya niyyakassa mudindriyassa diṭṭhacaritassa puggalassa tatiyā disā nāma. Ayaṃ ayaṃ catuttho catuttho kusalahammo sukhāya paṭipadāya khippābhiññāya niyyakassa tikkhindriyassa diṭṭhacaritassa puggalassa catutthā disā nāmā’’ti visuṃ visuṃ disābhāvena yojetvā, maggasaccanīrodhasaccāni yathārahaṃ nīharitvā, vibhajitabbadhammasabhāvo ca yena saṃvaṇṇanāvīsesena dassito. So saṃvaṇṇanāvīseso ca sīhaviikkīṭitanayasamuṭṭhānaṃ bhavati. Tassa olokanā ca yena saṃvaṇṇanāvīsesena dassitā. So saṃvaṇṇanāvīseso ca disālocananayasamuṭṭhānaṃ bhavati. Tathā oloketvā disāvīsesassa dhammassa puggalānaṃ nayanañca yena saṃvaṇṇanāvīsesena nayati, so saṃvaṇṇanāvīseso ca aṅkusanayasamuṭṭhānaṃ bhavatīti nayakkamena saṅkhepatō nayasamuṭṭhānaṃ bhavatīti viññātabbanti.

Iti nayasamuṭṭhāne sattibalānurūpā racitā

Vibhāvanā niṭṭhitā.

Paṇḍitehi pana aṭṭhakathāṭīkānusārena gambhīrattho vitthārato vibhajitvā gahetabboti.

Sāsanapaṭṭhānavibhāvanā

89. ‘‘Tattha katamaṃ nayasamuṭṭhāna’’ntiādinā ācariyena sabbathā nayasamuṭṭhānaṃ ṭhapitaṃ, amhehi ca ñātaṃ, ‘‘soḷasahārapañcanaya aṭṭhārasamūlapadesu aṭṭhārasa mūlapadā kathaṃ vibhattā, kuhiṃ amhehi daṭṭhabbā’’ti vattabbabhāvato ‘‘**tattha aṭṭhārasa mūlapadā kuhiṃ daṭṭhabbā**’’tiādi

vuttam. **Tatthā**ti tesu soḷasahārapañcanayaatṭhārasamūlapadesu atṭhārasa mūlapadā kena padena ācariyena vibhattā, kuhiṃ amhehi vitthārato daṭṭhabbāti pucchati. Atṭhārasa mūlapadā sāsanaatṭhāne mayā vibhattā, tumhehi ca vitthārato sāsanaatṭhāne daṭṭhabbāti vissajjeti. Vibhattāyeva hi atṭhārasa mūlapadā daṭṭhabbā bhavanti. **Aṭṭhakathāyaṃ** (netti. atṭha. 89) pana –

“Evaṃ sabbathā nayasamutṭhānaṃ vibhajitvā idāni sāsanaatṭhānaṃ vibhajanto yasmā saṅgahavārādīsu mūlapadeheva atṭhānaṃ saṅgahetvā sarūpato na dassitaṃ, tasmā yathā mūlapadehi atṭhānaṃ niddhāretabbam, evaṃ atṭhānatopi mūlapadāni niddhāretabbānīti dassanattaṃ ‘atṭhārasa mūlapadā kuhiṃ daṭṭhabbā? Sāsanaatṭhāne’ti āhā’ti –

Vuttam. Sāsanaatṭhāne atṭhārasa mūlapadā daṭṭhabbāti ācariyena vuttā, “katamaṃ taṃ sāsanaatṭhāna”nti pucchitabbatā “**tattha katamaṃ sāsanaatṭhāna**”ntiādi vuttam. **Tatthā**ti tesu atṭhārasamūlapadasāsanaatṭhānesu katamaṃ taṃ sāsanaatṭhānanti idāni mayā niddhāriyamānaṃ bhagavatā desitaṃ saṃkilesabhāgiyādisuttaṃ sāsanaatṭhānaṃ nāmāti vissajjeti. **Sāsana**nti pariyattisāsanaṃ. **Atṭhāna**nti tassa pariyattisāsanaṃ saṃkilesabhāgiyatādīhi pakārehi ṭhānaṃ pavattanaṃ atṭhānaṃ, taṃdīpanasuttaṃ pana idha atṭhānaṃ nāma. Tena vuttam – “**saṃkilesabhāgiyaṃ sutta**”ntiādi. Atha vā **sāsana**nti adhisīlaadhicittaadhipaññāsikkhattayaṃ sāsanaṃ nāma, taṃ sikkhattayaṃ patiṭṭhahati etena saṃkilesādināti **atṭhānaṃ**, sikkhattayaṃ sāsanaṃ sāsanaṃ atṭhānanti **sāsanaatṭhānaṃ**. Tadādhārabhūtaṃ suttampi ṭhānyūpacārato **sāsanaatṭhānaṃ** nāma. Taṃ sāsanaatṭhānasuttaṃ sarūpato dassetaṃ –

“Saṃkilesabhāgiyaṃ suttaṃ, vāsanābhāgiyaṃ suttaṃ, nibbedhabhāgiyaṃ suttaṃ, asekkhabhāgiyaṃ suttaṃ, saṃkilesabhāgiyañca vāsanābhāgiyañca suttaṃ, saṃkilesabhāgiyañca nibbedhabhāgiyañca suttaṃ, saṃkilesabhāgiyañca asekkhabhāgiyañca suttaṃ, saṃkilesabhāgiyañca nibbedhabhāgiyañca asekkhabhāgiyañca suttaṃ, saṃkilesabhāgiyañca vāsanābhāgiyañca nibbedhabhāgiyañca suttaṃ, vāsanābhāgiyañca nibbedhabhāgiyañca suttaṃ, taṃhāsaṃkilesabhāgiyaṃ suttaṃ, diṭṭhisāṃkilesabhāgiyaṃ suttaṃ, duccharitasāṃkilesabhāgiyaṃ suttaṃ, taṃhāvodānabhāgiyaṃ suttaṃ, diṭṭhivodānabhāgiyaṃ suttaṃ, duccharitavodānabhāgiyaṃ sutta’nti –

Vuttam. “Tesu suttesu ye saṃkilesādayo bhagavatā vuttā, tesu saṃkilesādīsu saṃkilesō kittako”ti pucchitabbatā “**tattha saṃkilesō tividho taṃhāsaṃkilesō diṭṭhisāṃkilesō duccharitasāṃkilesō**”ti vuttam. **Tatthā**ti tesu suttantesu saṃkilesādīsu dhammesu. “Tividhe tasmim saṃkilesē taṃhāsaṃkilesō katamena kusalena visujjhatī”ti pucchitabbatā “**tattha taṃhāsaṃkilesō samathena visujjhatī**”ti vuttam. **Tatthā**ti tasmim tividhe taṃhāsaṃkilesādīke. “So samatho khandhesu katamo khandho”ti pucchitabbatā “**so samatho samādhikkhandho**”ti vuttam. “Diṭṭhisāṃkilesō kena visujjhatī”ti pucchitabbatā “**diṭṭhisāṃkilesō vipassanāya visujjhatī**”ti vuttam. “Sā vipassanā katamo khandho”ti vattabbatā “**sā vipassanā paññākkhandho**”ti vuttam. “Duccharitasāṃkilesō kena visujjhatī”ti vattabbatā “**duccaritasāṃkilesō sucaritena visujjhatī**”ti vuttam. “Taṃ sucariṃ katamo khandho”ti vattabbatā “**taṃ sucariṃ silakkhandho**”ti vuttam. “Tasmim sīle ṭhitassa puggalassa kiṃ bhavati”ti vattabbatā “**tassa sīle patiṭṭhitassā**”tiādi vuttam. **Sīle** sucaritasāṃkilesā sīlakkhandhe **patiṭṭhitassa** tassa sīlavantassa puggalassa **bhavesu** kāmabhavarūpārūpabhavesu **āsatti** bhavapatthanā yadi uppajjati, **evaṃsāyanti** evaṃ assa ayanti padacchedo. **Evaṃ** sati **assa** sīle patiṭṭhitassa **ayaṃ** āsatti bhavapatthanā samathavipassanābhāvanāmayapuññakiriyavatthu ca bhavati, **ca**-saddena dānamayasīlamayapuññakiriyavatthu ca bhavati attho saṅgahito. **Tatrā**ti tesu kāmabhavarūpārūpabhavesu **upapattiyā saṃvattatīti**.

“Saṃkilesādayo yehi suttehi dassitā, tāni suttāni kittakānī”ti vattabbatā “**imāni cattāri suttāni**”tiādi vuttam. Asādhāraṇāni saṃkilesabhāgiyasuttavāsanābhāgiyasuttanibbedhabhāgiyasuttaasekkhabhāgiyasuttāni cattāri suttāni bhavanti, sādharmaṇāni saṃkilesabhāgiyavāsanābhāgiyasutta, saṃkilesabhāgiyanibbedhabhāgiyasutta,

saṃkilesabhāgiyaasekkhabhāgiyasutta, vāsanābhāgiyanibbedhabhāgiyasuttāni katāni missitāni cattāri bhavanti. Iti aṭṭha suttāni bhavanti. **Tāniyeva** vuttappakārāni aṭṭha suttāni bhavanti. Sādhāraṇāni vāsanābhāgiyaasekkhabhāgiyasuttanibbedhabhāgiyaasekkhabhāgiyasutta-saṃkilesabhāgiyavāsanābhāgiyanibbedhabhāgiyasuttasaṃkilesabhāgiyavāsanābhāgiyaasekkhabhāgiyasutta-saṃkilesabhāgiyanibbedhabhāgiyaasekkhabhāgiyasutta-vevasaṃkilesabhāgiyanavāsanābhāgiyanibbedhabhāgiyanaasekkhabhāgiyasuttāni katāni missitāni aṭṭha suttāni bhavanti. Tesu soḷasasuttesu cattāri ekakāni suttāni ca cattāri dukāni suttāni ca dve tikāni ca pāliyaṃ āgatāni, dve dukāni suttāni ca dve tikāni ca dve catukkāni suttāni ca **aṭṭhakathāyaṃ** (netti. aṭṭha. 89) āgatāni.

“Yadi paṭṭhānanayena vuttappakārāni soḷasa suttāniyeva vibhattāni, evaṃ sati suttageyyādinavavidhaṃ sakalaṃ pariyattisāsanam paṭṭhānanayena avibhattaṃ bhavyeyā”ti vattabbattā **“imehi soḷasahi suttehi”**tiādi vuttaṃ. Paṭṭhānanayena vibhattehi soḷasahi imehi suttehi navavidhaṃ sakalaṃ pariyattisuttaṃ paṭṭhānanayena vibhattaṃyeva hutvā bhinnaṃ bhavati. Saṃkilesabhāgiyādipabhedāya **gāthāya** gāthā anuminitabbā, saṃkilesabhāgiyādipabhedena **veyyākaraṇena** veyyākaraṇam anuminitabbam. Saṃkilesabhāgiyādipabhedena **suttena** suttaṃ anuminitabbam bhavatiyevāti.

90. “Tesu soḷasasu saṃkilesabhāgiyādīsu suttesu katamaṃ saṃkilesabhāgiyaṃ sutta”nti pucchitabbattā **“tattha katamaṃ saṃkilesabhāgiyaṃ sutta”**ntiādi vuttaṃ. **Tatthāti** tesu soḷasasu saṃkilesabhāgiyādīsu suttesu katamaṃ suttaṃ saṃkilesabhāgiyaṃ suttaṃ nāmāti pucchati.

“Kāmandhā jālasañchannā, taṇhāchadanachādītā;
Pamattabandhanābaddhā, macchāva kumināmukhe;
Jarāmaraṇamanventi, vaccho khīrapakova mātara”nti. –

Idaṃ suttaṃ saṃkilesabhāge vācakañāpakabhāvena pavattanato **saṃkilesabhāgiyaṃ suttaṃ** nāma. Ye sattā **kāmandhā** kāmena andhā jālasañchannā taṇhāchadanena chādītā, pamattabandhanāya baddhā bandhitabbā, te satte jarāmaraṇam anveti, yathā taṃ kumināmukhe ye macchā gahitā, te macche jarāmaraṇam anveti iva, evaṃ te satte jarāmaraṇam anveti. Khīrapako vaccho mātaram anveti iva, evaṃ te satte jarāmaraṇam anvetīti yojanā kātabbā. Atha vā khīrapako vaccho mātaram anveti iva, kumināmukhe gahitā macchā jarāmaraṇam anventi iva ca, evaṃ ye sattā kāmandhā pamattabandhanāya bandhitabbā, te sattā jarāmaraṇam anventīti yojanā.

“Idaṃ suttaṃyevā”ti vattabbattā –

“Cattārimāni, bhikkhave, agatigamanāni. Katamāni cattāri? Chandāgatiṃ gacchati, dosāgatiṃ gacchati, mohāgatiṃ gacchati, bhayāgatiṃ gacchati, imāni kho, bhikkhave, cattāri agatigamanāni. Idamavoca bhagavā, idaṃ vatvāna sugato, athāparaṃ etadavoca satthā –

“Chandā dosā bhayā mohā, yo dhammaṃ ativattati;
Nihīyati tassa yaso, kāḷapakkheva candimā”ti. –

Idaṃ saṃkilesabhāgiyaṃ suttanti –

Vuttaṃ. **Chandā** chandahetunā **dosā** dosahetunā **bhayā** bhayahetunā **mohā** mohahetunā **yo** rājādiko **yo** vinayadharādiko vā **dhammaṃ** sappurisadhammaṃ **ativattati** atikkamitvā vattati, **tassa** rājādino vā **tassa** vinayadharādino vā **yaso** kitti ca parivāro ca bhogo ca nihīyati. Candimā kāḷapakkhe pabhāya nihīyati iva, evaṃ nihīyatīti yojanā.

“Ettakamyevā”ti vattabbattā “**manopubbaṅgamā dhammā...pe... cakkamva vahato padanti idaṃ saṃkilesabhāgiyaṃ sutta**”nti vuttaṃ. Atho pākaṭo. **Aṭṭhakathāyampi** vibhatto.

“Middhī yadā hoti mahagghaso ca, niddāyitā samparivattasāyī;
Mahāvarāhova nivāpapuṭṭho, punappunaṃ gabbhamupeti mando”ti. –

Idaṃ suttampi saṃkilesabhāge visaye vācakañāpakabhāvena pavattanato **saṃkilesabhāgiyaṃ** suttam nāma. Nivāpapuṭṭho **mahāvarāho** gāmasūkaro **niddāyitā** supanasīlo samparivattasāyī hoti iva, evaṃ yo **mando** satto yadā mahagghaso hoti, so mando satto **middhī** thinamiddhābhībhitū hutvā **niddāyitā** muduphassasayane muduhatthehi parāmasito samparivattasāyī punappunaṃ gabbhaṃ upetīti yojanā.

“Ayasāva malaṃ samuṭṭhitam, tatuṭṭhāya tameva khādati;
Evaṃ atidhonacāriṇaṃ, sāni kammāni nayanti duggati”nti. –

Idaṃ suttampi saṃkilesabhāgiyaṃ suttam nāma. **Ayasā** ayato samuṭṭhitam jātamalaṃ **tatuṭṭhāya** tato ayato uṭṭhahitvā **tameva** ayaṃ khādati iva, evaṃ **atidhonacāriṇaṃ** atikkamitvā dhonacāripuggalaṃ **sāni** sayam katāni akusalakammāni duggatiṃ nayantīti yojanā.

“Coro yathā sandhimukhe gahīto, sakammunā haññati bajjhate ca;
Evaṃ ayaṃ pecca pajā parattha, sakammunā haññati bajjhate cā”ti. –

Idaṃ suttampi saṃkilesabhāgiyaṃ suttam nāma. Sandhimukhe rājapurisādīhi gahito coro **sakammunā** attanā katena corakammena haññati ca bajjhate ca yathā, evaṃ **ayaṃ** pāpakāriṇi pajā **parattha** paraloke pecca **sakammunā** sayam katena akusalakammunā sathādīhi haññati ca addubandhanādīhi bajjhate cāti yojanā.

“Sukhakāmāni bhūtāni, yo daṇḍena vihiṃsati;
Attano sukhamesāno, pecca so na labhate sukha”nti. –

Idaṃ suttampi saṃkilesabhāgiyaṃ suttam nāma. Attano sukhaṃ **esāno** esamāno **yo** satto aññāni sukhakāmāni bhūtāni daṇḍena vihiṃsati, **so** hiṃsako satto paraloke pecca sukhaṃ na labhatīti yojanā.

“Gunaṃ ce taramānānaṃ, jimhaṃ gacchati puṅgavo;
Sabbā tā jimhaṃ gacchanti, nette jimhaṃ gate sati.

“Evameva manussesu, yo hoti seṭṭhasammato;
So ce adhammaṃ carati, pageva itarā pajā;
Sabbam raṭṭham dukkham seti, rājā ce hoti adhammiko”ti. –

Idaṃ suttampi saṃkilesabhāgiyaṃ suttam nāma. Nadiṃ taramānānaṃ gunaṃ puṅgavo jimhaṃ ce gacchati, evaṃ nette jimhaṃ gate sati sabbā **tā** gāvīyo jimhaṃ gacchanti yathā, evameva manussesu **yo** rājā seṭṭhasammato, **so** rājā adhammaṃ carati, evaṃ raññe adhammaṃ carante sati itarā pajā **pageva** paṭhamameva adhammaṃ carati. Rājā adhammiko ce hoti, evaṃ raññe adhammike sati sabbam raṭṭham dukkham setīti yojanā.

“Sukiccharūpā vatime manussā, karonti pāpaṃ upadhīsu rattā;
Gacchanti te bahujanasannivāsaṃ, nirayaṃ avīciṃ kaṭukaṃ bhayānaka”nti. –

Idaṃ suttampi saṃkilesabhāgiyaṃ suttam nāma. Ye manussā **upadhīsu** kāmaguṇupadhīsu **rattā** rāgābhībhitū hutvā **pāpaṃ** akusalakammaṃ karonti, **ime** pāpakammakarā manussā **sukiccharūpā** vata

suṭṭhu kicchāpannarūpā vata bhavanti, **te** pāpakammakarā manussā kaṭukam bhayānakam bahujanasannivāsam nirayam avīcim gacchantīti yojanā.

“Phalam ve kadaliṃ hanti, phalam veḷum phalam naḷam;
Sakkāro kāpurisaṃ hanti, gabbho assatarim yathā”ti. –

Idam suttampi saṃkilesabhāgiyam suttam nāma. **Phalam** kadaliyā phalam kadaliṃ **ve** ekantena hanti yathā, phalam veḷum **ve** ekantena hanti yathā, phalam naḷam **ve** ekantena hanti yathā, gabbho **assatarim** mātarā **ve** ekantena hanti yathā, evam sakkāro kāpurisaṃ **ve** ekantena hantīti yojanā.

“Kodhamakkhagaru bhikkhu, lābhasakkāragāro;
Sukhette pūtibjāva, saddhamme na virūhati”ti. –

Idam suttampi saṃkilesabhāgiyam suttam nāma. **Sukhette** sundare khettepi khittam pūtibjāva na ruhati iva, evam yo bhikkhu lābhasakkāragāro **kodham** kujjhanalakkhaṇam kodham, **makkham** paraguṇasīlamakkhanalakkhaṇam makkhaṇca garuṃ katvā carati, so caranto bhikkhu saddhammasim na ruhatīti yojanā.

91. “Idhāham, bhikkhave, ekaccam puggalam paduṭṭhacittam evam cetasā ceto paricca pajānāmi... pe... iti me suta”nti **idam** suttampi saṃkilesabhāgiyam suttam nāma. Bhikkhave **idha** sāsane, loke vā aham ekaccam puggalam paduṭṭhacittam mama **cetasā** tassa **ceto** cittam **paricca** paricchindivā buddhacakkhunā evam pajānāmi. “Katham pajānāmi”ti ce puccheyya, yaṇca paṭipadam paṭipanno, yaṇca maggam samāruḷho ayam puggalo **yathā** yāya duppaṭipadāya yena dummaggena **iriyati** pavattati, tāya duppaṭipadāya tena dummaggena **imamhi** imasmim **samaye** duppaṭipajjanakāle **ayam** duppaṭipannaṃ paṭipanno dummaggasamāruḷho puggalo ce kālam kareyya, evam sati ābhatam vatthu nikkhittam yathā, evam niraye nikkhitto. Tam kissa hetu? Bhikkhave **assa** puggalassa cittam **paduṭṭham** padositam **hi** yasmā hoti, tasmā nikkhitto. Evam **idha** sāsane, loke vā cetopadosahetu ca pana ekacce **sattā** puggalā kāyassa bheda param maraṇā apāyam duggatiṃ vinipātam upapajjantīti pajānāmīti. Etamattham bhagavā avoca. **Tattha** tasmim sutte etam “paduṭṭhacittam ñatvāna...pe... nirayam so upapajjati”ti gāthāvacanaṃ **iti** evam vuccati.

Sattā **idha** sāsane, loke vā paduṭṭhacittam ekaccam puggalam ñatvāna bhikkhūnam santike etamattham byākāsi. **Imamhi** imasmim samaye ayam puggalo ce kālam kayirātha, evam sati paduṭṭhacittasamaṅgī hi nirayasmim upapajjeyya, puggalassa cittam padūsitam **hi** yasmā hoti, tasmā upapajjeyya, cetopadosahetu sattā duggatiṃ gacchanti ābhatam vatthum nikkhipeyya yathā, evamevam tathāvidho duppaṇṇo **so** padosacitto puggalo kāyassa bheda param maraṇā nirayam upapajjantīti ayampi attho bhagavatā vutto, iti **me** mayā sutanti yojanā.

“Sace bhāyatha dukkhassa, sace vo dukkhamappiyam;
Mākattha pāpakam kammaṃ, āvi vā yadi vā raho.

“Sace ca pāpakam kammaṃ, karissatha karotha vā;
Na vo dukkhā pamutyatthi, upeccapi palāyata”nti. –

Idam suttampi saṃkilesabhāgiyam suttam nāma. Sappurisā tumhe **dukkhassa** jātidukkhajarād dukkhabhāyādhi dukkhamaraṇadukkhāpāyadukkhā-atītavatṭamūlakadukkhānāgatavatṭamūlakadukkhāpaccuppannāhāramūlakadukkhāti aṭṭhavidhassa dukkhassa sace bhāyatha, **vo** tumhehi **dukkham** tathā aṭṭhavidham dukkham sace appiyam, evam sati āvi vā yadi raho vā pāpakam kammaṃ **mākattha** mā akattha. Sappurisā tumhe āvi vā yadi raho vā pāpakam kammaṃ sace karissatha vā sace karotha vā, evam sati **upeccapi** sañciccāpi **palāyatam** palāyantānam **vo** tumhākam **dukkhā** aṭṭhavidhā dukkhato **pamutti** muccanaṃ natthevāti yojanā.

“Adhammena dhanam laddhā, musāvādena cūbhayaṃ;
Mameti bālā maññanti, taṃ katham nu bhavissati.

“Antarāyā su bhavissanti, sambhatassa vinassati;
Matā saggam na gacchanti, nanu ettāvatā hatā”ti. –

Idam suttampi saṃkilesabhāgiyaṃ suttaṃ nāma. Ye bālā adhammena ca musāvādena ca **dhanam** saviññānāvīññānaṃ sabbaṃ labhitabbaṃ dhanam laddhā ubhayaṃ dhanam “mama dhana”nti maññanti, tesam bālānaṃ **taṃ** ubhayaṃ dhanam **katham** kena nu pakārena bhavissati, adhammena sambhatattā ciraṭṭhitikaṃ na hoti. **Antarāyā** rājantarāyādayo antarāyā tesam bālānaṃ bhavissanti. Yena adhammavohārādikena yaṃ dhanam sambhataṃ, **assa** adhammavohārādikassa taṃ sambhataṃ dhanam vinassati. **Matā** marantā te bālā **saggam** sugatiṃ na gacchanti. Sugati hi sobhanehi bhogehi aggoti “saggo”ti adhippetā. **Ettāvatā** ettakena diṭṭhadhammikasamparāyikānaṃ attahitānaṃ hāyanena te bālā **hatā** vinaṭṭhā bhavanti nanūti yojanā.

“Katham khaṇati attānaṃ, katham mittehi jīrati;
Katham vivaṭṭate dhammā, katham saggam na gacchati”.

“Lobhā khaṇati attānaṃ, luddho mittehi jīrati;
Lobhā vivaṭṭate dhammā, lobhā saggam na gacchati”ti. –

Idam suttampi saṃkilesabhāgiyaṃ suttaṃ nāma. Yojanattho pākaṭo.

“Caranti bālā dummedhā, amitteneva attanā;
Karontā pāpakaṃ kammaṃ, yaṃ hoti kaṭukapphalaṃ.

“Na taṃ kammaṃ kataṃ sādhu, yaṃ katvā anutappati;
Yassa assumukho rodaṃ, vipākaṃ paṭisevatī”ti. –

Idam suttampi saṃkilesabhāgiyaṃ suttaṃ nāma. **Dummedhā** nippaṇṇā bālā amittena pāpakaṃ kammaṃ kataṃ iva, evaṃ attanā kaṭukapphalaṃ yaṃ kammaṃ kataṃ hoti, taṃ pāpakaṃ kataṃ kammaṃ karontā caranti. Yaṃ kammaṃ katvā karonto pacchā anutappati, taṃ kataṃ kammaṃ na sādhu. **Yassa** kammaṃ vipākaṃ **rodaṃ** rudanto assumukho paṭisevatī, taṃ kataṃ kammaṃ na sādhūti yojanā.

“Dukkaraṃ duttitikkhaṇca...pe... avītarāgo”ti **idam** suttampi saṃkilesabhāgiyaṃ suttaṃ nāma. Suttattho **aṭṭhakathāyaṃ** vitthārato vutto.

“Appameyyaṃ paminanto, kodha vidvā vikappaye;
Appameyyaṃ pamāyinaṃ, nivutaṃ taṃ maññe akissava”nti. –

Idam suttampi saṃkilesabhāgiyaṃ suttaṃ nāma. **Idha** sāsane **appameyyaṃ** appameyyaguṇaṃ khīṇāsavaṃ puggalaṃ “ayaṃ khīṇāsavo puggalo ettakasīlo ettakasamādhi ettakapañño”ti paminanto **ko** puthujjano vikappaye. Appameyyaṃ khīṇāsavapuggalaṃ **pamāyinaṃ** pamāyantaṃ **taṃ** puthujjanaṃ ayaṃ **nivutaṃ** avakujjapaññaṃ **akissavaṃ** apaññanti **maññe** maññāmīti yojanā.

“Purisassa hi jātassa, kuṭhārī jāyate mukhe;
Yāya chindati attānaṃ, bālo dubbhāsitaṃ bhaṇaṃ.

“Na hi satthaṃ sunisitaṃ, visaṃ halāhalaṃ iva;

Evam viraddham pātetī, vācā dubbhāsītā yathā’’ti. –

Idam suttampi saṃkilesabhāgiyaṃ suttam nāma. **Dubbhāsitaṃ** ariyūpavādasāṅkhātaṃ pharusavācaṃ **bhaṇaṃ** bhaṇanto bālo duṭṭho puriso **yāya** kuṭṭhārīsadisīyā dubbhāsītavācāya attānaṃ chindati, sā kuṭṭhārīsadisī dubbhāsītavācā jātassa purisassa mukhe **jāyate** jāyati, sā dubbhāsītavācā mukhe jāyati iva, evaṃ sunisitaṃ satthaṃ mukhe na jāyati, yathā halāhalaṃ viṣaṃ mukhe na jāyati, dubbhāsītā vācā apāyesu **viraddham** puggalaṃ pātetī yathā, evaṃ sunisitaṃ satthaṃ apāyesu na pātetī, halāhalaṃ viṣaṃ apāyesu na pātetīti yojanā.

92. “Yo nindiyam pasamsati, tam vā nindati yo pasamsiyo;
Vicināti mukhena so kalim, kalinā tena sukham na vindati.

“Appamatto ayam kali, yo akkhesu dhanaparājayo;
Sabbassāpi sahāpi attanā, ayameva mahantataro kali;
Yo sugatesu manam padosaye.

“Sataṃ sahasānaṃ nirabbudānaṃ, chatṭimsatī pañca ca abbudāni;
Yamariyagarahī nirayam upeti, vācam manañca pañidhāya pāpaka’’nti. –

Idam suttampi saṃkilesabhāgiyaṃ suttam nāma. **Yo** puggalo **nindiyam** ducaraṃ dussīlaṃ puggalaṃ pasamsati, so pasamsako puggalo mukhena kalim **vicināti** upacināti, tena kalinā sukham na vindati. **Yo** sucārī sīlavā puggalo pasamsiyo hoti, **tam** vā sucāriṃ vā sīlavantaṃ puggalaṃ **yo** puggalo nindati, so nindanto puggalo mukhena kalim **vicināti** upacināti, tena kalinā sukham na vindati.

Attanā sahāpi **sabbassa** dhanassa vasenapi akkhesu yo dhanaparājayo bhavati, **ayam kali** ayam dhanaparājayo appamatto hoti. **Yo** puggalo sugatesu manam padosaye, tassa puggalassa yo kali bhavati, ayameva kali mahantataro hoti.

Kasmā? Vācañca manañca pañidhāya **ariyagarahī** puggalo **yam** kālam pāpakaṃ nirayam upeti, so kālo “sataṃ sahasānaṃ nirabbudānañca chatṭimsa nirabbudāni ca pañca abbudāni ca yasmiṃ kāle gaṇīyanti’’ti tena kālena samo hoti, tasmā mahantataro hotīti yojanā.

“Yo lobhaguṇe anuyutto...pe...
Gacchasi kho papataṃ ciraratta’’nti. –

Idam suttampi saṃkilesabhāgiyaṃ suttam nāma. **Yo** puggalo lobhaguṇe **anuyutto** anu punappunaṃ yutto hoti, **so** puggalo **aññe** puggale vacasā paribhāsati, assaddho kadariyo **avadaññū** buddhānaṃ ovādaññū na hoti, maccharī pesuṇiyam pesuṇiyasmiṃ anuyutto hoti.

Mukhadugga mukhavisama **vibhūta** vigatabhūta anariya **bhūnahu** buddhivināsaka pāpaka dukkaṭakāri **purisanta** purisalāmaka **kali** alakkhi avajātaputta tvaṃ nerayiko asi. **Idha** idāni bahubhāṇī mā hohi.

Ahitāya rajaṃ attani **mā ākirasi** mā pakkhipasi. Kibbisakāri tvaṃ **sante** khīṇāsava puggale garahasi, bahūni ducarītāni kammāni carasi, caritvā tvaṃ **cirarattaṃ** racanavirahitaṃ **papataṃ** narakaṃ nirayam gacchasi **kho** ekamsenāti yojanā.

Nānāvidham saṃkilesabhāgiyaṃ suttam ācariyena niddhāritaṃ, amhehi ca ñātaṃ, “katamaṃ vāsanābhāgiyaṃ sutta’’nti pucchitabbattā “**tattha katamaṃ vāsanābhāgiyaṃ sutta**’’ntiādi vuttaṃ. **Tatthāti** tesu soḷasasu saṃkilesabhāgiyādīsu suttasu katamaṃ suttam vāsanābhāgiyaṃ suttam nāmāti pucchati. “Manopubbaṅgamā dhammā...pe... chāyāva anapāyini’’ti idam vāsanābhāge puññabhāge

visaye vācakañāpakabhāvena pavattanato **vāsanābhāgiyaṃ** suttaṃ nāma. Attho pākaṭo.

93. “Mahānāmo sakko bhagavantaṃ etadavoca...pe... apāpikā kālaṅkiriya”ti **idaṃ** suttaṃpi vāsanābhāge puññabhāge visaye vācakañāpakabhāvena pavattanato **vāsanābhāgiyaṃ** suttaṃ nāma. Attho pākaṭo.

“Sukhakāmāni bhūtāni, yo daṇḍena na hiṃsati;
Attano sukhamesāno, pecca so labhate sukha”nti. –

Idaṃ suttaṃpi vāsanābhāgiyaṃ suttaṃ nāma. Attho pākaṭo.

“Gunaṃ ce taramānānaṃ...pe... rājā ce hoti dhammiko”ti **idaṃ** suttaṃpi vāsanābhāgiyaṃ suttaṃ nāma. Attho pākaṭo.

94. “Bhagavā sāvattihyaṃ viharati...pe... evaṃ pajānātī”ti **idaṃ** suttaṃpi vāsanā...pe... suttaṃ nāma. Attho pākaṭo.

“Kasmā bhagavā janapadacārikaṃ caratī”ti puccheyya, sattahi kāraṇehi buddhā bhagavanto janapadacārikaṃ caranti. Katamehi sattahi? Desantaragatānaṃ veneyyānaṃ vinayanatthaṃ, tatra t̥hitānaṃ ussukkasamuppādanatthaṃ, sāvakānaṃ ekasmiṃ t̥hāne nibaddhavāsanivāraṇatthaṃ, attano ca tattha nibaddhavāse anāsaṅgadassanatthaṃ, sambuddhavasitaṭṭhānatāya desānaṃ cetiyabhāvasampādanatthaṃ, bahūnaṃ sattānaṃ dassanūpasāṅkamaṇādīhi puññoghappasavanatthaṃ, avuṭṭhiādiupaddavūpasamanatthañcāti imehi sattahi kāraṇehi buddhā bhagavanto janapadacārikaṃ carantīti janapadacaraṇakāraṇaṃ veditabbaṃ.

“Ekapupphaṃ cajitvāna, sahasaṃ kappakoṭiyo;
Deve ceva manusse ca, sesena parinibbuto”ti. –

Idaṃ suttaṃpi vāsanābhāgiyaṃ suttaṃ nāma. **Sahassaṃ kappakoṭiyoti** sahasaṃ attabhāvato koṭiyo.

“Assatthe haritobhāse, saṃvirūḷhamhi pādape;
Ekaṃ buddhagataṃ saññaṃ, alabhiṃhaṃ patissato.

“Ajja tiṃsaṃ tato kappā, nābhijānāmi duggatiṃ;
Tisso vijjā sacchikatā, tassā saññāya vāsanā”ti. –

Idaṃ suttaṃpi vāsanābhāgiyaṃ suttaṃ nāma. **Haritobhāseti** haritaobhāse. **Alabhiṃhanti** ahaṃ alabhiṃ.

“Piṇḍāya kosalaṃ puramaṃ...pe... vipāko hoti acintiyō”ti **idaṃ** suttaṃpi vāsanābhāgiyaṃ suttaṃ nāma. Aggapuggalo anukampako taṇhānighātaṃ **muni** sambuddho purebhattaṃ **piṇḍāya** piṇḍaṃ paṭiggaṇhituṃ kosalaṃ puramaṃ pāvīsi.

Yassa purisassa hatthe sabbapupphehi alaṅkato **vaṭṭamsako** pupphavaṭṭamsakova atthi, **so** ayaṃ puriso rājamaggena kosalapuraṃ pavisaṅgaṃ bhikkhusaṅghapurakkhataṃ devamānusaṃpūjitaṃ sambuddhaṃ addasa, disvā haṭṭho cittaṃ pasādesi; pasādetvā sambuddhaṃ upasaṅkami.

Upasaṅkamitvā **so** ayaṃ **pasanno** hutvā surabhiṃ vaṇṇavantaṃ manoramaṃ taṃ vaṭṭamsakaṃ sambuddhassa sehi pāṇibhi upanāmesi.

Tato buddhassa **lapanantarā** lapanassa vadanassa antarā aggisikhā vaṇṇā saḥassaraṃsi **okkā** pabhā nikkhami, abbhā vijju nikkhamati iva, evaṃ ānanā saḥassaraṃsi nikkhamitvā ādiccabandhuno sīse tikkhattuṃ padakkhiṇaṃ **karitvāna** parivaṭṭetvā muddhani antaradhāyatha.

Ānando acchariyaṃ abbhutaṃ lomahaṃsanaṃ **idaṃ** pāṭihāriyaṃ disvā cīvaraṃ ekaṃsaṃ karitvā etaṃ abravi – “mahāmuni, sitakammaṃsa hetu ko? Taṃ hetuṃ byākarohi, dhammāloko bhavissati”ti.

Yassa bhagavato sabbadhammesu ñāṇaṃ sadā pavattati, kaṅkhāvitaraṇo muni so bhagavā kaṅkhiṃ vematikaṃ ānandaṃ therāṃ etaṃ abravi. Ānanda, yo sopuriso mayi cittaṃ pasādayi, so puriso caturāsītikappāni duggatiṃ na gamissati, devesu devasobhaggaṃ dibbaṃ rajjaṃ pasāsivā manujesu **raṭṭhe** sakalaraṭṭhe manujindo rājā bhavissati. **So** puriso carimaṃ pabbajitvā, dhammataṃ sacchikatvā ca dhutarāgo **vaṭṭasako** nāma paccekabuddho bhavissati.

Tathāgate vā sammāsambuddhe vā paccekasambuddhe vā **tassa** tathāgatassa sāvake vā citte pasannamhi dakkhiṇā appakā nāma natthi.

Buddhā **evaṃ** ettakāti acintiyā bhavanti. **Buddhadhammā** buddhaguṇā **evaṃ** ettakāti acintiyā bhavanti, acintiyā pasannānaṃ **vipāko** puññavipāko **evaṃ** ettakoti acintiyā hotīti etaṃ abravīti yojanā.

96. “Idhāhaṃ, bhikkhave, ekaccaṃ puggalaṃ...pe... ayampi attho vutto bhagavatā iti me suta”nti **idaṃ** suttampi vāsanābhāgiyaṃ suttamā nāma. Bhikkhave, **idha** imasmiṃ sāsane ahaṃ ekaccaṃ puggalaṃ evaṃ mama cetasā ekaccassa puggalassa **ceto** cittaṃ paricca buddhacakkhunā evaṃ pajānāmi, **yathā** yena pakārena ayaṃ puggalo yañca dānādipaṭipadaṃ paṭipanno, yañca dassanādimaggaṃ samāruḷho hutvā taṃ paṭipadaṃ, maggañca **iriyati** pavatteti, **imamhi** imasmiñca samaye **ayaṃ** puggalo ce kālaṃ kareyya, evaṃ sati ābhatam vattuṃ nikkhipati yathā, evaṃ tāya paṭipadāya tena maggena sagge attanikkhitto bhava. Taṃ kissa hetu? Bhikkhave, **assa** puggalassa cittaṃ **hi** yasmā **pasannaṃ** pasāditaṃ, tasmā nikkhitto bhava. **Idha** sāsane, loke vā ekacce **sattā** puggalā kāyassa bhedaṃ paraṃ maraṇā sugatiṃ saggam lokaṃ cetopasādahetu kho pana upapajjantīti evaṃ ahaṃ pajānāmīti bhagavā etaṃatthaṃ avoca. **Tattha** tasmim atthe saṅgahavasena pavattaṃ **etaṃ** “pasannacittaṃ ñatvāna...pe... saggam so upapajjati”ti gāthāvacaṇaṃ vuccati. Ayampi attho bhagavatā vutto, iti **me** mayā sutanti yojanā.

“Suvaṇṇacchadanaṃ nāvaṃ...pe... etādisaṃ katapuññā labhi”nti **idaṃ** suttampi vāsanābhāgiyaṃ suttamā nāma. **Nāri** devadhītā **suvaṇṇacchadanaṃ** suvaṇṇālaṅkārehi chāditaṃ nāvaṃ āruya tiṭṭhasi, **pokkharāṇiṃ** devapokkharāṇiṃ ogāhasi, padumaṃ pāṇinā chindasi.

Devate **kena** kammena **te** tava tādiso vaṇṇo tādiso ānubhāvo tādīsī juti bhavati, devate **te** tava ye keci bhogā manasā icchitā bhavanti, te bhogā ca kena kammena uppajjanti. Devate me pucchitā tvaṃ **samsa** samsāhi **idaṃ** sabbaṃ kissa kammaṃsa ca phalanti sakko pucchati.

Devarājena pucchitā sā devadhītā attamaṇā hutvā pañhaṃ puṭṭhā sakkassa byākāsi. Devarājā **addhānaṃ** dīghamaggaṃ paṭipannā ahaṃ yasassino **kassapassa** bhagavato manoramaṃ thūpaṃ addassaṃ, disvā **tattha** thūpe cittaṃ pasādesiṃ. Pasannāhaṃ sehi pāṇihi padumapupphehi pūjesiṃ. Tasseva kammaṃsa idaṃ sabbaṃ phalaṃ vipāko bhava. Katapuññāhaṃ etādisaṃ phalaṃ alabhinti sakkassa byākāsi. Iti me sutanti mahāmoggallāno vadatīti yojanā.

“Yathānidhāritasuttāniyeva vāsanābhāgiyasuttāni paripuñṇāni”ti vattabbattā “**dānakathā** **sīlakathā** **saggakathā** **puññakathā** **puññavipākakathā** **idaṃ vāsanābhāgiya**”ntiādi vuttam. Tattha yāya desanāya dānañca dānaphalañca dassitaṃ, sā desanā **dānakathā** nāma. Yāya desanāya sīlañca sīlaphalañca dassitaṃ, sā desanā **sīlakathā** nāma. Yāya desanāya saggā ca saggesu nibbattāpakañca kammaṃsa dassitaṃ, sā **saggakathā** nāma. Yāya desanāya dānasīlabhāvanādivasena dasavidhaṃ

puññakammaṃ dassitaṃ, sā **puññakathā** nāma. Yāya desanāya tādissassa puññakammassa vividho ayaṃ vipāko imassa puññassa vipākoti niyametvā dassito, sā **puññavipākakathā** nāma.

Dasabaladharānaṃ sammāsambuddhānaṃ uddissakatesu sarīradhātuṃ abbhantare ṭhapetvā paṃsūhi katesu thūpesu ye narā pasannā, te narā **tattha** thūpe **kāraṃ** puññaṃ katvā saggesu uppajjitvā pamodantīti yojanā. **Idaṃ** suttaṃ vā...pe... suttaṃ.

97. Devaputtasarīraṇṇā devaputtasarīrasadisavaṇṇā **subhagasaṅṭhiti** sobhaggayuttasaṅṭhānā **sabbe** janā udakena paṃsuṃ temetvā thūpaṃ vaḍḍhetha, so ayaṃ thūpo kassa puggalassa thūpoti pucchati.

Sugatte sundaragatte devate **tasmim** thūpe pasannā ime devamanujā **kāraṃ** puññaṃ karontā hutvā jarāmarāṇato pamuccare. So ayaṃ thūpo mahesino dasabaladhammadhārino sugatassa thūpoti veditabboti āhāti yojanā. **Idaṃ** suttaṃ vā...pe... suttaṃ.

Yāhaṃ yā ahaṃ mahesino thūpaṃ cattāri uppalāni ca mālañca abhiropayim, tena mayā kataṃ **taṃ** puññaṃ ulāraṃ vata **āsi** ahosi. **Tato** kappato ajja kappā tiṃsaṃ dharanti satthuno thūpaṃ pūjetvā tattakāni duggatiṃ na jānāmi, vinipātaṃ na gacchāmīti yojanā. **Idaṃ** suttaṃ vā...pe... suttaṃ.

Ahaṃ **bāttimsalakkhaṇadhara**ssa bāttimsalakkhaṇadharena sampannassa vijitavijayassa lokanāthassa thūpaṃ apūjesim, pūjetvā **satasahassaṃ kappe** āyukappe pamudito āsim. Mayā yaṃ puññaṃ pasutaṃ, tena puññaṇa vinipātaṃ **anāgantuna** anāgantvā **devasobhaggaṃ** sampattim ca devarajjāni ca tāni akārim. Atha vā devasobhaggañca mayā kāritaṃ, rajjāni ca mayā kāritāni.

Adantadamakassa sāsane **yaṃ cakkhu** paññācakkhu paṇihitaṃ, tathā **cittaṃ** yaṃ vimuttacittaṃ paṇihitaṃ, taṃ sabbam paññācakkhu vimuttacittaṃ **me** mayā laddhaṃ, ahaṃ vidhūtalatāsankhātataṇhā hutvā **vimuttacittā** phalavimuttacittasampannā amhīti avocāti yojanā. **Idaṃ** suttaṃ vā...pe... suttaṃ.

98. Vimuttacitte phalavimuttacittasampanne **akhile** pañcacetokhīlarahite anāsave **araṇavihārimhi** araṇavihārasīle **asaṅgamānase** alaggamānase paccekabuddhasmiṃ sāmākapatthodanamattameva dakkhiṇaṃ adāsim.

Tasmim paccekabuddhe **uttamaṃ dhammaṃ** paccekabodhidhammaṃ **okappayim** “so uttamo dhammo atthī”ti saddahim. **Evaṃ** ariyavihārena vihārīhi paccekabuddhehi **me** mama saṅgamo kato **siyā** bhave, kudāsupi ca ahaṃ apekkhavā mā bhaveyyanti mānasaṃ tasmiñca dhamme **paṇidhesim** “iminā paccekabuddhena laddhadhammaṃ ahampi sacchikareyya”nti cittaṃ paṇidahim.

Tasseva paccekabuddhe katasseva kammassa vipākato ahaṃ dīghāyukesu **amamesu** “mama pariggaho”ti pariggahābhāvena apariggahesu visesagāmīsu ahīnagāmīsu **kurūsu** uttarakurūsu **pāṇīsu** sattesu sahasakkhattuṃ **upapajjatha** upapajjim.

Tasseva kammassa vipākato vicitramālābharaṇānulepīsu **yasassīsu** parivāravantesu **tidaso** devo ahaṃ visiṭṭhakāyūpagato hutvā sahasakkhattuṃ upapajjatha.

Tasseva kammassa vipākato ahaṃ vimuttacitto akhīlo anāsavo hutvā **hitāhitāsīhi** kusalākusalavītivattehi antimadehadhāribhi **imehi** paccekabuddhehi, buddhasāvakehi vā **me** mama samāgamo āsi.

“Sīlavato yaṃ icchitaṃ, taṃ samijjhate”ti imaṃ vacanaṃ tathāgato jino paccakkhaṃ katvā avaca kho, **yathā yathā** yena yena pakārena me manasā vicintitaṃ, **tathā** tathā tena tena pakārena samiddhaṃ

bhavati. **Ayaṃ** bhavo antimo bhavoti yojanā. **Idaṃ** suttaṃ vā...pe... suttaṃ.

Ekatiṃsamhi kappamhi jino anejo anantadassī “**sikhī**”ti itināmako uppajji. Tassāpi bhagavato rājā bhātā **sikhiddhe** ca sikhī itināmako buddhe ca tassa bhagavato **dhamme** ca abhippasanno lokavināyakamhi parinibbute sati devātidevassa naruttamassa mahesino vipulaṃ mahantaṃ samantato gāvutikaṃ thūpaṃ akāsim.

Tasmiṃ thūpe **balim** pūjābalim abhihārī manusso jātisumanam paggayha pahaṭṭho pūjesi. **Assa** manussassa ekaṃ pupphaṃ vātena paharitaṃ hutvā patitaṃ. Ahaṃ **taṃ** patitaṃ ekaṃ pupphaṃ gahetvā **tasseva** pupphasāmikassa adāsim.

So manusso pupphasāmiko abhippasannacitto hutvā maṃ “tvameva etaṃ ekaṃ pupphaṃ pūjā”ti adāsi. **Dadāsī**ti ettha da-kāro āgamo. Ahaṃ **taṃ** ekaṃ pupphaṃ gahetvā **buddhaṃ** buddhaguṇam punappunam anussaranto yasmim kappe abhiropayim, **tato** kappato ajja kappā tiṃsam ahesum. Tesu kappesu duggatiṃ nābhijānāmi, vinipātañca na gacchāmi, idaṃ phalaṃ thūpapūjāya phalanti avocāti yojanā. **Idaṃ** suttaṃ vā...pe... suttaṃ.

Brahmadattassa brahmadattanāmakassa rājino kapilaṃ nāma nagaraṃ **suvibhattaṃ** bhāgato sutṭhu vibhattaṃ, **mahāpathaṃ** mahāpathasampannaṃ **ākiṇṇaṃ**, nānājātikhehi manussehi paripuṇṇam, iddhaṃ phītañca āsi.

Pañcālānaṃ tattha puruttame ahaṃ kummāsaṃ vikkiṇim, so ahaṃ yasassinam **upariṭṭhaṃ** upasamīpe ṭhitaṃ ariṭṭhaṃ nāma **sambuddhaṃ** paccekabuddhaṃ addasim, disvā haṭṭho cittaṃ pasādetvā naruttamaṃ ariṭṭhaṃ me gehasmim **yaṃ** dhuvabhattaṃ **vijjatha** vijji, tena dhuvabhattena nimantesim.

Yato ca yasmim kāle ca kattiko yassaṃ pannarasīpuṇṇo, sā **puṇṇamāsī** pannarasī upaṭṭhitā, **tato ca** tasmiṃ kāle ca ahaṃ navaṃ dussayugaṃ gayha **ariṭṭhassa** ariṭṭhanāmakassa paccekabuddhassa upanāmesim.

Naruttamo anukampako kāruṇiko taṇhānighātako **muni** paccekabuddho **pasannacittaṃ** maṃ ṇatvāna paṭiggaṇhi.

Ahaṃ kalyāṇaṃ buddhavaṇṇitaṃ kammaṃ karitvāna deve ca manusse ca sandhāvitvā tato cuto bārāṇasiyaṃ nagare adḍhe kulasmim seṭṭhissa ekaputtako uppajjim, pāṇehi ca piyataro āsim.

Tato ca tasmiṃ kāle viññutaṃ patto hutvā devaputtena codito ahaṃ pāsādā oruhitvāna **sambuddhaṃ** bhagavantaṃ gotamaṃ upasaṅkamim.

So sambuddho bhagavā gotamo anukampāya me dhammaṃ adesesi. **Dukkhaṃ** dukkhasaccañca **dukkhasamuppādaṃ** samudayasaccañca **dukkhassa atikkamaṃ** nirodhasaccañca ariyaṃ aṭṭhaṅgikaṃ dukkhūpasamagāminam **maggam** maggasaccañca iti cattāri saccāni desitāni, taduppādaṃ dhammaṃ **muni** bhagavā gotamo adesayi.

Ahaṃ **tassa** bhagavato gotamassa vacanaṃ sutvā sāsane rato hutvā viharim, ahaṃ rattindivaṃ atandito hutvā samathaṃ paṭivijjim.

Ajjhattaṃ ye āsavā, bahiddhā ca ye āsavā maggena samucchinnā āsum, **sabbe** te āsavā **me** mama vijjimsu, puna na ca uppajjare.

Dukkhaṃ “pariyantakatam yassa dukkhassā”ti **pariyantakatam** āsi, ayaṃ samussayo jātimaraṇasaṃsāro **carimo** antimo āsi, idāni imassa attabhāvassa anantaram punabbhavo mama natthīti avocāti yojanā. Yaṃ nānāvidhaṃ vāsanābhāgiyaṃ suttaṃ udāharaṇavasena niddhāritam, **idaṃ** nānāvidhaṃ suttaṃ vāsanābhāge puññakoṭṭhāse visaye vācakañāpakabhāvena pavattanato **vāsanābhāgiyaṃ** suttaṃ nāma.

Nānāvidhaṃ vāsanābhāgiyaṃ suttaṃ ācariyena niddhāritam, amhehi ca ñātam, “katamaṃ nibbedhabhāgiyaṃ sutta”nti pucchitabbattā “**tattha katamaṃ nibbedhabhāgiyaṃ sutta**”ntiādi vuttaṃ. **Tattha** tesu soḷasasu saṃkilesabhāgiyādīsu suttesu katamaṃ suttaṃ nibbedhabhāgiyaṃ suttaṃ nāmāti pucchati.

Uddham brahmaloke **adho** kāmāvacare bhava **sabbadhi** sabbesu bhavesu **vippamutto** arahā “**ayaṃ** nāma dhammo ahaṃ asmī”ti anānupassī, evaṃ vimutto arahā atinṇapubbaṃ oghaṃ apunabbhavāya **udatāri** uttiṇṇoti yojanā. **Idaṃ** suttaṃ nibbedhabhāge sekkhadhamme visaye vācakañāpakabhāvena pavattanato **nibbedhabhāgiyaṃ** suttaṃ nāma.

“Ettakamevā”ti vattabbattā “**sīlavato**”tiādi vuttaṃ. Ānanda, sīlavato puggalassa “kinti **me** mama avippaṭṭisāro **jāyeyya** pavatteyyā”ti cetanā **na karaṇīyā** na kātabbā. Ānanda, sīlavato avippaṭṭisāro yaṃ **jāyeyya** pavatteyya, **esā** avippaṭṭisārassa jāyanā pavattanā dhammatā bhavati. Ānanda, **avippaṭṭisārinā** puggalena “kinti **me** mama pāmojjam **jāyeyya** pavatteyyā”ti cetanā na karaṇīyā, ānanda, **avippaṭṭisāriṇo** puggalassa pāmojjam yaṃ **jāyeyya** pavatteyya, **esā** pāmojjassa jāyanā pavattanā dhammatā. Sesesupi imassa yojanānāyānusārena yojanānayo gahetabbo. **Idaṃ** suttampi nibbedhabhāgiyaṃ suttaṃ nāma.

Ātāpino kilesānaṃ ātāpena sammappadhānena samannāgatassa **jhāyato** jhāyantassa **brāhmaṇassa** bāhitapāpassa khīṇāsavassa **dhammā** anulomapaccayākārapaṭivedhasādhakā bodhipakkhiyadhammā **yadā** yasmim kāle **have** ekantena **pātubhavanti** uppajjanti. Atha vā **dhammā** catuariyasaccadhammā **pātubhavanti** pakāsayanti abhisamayavasena pākaṭā honti. **Atha** vā pātubhavanakāle **assa** ātāpino jhāyato brāhmaṇassa khīṇāsavassa sabbā kaṅkhā **vapayanti** apagacchanti nirujjhanti. Kasmā? **Sahetudhammam** avijjādikena hetunā saha pavattaṃ saṅkhārādikaṃ sukkena asammissaṃ dukkhakkhandhadhammaṃ **yato** yasmā **pajānāti** aññāsi paṭivijjhanti, tato tasmā vapayanti apagacchanti nirujjhantīti yojanā. **Idaṃ** suttaṃ nibbedhabhāgiyaṃ suttaṃ nāma.

Dutiyagāthāyaṃ pana **paccayānaṃ khayam** khayasaṅkhātaṃ nibbānaṃ **yato** yasmā **avedi** aññāsi paṭivijjhanti, tato tasmā sabbāpi kaṅkhā vapayantīti yojanā. **Idaṃ** suttaṃ nibbedhabhāgiyaṃ suttaṃ.

Tissa, tvaṃ kiṃ nu kujjhasi? Mā kujjhi, tissa, **te** tava **akkodho** akujjhanam **varaṃ** uttamaṃ, **hi** saccaṃ, tissa, tayā kodhamānamakkhavinayattham brahmacariyaṃ vussati nūti bhagavā avocāti yojanā.

Āraññaṃ āraññaṃ paṃsukūlikaṃ **aññātuñchena** aññātaanabhilakkhitagharapaṭipāṭiyā ṭhatvā uñchena piṇḍapātacaraṇavīriyena laddhena missakabhojanena yāpentaṃ nandaṃ **kadā** kāle ahaṃ passeyyanti avocāti yojanā. **Idaṃ** suttaṃ nibbedhabhāgiyaṃ suttaṃ.

Gotama, **kiṃsu** katamaṃ **chetvā** vadhitvā vadhanto kodhapariḷāhena aparidayhamāno hutvā sukhaṃ **seti** sayati, **kiṃsu** katamaṃ **chetvā** vadhitvā vadhanto kodhavināsenā vīnaṭṭhadomanasso hutvā na socati, gotama, tvaṃ kissa ekadhammassa **vadham** vadhanaṃ rocesīti brāhmaṇo pucchati.

Brāhmaṇa, **kodham** kujjhanam **chetvā** vadhitvā vadhanto kodhapariḷāhena aparidayhamāno hutvā sukhaṃ **seti** sayati, **kodham** kujjhanam **chetvā** vadhitvā vadhanto kodhavināsenā vīnaṭṭhadomanasso hutvā na socati, **visamūlassa** visasadisassa dukkhassa mūlabhūtaṃ **madhuraggassa**

madhurasāṅkhātassa sukhapariyosānassa **kodhassa** kujjhanassa **vadham** vadhanam **ariyā** buddhādayo puggalā pasamsanti. **Hi** saccam **taṃ** kodham kujjhanam **chetvā** vadhitvā vadhanto kodhavināsenā vinatṭhadomanasso hutvā **seti** sayatīti yojanā. **Madhuraggassāti** ca madhuram cetasikasukham assādaaggam pariyoṣānam assa kodhassāti **madhuraggoti** samāso veditabbo. Kujjhantassa hi akkositvā paribhāsivā paharivā pariyoṣāne cetasikasukhassādo uppajjatīti. **Idam** suttaṃ nibbedhabhāgiyaṃ suttaṃ.

Gotama, hananto dhīro uppatitaṃ **kiṃsu** katamaṃ **hane** haneyya. Vinodento dhīro jātaṃ **kiṃsu** katamaṃ **vinodaye** vinodayeyya. Pajahanto dhīro **kiṃ ca** katamaṃ **pajahe** pajaheyya. Dhīrassa **kissa** dhammassa abhisamayo sukhoti devatā pucchati.

Devaputta, hananto dhīro uppatitaṃ **kodham** kujjhanam **hane** haneyya. Vinodento dhīro jātaṃ rāgam **vinodaye** vinodayeyya. Pajahanto dhīro avijjam **pajahe** pajaheyya. Saccadhammassa abhisamayo sukhoti bhagavā avocāti yojanā. **Idam** suttaṃ nibbedhabhāgiyaṃ suttaṃ.

101. Bhagavā sattiya **omaṭṭho** uparito yāva heṭṭhā viddho puriso sattippahānāya vīriyaṃ ārabhati viya, agginā matthake **dayhamāno** ādittasiro puriso agginibbāpanatthāya vīriyaṃ ārabhati iva, evaṃ kāmarāgena **dayhamāno** bhikkhu **kāmarāgappahānāya** kāmarāgavikkhambhānāya appamatto vāyamamāno **sato** satisampanno hutvā **paribbaje** vihareyyāti devatā kathesi.

Bhagavā pana “samucchedappahānāya vīriyaṃ ārabhīyati” ti dassetuṃ “**sattiya viya omaṭṭho**” tiādimāha. Devaputta, sattiya **omaṭṭho** puriso sattippahānāya vīriyaṃ ārabhati viya, agginā matthake **dayhamāno** ādittasiro puriso agginibbāpanatthāya vīriyaṃ ārabhati iva, evaṃ sakkāyadiṭṭhiyā abhibhūto bhikkhu sakkāyadiṭṭhiyā **pahānāya** maggena samucchedappahānāya appamatto vāyamamāno **sato** satisampanno hutvā **paribbaje** vihareyyāti bhagavā avocāti yojanā. **Idam** suttaṃ nibbedhabhāgiyaṃ suttaṃ nāma.

Sabbe **nicayā** bhogā **khayantā** khayapariyoṣānā bhavanti, sabbe **samussayā** dhammā **patanantā** patanapariyoṣānā bhavanti, **sabbesaṃ** sattānaṃ maraṇamāgama **sabbesaṃ** sattānaṃ jīvitam addhuvam bhavati, iti **etaṃ** vuttappakāram **bhayaṃ** bhayahetuṃ **marāṇam** sammutimaraṇam **apekkhamāno paṇḍito sukhāvahāni** diṭṭhadhammikasamparāyikasukhāvahāni **puññāni** dānasīlabhāvanāmayapuññāni kayirāthāti devatā avoca.

Devaputta, sabbe **nicayā** bhogā **khayantā** khayapariyoṣānā, sabbe **samussayā** dhammā **patanantā** patanapariyoṣānā, **sabbesaṃ** sattānaṃ maraṇamāgama **sabbesaṃ** sattānaṃ jīvitam addhuvam, iti **etaṃ** vuttappakāram **bhayaṃ** bhayahetuṃ maraṇam **apekkhamāno santipekkho** sabbasaṅkhārupasamaṃ nibbānaṃ **apekkhamāno paṇḍito lokāmisam** kāmaguṇam **pajahe** pajaheyyāti bhagavā avocāti yojanā. **Idam** suttaṃ nibbedhabhāgiyaṃ suttaṃ nāma.

Māvidha **yesam** munīnaṃ cittaṃ **jhānarataṃ** jhāne rataṃ hoti, te munayo sukham sayanti na socanti. **Paññavā** maggapaññavā susamāhito āradhāvīriyo **pahitto** nibbānaṃ pesitacitto puggalo duttaraṃ **ogham** saṃsārogham tarati.

Kāmasaññāya **virato** vigatacitto yo khīṇāsavo **sabbasaṃyojanātito** arahattamaggena sabbe saṃyojane atīto nandibhavaparikkhīṇo ahoṣi, **so** khīṇāsavo **gambhīre** saṃsāraṇṇave na sīdatīti yojanā. Nandisaṅkhātā taṇhā ca kāmabhavarūpabhavaarūpabhavā ca **nandibhavā**, nandibhavā parikkhīṇā yassa khīṇāsavassāti **nandibhavaparikkhīṇoti** samāso veditabbo. **Idam** suttaṃ nibbedhabhāgiyaṃ suttaṃ nāma.

Arahatam arahantānaṃ buddhapaccekabuddhasāvakanānaṃ **dhammam** sucaritādibhedañca

sattatiṃsabodhipakkhiyabhedañca dhammaṃ yo paṇḍito **saddahāno** saddahanto hutvā nibbānappattiyā **appamatto** vicakkhaṇo hutvā **sussūsaṃ** sussūsanto bhavē, so paṇḍito **paññaṃ** lokiyalokuttarapaññaṃ **labhate** labhati.

Yo vīriyavā puggalo **patirūpadesakārī** desakālādīni ahāpetvā lokiyalokuttaradhammapatirūpaṃ adhigamūpāyaṃ karoti, **dhuravā** cetasikavīriyena anikkhittadhuro **uṭṭhātā** kāyikavīriyavasena uṭṭhānasampanno hoti, so vīriyavā puggalo **dhanaṃ** lokiyalokuttaradhanaṃ **vindate** adhigacchati. **Saccena** vacīsaccena ca paramatthasaccena ca buddhādiko saccadhamme ṭhito sappuriso kittiṃ pappoti. **Dadaṃ** dadanto yaṃ kiñci icchitaṃ patthitaṃ catusaṅghavattumaṃ dadanto saṅghanto sappuriso **mittāni** ekantamittāni **ganthati** sampādeti, **evaṃ** catūhi saccadhammadhitticāgehi samannāgato so sappuriso **asmā** lokā paraṃ lokamaṃ **pecca** gantvā ekantena sokakāraṇassa abhāvato na socatīti yojanā.

Gotama, sabbaganthappahīno tīhi bhavēhi vippamutto **sato** satisampanno tvamaṃ, samaṇo, **aññaṃ** devamanussādikaṃ **yaṃ anusāsasi** yaṃ anusāsanamaṃ karosi, **taṃ** anusāsanamaṃ sabbaganthappahīnassa tīhi bhavēhi **vippamuttassa** samaṇassa **te** tava na sādhiṭi sakkānāmaṃ mārapakkhiko yakkho gāthāya ajjhabhāsi.

“**Sakka** sakkānāmaṃ yakkha anukampitena purisena saddhiṃ yena kenaci **vaṇṇena** kāraṇena **saṃvāso** ekasmiṃ ṭhāne saḥavāso jāyati, **taṃ** anukampitabbaṃ saḥavāsaṃ purisaṃ sappaññaṃ manasā **anukampitumaṃ na arahati** anukampitumaṃ yeva arahati. Yā **anukampā** karuṇā, yā **anuddayā** mettā, muditā ca uppannā, tāya anukampāya karuṇāya, tāya anuddayāya mettāya muditāya ca samussāhitena pasannena manasā yo **sappañño** sappuriso **aññaṃ** devamanussādikaṃ **yaṃ anusāsati** yaṃ anusāsanamaṃ karoti, so sappaññaṃ sappuriso tena anusāsanena **saṃyutto** kāmacchandādīnaṃ saṃyojanānaṃ vasena ananulomasamyogena saṃyutto na hotīti bhagavā avocāti yojanā.

102. Samaṇa, rāgo ca doso ca ime dve dhammā **kutonidānā**, kiṃnidānā, kiṃpaccayā bhavanti, arati ca rati ca lomahaṃso ca ime tayo kutojā kuto bhavanti? Kumārakā **dhāṅkaṃ** kākaṃ gahetvā pāde dīghasuttakena bandhitvā suttakoṭiṃ aṅguliyaṃ veṭhetvā osajanti iva, evamaṃ manovitakkā kuto samuṭṭhāya cittaṃ osajantīti sūcilomayakkho bhagavantaṃ pucchi.

Rāgo ca doso ca ime dve dhammā **itonidānā** ito attabhāvato nidānā jāyanti; arati ca rati ca lomahaṃso ca ime tayo **itojā** ito attato bhavanti; kumārakā **dhāṅkaṃ** kākaṃ gahetvā pāde dīghasuttakena bandhitvā suttakoṭiṃ aṅguliyaṃ veṭhetvā osajanti iva, evamaṃ manovitakkā **ito** attabhāvato samuṭṭhāya cittaṃ osajanti.

Nigrodhassa **khandhajā** pārohā sākāsu jāyanti iva, vane rukkhaṃ nissāya jātā **māluvā** latā taṃ rukkhaṃ ajjhottharivā **vitatā** otatavitatā tiṭṭhatī iva, evamaṃ, yakkha, tvamaṃ suṇohi **snehajā** taṇhāsnehato jātā **attasambhūtā** attani sambhūtā puna anekappakārā **manovitakkā** pāpamanovitakkā ceva taṃsampaṃyuttakilesā ca **kāmesu** vatthukāmesu **visattā** laggā saṃsibbitā ṭhitā.

Ye paṇḍitā “yaṃ nidānaṃ assa attabhāvassā”ti **yatonidānaṃ naṃ** kilesagahanaṃ samudayasaccaṃ pajānanti, **te** paṇḍitā attabhāvasaṅkhātassa dukkhasaccassa nidānabhūtaṃ **naṃ** kilesagahanaṃ samudayasaccaṃ maggasaccena **vinodenti**. **Apunabbhavāya** apunabhavasāṅkhātāya nirodhasaccatthāya **atiṇṇapubbaṃ** anamatagge saṃsāre supinenāpi **atiṇṇapubbaṃ duttaraṃ imaṃ oghaṃ** catubbidhaṃ saṃkilesoghaṃ tarantīti bhagavā avocāti yojanā.

“Bhagavā, samaṇadhammassa karaṇaṃ nāma **dukkaraṃ**, bhagavā, samaṇadhammassa karaṇaṃ nāma **sudukkaraṃ** suṭṭhutaṃ dukkara”nti eko kulaputto pabbajitvā samaṇadhammaṃ katvā ariyabhūmiṃ appatvā kālaṃ katvā devaloke nibbato, so devaputto bhagavantaṃ upasaṅkamitvā āha. Kāmada, sīlasamāhitā **ṭhitattā** ṭhitasabhāvā satta **sekkhā** puggalā **dukkaraṃ vāpi** samaṇadhammaṃ karonti. **Anagāriyupetassa** anagāriyaṃ niggehabhāvaṃ upagatassa pabbajitassa **tuṭṭhi**

catupaccayasantoso sukhāvahā hotī’ ti bhagavā avoca.

“Bhagavā, **yadidaṃ** yā esā tuṭṭhi sukhāvahā, esā tuṭṭhi dullabhā’ ti so devaputto āha. “Kāmada, **yesaṃ** sekkhānaṃ mano divā ca ratto ca **bhāvanāya rato** cittavūpasame rato, te sekkhā dullabhaṃ vāpi tussanaṃ labhanti’ ti bhagavā avoca.

“Bhagavā, **yadidaṃ** yaṃ idaṃ cittaṃ bhāvanāya rataṃ, taṃ cittaṃ dussamādaha’ nti so devaputto āha. “Kāmada, ye ariyā indriyūpasame rattindivaṃ ratā, te ariyā dussamādahaṃ vāpi cittaṃ samādahanti, kāmada, te ariyā maccuno **jālaṃ** kilesajālaṃ chetvā maggaṃ gacchantī’ ti bhagavā avoca.

“Bhagavā, yo maggo pubbhāgapaṭipadāvasena visamo, so maggo duggamo’ ti so devaputto āha. “Kāmada, ariyā duggame visame vāpi maggaṃ gacchanti, anariyā visame magge avamsirā papatanti, ariyānaṃ so maggo samova bhava, na asamo. **Hi** saccaṃ **visame** visattakāye ariyā samā bhavanti’ ti bhagavā avocāti yojanā.

103. Yaṃ jetavanaṃ isisaṅghanisevitaṃ dhammarājena āvutthaṃ, idaṃ taṃ jetavanaṃ mama **pīṭisaṅjananaṃ** pīṭiyā saṅjananaṃ karaṃ hi karaṃ eva.

Kammaṃ maggacetaṇākammañca **vijjā** maggapaññā ca **dhammo** samādhi ceva samādhipakkhiko ca dhammo **sīlaṃ**, sīle ṭhitassa **jīvitam** uttamaṃ, **etena** aṭṭhaṅgikena maggena sattā sujjhanti, gottena vā dhanena vā sattā na sujjhanti.

Tasmā maggeneva sattānaṃ visujjhanato attano atthaṃ **sampassaṃ** passanto paṇḍito poso **yoniso** upāyena **dhammaṃ** bodhipakkhiyadhammaṃ **vicine** vicineyya, **evaṃ** vicinane sati **tattha** ariyamagge vicinanto puggalo sujjhati.

Sāriputto sīlena ca upasamena ca pāraṅgato iva, evaṃ yopi bhikkhu sīlena ca upasamena ca pāraṅgato, so bhikkhu **etāva paramo** sāriputtasadisova siyāti anāthapiṇḍikanāmo devaputto bhagavantaṃ upasaṅkamitvā āhāti yojanā. **Idaṃ** suttaṃ nibbedhabhāgiyaṃ suttaṃ nāma.

Atītaṃ atītakkhandaṃ ca taṇhādīṭṭhihi nānvāgameyya, **anāgataṃ** anāgatakkhandaṃ ca taṇhādīṭṭhihi **nappaṭikaṅkhe** na pattheyya. **Yaṃ** yasmā atītaṃ **pahīnaṃ** niruddhaṃ atthaṅgataṃ, tasmā atītassa pahīnattā niruddhattā atthaṅgatatā nānvāgameyya. **Yaṃ** yasmā anāgataṃ appattaṃ, tasmā na paṭikaṅkhe.

Paccuppannaṃ khandhapaṅcakaṃ vayadhammaṃ yattha yattha santāne vā, yattha yattha araṅgādīsu vā uppannaṃ, **tattha tattha** santāne vā, **tattha tattha** araṅgādīsu vā naṃ paccuppannadhammaṃ yāhi aniccānupassanādīhi vipassati, tāhi aniccānupassanādīhi nibbānaṃ rāgādīhi asaṃhīraṃ asaṃkupaṃ bhavati, **taṃ** nibbānaṃ vipassako puggalo vidvā nibbānārammaṇaṃ phalasaṃpattiṃ appento hutvā **anubrūhaye** vaḍḍheyya.

Ātappaṃ saṃkilesānaṃ ātapantaṃ vīriyaṃ ajjeva **kiccaṃ** kātabbaṃ, suve jīvitam vā maraṇaṃ vā ko **jaññā** jāneyya, “suve vā dānādipuññaṃ jānissāmi’ ti cittaṃ anuppādetvā “ajjeva karissāmi’ ti evaṃ vīriyaṃ kātabbaṃ. **Hi** saccaṃ maraṇakāraṇabhāvatāya ahivicchikavisasatthādiānekāya senāya vasena **mahāsenena tena** maccunā saddhiṃ mittasanthavākārena vā laṅjadānena vā saṅgaraṃ natthīti.

Evaṃ manasi katvā **vihāriṃ** viharantaṃ ātāpiṃ ahorattaṃ **atanditaṃ** analasaṃ utṭhāhakaṃ sappurisaṃ “bhaddekaratto’ ti santo muni **ve** ekantena **ācikkhate** ācikkhatiyevāti yojanā.

“**Cattārimāni bhikkhave**” tyādisuttaṃ pālito ca aṭṭhakathāto ca pākaṭaṃ.

104. Nānāvidhaṃ nibbedhabhāgiyaṃ suttaṃ ācariyena niddhāritaṃ, amhehi ca ñātaṃ, “katamaṃ asekkhabhāgiyaṃ sutta”nti pucchitabbattā “**tattha katamaṃ asekkhabhāgiyaṃ sutta**”ntiādi vuttaṃ. **Tatthā**ti tesu soḷasasu saṃkilesabhāgiyādīsu suttesu **katamaṃ** suttaṃ asekkhabhāgiyaṃ suttaṃ nāmāti pucchati.

Yassa uttamapurisassa cittaṃ selūpamaṃ **ṭhitaṃ** lokadhammavātehi nānukampati, **rajanīyesu** lābhādīsu virattaṃ bhava, so uttamapuriso **kopaneyye** alābhādike na kuppati, tassa uttamapurisassa cittaṃ evaṃ aniccatādinā bhāvitaṃ, **naṃ** bhāvitacittaṃ uttamapurisaṃ vītikkantalokadhammahetukaṃ dukkhaṃ kuto essatīti yojanā. **Idaṃ** suttaṃ asekkhabhāge visaye vācakañāpakabhāvena pavattanato **asekkhabhāgiyaṃ** suttaṃ nāma. Esa nayo ito paresupi veditabbo.

“Asekkhabhāgiyaṃ suttaṃ idamevā”ti vattabbabhāvato “**āyasmato cā**”tiādi vuttaṃ.

Yo brāhmaṇo bāhitapāpadhammattā **bāhitapāpadhammo** bhava, so brāhmaṇo niggatahuṃhuṃkattā **nihuṃhuṃko** bhava, niggatakilesakasāvattā **nikkasāvo** bhava, sīlasaṃvarena saṃyatacittatāya **yatto** bhava, yo brāhmaṇo catumaggañāvedehi antaṃ nibbānaṃ gatattā **vedantagū** bhava, dhammena vusitabrahmacariyattā **vusitabrahmacariyo** bhava. Yassa brāhmaṇassa kuhiñci loke **ussadā** rāgussado dosussado mohussado mānussado diṭṭhussado natthi, so brāhmaṇo **brahmavādaṃ** “ahaṃ brāhmaṇomhī”ti vācaṃ vadeyyāti bhagavā avocāti yojanā.

Ye buddhā **pāpake** akusale dhamme bāhitvā sadā caranti **satā** satisampannā khīṇasaṃyojanā, te buddhā lokasmiṃ brāhmaṇāti **ve** ekantena kathīyantīti avocāti yojanā.

Yattha nibbāne āpo ca pathavī ca tejo ca vāyo ca **na gādhati** na patiṭṭhahati, **tattha** nibbāne **sukkā** gahā ceva tārakā ca na jotanti, **tattha** nibbāne ādicco nappakāsati, **tattha** nibbāne candimā na bhāti, **tattha** nibbāne tamo na vijjati.

Yo brāhmaṇo **attanā** sayamaṃ muni monena yadā taṃ nibbānaṃ **avedi** vindati paṭilabhati paṭivijjhati, **atha** paṭivijjhanakkhaṇe so brāhmaṇo **rūpā** rūpadhammato ca **arūpā** arūpadhammato ca **sukhadukkā** sukhadukkato ca pamuccatīti avocāti yojanā.

Yakkha, yo brāhmaṇo **sakesu** sakaattabhāvesu **dhammesu** upādānakkhandhesu saccesu, dhammesu ca pāragū hoti, **atha** pāragamanakkhaṇe so brāhmaṇo **etaṃ** ajakalāpakaṃ tayā vuttaṃ etaṃ **pisācaṃ** kilesapisācaṇca, tayā kataṃ **akkulaṇca** akkulaṃ, pakkulakaraṇaṃ ativattatīti avocāti yojanā.

Yo bhikkhu **āyantim** āgacchantim purāṇadutiyaṃ bhariyaṃ vā, aññaṃ āgacchantim itthim vā cittena na abhinandati, **pakkamantim** purāṇadutiyaṃ bhariyaṃ vā, aññaṃ pakkamantim itthim vā cittena na socati, **saṅgā** pañcavidhatopi saṅgato muttaṃ saṅgāmajim **taṃ** bhikkhuṃ “brāhmaṇa”nti ahaṃ vadāmīti avocāti yojanā.

Ettha nadiyaṃ bahujaṇo nhāyati, so bahujaṇo nhāyako **udakena** udakanhānena sucī na hoti. **Yamhi** puggale **saccaṃ**, saccato sesadhammo ca atthi, so puggalo sucī ca hoti, so puggalo brāhmaṇo ca hotīti avocāti yojanā; suciasucibhāvo **ṭikāyaṃ** vitthārato vuttova.

Ātāpino jhāyato yassa brāhmaṇassa **dhammā** saccadhammā yadā **have** ekantena pātubhavanti, tadā dhammānaṃ pātubhavanakkhaṇe so brāhmaṇo mārasenaṃ **vidhūpayamaṃ** vidhūpayanto tiṭṭhati. “Kimivā”ti vattabbattā “**sūriyova obhāsayaṃantalikkha**”nti vuttaṃ. Sūriyo antalikkhaṃ obhāsayaṃto tiṭṭhati iva, evaṃ tiṭṭhatīti yojanā.

Yo paṃsukūliko bhikkhu sabbāni cattāri **yogāni** upātivatto sakiñcane loke **akiñcano iriyati**

catubbidhairiyāpathaṃ vatteti. **Apahānadhammaṃ** kenaci maggena appahānasabhāvaṃ appattakāyena appattaṃ **tevijjapattaṃ**, iriyamānaṃ santindriyaṃ taṃ paṃsukūlikaṃ bhikkhuṃ tumhe passatha.

Ājāniyaṃ purisaājānīyaṃ **jātibalanisedhaṃ** “ahaṃ jātibrahmaṇo”ti jātimattakena pavattamānabalanisedhakaṃ taṃ paṃsukūlikaṃ bhikkhuṃ sambahulā uḷārā devatā brahmaṃ vimānaṃ upasaṅkamtivā **idha** sāsane, brahmavimāne vā pasannacittā hutvā namassanti. **Nidhāti** ca ettha **na-kāro** āgamo.

Purisājañña **te** tava amhākaṃ namo atthu, purisuttama **te** tava amhākaṃ namo atthu, yassa **te** tava nissayaṃ mayāṃ nābhijānāma, so tvaṃ kiṃ puggalaṃ nissāya jhāyasīti avocunti yojanā.

Ye bhikkhū kālena kālaṃ dhammassavanavasena cirarattaṃ sametikā bhavanti, ime bhikkhū sahāyā honti vata. **Nesaṃ** sahāyānaṃ bhikkhūnaṃ **dhamme** buddhappavedite dhamme saddhammo sameti.

Kappinena ariyappavedite dhamme suvinītā te sahāyakā bhikkhū savāhiniṃ māraṃ jetvā antimaṃ **dehaṃ** attabhāvaṃ dhārentīti avocāti yojanā.

Sithilaṃ vīriyaṃ ārabba sabbadukkhappamocanaṃ idaṃ nibbānaṃ yogāvacaraṇa na adhigantabbaṃ, **appena** appakena thāmasā idaṃ nibbānaṃ na adhigantabbaṃ.

Ayañca yogāvacaraṇa bhikkhu daharo, yo puriso savāhiniṃ māraṃ jetvā antimaṃ **dehaṃ** attabhāvaṃ dhāreti, so **ayaṃ** puriso so uttamapurisovāti avocāti yojanā. “Puriso”ti vattabbe chandānurakkhaṇavasena “poriso”ti vuttaṃ.

Mogharāja, dubbaṇṇako lūkhacīvaro sadā **sato** satisampanno khīṇāsavo ca viṣaṃyutto ca katakicco ca anāsavo ca tevijjo ca iddhippattaṃ ca cetopariyāyakovido ca so bhikkhu savāhiniṃ māraṃ jetvā antimaṃ dehaṃ dhārentīti avocāti yojanā.

105. “**Tathāgato**”tiādīsu yojanā pākaṭā. **Idaṃ** suttaṃ asekkhabhāge visaye vācakañāpakabhāvena pavattanato **asekkhabhāgiyaṃ** suttaṃ nāma.

106. Nānāvidhaṃ asekkhabhāgiyaṃ suttaṃ ācariyena niddhāritaṃ, amhehi ca ñātaṃ, “katamaṃ saṃkilesabhāgiyañca vāsanābhāgiyañca sutta”nti vattabbattā “**tattha katamaṃ saṃkilesabhāgiyañca vāsanābhāgiyañca sutta**”ntiādī vuttaṃ. **Tatthāti** tesu soḷasasu saṃkilesabhāgiyādīsu suttesu **katamaṃ** suttaṃ saṃkilesabhāgiyañca vāsanābhāgiyañca suttaṃ nāmāti pucchati.

Channaṃ āpattiṃ āpajjitvā channaṃ chādentāṃ bhikkhuṃ dukkaṭādivasso ativassati, **vivaṭaṃ** āpattiṃ āpajjitvā vivaṭaṃ desentaṃ ācikkhantaṃ bhikkhuṃ dukkaṭādivasso nātivassati, **tasmā** channassa ativassanato ca vivaṭassa nātivassanato ca **channaṃ** chāditabbaṃ āpattiṃ **vivaretha** desetha ārocetha, **evaṃ** vivaraṇe sati **taṃ** vivarantaṃ bhikkhuṃ dukkaṭādivasso nātivassatīti yojanā.

“Imasmiṃ sutte kittakena saṃkilesa dassito, kittakena vāsanā dassitā”ti pucchitabbattā “channamativassatī”ti saṃkilesa, “vivaṭaṃ nātivassatī”ti vāsanā, “tasmā channaṃ vivaretha, evaṃ taṃ nātivassatī”ti ayaṃ saṃkilesa ca vāsanā cā”ti vuttaṃ. “**Channamativassatī**”ti ettakena saṃkilesa dassito. “**Vivaṭaṃ nātivassatī**”ti ettakena vāsanā dassitā. “**Tasmā channaṃ vivaretha, evaṃ taṃ nātivassatī**”ti ettakena ayaṃ saṃkilesa ca dassito, ayaṃ vāsanā ca dassitā. **Idaṃ** “channaṃ...pe...vassatī”ti suttaṃ saṃkilesabhāge visaye ca vāsanābhāge visaye ca vācakañāpakabhāvena pavattanato **saṃkilesabhāgiyañca vāsanābhāgiyañca** suttaṃ nāma.

“Saṃkilesabhāgiyaṅca vāsanābhāgiyaṅca suttaṃ ettakamevā”ti vattabbattā **“cattārome mahārājā”**tiādi vuttaṃ. “Tesu catūsu puggalesu katame puggalā saṃkilesabhāgiyā, katame puggalā vāsanābhāgiyā”ti pucchitabbattā **“tattha yo ca puggalo”**tiādi vuttaṃ. **Tatthā**ti tesu catūsu tamotamaparāyaṇādīsu puggalesu. Tassattho pākaṭo. **Idaṃ** “cattārome”tiādikaṃ suttaṃ saṃkilesabhāgiyesu dvīsu puggalesu ca vāsanābhāgiyesu dvīsu puggalesu ca vācakañāpakabhāvena pavattanato **saṃkilesabhāgiyaṅca vāsanābhāgiyaṅca suttaṃ** nāma.

Nānāvidhaṃ saṃkilesabhāgiyaṅca vāsanābhāgiyaṅca suttaṃ ācariyena niddhāritaṃ, amhehi ca ñātaṃ, “katamaṃ saṃkilesabhāgiyaṅca nibbedhabhāgiyaṅca suttaṃ nāmā”ti pucchitabbattā **tattha katamaṃ saṃkilesabhāgiyaṅca nibbedhabhāgiyaṅca sutta**”ntiādi vuttaṃ. Tassattho vuttanayena veditabbo.

Ayasaṃ yaṃ bandhanaṅca dārujaṃ yaṃ bandhanaṅca pabbajaṃ yaṃ bandhanaṅca loke atthi, **taṃ** ayasādibandhanaṃ “dalhaṃ bandhana”nti **dhīrā** buddhādayo paṇḍitapurisā na āhu. Maṇikuṇḍalesu ca puttesu ca dāresu ca yā **sārattarattā** balavarāgarattā apekkhā loke vijjati, taṃ sārattarattaapekkhāsāṅkhātamaṃ rāgabandhanaṃ “dalhaṃ bandhana”nti **dhīrā** paṇḍitapurisā āhu. Iminā suttappadesena **ayaṃ** sārattarattaapekkhāsāṅkhāto akusaladhammo **saṃkilesa** dassito.

“Kena nibbedho dassito”ti vattabbattā **“eta”**ntiādi vuttaṃ. **Dhīrā** paṇḍitapurisā **etaṃ** rāgabandhanaṃ “dalhaṃ bandhana”nti āhu. **Etaṃ** rāgabandhanaṃ **ohāriṇaṃ** heṭṭhā apāyaṃ avaharaṇaṃ hoti, **sithilaṃ** bandhanaṭṭhāne chaviādīni akopetattā sithilaṃ hoti, **duppamuñcaṃ** lobhavasena ekavārampi uppanassa rāgabandhanassa dummocayattā duppamuñcaṃ hoti, paṇḍitapurisā **etampi** vuttappakāraṃ rāgabandhanampi maggena **chetvāna** anapekkhino hutvā kāmasukhaṃ pahāya paribbajanti. Iti iminā suttappadesena **ayaṃ** maggo **nibbedho** dassito. **Idaṃ** “ayasa”ntiādikaṃ suttaṃ rāgādisaṃkilesabhāge visaye ca vāsanābhāge visaye ca vācakañāpakabhāvena pavattanato **saṃkilesabhāgiyaṅca vāsanābhāgiyaṅca suttaṃ** nāma.

107. Bhikkhave, **yaṅca ceteti** yaṅca cetanaṃ nibbatteti, **yaṅca pakappeti** yaṅca pakappanaṃ karoti, **yaṅca anuseti** yaṅca anusayanaṃ bhavati, **etaṃ** cetanaṃ etaṃ pakappanaṃ etaṃ anusayanaṃ viññāṇassa ṭhitiyā **ārammaṇaṃ** paccayo hoti. **Ārammaṇe** paccaye sati tassa abhisāṅkhāra **viññāṇassa** patiṭṭhā hoti. Tasmim̐ abhisāṅkhāravīññāṇe patiṭṭhite viruḷhe sati āyatim̐ **punabbhavābhiniḃbatti** viññāṇādinibbatti hoti. Āyatim̐ punabbhavābhiniḃbattiyā sati āyatim̐ jātijarāmarāṇaṃ sambhavati. Āyatim̐ soka...pe... samudayo hoti.

Bhikkhave, ce no ceteti, ce no pakappeti, **atha** tathāpi ce **anuseti** anusayanaṃ bhavati, evaṃ sati **etaṃ** anusayanaṃ **viññāṇassa** abhisāṅkhāravīññāṇassa **ārammaṇaṃ** paccayo hoti...pe... samudayo hoti. **Iti** iminā suttappadesena **ayaṃ** vuttappakāro cetayanādiko akusaladhammo **saṃkilesa** dassito.

“Kena nibbedho dassito”ti vattabbattā **“yato cā”**tiādi vuttaṃ. Bhikkhave, yato ca ariyamaggiko neva ceteti, no ca pakappeti, no ca anuseti, etaṃ acetayanaṃ etaṃ akappanaṃ etaṃ ananusayanaṃ **viññāṇassa** abhisāṅkhāravīññāṇassa **ārammaṇaṃ** paccayo na hoti...pe... āyatim̐ jātijarāmarāṇaṃ nirujjhanti, āyatim̐ soka...pe... yāsā nirujjhanti...pe... nirodho hoti. **Iti** iminā suttappadesena **ayaṃ** ariyamaggo **nibbedho** dassito. **Idaṃ** “yaṅca bhikkhave”tiādikaṃ suttaṃ saṃkilesabhāge visaye ca nibbedhabhāge visaye ca vācakañāpakabhāvena pavattanato **saṃkilesabhāgiyaṅca nibbedhabhāgiyaṅca suttaṃ** nāma.

108. Nānāvidhaṃ saṃkilesabhāgiyaṅca nibbedhabhāgiyaṅca suttaṃ ācariyena niddhāritaṃ, amhehi ca ñātaṃ, “katamaṃ saṃkilesabhāgiyaṅca asekkhabhāgiyaṅca sutta”nti pucchitabbattā **“tattha katamaṃ saṃkilesabhāgiyaṅca asekkhabhāgiyaṅca sutta”**ntiādi vuttaṃ. Tassattho vuttanayena veditabbo.

Bhikkhave, assutavā puthujjano **samuddo** jalasāgarasamuddo “samuddo samuddo”ti bhāsati. Kenatthena bhāsati? Duppūraṇaṭṭhena ca saṃsaraṇaṭṭhena ca duratikkamanatthena ca samuddoti bhāsati. Evaṃ sati, bhikkhave, eso jalasāgarasamuddo **ariyassa** bhagavato vinaye vuttappakāraṭṭhena samuddo na hoti. Bhikkhave, **eso** jalasāgarasamuddo mahā udakarāsi mahā udakaṇṇavo hoti. Bhikkhave, cakkhu purisassa samuddo hoti, **tassa** cakkhussa **rūpamayo** rūpāyatanamayo vego. Kenatthena? Pathavito yāva akaniṭṭhabrahmalokā nīlādirūpārammaṇaṃ samosarantampi duppūraṇaṭṭhena ca anamatagge saṃsāre saṃsaraṇaṭṭhena ca duratikkamanatthena ca cakkhumeva samuddo hoti. Nīlādirūpāyatanassa appameyyassa appameyyena ūmimayena vegena saṃsaraṇaṭṭhena nīlādirūpameva vego hoti. **Iti** iminā suttappadesena **ayaṃ** cakkhu samuddo rūpamayo vego ca **saṃkilesa** saṃkilesahetu dassito.

“Kena asekkho dassito”ti vattabbattā “**yo ta**”ntiādi vuttaṃ. Yasmiṃ arahattaphale tṭhito **yo** arahā rūpamayaṃ taṃ vegaṃ **sahati** manāpe rūpe rāgaṃ, amanāpe rūpe dosaṃ, asamapekkhane moḥaṃ anuppādentō hutvā upekkhakabhāvena sahati, **ayaṃ** arahā, bhikkhave, saūmiṃ sāvaṭṭaṃ sagahaṃ sarakkhasaṃ cakkhusamuddaṃ atarīti vuccati, tiṇṇo pāraṅgato thale tiṭṭhati brāhmaṇoti vuccati. **Iti** iminā suttappadesena **ayaṃ** arahattaphalabhūto **asekkho** dassito.

“**Sotaṃ bhikkhave**”tiādīsupi iminā nayena yathāsambhavaṃ attho veditabbo. Idaṃ “samuddo”tiādikaṃ suttaṃ saṃkilesabhāge visaye ca asekkhabhāge visaye ca vācakañāpakabhāvena pavattanato **saṃkilesabhāgiyaṅca asekkhabhāgiyaṅca** suttaṃ nāma.

“Ettakamevā”ti vattabbattā “**chayime**”tiādi vuttaṃ. Bhikkhave, lokasmiṃ sattānaṃ **anayāya** anattāya pāṇīnaṃ byābādāya ime mayā vuccamānā baḷisā cha bhavanti. Katame cha? Bhikkhave, **cakkhuviññeyyā** cakkhuviññāṇena viññeyyā iṭṭhā **kantā** kāmanīyā **manāpā** manavaḍḍhakā **piyarūpā** piyasabhāvā **kāmūpasamhitā** kilesakāmasahitā **rajanīyā rūpā** nīlādirūpārammaṇā santi, **taṃ** vuttappakāraṃ rūpaṃ bhikkhu **ce abhinandati** sappītikataṇhāya abhimukho nandati, **ce abhivadati** “aho sukhaṃ aho sukha”nti vadāpentiyā taṇhāyanavasena abhivadati, **ce ajjosāya tiṭṭhati** gilitvā viya pariniṭṭhapetvā tiṭṭhati, evaṃ sati, bhikkhave, **ayaṃ** bhikkhu “gilitabaḷiso...pe... pāpimato”ti vuccati. Ettha ca nīlādirūpārammaṇabhāvena ca cakkhuviññeyyabhāvena ca ekavidhataṃ anativattanato “ta”nti ekavacanāniddeso katoti veditabbo. “**Santi, bhikkhave, sotaviññeyyā**”tiādīsupi iminā nayena yathāsambhavaṃ attho veditabbo. **Iti** iminā suttappadesena **ayaṃ** cakkhuviññeyyādiko chabbidho baḷiso **saṃkilesa** kilesahetu dassito.

“Kena asekkho dassito”ti vattabbattā “**santi cā**”tiādi vuttaṃ.

Abhedi bhindi, **paribhedi** parisamantato bhindi. **Iti** iminā suttappadesena **ayaṃ** arahattaphalabhūto **asekkho** dassito. **Idaṃ** “chayime”tiādikaṃ suttaṃ vuttanayena saṃkilesabhāgiyaṅca asekkhabhāgiyaṅca suttaṃ nāma.

109. Nānāvidhaṃ saṃkilesabhāgiyaṅca asekkhabhāgiyaṅca suttaṃ ācariyena niddhāritam, amhehi ca ñātaṃ, “katamaṃ saṃkilesabhāgiyaṅca nibbedhabhāgiyaṅca asekkhabhāgiyaṅca sutta”nti pucchitabbattā “**tattha katamaṃ saṃkilesabhāgiyaṅca nibbedhabhāgiyaṅca asekkhabhāgiyaṅca sutta**”ntiādi vuttaṃ.

Ayaṃ loko sattaloko **santāpajāto** ñātibyasanādivasena jātasokasantāpo ceva rāgādivasena jātapariḷāhasantāpo ca **phassapareto** anekehi dukkhasamphassehi abhibhūto **rodam** rodanto vadati. Kinti vadati? Attanā phuṭṭhaṃ dukkhaṃ abhāvitakāyatāya adhiṅkṛtaṃ asakkonto hutvā “aho dukkhaṃ, īdisaṃ dukkhaṃ mayhaṃ sattunopi mā hotū”tiādinā rodanto vilapanto vadati, “kasmā evaṃ vadatī”ti vattabbattā “**attato yena yena hi maññanti**”tiādi vuttaṃ. Ete sattā yena yena kāmajjosādinā pakārena attato dukkhasa paṭikāraṃ maññanti, **tato** pakārato **aññathā** aññena pakārena **taṃ** dukkhaṃ tikicchitabbaṃ **hi** yasmā hoti.

Aññathābhāvīti yasmā rodam rodanto vadati, yena yena vā paravihiṃsādipakārena attano vaḍḍhim maññanti āsīanti, tato pakārato aññathā avaḍḍhi eva hoti. **Tam** āsītabbam aññathābhāvī avaḍḍhitabhāvī eva **hi** yasmā hoti, tasmā maññitabbassa āsītabbassa aññathā bhavanasīlattā rodam rodanto vadati, ayam sattaloko rodanto ca hutvā vadati. “Ki”nti pucchitabbattā “**bhavasatto**”tiādi vuttam. **Bhavasatto** kāmabhavādīsu satto visatto loko **bhavameva** kāmabhavādibhavameva abhinandati. **Yam** bhavam abhinandati, tam jarāmarañāḍianekabyasanānubandhattā bhayānakatṭhena **bhayam** hoti. **Yassa** yato jarāmarañādito bhāyati, tam jarāmarañādidukkhassa adhiṭṭhānabhāvato **dukkham** dukkhādhiṭṭhānam hoti. **Iti** iminā suttappadesena **ayam** santāpādiko **saṃkilesa** saṃkilesahetu dassito.

Samkilesa dassito, “kena nibbedho dassito”ti vattabbattā “**bhavavippahānāya kho**”tiādi vuttam. **Bhavavippahānāya kho pana** kāmabhavādīkassa bhavassa pajahanatthāya eva idaṃ mayā adhigatam maggabrahmacariyam vussati. **Iti** iminā suttappadesena **ayam** brahmacariyabhūto maggo **nibbedho** dassito.

“Bhavavippahānāya”tiādinā ekantena niyyānikamaggo nibbedho ācariyena dassito, amhehi ca ñāto, “katamo aniyānikamaggo”ti pucchitabbattā “**ye hi keci samaṇā vā**”tiādi vuttam. **Hi**-saddo vācāsīlīṭṭhattho. Ye keci samaṇā vā ye keci brāhmaṇā vā **bhavana** rūpabhavena **bhavassa** kāmabhavassa vippamokkham āhaṃsu, **bhavana** arūpabhavena **bhavassa** kāmabhavassa ceva rūpabhavassa ca vippamokkham āhaṃsu, sabbe te samaṇā vā sabbe te brāhmaṇā vā **bhavamā** vuttappakārabhavato avippamuttā bhavantīti ahaṃ vadāmi.

“Rūpabhavādinā ye ca kāmabhavādibhavassa vippamokkham āhaṃsū”ti vattabbattā vibhavana bhavassa nissaraṇam āhaṃsūti dassetuṃ “**ye vā panā**”tiādi vuttam. Ye vā pana keci samaṇā vā ye vā pana keci brāhmaṇā vā **vibhavana** ucchedadiṭṭhiyā **bhavassa** saṃsārabhavassa nissaraṇam āhaṃsu, sabbe te samaṇā vā sabbe te brāhmaṇā vā **bhavamā** saṃsārabhavato anissaṭṭhāva hontīti ahaṃ vadāmi. “Kasmā anissaṭṭhā”ti vattabbattā anissaṭṭhāraṇam dassetuṃ “**upadhim hī**”tiādi vuttam. Idaṃ **dukkham** saṃsāradukkham **upadhim** khandhūpadhikilesūpadhiabhisāṅkhārūpadhayo paṭicca **hi** yasmā sambhoti, tasmā anissaṭṭhā hontī. **Iti** iminā suttappadesena **ayam** micchādiṭṭhisāṅkhāto **saṃkilesa** dassito.

Ye hi “keci”tiādinā saṃkilesa dassito, “kena nibbedho dassito”ti vattabbattā “**sabbupādānakkhayā**”tiādi vuttam. **Sabbupādānakkhayā** ariyamaggato **dukkhassa** saṃsāradukkhassa sambhavo natthi. **Iti** iminā suttappadesena **ayam** ariyamaggo **nibbedho** dassito.

“Vuttappakārā aññasuttappadesenapi dassito”ti dassetuṃ “**lokamima**”ntiādi vuttam. **Puthū** visuṃ visuṃ avijjāya **paretam** abhibhūtam **bhūtaratam** bhūtesu itthipurisesu aññamaññaratam **bhūtam** khandhapañcakam bhavēhi aparimuttam imaṃ lokaṃ mama citta tvam passa. **Ye keci bhavā** ittarakhaṇā vā bhavā, dīghāyukā vā bhavā, sātavanto vā bhavā, asātavanto vā bhavā pañcakkhandhā **sabbadhi** “uddham adho tiriya”nti imesu sabbesu **sabbatthatāya** sabbatthabhāvena ahesuṃ, **sabbe te** vuttappakārā bhavā niccadhuvarahitattā **aniccā** sampīlītattā **dukkhā** vipariṇāmadhāvato **vipariṇāmadhammā** ahesuṃ. **Iti** iminā suttappadesena **ayam** avijjādiko **saṃkilesa** dassito.

“Lokamima”ntiādinā saṃkilesa dassito, “kena nibbedho dassito”ti vattabbattā “**evameta**”ntiādi vuttam. **Evam** vuttappakārena **etam** khandhapañcakam yathābhūtam **sammappaññāya** sassa attano maggapaññāya, vipassanāpaññāya vā **passato** passantassa puggalassa bhavataṇhā pahīyati, sammappaññāya yathābhūtam khandhapañcakam passanto **vibhavam** ucchedadiṭṭhim **nābhinandati** na pattheti. Tassa puggalassa sabbaso taṇhānam khayā **asesavirāgaṇirodho** asesavirāgasāṅkhātena maggena nirodho nirujjhanam **nibbānam** nibbuti hoti. **Iti** iminā suttappadesena **ayam** maggo **nibbedho** dassito.

“Evameta”ntiādinā nibbedho dassito, “kena asekkho dassito”ti vattabbattā “**tassa**

nibbutassā’tiādi vuttaṃ. Taṇhādiṭṭhinibbutassa tassa **bhikkhuno anupādā** kilesābhisaṅkhārānaṃ anuppādanato aggahaṇato punabbhavo na hoti, evaṃbhūtena ariyapuggalena pubbe attānaṃ abhibhūto pañcavidho māro vijito ahosi, anena ariyapuggalena pañcahi mārehi saṅgāmo vijito, saṅgāme, iṭṭhāniṭṭhādīsu vā **tādī** tādīlakkaṇappatto ariyapuggalo sabbabhavāni **upaccagā** atikkantova jāto. **Iti** iminā suttappadesena **ayaṃ** asekkho dassito. **Idaṃ** vuttappakāraṃ “ayaṃ loko”tiādikam suttam saṃkilesabhāge visaye ca nibbedhabhāge visaye ca asekkhabhāge visaye ca vācakañāpakabhāvena ekadesavasena pavattanato **saṃkilesabhāgiyaṅca nibbedhabhāgiyaṅca asekkhabhāgiyaṅca** suttam nāma.

“Ettakamevā”ti vattabbattā “**cattārome**”tiādi vuttaṃ. Andhaputhujjano saṃsārasotassa anukūlabhāvena gacchanato **anusotagāmī** nāma, kalyāṇaputhujjano saṃsārasotassa nibbidānupassanādīhi paṭikkūlavasena pavattanato **paṭisotagāmī** nāma, sekkho acalappasādādisamannāgamena ṭhitasabhāvattā **ṭhitatto** nāma, asekkho saṃsārapāraṅgatavasena tiṭṭhanato “**thale tiṭṭhatī**”ti vuccati.

“Tesu catūsu puggalesu katamo puggalo saṃkilesabhāgiyādī”ti vattabbabhāvato “**tattha yoya**”ntiādi vuttaṃ.

110. Nānāvidhaṃ saṃkilesabhāgiyaṅca nibbedhabhāgiyaṅca asekkhabhāgiyaṅca suttam ācariyena niddhāritam, amhehi ca ñātam, “katamaṃ saṃkilesabhāgiyaṅca vāsanābhāgiyaṅca nibbedhabhāgiyaṅca sutta”nti pucchitabbattā “**tattha katama**”ntiādi vuttaṃ.

Abhijātiyo puggalā cha saṃvijjanti lokasmiṃ, kaṇhe nīce kule nibbato **kaṇhābhijātiko**, kaṇhadhammasamannāgatattā vā **kaṇho kaṇhābhijātiko** hutvā **kaṇham** kālakam dasavidham dussīlyadhammaṃ **abhijāyati** pasavati, eso puggalo atthi. Vuttappakārena kaṇho kaṇhābhijātiko hutvā **sukkam** dasavidham kusaladhammaṃ abhijāyati, eso puggalo atthi. Kaṇho kaṇhābhijātiko hutvā akaṇham asukkam akaṇhaasukkavipākam **accantadiṭṭham** nibbānam ārādheti, eso puggalo atthi. Vuttavipariyāyena tayo puggalā jānitabbā.

“Tesu katame puggalā saṃkilesabhāgiyā”tiādinā vattabbattā “**tattha yo cā**”tiādi vuttaṃ.

“Ettakamevā”ti vattabbattā “**cattārimānī**”tiādi vuttaṃ.

111. Nānāvidhaṃ saṃkilesabhāgiyaṅca vāsanābhāgiyaṅca nibbedhabhāgiyaṅca suttam ācariyena niddhāritam, amhehi ca ñātam, “katamaṃ vāsanābhāgiyaṅca nibbedhabhāgiyaṅca sutta”nti pucchitabbattā “**tattha katamaṃ vāsanābhāgiyaṅca nibbedhabhāgiyaṅcā**”tiādi vuttaṃ.

Mānusattam manussabhāvaṃ laddhāna kiccaṃ, akiccaṅca dve bhavanti, dve kiccāniyeva kattabbāni. Tenāha aṭṭhakathācariyo (netti. aṭṭha. 111) “kattabba”nti dasseti. “Katamaṃ kattabbaṃ kicca”nti vattabbattā kattabakiccaṃ dassetuṃ “**sukiccaṃ cevā**”tiādi vuttaṃ. Puññāni ca kattabbattā sukiccaṃ eva, saṃyojanavippahānaṃ vā kattabbattā sukiccaṃ nāmāti yojanā.

“Tattha sutte katamena katamo dassito”ti vattabbattā “**sukiccaṃceva puññānīti vāsanā, saṃyojanavippahānaṃ vāti nibbedho**”ti vutto.

“Ettakamevā”ti vattabbattā “**puññāni karitvānā**”tiādi vuttaṃ. Puññāni karitvāna **katapuññā** puggalā **saggā** saggato saggamyeva vajanti. **Saṃyojanappahānā** ariyā **jarāmarañā** jarāmarāṇato vippamuccanti.

“Tattha sutte katamena katamo dassito”ti vattabbattā “puññāni karitvāna, saggā saggam vajanti

katapuññā'ti vāsanā, 'saṃyojanappahānā, jarāmaraṇā vippamuccantī'ti nibbedho'ti vuttaṃ.

“Ettakamevā'ti vattabbattā **“dvemānī”**tiādi vuttaṃ. “Katamena katamo dassito'ti vattabbattā **“tattha yo...pe... ayam nibbedho”**ti vuttaṃ.

Nānāvidhaṃ vāsanābhāgiyañca nibbedhabhāgiyañca suttaṃ ācariyena niddhāritaṃ, amhehi ca ñātāṃ, “katamaṃ taṇhāsaṃkilesabhāgiyaṃ sutta”nti pucchitabbattā **“tattha taṇhāsaṃkilesabhāgiya”**ntiādi vuttaṃ. **Tatthā**ti tesu soḷasasu saṃkilesabhāgiyādīsu suttesu taṇhāsaṃkilesabhāgiyaṃ suttaṃ taṇhāpakkheneva niddisitabbaṃ, bahuvīsayaṭṭā niyametvāna niddhāressāmīti vuttaṃ hoti. “Kena pakārena niddisitabba”nti vattabbattā **“tīhi taṇhāhi”**tiādi vuttaṃ. **Bhavataṇhāyā**ti rūpabhavataṇhāya. **Vibhavataṇhāyā**ti arūpabhavataṇhāya. Yena yena vā pana **vatthunā** taṇhāpabhedaucchedādivatthunā **ajjhositā** bhavataṇhādivasena ajjhositā, tena tena pakārena taṇhādinā vā taṇhāpabhedaucchedādivatthunā vā taṇhāsaṃkilesabhāgiyaṃ suttaṃ niddisitabbaṃ.

Taṇhāsaṃkilesabhāgiyaṃ suttaṃ taṇhāpakkheneva niddisitabbanti ācariyena vuttaṃ, amhehi ca lakkhitaṃ, “diṭṭhisāṃkilesabhāgiyaṃ suttaṃ kena pakkhena niddisitabba”nti vattabbattā **“tattha diṭṭhisāṃkilesabhāgiya”**ntiādi vuttaṃ. **Yena yena vā pana vatthunā**ti diṭṭhippabhedaamarāvikkhepādivatthunā.

Diṭṭhisāṃkilesabhāgiyaṃ suttaṃ diṭṭhipakkheneva niddisitabbanti ācariyena vuttaṃ, amhehi ca lakkhitaṃ, “duccaritasāṃkilesabhāgiyaṃ suttaṃ kena pakārena niddisitabba”nti vattabbattā **“tattha duccaritasāṃkilesabhāgiya”**ntiādi vuttaṃ. Tatheva vattabbattā **“tattha taṇhāvodānabhāgiya”**ntiādi vuttaṃ, **“diṭṭhivodānabhāgiya”**ntiādi vuttaṃ, **“duccaritavodānabhāgiya”**ntiādi vuttaṃ.

112. Yasmiṃ sāsanaṭṭhāne aṭṭhārasa mūlapadā daṭṭhabbā, taṃ sāsanaṭṭhānaṃ soḷasahi saṃkilesabhāgiyādīhi suttehi ekadesaniddhāraṇavasena vibhajitaṃ, amhehi ca ñātāṃ, “kiṃ pana taṃ sāsanaṭṭhānaṃ tehi soḷasahi eva saṃkilesabhāgiyādīhi vibhajitabbaṃ, udāhu aññehi suttehipi vibhajitabba”nti vattabbattā aññehi aṭṭhavīsasuttehipi vibhajitum **“tattha katame aṭṭhārasa mūlapadā? Lokiyaṃ lokuttara”**ntiādi vuttaṃ. “Yadi aññehi aṭṭhavīsasuttehi vibhajitabbaṃ, evaṃ sati ‘lokiya’ntiādivacanameva vattabbaṃ, kasmā ‘tattha katame aṭṭhārasa mūlapadā’ti vuttā’ti ce? Tassa sāsanaṭṭhānavibhāgo aṭṭhārasahi mūlapadehi saṅgahito, aṭṭhārasa mūlapadāpi vibhajite sāsanaṭṭhāne daṭṭhabbā, tasmā mūlapadā vibhattāyeva. Tāni mūlapadāni vibhajitum **“tattha katame aṭṭhārasa mūlapadā”**ti vuttaṃ. **Aṭṭhakathāyaṃ** (netti. aṭṭha. 112) pana –

“Evaṃ soḷasavidhena sāsanaṭṭhānaṃ nānāsuttehi udāharaṇavasena vibhajitvā idāni aṭṭhavīsatividhena sāsanaṭṭhānaṃ dassentena yasmā ayampi ṭṭhānavibhāgo mūlapadehi saṅgahito, na imassāpi tehi asaṅgahito padeso atthi, tasmā mūlapadaṃ, vibhajitabbatañca dassetuṃ ‘tattha katame aṭṭhārasa mūlapadā’ti pucchāya vasena mūlapadāni uddharitvā ‘lokiyaṃ lokuttara’ntiādinā nava tikā, thavo cāti aṭṭhavīsatividhaṃ sāsanaṭṭhānaṃ uddiṭṭha”nti –

Vuttaṃ. **Tatthā**ti tesu soḷasahārapañcakanayaṭṭhārasamūlapadesu katamāni padāni mūlapadāni hontīti pucchati. Loke niyutto sabhāvadhammoti **lokiyo**, loke vā vidūhi vidito sabhāvotipi **lokiyo**, lokiyo sabhāvadhammo assa visesasuttassa atthīti taṃ visesasuttaṃ **lokiyaṃ** nāma. Esa nayo **“lokuttara”**ntiādisupi veditabbo. Jānātīti **ñāṇaṃ**, ñāṇaṃ assa visesasuttassa atthīti **ñāṇaṃ**. Ñātābātī **ñeyyā**, ñeyyā assa visesasuttassa atthīti **ñeyyaṃ**. Eseva nayo – **“ñāṇaṇca ñeyyañca”**ti etthāpi veditabbo. Nibbānaṃ paṭhamam passatīti **dassanaṃ**, paṭhamamaggañāṇaṃ, dassanaṃ assa visesasuttassa atthīti **dassanaṃ**. Bhāvanā assa visesasuttassa pāḷiyā atthīti **bhāvanā**. **“Dassanañca bhāvanā cā”**ti etthāpi esa nayo veditabbo. Sassa attano vacananti **sakaṃ**, sakaṃ vacanaṃ **sakavacanaṃ**, bhagavato vacananti attho. Parassa vacanaṃ **paravacanaṃ**. Vissajjanīyo assa visesasuttassa atthīti **vissajjanīyaṃ**. Natthi vissajjanīyo assa visesasuttassāti **avissajjanīyaṃ**. Kammaṃ assa visesasuttassa atthīti **kammaṃ**. Vipāko assa pāṭhassa atthīti **vipāko**. Sesesupi assatthiattho

gahetabbo. Atha vā lokiyādiattho mukhyattho, taṃvācakasuttampi thānyūpacārena vuttaṃ.
Buddhādīnaṃ guṇe abhithhavati etena suttappadesenāti **thavo**, suttappadeso.

“Tesu aṭṭhavīsatividhesu lokiyādīsū sāsanapaṭṭhānasuttasu katamaṃ suttaṃ lokiyaṃ sutta”nti
pucchitabbatā “**tattha katamaṃ lokiya**”ntiādi vuttaṃ. **Tatthāti** tesu aṭṭhavīsatividhesu lokiyādīsū
sāsanapaṭṭhānasuttasu **katamaṃ** suttaṃ lokiyaṃ sāsanapaṭṭhānaṃ suttanti pucchati.

Bhikkhave, dhenuyā thanehi nikkhantaṃ sajjukhīraṃ nikkhantakkhaṇe **na muccati** na pariṇamati
khīrabhāvaṃ pajahitvā dadhibhāvaṃ na pāpuṇāti, takkādiambilasamāyogato pacchā khīrabhāvaṃ
pajahati dadhibhāvaṃ pāpuṇāti iva, evaṃ yena bālena pāpaṃ yaṃ kammaṃ kataṃ, taṃ kammaṃ
karaṇakkhaṇe tassa bālassa apāyadukkhādīnibbattāpanavasena na vipaccati. Dutiye pana vā tatiyādimhi
vā attabhāve vipaccati. **Bhasmacchanno** chārikāya paṭicchanno **pāvako** aggī akkantaṃ janaṃ
akkamanakkhaṇe na ḍahati. Chārikaṃ pana tāpetvā kālantare ḍahati iva, evaṃ yena bālena pāpaṃ yaṃ
kammaṃ kataṃ, taṃ kammaṃ karaṇakkhaṇe taṃ bālaṃ apāyadukkhādīnibbattāpanavasena ḍahāpentaṃ
hutvā na anveti. Dutiye vā tatiyādimhi vā attabhāve apāyadukkhādīnibbattāpanavasena ḍahāpentaṃ
hutvā ḍahantaṃ taṃ bālaṃ taṃ anvetīti yojanā. **Idaṃ** “na hi...pe... pāvako”ti suttaṃ lokiye atthe
vācakañāpakabhāvena pavattanato **lokiyaṃ** nāma.

“Ettakameva lokiya”nti vattabbatā “**cattārimānī**”tiādi vuttaṃ. Attho pākaṭo. **Idaṃ**
“cattārimānī...pe... kālapakkheva candimā”ti suttaṃ lokiye atthe vācakañāpakabhāvena pavattanato
lokiyaṃ nāma.

“Evaṃ duvidhamyeva lokiya”nti vattabbatā “**aṭṭhime, bhikkhave, lokadhammā**”tiādi vuttaṃ.
Attho pākaṭo. **Idaṃ** “aṭṭhime”tiādikāṃ suttaṃ lokiye aṭṭhavidhesu atthesu vācakañāpakabhāvena
pavattanato **lokiyaṃ** nāma.

Nānāvidhaṃ lokiyaṃ ācariyena niddhāritaṃ, amhehi ca ñātaṃ, “katamaṃ suttaṃ lokuttara”nti
vattabbatā “**tattha katamaṃ lokuttara**”ntiādi vuttaṃ. Ito paresupi esa nayo veditabbo. **Tatthāti** tesu
aṭṭhavīsatividhesu lokiyādīsū suttasu.

Chekena sārathinā sudantā assā samathaṅgatā yathā, evaṃ **pahīnamānassa**
pahīnanavavidhamānassa **yassa** anāsavassa bhikkhuno **indriyāni** chabbidhāni cakkhundriyādīni
samathaṅgatāni. **Tādino** tādīlakkhaṇena samannāgatassa anāsavassa **tassa** bhikkhuno devāpi manussāpi
pihayantīti yojanā. **Idaṃ** “yassindriyānī”tiādikāṃ suttaṃ lokuttare atthe vācakañāpakabhāvena
pavattanato **lokuttaraṃ** nāma.

“Ettakamevā”ti vattabbatā “**pañcimāni bhikkhave indriyāni**”tiādi vuttaṃ. **Idaṃ**
“pañcimānī”tiādikāṃ suttampi lokuttare atthe vācakañāpakabhāvena pavattanato **lokuttaraṃ** nāma. (1)

“Laddhāna mānusattaṃ dve, kiccaṃ akiccameva cā”tiādikā dve gāthā vuttā. **Iha** gāthāsu
“sukiccaṃ ceva puññānī”ti **yaṃ** gāthāpadañca “puññāni karitvāna, saggā saggāṃ vajanti katapuññā”ti
yaṃ gāthāpadañca vuttaṃ, **idaṃ** gāthāpadaṃ lokiye atthe vācakañāpakabhāvena pavattanato **lokiyaṃ**
nāma.

Iha gāthāsu “saṃyojanavippahānaṃ vā”ti **yaṃ** gāthāpadañca “saṃyojanavippahānā, jarāmarañā
vipparamuccantī”ti **yaṃ** gāthāpadañca vuttaṃ, **idaṃ** gāthāpadaṃ vuttanayena lokuttaraṃ nāma. **Idaṃ**
“laddhānā”tiādikāṃ vuttappakārena lokiyañca lokuttarañca.

Bhikkhave, viññāṇe āhāre āhārapaṭibaddhe chandarāge sati nāmarūpassa avakkanti hoti.
“Viññāṇe...pe... hoti”ti **idaṃ** vuttanayena lokiyaṃ nāma. “Viññāṇe...pe... nirodho”ti **idaṃ** suttaṃ

lokuttaram nāma. **Idaṃ** “viññāṇe ce bhikkhave” tiādikaṃ suttaṃ lokiye atthe ca lokuttare atthe ca ekadesavasena vācakañāpakavasena pavattanato **lokiyañca lokuttarañca**. (2)

113. Sattaloke sabbā disā anuparigamma **kvaci** disāyaṃ cetasā **attanā** attato piyataram aññaṃ neva ajjhagā, attāva piyataro yathā, evaṃ **paresam** sattānaṃ **puthu** visuṃ visuṃ attāva **piyo** piyataro, tasmā attanova piyatarattā **attakāmo** attano hitakāmo paṇḍito sattaloko attānaṃ upamaṃ katvā paraṃ **na himse** na himseyyāti yojanā. **Idaṃ** “sabbā disā” tiādikaṃ suttaṃ sattesu vācakañāpakabhāvena pavattanato **sattādhiṭṭhānaṃ** nāma.

Ye keci khīṇāsavā puggalā **bhūtāva** na bhavissanti, **sabbe** te khīṇāsavā puggalā **deham** attabhāvaṃ pahāya nibbānaṃ gamissanti. Ye ca puthujjanādayo sattā punabbhavesu bhavissanti, **sabbe** te puthujjanādayo sattā **deham** attabhāvaṃ pahāya paralokaṃ gamissanti, taṃ **sabbajāniṃ** sabbassa sattassa hāniṃ maraṇaṃ, vināsaṃ vā kusalo yo puggalo vijānāti, so **kusalo** puggalo taṃ sabbajāniṃ viditvā ātāpiyo brahmacariyaṃ careyyāti yojanā. **Idaṃ** “ye keci” tiādikaṃ vuttanayena sattādhiṭṭhānaṃ.

Sattahi aṅgehi samannāgataṃ kalyāṇamittaṃ yāvajīvaṃ kusalena puggalena na vijahitabbaṃ. Katamehi sattahi? Parisuddhasīlasampattiparisuddhadiṭṭhisampattīhi samannāgatattā **piyo ca** piyāyitabbo ca hoti, pāsānachattaṃ viya **garu ca** hoti, sambhāvetabbatāya **bhāvanīyo ca** hoti, “kālena vadāmi, no akālenā” tiādike pañcadhamme attani upaṭṭhāpetvā sabrahmacārīnaṃ vā sissānaṃ vā vinicchayaullumpanaovādādānabhāve ṭhatvā **vattā ca** hoti, sabrahmacārīhi vā sissādīhi vā vuccamāno suvaco hutvā tesam **vacanakkhamo ca** hoti, saccapaṭiccasamuppādādigambhīraṃ vā aññaṃ gambhīraṃ vā **kathaṃ kattā ca** hoti, dhammavinayādivaseneva dīpanato **aṭṭhāne ca na niyojako** hoti. Imehi sattahi aṅgehi samannāgataṃ kalyāṇamittaṃ yāvajīvaṃ na vijahitabbaṃ. **Idaṃ** “sattahi” tiādivacanaṃ bhagavā avoca. **Idaṃ** “sattahi” tiādikaṃ vacanaṃ sugato vatvā athāparaṃ **etaṃ** gāthāvacanaṃ satthā avoca. Kiṃ avoca?

“Piyo garu bhāvanīyo, vattā ca vacanakkhamo;
Gambhīrañca kathaṃ kattā, na aṭṭhāne niyojako;
Taṃ mittaṃ mittakāmena, yāvajīvampi seviya” nti. –

Etaṃ gāthāvacanaṃ satthā avocāti yojanā. “Na ca aṭṭhānayojo” ti pāṭho atthi. **Idaṃ** “sattahi” tiādikaṃ vacanaṃ sattādhiṭṭhānaṃ.

Loke yaṃ kāmasukhañca yaṃ idaṃ diviyaṃ sukhañca atthi, **ete** kāmasukhadiviyasukhā taṇhākkhayasukhassa soḷasiṃ kalamā na agghantīti yojanā. **Idaṃ** “yañcā” tiādikaṃ suttaṃ dhammādhīṭṭhānaṃ.

Yattha nibbāne dukkhaṃ nirujjhati, sammāsambuddhadesitaṃ asokaṃ virajaṃ khemaṃ taṃ nibbānaṃ susukhaṃ vatāti yojanā. **Idaṃ** “susukha” ntiādikaṃ suttampi dhammādhīṭṭhānaṃ. (3)

Tīsu bhavesu sattānaṃ jananato taṇhāsānkhātāṃ **mātarañca**, pītaṃ nissāya mānassa uppajjanato mānāsānkhātāṃ **pītañca**, raṭṭhe loko raṭṭhissaraṃ rājānaṃ bhajati viya dvinnaṃ sassatucchedadiṭṭhīnaṃ sabbadiṭṭhigatehi bhajāniyattā sassatucchedadiṭṭhisānkhāte **khattiye dve rājāno ca**, āyasādhako puriso raṭṭhe atthaṃ anucarati iva nandirāgassa dvādasāyatane anucaraṇato nandirāgasānkhātena anucaraṇena saha pavattanaṭṭhānaṃ dvādasāyatanaśānkhātāṃ **raṭṭhañca** khīṇāsavo yo brāhmaṇo hanati, so brāhmaṇo hantvā **anīgho** niddukkho hutvā yātīti yojanā. Iha “mātara” ntiādīgāthāyaṃ “mātaraṃ...pe... hantvā” ti **idaṃ** gāthāvacanaṃ dhammādhīṭṭhānaṃ. “Anīgho yāti brāhmaṇo” ti **idaṃ** gāthāvacanaṃ sattādhiṭṭhānaṃ. **Idaṃ** “mātara” ntiādikaṃ suttaṃ sattādhiṭṭhānañca dhammādhīṭṭhānañca.

“Cattārome bhikkhave iddhipādā”ti **idam** suttappadesavacanam dhammādhiṭṭhānam. So catūhi iddhipādehi samannāgato puggalo **kāyepi** karajakāyepi **cittam** pādakajjhānacittam **samodahati** pakkhipati, so puggalo dissamānakāyena gantukāmo karajakāyagatikam pādakajjhānacittam adhiṭṭhahati. **Cittepi** pādakajjhānacittepi **kāyam** karajakāyam **samodahati** pakkhipati, so puggalo sīgham aññaṃ gantukāmo pādakajjhānacittagatikam karajakāyam adhiṭṭhahati. **Kāye** karajakāye **sukhasaññaṃ** sukhavihārasaññaṃ **lahusaññaṃ** lahugamanasaññaṃ okkamitvā aññaṃ gamaneyyam icchitaṭṭhānam ekacittakkhaṇeneva ca gantvā upasampajja viharati. **Idam** “so”tiādikaṃ suttappadesavacanam sattādhiṭṭhānam. **Idam** “cattārome”tiādikaṃ suttaṃ sattādhiṭṭhānaṃca dhammādhiṭṭhānaṃca. (4)

114. Yam sabbaññutaññaṃ **lokuttaram** lokam uttaritvā abhibhavitvā ṭhitam, **yena** sabbaññutaññaṇena bhagavā “sabbaññū”ti vuccati, **tassa** sabbaññutaññaṇassa parihānam natthi, **taṃ** sabbaññutaññaṃ sabbakāle jānitum āvajjanakāle pavattatīti yojanā. **Idam** “yam ta”ntiādikaṃ ñaṇe atthe vācakañāpakabhāvenapi pavattanato **ññaṃ** nāma.

Yāya nibbānagāminiyā maggapaññaṃ jātimaraṇasankhayaṃ pajānāti, sā nibbānagāminī maggapaññaṃ sabbāhi lokiyāhi paññaṃ **setṭhā** pasatthāti yojanā. **Idam** “pañña hī”tiādikaṃ vuttanayena ññaṃ nāma.

“Dhotaka, vo tumhākaṃ santim ahaṃ kittayissāmī”ti bhagavā avoca. “**Diṭṭhe dhamme** dukkhādidhamme vā attabhāve vā **sato** aniccānupassanādisatisampanno hutvā **caram** caranto yogāvacarō anītihaṃ **yam santim** yaṃ nibbānam ariyamaggena **viditvā loke** saṃsāraloke **visattikam** visappakam taṇhaṃ **tare** tareyyā”ti bhagavā avoca.

Dhotako bhagavantam vadati “**mahesi** mahante sīlakkhandhādī esanasīla, gotama, **sato** ‘sabbe sankhārā aniccā’tiādisaraṇasampanno hutvā **caram** caranto yogāvacarō uttamaṃ **yam santim** yaṃ nibbānam ariyamaggena **viditvā loke** saṃsāraloke visattikam taṇhaṃ **tare** tareyyāti **taṃca** vacanam **taṃca** santim nibbānam ahaṃ **abhinandāmi** abhipatthayāmi, mahesi tvam, yaṃca sampajānāsī”ti dhotako bhagavantam vadati.

“**Dhotakā**”ti ālapitvā bhagavā dhotakam avoca. “**Uddham** anāgataṃ upari **adho** atītam heṭṭhā ca **tiriyañcāpi** majjhe paccuppannam parito ca **loke** saṃsāraloke etaṃ taṇhaṃ **bhavābhavāya** khuddakabhavamahantabhavattāya **saṅgo** laggoti **viditvā** vicaranto tvam taṇhaṃ **mākāsi** mā akāsī”ti bhagavā dhotakam avocāti yojanā. **Idam** “kittayissāmī”tiādikaṃ ñeyye visaye atthe vācakañāpakabhāvena pavattanato **ñeyyam** nāma.

“Ettakamevā”ti vattabbattā “**catunnam bhikkhave**”tiādi vuttaṃ. Bhikkhave, catunnam **ariyasaccānam** ariyabhāvakarānam saccānam **ananubodhā** abujjhanena **appaṭivedhā** appaṭivijjhanena **evam** iminā kāraṇena mamañceva tumhākaṃcā dīghamaddhānam idam **sandhāvitam** sandhāvanam, idam **samsaritam** samsaraṇam ahosīti, bhikkhave, aja **tayidam** taṃ idam dukkham ariyasaccam mayā anubuddham paṭividdham...pe... **tayidam** taṃ idam dukkhanirodhagāminī paṭipadā ariyasaccam mayā anubuddham paṭividdham, mama bhavataṇhā ucchinnā, bhavanetti taṇhā khīṇā, idāni mama punabbhavo natthi, **iti idam** “catunna”ntiādikaṃ bhagavā avoca, sugato **idam** “catunna”ntiādikaṃ vatvā athāparaṃ **etaṃ** “catunna”ntiādigāthāvacanam satthā avocāti yojetvā gāthāyaṃca tatheva yojanā kātabbā. **Idam** “catunna”ntiādikaṃ vuttanayena ñeyyam nāma. (5)

“Rūpaṃ aniccaṃ...pe... viññaṇam anicca”nti **idam** suttaṃ ñeyye rūpādidhamme vācakañāpakabhāvena pavattanato **ñeyyam** nāma.

Evam “rūpaṃ anicca”ntiādinā pakārena **jānam** jānanto **evam** “rūpaṃ anicca”ntiādinā pakārena **passam** passanto **ariyasāvako** ariyassa bhagavato sāvako “idam rūpaṃ anicca”nti rūpaṃ passati,

“ayaṃ vedanā aniccā”ti vedanaṃ passati, “ayaṃ saññā aniccā”ti saññaṃ passati, “ime saṅkhārā aniccā”ti saṅkhāre passati, “idaṃ viññānaṃ anicca”nti viññānaṃ passati. **Iti idaṃ** suttaṃ rūpādiṭṭhane ñaṇe vācakañāpakabhāvena pavattanato **ñāṇaṃ** nāma.

So “rūpaṃ anicca”ntiādinā pakārena passanto ariyasāvako **rūpena** rūparāgena parimuccati...pe... **viññāṇambhā** viññāṇarāgamhā parimuccatīti dukkhasmā parimuccatīti ahaṃ vadāmīti yojanā. **Idaṃ** “so parimuccatī”tiādikaṃ suttaṃ ñaṇe ca ñeyye ca vācakañāpakabhāvena pavattanato **ñāṇaṇca ñeyyaṇca** hoti.

Sabbe pañcakkhandhā paccayehi saṅkharitattā **saṅkhārā** ādiantavantabhāvato, aniccantikabhāvato, tāvakālikabhāvato ca khaṇaparittabhāvato **aniccā** bhavanti. **Idaṃ** “sabbe saṅkhārā aniccā”ti suttaṃ padesavacanaṃ vuttanayena ñeyyaṃ nāma. **Yadā** vipassanākaraṇakāle **paññāya** vipassanāpaññāya **passati** aniccātādikaṃ passati. **Idaṃ** “yadā paññāya passatī”ti suttaṃ padesavacanaṃ ñāṇaṃ nāma. **Atha** passanakkhaṇe **dukkhe** pañcakkhandhe vipassako nibbindati, nibbindanto puggalo dukkhādiṭṭhānaṇdivasena cattāri saccāni paṭivijjhati, **eso** catusaccaṇṇavedho **visuddhiyā** visuddhatthāya maggoti. **Idaṃ** “athā”tiādikaṃ suttaṃ padesavacanaṃ ñāṇaṇca ñeyyaṇca hoti.

Soṇāti soṇaṃ ālapati. **Samaṇā** bāhirakasamaṇā **brāhmaṇā** jātibrāhmaṇā aniccena rūpena, dukkhena rūpena, vipariṇāmadhammena rūpena “ahaṃ parehi **seyyo** uttamo asmī”ti vā samanupassanti, “ahaṃ parena **sadiso** samāno asmī”ti vā samanupassanti, “ahaṃ parato **hīno** lāmako asmī”ti vā samanupassanti, yathābhūtaṃ adassanā **aññatra** vajjetvā aññaṃ kiṃ nāma kāraṇaṃ siyā, yathābhūtaṃ adassanato tāva samanupassanassa aññaṃ kāraṇaṃ natthi, yathābhūtaṃ adassanameva kāraṇanti veditabbaṃ. “**Aniccāya vedanāyā**”tiādīsipi iminā vuttanayena vuttanayānusārena yojanā kātabbā. **Idaṃ** “ye hi kecī”tiādikaṃ suttaṃ padesavacanaṃ ñeyyaṃ nāma. “Ye ca kho kecī”tiādiko sukkaṇṇakho pana vuttavipariyāyena veditabbo. **Idaṃ** “ye ca kho”tiādikaṃ suttaṃ padesavacanaṃ ñāṇaṃ nāma. **Idaṃ** “ye hi kecī”tiādikaṃ suttaṃ ñaṇe ca ñeyye ca atthe vācakañāpakabhāvena pavattanato **ñāṇaṇca ñeyyaṇca** hoti. (6)

Nānāvidhaṃ ñāṇaṇca ñeyyaṇca sāsanaṇṇaṇṇasuttaṃ ācariyena niddhāritaṃ, amhehi ca ñātaṃ, “katamaṃ dassana”nti pucchitabbattā “**tattha katamaṃ dassana**”ntiādi vuttaṃ. **Tatthāti** tesu lokiyādīsū aṭṭhavīsatividhesu sāsanaṇṇaṇṇesu suttesu katamaṃ suttaṃ dassanaṃ nāmāti pucchati.

115. Gambhīrapaññena sabbaññubuddhena **sudesitāni** saṅkhepavittāradīhi tehi tehi nayehi suṭṭhu desitāni ariyasaccāni **ye** bhāvitabhāvanā ariyapuggalā paññāobhāseṇa vibhāvayanti, te bhāvitabhāvanā ariyapuggalā devarajjacakkavattirajjādipamādaṭṭhānaṃ āgamma bhusaṃ pamattā kiñcāpi honti, tathāpi **te** bhāvitabhāvanā ariyapuggalā sotāpattimaggañāṇeṇa abhisāṅkhāraviññāṇassa nirodhena aṭṭhamabhavādīsū uppajjanārahānaṃ nāmarūpānaṃ niruddhattā aṭṭhamakkhattuvasena **aṭṭhamam** bhavaṃ na ādiyantīti yojanā. **Idaṃ** “ye ariyasaccāni”tiādikaṃ suttaṃ dassane paṭhamamaggañāṇe vācakañāpakabhāvena pavattanato **dassanaṃ** nāma.

Nagaradvārabāhathirakaraṇatthaṃ ummārabbhantare pathaviyaṃ aṭṭhatthadasahattappamāṇaṃ āvāṭaṃ khaṇitvā tasmim āvāṭe ussāpitattā **pathavissito** pathavinissito antopathavinissito **indakhīlo** sārādārumayo thambho **catubbhi** catūhi disāhi āgatehi **vātehi** mahāvātehi **asampakampiyo** sampakampitūṃ asakkuṇeyyo siyā yathā, **yo** sappuriso ariyasaccāni avecca passati, taṃ sappurisaṃ sabbatitthiyavādavātehi asampakampiyattā **tathūpamaṃ** ahaṃ vadāmīti yojanā. **Idaṃ** “yathindakhīlo”tiādikaṃ suttaṃ vuttanayena dassanaṃ nāma.

Bhikkhave, catūhi sotāpattiyāṅgehi samannāgato **ariyasāvako** ariyassa bhagavato sammāsambuddhassa sāvako ācikkhitūṃ **ākaṅkhamāno** hutvā **attanāva** sayameva attānaṃ byākareyya “bho, mama atta ahaṃ idāni khīṇanirayo amhi, khīṇatiracchānāyoni amhi...pe... dukkhassantaṃ karissāmī”ti byākareyya. Caturaṅgasarūpaṃ dassetaṃ “**katamehi catūhi**”tiādi vuttaṃ. **Idaṃ**

“catūhī”tiādikaṃ dassanaṃ nāma.

Nānāvidhaṃ dassanaṃ niddhāritaṃ, “katamā bhāvanā”ti pucchitabbattā “**tattha katamā bhāvanā**”tiādi vuttaṃ.

Idha sāsane **yassa** ariyasāvakaṃ **ajjhataṃ** kāmabhāve nibbattāpakānaṃ orambhāgiyaṃyojanānaṃ pajahanavasena ca **bahiddhā** rūpārūpabhāvesu nibbattāpakānaṃ uddhambhāgiyaṃyojanānaṃ pajahanavasena ca **indriyāni** saddhindriyādāni indriyāni **subhāvitāni** ariyamaggabhāvanāvasena suṭṭhu bhāvitāni bhavanti, **bhāvito** bhāvitamaggo **sa danto** so ariyasāvako imaṃ lokañca paraṃ lokañca **nibbijja** nibbijjhitvā paṭivijjhitvā **kālaṃ** maraṇakāle, kālaṃkiriyaṃ vā **kaṅkhati** patthetīti yojanā. **Ayaṃ** “yassindriyāni”tiādikā pāḷi bhāvanāya vācakañāpakabhāvena pavattanato **bhāvanā** nāma.

Dhammapadāni jhānavipassanāmaggaphalanibbānadhammakotṭhāsāni. **Anabhijjhā dhammapadaṃ** anabhijjhāsīna adhigatajhānavipassanāmagganibbānadhammapadaṃ koṭṭhāsaṃ. Esa nayo sesesupi. **Ayaṃ** “cattārimāni”tiādikā pāḷi vuttanayena bhāvanā nāma. (7)

Devaputta chindanto puggalo **pañca** orambhāgiyaṃyojanāni heṭṭhā maggattayena **chinde** chindeyya, pajahanto puggalo **pañca** uddhambhāgiyaṃyojanāni arahattamaggena **jahe** pajaheyya, bhāvayanto puggalo **pañca** saddhindriyādāni ca uttari **bhāvaye** bhāveyya. **Pañcasaṅgātigo** rāgasāṅgadosasaṅgamohasaṅgamānaṅgadiṭṭhisāṅgātigo bhikkhu **oghatinṇoti** kāmoghabhavoghaditṭhoghaavijjoghatinṇoti **vuccati** kathīyatīti yojanā. “Pañca chinde pañca jahe”ti idaṃ vacanaṃ dassanaṃ nāma. “Pañca cuttari...pe... vuccati”ti **ayaṃ** pāḷi bhāvanā nāma. **Idaṃ** “pañcā”tiādikaṃ suttaṃ dassanañca bhāvanā ca hoti.

“**Tīṇimāni, bhikkhave**”tiādīsu yojanā pākaṭā. (8)

116. “Sabbapāpassa akaraṇaṃ...pe... buddhāna sāsana”nti **idaṃ** suttaṃ sammāsambuddhassa vacanabhāvato **sakavacanaṃ** nāma. Attho heṭṭhā vuttova.

Bhikkhave, bālassa **bālalakkhaṇāni** bālaupalakkhaṇakāraṇāni **bālanimittāni** “ayaṃ bālo”ti gahaṇakāraṇāni **bālāpadānāni** bālassa apadānāni porāṇāni viruḥhāni kammāni **yehi** bālalakkhaṇādīhi bālaṃ “bālo”ti **pare** paṇḍitā sañjānanti, **imāni** bālalakkhaṇāni mayā vuccamānāni tīṇi. Katamāni tīṇi? Bhikkhave, bālo **duccintitacintī ca** duccintitaṃ abhijjhābyāpādamicchādassanaṃ cintī ca hoti, **dubbhāsītābhāsī** dubbhāsitaṃ musāvādādiṃ bhāsī ca hoti. **dukkaṭakammakārī ca** dukkaṭaṃ paṇātipātādikammaṃ kārī ca hoti. Bhikkhave, bālassa...pe... bālāpadānāni iminā mayā vuttāni tīṇi kho bhavanti. Sukkapakkho pana vuttavipariyāyena vedītabbo. **Idaṃ** “tīṇimāni bhikkhave”tiādikaṃ vacanaṃ sammāsambuddhassa vacanabhāvato **sakavacanaṃ** nāma.

Pathavīsamo vitthato sambodho nāma natthi. Pātaṃ vuṭṭhaṃ udakaṃ ābhuso lābhi gaṇhātīti **pātālo**, pātālena samo **pātālasamo** ninno na vijjati. Merusamo unnato natthi, cakkavattisadisō poriso natthīti yojanā. **Idaṃ** “pathavīsamo”tiādikaṃ vacanaṃ parassa devassa vacanabhāvato **paravacanaṃ** hoti.

“Devānaṃ inda, tava subhāsītena jayo hotī”ti vatvā “vepacitti, tava subhāsītena jayo hotū”ti vatvā “vepacitti, tvaṃ gāthaṃ **bhaṇa** bhaṇāhī”ti avoca. Bhikkhave, atha kho asurindo vepacitti **imaṃ** vuccamānaṃ gāthaṃ abhāsī “te paṭisedhako **no ce assa** no ce bhāveyya, evaṃ sati bālā bhiyyo pakujjheyyuṃ, tasmā **dhīro** paṇḍito bhusena daṇḍena bālaṃ nisedhaye”ti.

Gāthāya, bhikkhave, asurindena vepacittinā bhāsītāya asurā anumodīṃsu, devā tuṅhī ahesuṃ. Bhikkhave, atha kho asurindo vepacitti devānaṃ indaṃ sakkāṃ **etaṃ** vacanaṃ avoca “devānaminda,

tvam gātham **bhaṇa** bhaṇāhī”ti etaṃ vacanaṃ avoca. Bhikkhave, atha kho devānamindo sakko imaṃ gātham abhāsi “bālassa paṭisedhanaṃ **param** paccatthikaṃ saṅkupitaṃ ñatvā **sato** satimā yo paṇḍito kodhato upasammati, tassa paṇḍitassa **etadeva** upasamaṃ varanti ahaṃ maññe”ti.

Gāthāya, bhikkhave, devānamindena sakkena bhāsītāya devā anumodimsu, asurā tuṅhī ahesuṃ. Bhikkhave, atha kho devānamindo sakko asurindaṃ vepacittiṃ **etaṃ** vacanaṃ avoca “vepacitti, tvam gātham bhaṇāhī”ti etaṃ vacanaṃ avoca. Bhikkhave, atha kho asurindaṃ vepacitti imaṃ gātham abhāsi “vāsava yadā titikkhati, tadā naṃ titikkhantaṃ puggalaṃ bālo “ayaṃ me bhayā titikkhatī”ti maññati, titikkhāya etadeva vajjaṃ ahaṃ passāmi. Vāsava gogaṇo palāyinaṃ gavaṃ ajjhottharati iva, evaṃ dummedho khamantaṃ bhiyyo **ajjhāruhati** ajjhottharati.

Gāthāya, bhikkhave, asurindena vepacittinā bhāsītāya asurā anumodimsu, devā tuṅhī ahesuṃ. Jāyamāne ca goyuddhe paṭhamaṃ dveveva goṇā yujjhanti, gogaṇo pana yāva eko goṇo na palāyati, tāva olokontova tiṭṭhati. Yadā ca eko goṇo palāyati, tadā sabbo goṇo taṃ palāyinaṃ gavaṃ bhiyyo ajjhottharatīti goyuddhasabhāvo veditabbo. “**Atha kho**”tiādīnaṃ yojanattho pākaṭo.

Vepacitti, yo puggalo titikkhati, **taṃ** khamantaṃ puggalaṃ “ayaṃ me bhayā titikkhatī”ti kāmaṃ maññatu vā, mā maññatu vā, taṃ maññanaṃ nipphalameva. Atthā sadatthaparamā bhavanti. **Khantiyā** khantito bhiyyo sadattho nāma na vijjati.

Yo balavā santo dubbalassa have titikkhatīti tassa balavantassa **taṃ** titikkhanaṃ paramaṃ khantinti sappurisā āhu, dubbalo niccaṃ khamati eva.

Yassa bālassa bālabalaṃ atthi, tassa bālassa bālabalaṃ “abala”nti sappurisā āhu, yassa dhammaguttassa yaṃ balaṃ atthi, tassa dhammaguttassa tassa balassa **paṭivattā** paṭippharivā vattā na vijjati.

Vepacitti, yo puggalo **kuddhaṃ** paṭhamaṃ kujjhantassa paṭikujjhanti, so paṭikujjhanto puggalo tena paṭikujjhanena **tassa** paṭhamaṃ kujjhantassa pāpapuggalassa pāpapuggalato **pāpiyo eva** pāpataro hīnataro eva bhava.

Vepacitti, yo sappuriso **sato** satimā paraṃ saṅkupitaṃ ñatvā paṭhamaṃ kujjhantassa appaṭikujjhantova bhava, so sappuriso dujjayaṃ saṅgāmaṃ jeti nāma, attano ca parassa ca ubhinnaṃ atthaṃ carati nāma.

Attano ca parassa ca tikicchantaṃ ubhinnaṃ kodho upasammati, ye janā **dhammassa** khantidhammassa atthe, catusaccadhamme vā akovidā bhavanti, te janā khamantaṃ sappurisaṃ “ayaṃ bālo”ti maññanti, tesam akovidānaṃ janānaṃ taṃ maññanaṃ nipphalanti.

Gāthāsu, bhikkhave, devānamindena sakkena bhāsītāsu devā anumodimsu, asurā tuṅhī ahesunti yojanā. **Idaṃ** “bhiyyo bālā”tiādikaṃ vacanaṃ sakkavepacittīnaṃ vacanabhāvato **paravacanaṃ** nāma. (9)

117. Pattam etarahi adhigataṃ yañca kāmūpakaraṇaṃ, āyatim **pattabbaṃ** adhigataṃ yañca kāmūpakaraṇaṃ atthi, etaṃ ubhayaṃ **rajānukiṇṇaṃ** rāgarajādikiṇṇaṃ iti **āturassa** āturānaṃyeva puggalānaṃ santike **anusikkhato** anusikkhantassa **sikkhāsārā** hutvā upaṭṭhahanti, sīlaṃ vataṃ jīvitam brahmacariyaṃ ime sikkhāsārā hutvā upaṭṭhahantīti ye **upaṭṭhānasārā** puggalā sārato gahetvā ṭhitā. Ettha **sīlaṃ** nāma “na karomī”ti oramaṇaṃ. **Vataṃ** nāma bhojanakiccakaraṇādi. **Jīvitam** nāma ājīvo. **Brahmacariyaṃ** nāma methunavirativisesabhāvo veditabbo. Tesam upaṭṭhānasārānaṃ puggalānaṃ **ayaṃ** vādo eko paṭhamo **anto** lāmako. **Ye ca** puggalā “kāmesu doso natthī”ti **evaṃvādino** **evaṃdiṭṭhino** hutvā ṭhitā, tesam puggalānaṃ **ayaṃ** vādo eko dutiyo **anto** lāmako. Iccete ubho **antā**

antavādā puggalā kaṭasivaḍḍhanā kaṭasiyo diṭṭhiṃ vaḍḍhenti. Ete **ubho ante** attakilamathānuyoge kāmasukhallikānuyoge **eke** puggalā anabhiññāya olīyanti, **eke** puggalā atidhāvanti yojanā. **Idaṃ** “yañca patta”ntiādikāṃ vacanaṃ paresaṃ puggalānaṃ vacanabhāvato **paravacanaṃ** nāma.

Ye ca sammādiṭṭhipuggalā **te ubho ante** attakilamathānuyogakāmasukhallikānuyoge abhiññāya **tatra** ca ante na ahesuṃ. Tena ca abhijānanena **te** ubho ante na amaññiṃsu, **tesaṃ** sammādiṭṭhipuggalānaṃ **vaṭṭaṃ** tividhaṃ vaṭṭaṃ paññāpanāya natthi. **Iti** evaṃ **idaṃ** “ye cā”tiādikāṃ vacanaṃ bhagavato vacanabhāvato **sakavacanaṃ** nāma. **Ayaṃ udāno** “yañca pattaṃ...pe... paññāpanāyā”ti ayaṃ udāno vuttanayena sakavacanañca paravacanañca hoti.

Pasenadī nāma **kosalo** kosalissaro rājā bhagavantaṃ **etaṃ** “idha mayhaṃ...pe... tesaṃ piyo attā”ti vacanaṃ avoca. Bhante, idha rahogatassa paṭisallīnassa **mayhaṃ** mama **cetaso** cittassa evaṃ parivitakko udapādi, **kesaṃ** sattānaṃ attā piyo nu kho, **kesaṃ** sattānaṃ attā appiyo nu kho **iti** etaṃ parivitakkaṇaṃ udapādi. Bhante, tassa mayhaṃ etaṃ parivitakkaṇaṃ ahoṣi, **ye ca keci** sattā kāyena duccharitaṃ caranti kho...pe... manasā duccharitaṃ caranti kho, **tesaṃ** sattānaṃ attā appiyo kho. **Te** duccharitaṃ carantā sattā “no attā piyo”ti evaṃ kiñcāpi vadeyyuṃ, atha kho **tesaṃ** duccharitaṃ carantānaṃ sattānaṃ attā appiyova. Taṃ kissa hetu? Appiyo **appiyassa** anathāya **yaṃ** duccharitaṃ kareyya, **taṃ** duccharitaṃ **te** duccharitaṃ carantā sattā **attanāva**. sayameva. **Attano** anathāya **hi** yasmā karonti, tasmā **tesaṃ** duccharitaṃ carantānaṃ sattānaṃ attā appiyovāti etaṃ parivitakkaṇaṃ ahoṣi.

Bhante, **ye ca keci** sattā kāyena sucaritaṃ caranti kho...pe... manasā sucaritaṃ caranti kho, **tesaṃ** sucaritaṃ carantānaṃ sattānaṃ attā piyo kho, **te** sucaritaṃ carantā sattā “no attā appiyo”ti evaṃ kiñcāpi vadeyyuṃ, atha kho **tesaṃ** sucaritaṃ carantānaṃ sattānaṃ attā piyova. Taṃ kissa hetu? Piyo **piyassa** atthāya **yaṃ** sucaritaṃ careyya, **taṃ** sucaritaṃ **te** sucaritaṃ carantā sattā **attanāva** sayameva **attano** atthāya **hi** yasmā karonti, tasmā **tesaṃ** sucaritaṃ carantānaṃ sattānaṃ attā piyovāti etaṃ parivitakkaṇaṃ ahoṣi. Etaṃ vacanaṃ avocāti yojanā.

“**Evametaṃ mahārājā**”ti vacanaṃ paṭhamaṃ vatvā “**ye hi keci**”tiādike bhagavato vuttavacanepi yojanā tatheva kātābbā.

Gāthāsu pana yo paṇḍito attānaṃ “piya”nti ce jaññā, evaṃ sati so paṇḍito **naṃ** attānaṃ **pāpena** kammena **na saṃyuje** na saṃyojeyya, **taṃ** vacanaṃ **hi** saccaṃ piyaṃ attānaṃ sulabhaṃ na hoti, dukkaṭakārinā sukhaṃ sulabhaṃ na hoti.

Antakena maccunā adhipannassa mānusaṃ bhavaṃ **jahato** pajahantassa **tassa** maraṇamukhe ṭhitassa sattassa kiṃ sakaṃ hoti, maraṇamukhe ṭhito so satto kiñca ādāya paralokaṃ gacchati, chāyā gacchantāṃ sattaṃ anapāyinī iva, evaṃ **assa** paralokagatassa sattassa kiñca anugaṃ hoti.

Iti bhagavā evaṃ pucchati, pucchitvā “**ubho**”tiādivissajjanavacanañca āha. **Idha** loke yo macco yaṃ puññañca yaṃ pāpañca ubho kamme **kurute** karoti, **tassa** paralokagatassa maccassa **taṃ** puññapāpadvayaṃ sakaṃ hoti. Paralokaṃ gato macco **taṃva** puññapāpadvayaṃ ādāya paralokaṃ gacchati, chāyā gacchantāṃ sattaṃ anapāyinī iva, evaṃ **assa** paralokagatassa maccassa **taṃva** puññapāpadvayaṃ anugaṃ hoti.

Tasmā paṇḍito **samparāyikaṃ** samparāye phalanibbattāpakaṃ kalyāṇaṃ **nicayaṃ** nicayanto hutvā kareyya. Pāṇinaṃ paralokasmim puññāni patiṭṭhā honti, iti bhagavā āhāti yojanā kātābbā. **Idaṃ** “rājā pasenadī”tiādikāṃ suttaṃ kosalarañño vacanabhāvato **paravacanaṃ** hoti. “Evametaṃ, mahārāja, evametaṃ mahārājā”tiādikā anugīti bhagavato vacanabhāvato **sakavacanaṃ** hoti. **Idaṃ** dvayaṃ vacanaṃ sakavacanañca paravacanañca hoti. (10)

118. Pañhe pucchite **idaṃ** dukkhasaccaṃ abhiññeyyaṃ, **idaṃ** samudayasaccaṃ pahātabbaṃ, **idaṃ** maggasaccaṃ bhāvetabbaṃ, **idaṃ** nirodhasaccaṃ, phalaṃ vā sacchikātabbaṃ, **ime** kusalākusalā **dhammā** evaṃ kusalākusalabhāvena **gahitā** anavajjasāvajjabhāvena vā **gahitā** sukhavipākadukkhavipākabhāvena vā **gahitā**, **idaṃ** iṭṭhavipākaṃ **idaṃ** anīṭhavipākaṃ phalaṃ nibbattayaiti evaṃgahitānaṃ **tesaṃ** kusalākusaladhammānaṃ ayaṃ vuḍḍhi attho, ayaṃ hāni atthoti. **Iti idaṃ** “pañhe pucchite”tiādikaṃ suttaṃ vissajjanīye atthe vācakañāpakabhāvena pavattanato **vissajjanīyaṃ** nāma.

“Uḷāro buddho bhagavā”ti iminā padena buddhauḷārataṃ **ekaṃseneva** ekakoṭṭhāseneva niddise. “Svākkhāto dhammo”ti iminā padena dhammasvākkhātataṃ **ekaṃseneva** ekakoṭṭhāseneva niddise. “Suppaṭipanno saṅgho”ti iminā padena saṅghasuppaṭipattiṃ **ekaṃseneva** ekakoṭṭhāseneva niddise. “sabbe saṅkhārā aniccā”ti iminā padena saṅkhārāniccataṃ **ekaṃseneva** niddise. “Sabbe saṅkhārā dukkhā”ti iminā padena saṅkhāradukkhataṃ **ekaṃseneva** niddise. “Sabbe dhammā anattā”ti iminā padena dhammānattataṃ **ekaṃseneva** niddise. “Sabbe saṅkhārā anattā”ti avatvā “sabbe dhammā anattā”ti vuttena iminā padena saṅkhārehi aññaṃ yaṃ vā pana maggaphalanirodhasamāpattidhammajātaṃ atthi, taṃ maggaphalanirodhasamāpattidhammajātampi evaṃjātiyaṃ evaṃ **ekaṃsabyākaraṇīyanti** maggaphalanirodhasamāpattidhammajātassāpi anattataṃ **ekaṃseneva** niddiseti yojanā. **Idaṃ** “uḷāro”tiādikaṃ suttaṃ vissajjanīye buddhauḷāratādike vācakañāpakabhāvena pavattanato **vissajjanīyaṃ** nāma.

Naradamasārathi ākaṅkhato **te** bhagavato **manasā** sabbaññutaññānasahitādīmanasā **vicintitaṃ** ñeeyadhammaṃ devā manussā sabbe pāṇino **na jaññā** na jāneyyūṃ. Santaṃ araṇaṃ samādhiṃ nisevato **te** bhagavato manasā vicintitā kasiṇāpi sabbe pāṇino **na jaññā** na jāneyyūṃ. **Kasiṇāpi** vā kasiṇārammaṇāya paññāyapi **na jaññā** na jāneyyūṃ. **Kasiṇāpīti** ettha ca “kasiṇāyapī”ti vattabbepi yakāra lopavasena “kasiṇāpī”ti vuttaṃ. Atha vā “**yaṃ ākaṅkhati** yaṃ ākaṅkhaṇaṃ karoti, **taṃ** ākaṅkhaṇaṃ **kiṃ** katama”nti pucchitaṃ pañhaṃ aññesaṃ avisayattā avissajjanīyaṃ hotīti yojanā. **Idaṃ** “ākaṅkhato”tiādikaṃ suttaṃ avissajjanīye visaye vācakañāpakabhāvena pavattanato **avissajjanīyaṃ** nāma.

Bhagavā **sīlakkhandhe** sīlakkhandhahetu **ettako** etaparimāṇo, bhagavā **samādhikkhandhe** samādhikkhandhahetu **ettako** etaparimāṇo, bhagavā **paññākkhandhe** paññākkhandhahetu **ettako** etaparimāṇo, bhagavā **vimuttikkhandhe** vimuttikkhandhahetu **ettako** etaparimāṇo, bhagavā **vimuttiñāpadassanakkhandhe** vimuttiñāpadassanakkhandhahetu **ettako** etaparimāṇo, bhagavā **iriyāyaṃ** kāyavacīsamācāre kāyavacīsamācārahetu **ettako** etaparimāṇo, bhagavā **pabhāve** ānubhāvahetu **ettako** etaparimāṇo, bhagavā **hitesitāyaṃ** mettāhetu **ettako** etaparimāṇo, bhagavā **karuṇāyaṃ** karuṇāhetu **ettako** etaparimāṇo, bhagavā **iddhiyaṃ** iddhividhahetu **ettako** etaparimāṇoti avissajjanīyoti yojanā. **Idaṃ** “ettako”tiādikaṃ suttaṃ avissajjanīye visaye vācakañāpakabhāvena pavattanato **avissajjanīyaṃ** nāma.

Bhikkhave, arahato sammāsambuddhassa tathāgatassa loke **uppādā** uppādahetu tiṇṇaṃ ratanānaṃ uppādo sambhavati, āyatim buddharatanassa uppādo sambhavati, ekassa buddharatanassa dharamānakkhaṇena hi aññassa buddharatanassa anuppajjanato āyatinti vuttaṃ, dhammaratanassa uppādo sambhavati, saṅgharatanassa uppādo sambhavatīti tīṇi ratanāni. “Tāni tīṇi ratanāni guṇato kiṃpamāṇānī”ti pucchite sati tāni tīṇi ratanāni guṇato etaparimāṇānīti na vissajjitabbānīti yojanā. **Idaṃ** “tathāgatassā”tiādikaṃ suttaṃ avissajjanīye visaye vācakañāpakabhāvena pavattanato **avissajjanīyaṃ** nāma.

Buddhavisayo puggalaparo puggalapadhāno pañho avissajjanīyo, buddhavisayāva **puggalaparoparaññutā** avissajjanīyā. Bhikkhave, avijjānīvaraṇānaṃ sattānaṃ pubbā koṭi na paññāyati taṇhāsaṃyojanānaṃ, sakim nirayaṃ sandhāvataṃ saṃsarataṃ sattānaṃ, sakim tiracchānayoṇim sandhāvataṃ saṃsarataṃ sattānaṃ, sakim pettivisayaṃ sandhāvataṃ saṃsarataṃ sattānaṃ, sakim

asurayoniṃ sandhāvataṃ saṃsaratāṃ sattānaṃ, sakim̃ deve sandhāvataṃ saṃsaratāṃ sattānaṃ, sakim̃ manusse sandhāvataṃ saṃsaratāṃ sattānaṃ pubbā koṭi na paññāyati na dissati na upalabbhatī. “Sā pubbā koṭi katamā”ti kenaci kataṃ pucchanaṃ **avissajjanīyaṃ** saṃsārassa pubbakoṭiyā abhāvato avissajjanīyaṃ hoti. “**Na paññāyati**”ti desanā sāvakānaṃ ñāṇavekallena katā, na attano ñāṇavekallena. “Na paññāyati”ti desanā attano ceva sāvakānañca ñāṇavekallena kātābbā siyāti codanaṃ manasi katvā “**duvidhā buddhānaṃ bhagavantānaṃ desanā**”tiādi vuttaṃ. Attā upanetabbo etissā desanāyāti **attūpanāyikā**. Paro upanetabbo etissā desanāyāti **parūpanāyikā**. “Katamā attūpanāyikā desanā, katamā parūpanāyikā desanā”ti pucchitabbattā niyametvā dassetuṃ “**na paññāyati**”tiādi vuttaṃ. “Na paññāyati”ti desanā sāvakānaṃ netabbānaṃ vasena desitattā parūpanāyikā desanā nāma, “**natthi buddhānaṃ bhagavantānaṃ avijānanā**”ti desanā attano netabbassa vasena desitattā attūpanāyikā desanā nāma. “Natthi buddhānaṃ bhagavantānaṃ avijānanā”ti vuttattā pubbāya koṭiyā abhāvato eva na paññāyatīti viññāyati, bhagavato ñāṇassa paññāpanaṃ kātuṃ asamattattā na paññāyatīti na viññāyati tena **aṭṭhakathāyaṃ** “natthi buddhānaṃ bhagavantānaṃ avijānanāti etena purimāya koṭiyā abhāvato eva na paññāyati, na tatha ñāṇassa paṭighātoti dassetī”ti (netti. aṭṭha. 118) vuttaṃ.

“Kathaṃ pana buddhānaṃ bhagavantānaṃ avijānanāya natthibhāvovijānitabbo”ti vattabbattā avijānanāya natthibhāvaṃ jānāpetuṃ “**yathā bhagavā kokālikaṃ bhikkhu**”ntiādi vuttaṃ. **Aṭṭhakathāyaṃ** pana – “yaṃ pana atthi, taṃ aññesaṃ appameyyampi bhagavato na appameyyanti bhagavato sabbattha appaṭihatañāṇataṃ dassetuṃ ‘yathā bhagavā kokālikaṃ bhikkhuṃ ārabbhā’tiādimāhā”ti vuttaṃ. Bhagavā kokālikaṃ bhikkhuṃ ārabbhā “kīva dīghaṃ nu kho, bhante, padume niraye āyuppamāṇa”nti pañhaṃ pucchitvā nisinnaṃ **aññataram bhikkhuṃ yathā** yena pakārena “**seyyathāpi...pe... āghātetvā**”ti evamāha. Tato tena pakārena avijānanāya natthibhāvo vijānitabboti attho ghetabbo.

Bhikkhu, tvaṃ sallakkhehi, kokālika vīsatickhāriko kosalako tilavāho rāsim katvā ṭhapito, tato tilato puriso vassasatassa vassasatassa accayena ekamekaṃ tilaṃ uddhareyya, so vīsatickhāriko kosalako tilavāho iminā uddharānupakkamena khippataram parikkhayaṃ pariyādānaṃ seyyathāpi gaccheyya, eko abbudo nirayo parikkhayaṃ pariyādānaṃ na tveva gaccheyya. Vīsati abbudā nirayā tattake kāle parikkhayaṃ pariyādānaṃ seyyathāpi gaccheyyūṃ, evameva eko nirabbudo nirayo tattake kāle parikkhayaṃ pariyādānaṃ na tveva gaccheyya. Esa nayo sesesupi. Sāriputtamoggallānesu cittaṃ āghātetvā padumaṃ nirayaṃ kokālika bhikkhu upapanno kho, bhikkhu, tvaṃ evaṃ sallakkhehīti bhagavā āhāti yojanā. Bhagavā “ayaṃ appameyyo ayaṃ asaṅkhyeyyo”ti vā na kiñci āha. “Tasmiṃ appameyye katamo appameyyo, tasmiṃ asaṅkhyeyye katamo asaṅkhyeyyo”ti kenaci kataṃ pucchanaṃ buddhavisayattā **avissajjanīyaṃ. Idam** appameyyaasaṅkhyeyyasuttaṃ vuttanayena avissajjanīyaṃ. (11)

119. “**Yadā so upako**”tiādisu yojanā pākāṭā.

“**Kathaṃ** kena pakārena **jino**”ti upakena kataṃ pucchanaṃ “kilesappahānapakārena jino”ti vissajjanīyattā **vissajjanīyaṃ. “Kena** pakārena **jino**”ti upakena kataṃ pucchanaṃ “pāpakānaṃ dhammānaṃ jitattā jino”ti vissajjanīyattā **vissajjanīyaṃ. “Katamo jino**”ti kataṃ pucchanaṃ “rūpādiko jino”ti vā “rūpādikaṃ muñcitvā añño jino”ti vā vissajjetuṃ asakkuṇeyyattā **avissajjanīyaṃ. “Katamo āsavakkhayo, katamo rāgakkhayo, katamo dosakkhayo, katamo mohakkhayo**”ti kataṃ pucchanaṃ “nibbānaṃ āsavakkhayo”ti vā “arahattamaggo āsavakkhayo”ti vā “arahattaphalaṃ rāgakkhayo”ti vā iti evamādinā vissajjanīyattā **vissajjanīyaṃ. “Kittako āsavakkhayo, kittako rāgakkhayo, kittako dosakkhayo, kittako mohakkhayo**”ti kataṃ pucchanaṃ “ettako etaparimāṇo āsavakkhayo”ti evamādinā avissajjanīyattā **avissajjanīyaṃ. Idam** vuttappakāraṃ suttaṃ vuttanayena vissajjanīyañca avissajjanīyañca hoti. (12)

“**Tathāgato satto atthi**”ti pucchanaṃ “pañcakkhandhe upādāya paññāpetabbo sattabhūto atthi”ti vissajjanīyattā **vissajjanīyaṃ. “Atthi rūpa**”nti kataṃ pucchanaṃ rūpassa vissajjanānattā “āmantā”ti vissajjanīyattā **vissajjanīyaṃ, “rūpaṃ tathāgato**”ti kataṃ pucchanaṃ tathābhāvato alabbhanato

avissajjanīyattā **avissajjanīyaṃ**. “**Rūpavā tathāgato**”tiādīsipi esa nayo yathāsambhavaṃ yojetabbo. **Idaṃ** vuttappakāraṃ suttaṃ vuttanayena vissajjanīyañca avissajjanīyañca hoti.

“**Passati bhagavā dibbena cakkhunā...pe... yathākammūpage satte pajānātī**”ti kataṃ pucchanaṃ “passati bhagavā”ti vā...pe... “pajānātī bhagavā”ti vā vissajjanīyattā **vissajjanīyaṃ**. “**Katame sattā, katamo tathāgato**”ti kataṃ pucchanaṃ paramatthato alabbhanato avissajjanīyattā **avissajjanīyaṃ**.

“**Atthi tathāgato**”ti kataṃ pucchanaṃ heṭṭhā vuttanayena vissajjanīyaṃ. “**Atthi tathāgato paraṃ maraṇā**”ti kataṃ pucchanaṃ “atthi tathāgato paraṃ maraṇā”ti vissajjanīyattā **vissajjanīyaṃ**. **Idaṃ** vuttappakāraṃ suttaṃ vissajjanīye visaye ca avissajjanīye visaye ca vācakañāpakabhāvena pavattanato **vissajjanīyañca avissajjanīyañca** hoti.

120. Nānāvidhaṃ vissajjanīyāvissajjanīyasuttaṃ ācariyena niddhāritaṃ, amhehi ca ñātaṃ, “katamaṃ suttaṃ kamma”nti pucchitabbattā “**tattha katamaṃ kamma**”ntiādi vuttaṃ.

“**Antakenādhīpanassā**”tiādīsipi attho heṭṭhā vuttanayattā pākaṭo “maraṇenābhībhūtassa...pe... chāyāva anapāyīnī”ti **idaṃ** suttaṃ puññakammaṃ pāpakammadvaye vācakañāpakabhāvena pavattanato **kammaṃ** nāma.

Bhikkhave, tumhe puna caparaṃ kammaṃ sallakkhetha. (**Anuṭṭhānagilānaṃ**) **anuṭṭhānagilāna**ssa **pīṭhasamāruḷhaṃ** pīṭhasamāruḷhassa **bālaṃ** bālassa vā **mañcasamāruḷhaṃ** mañcasamāruḷhassa **bālaṃ** bālassa vā **chamāyaṃ** bhūmiyaṃ **semānaṃ** semānassa sayantassa **bālaṃ** bālassa vā kāyena duccharitāni vācāya duccharitāni manasā duccharitāni pāpakāni yāni kammāni **pubbe** pubbakāle vā atīte anekakappakoṭisatasahasasā vā **assa** bālena katāni, **tāni** pāpakāni kammāni **tamhi** pīṭhasamāruḷhādisamāye **olambanti** viya upaṭṭhahanti **ajjholambanti** viya upaṭṭhahanti **abhippalambanti** viya upaṭṭhahanti. Bhikkhave, **mahataṃ** mahantānaṃ pabbatakūṭānaṃ chāyā sāyanhasamāyaṃ pathaviyaṃ seyyathāpi olambanti ajjholambanti abhippalambanti yathā, bhikkhave, evameva bālaṃ...pe... abhippalambanti. Bhikkhave, **tatra** tasmiṃ upaṭṭhānākāre upaṭṭhānākārahetu **bālassa** katapāpassa evaṃ parivitakko hoti “**me** mayā kalyāṇaṃ akataṃ vata, **me** mayā kusalaṃ akataṃ vata, bhīruttānaṃ kataṃ vata, **me** mayā pāpaṃ kataṃ vata, **me** mayā luddaṃ kataṃ vata, **me** mayā kibbisaṃ kataṃ vata, **bho** agilāna sappurisa akatakalyāṇānaṃ akatakusalānaṃ akatabhīruttānaṃ katapāpānaṃ kataluddānaṃ katakibbisānaṃ yāvata **gati** duggati atthi, taṃ gatiṃ ahaṃ pecca gacchāmi”ti evaṃ parivitakko hoti. Evaṃ vitakkento **so** bālo socati kilamati paridevati, urattāliṃ kandati sammohaṃ āpajjatiṃ yojanā.

Pabbatakūṭānaṃ chāyā nāma sūriyuggamanakālepi pathaviyā olambantīpi chāyā hāyanavasena olambanti. Sāyanhasamāyaṃ pana chāyā vaḍḍhanavasena olambanti, tatheva kammāni pi tasmiṃ kāle vaḍḍhanavasena upaṭṭhahanti, tasmā tameva vaḍḍhanupaṭṭhānaṃ sandhāya “sāyanhasamāya”nti vuttaṃ. Sukkapakkhepi yojanā kaṇhapakkhe yojanānusārena kātābbā. **Idaṃ** “puna capara”ntiādikāṃ suttadvayaṃ kusalakammaakusalakammesu vācakañāpakabhāvena pavattanato **kammaṃ** nāma.

Nānāvidhaṃ kammaṃ ācariyena niddhāritaṃ, amhehi ca ñātaṃ, “katamo vipāko”ti pucchitabbattā **tattha katamo vipāko**”tiādi vuttaṃ. **Tattha** tesu aṭṭhavīsatividhesu lokiyādīsū sānanapaṭṭhānesu katamo vipākotī pucchati. Bhikkhave, vo tumhehi ye manussattasaddhāpaṭilābhādayo paṭiladdhā, te manussattasaddhāpaṭilābhādayo **vo** tumhākaṃ lābhā bhavanti. Tumhehi pabbajitvā yaṃ catupārisuddhisīlādisampādanaṃ laddhaṃ, taṃ catupārisuddhisīlādisampādanaṃ **vo** tumhākaṃ suladdhaṃ bhavati. Bhikkhave, yo buddhuppādo navamo khaṇo tumhehi laddho, so buddhuppādo navamo **khaṇo vo** tumhākaṃ brahmacariyavāsāya paṭiladdho bhavati.

Bhikkhave, mayā chaphassāyatanikā nāma nirayā diṭṭhā, **tattha** tesu diṭṭhesu chaphassāyatanikesu nāma nirayesu yaṃ kiñci rūpaṃ cakkhunā passati, taṃ aniṭṭharūpaṃyeva passati, no iṭṭharūpaṃ. Akantarūpaṃyeva passati, no kantarūpaṃ. Amanāparūpaṃyeva passati, no manāparūpaṃ.

Yaṃ kiñci saddaṃ sotena...pe... ghānena...pe... jivhāya...pe... kāyena...pe... yaṃ kiñci dhammaṃ manasā vijānāti, taṃ aniṭṭhadhammaṃyeva vijānāti, no iṭṭhadhammaṃ. Akantadhammaṃyeva vijānāti, no kantadhammaṃ. Amanāpadhammaṃyeva vijānāti, no manāpadhammanti pāṭho yutto. “Aniṭṭharūpaṃyeva vijānāti, no iṭṭharūpa”ntiādiṭṭhā ayutto, katthaci pāliyaṃ ayuttapāṭho diṭṭho. Sukkapakkhe vuttanayavipariyāyena yojanā kātabbā. **Ayaṃ** vuttappakārā “lābhā vo, bhikkhave”tiādikā pāṭho vipāke vācakañāpakabhāveneva pavattanato **vipāko** nāma.

Mārisā **niraye paccamānānaṃ** amhākaṃ sabbaso nimujjanaummujjanavasena **saṭṭhivassasahassāni** paripuṇṇāni, nirayassa **anto** pariyosānaṃ **kadā** kasmim kāle bhavissati.

Nirayassa **anto** pariyosānaṃ natthi. Nirayassa anto pariyosānaṃ kuto atthi? Nirayassa **anto** pariyosānaṃ amhākaṃ na paṭidissati. Mārisā, yadā tumhe ca ahañca seṭṭhiputtā jātā, **tadā tuyhaṃ** tumhākañca **mayhaṃ** mama ca pāpaṃ **hi** yasmā **pakataṃ** pakārehi kataṃ, tasmā nirayassa **anto** pariyosānaṃ amhākaṃ na dissatīti **ayaṃ** pāṭho vipāke vācakañāpakabhāvena pavattanato **vipāko** nāma. (13)

121. Adhammacārī naro kusaladhammesu pamatto **hi** yasmā hoti, tasmā so adhammacārī pamatto naro **yahiṃ yahiṃ** yaṃ yaṃ duggatiṃ gacchati, taṃ taṃ gacchantam adhammacāriṃ **naṃ** naraṃ attanā carito so dhammova hanati. Kimiva hanati? **Sayaṃ** attanā gahito kaṇhasappo gaṇhantaṃ janaṃ hanati yathā, evaṃ attanā carito adhammo adhammacāriṃ naṃ hanati. “**Na hi dhammo adhammo ca**”tiādigāthāya attho pākaṭo. **Idaṃ** suddadvayaṃ kamme ca vipāke ca vācakañāpakabhāvena pavattanato **kammañca vipāko ca** hoti.

Bhikkhave, tumhe puññānaṃ mā bhāyittha; bhikkhave, **yadidaṃ** yaṃ idaṃ “puññāni”ti adhivacanaṃ pavattaṃ; **etaṃ** “puññāni”ti adhivacanaṃ iṭṭhassa kantassa piyassa manāpassa **sukhassa** sukhavipākajanakassa kammassa adhivacanaṃ hoti. Bhikkhave, ahaṃ dīgharattaṃ katānaṃ puññānaṃ dīgharattaṃ paccanubhūtaṃ iṭṭhaṃ kantaṃ piyaṃ manāpaṃ abhijānāmi kho. “Kathaṃ abhijānāmi”ti ce puccheyya, pubbe satta vassāni **mettacittaṃ** mettāya sahitaṃ dutiyajjhānacittaṃ bhāvetvā satta saṃvaṭṭavivaṭṭakappe **imaṃ lokaṃ** manussalokaṃ puna na āgamāsiṃ. **Satta saṃvaṭṭavivaṭṭakappeti** cettha saṃvaṭṭaggahaṇena saṃvaṭṭatṭhāyī, vivaṭṭaggahaṇena vivaṭṭatṭhāyīpi gahitāti veditabbā. Sesesupi evameva gahetabbo. Bhikkhave, saṃvaṭṭamāne kappe ahaṃ ābhassarūpago homi, vivaṭṭakappe suññaṃ brahmavimānaṃ upapajjāmi. Bhikkhave, **tatra** brahmavimāne tatra upapajjamaṇe upapajjamānahaṭṭha ahaṃ brahmā homi, aññe mahānubhāvena abhibhavanato **abhibhū**, aññehi anabhibhavanato **anabhibhūto** mahābrahmā homi, **aññadatthu** ekaṃsena daso ahaṃ vasavattī homi.

Bhikkhave, ahaṃ devānamindo sakko chattimsakkhattuṃ ahoṣiṃ kho, dhammiko dhammarājā cāturato vijitāvī janapadatthāvariyaṃpattaṃ cakkaranādisattaratanasamannāgato cakkavattirājā anekasatakkhattuṃ ahoṣiṃ, padesarajjassa rājabhāve ko pana vādo.

Bhikkhave, tassa cakkavattirājabhūtassa mayhaṃ **etaṃ** parivitakkaṇaṃ ahoṣi “yena phalena yena vipākena ahaṃ etarahi evaṃmahiddhiko evaṃmahānubhāvo amhi, taṃ idaṃ phalaṃ kissa kammassa phalaṃ nu kho, so ayaṃ vipāko kissa kammassa vipāko nu kho”ti etaṃ parivitakkaṇaṃ ahoṣi. Bhikkhave, **tassa** vitakkaṇassa mayhaṃ **etaṃ** parivitakkaṇaṃ ahoṣi “yena phalena yena vipākena ahaṃ etarahi evaṃmahiddhiko evaṃmahānubhāvo amhi, **me** pavattaṃ taṃ idaṃ phalaṃ tiṇṇaṃ kammānaṃ phalaṃ kho, so ayaṃ vipāko tiṇṇaṃ kammānaṃ vipāko kho, seyyathidaṃ katamesaṃ tiṇṇaṃ kammānaṃ phalaṃ vipāko? Dānassa damassa saṃyamassāti tiṇṇaṃ kammānaṃ phalaṃ vipāko”ti etaṃ parivitakkaṇaṃ ahoṣīti avocāti yojanā.

Tattha tasmim ‘‘mā, bhikkhave, puññānaṃ bhāyitthā’’ tiādike sutte yañca dānaṃ, yo ca damo, yo ca saṃyamo atthi, **idaṃ** dānādittayaṃ **kammaṃ**, taṃvācakañāpakaṃ suttampi **kammaṃ** nāma. **Tappaccayo** taṃkammappaccayo paccayuppanabhūto paccanubhūto yo vipāko atthi, etaṃ vipāke phalampi pakkhipitabbaṃ, **ayaṃ** vipāko taṃvācakañāpako pāṭhopi **vipāko** nāma. **Cūlakammavibhaṅgo** cūlakammavipākaputhuttavibhāgo tathā vattabbo.

Todeyyaputtassa subhassa mānavassa **yaṃ** suttaṃ bhagavatā desitaṃ, **tattha** sutte vuttā **ye** pāṇātipātādayo dhammā appāyukadīghāyukatāya saṃvattanti, **ye** hiṃsanādayo dhammā bahvābādhaappābādhatāya saṃvattanti, **ye** usūyanādayo dhammā appesakkhamahesakkhatāya saṃvattanti, **ye** kodhādayo dhammā dubbaññasuvannaṇatāya saṃvattanti, **ye** agāravādayo dhammā nīcakulikauccakulikatāya saṃvattanti, **ye** maccherādayo dhammā appabhogamahābhogātāya saṃvattanti, **ye** asallakkhañādayo dhammā duppaññapaññavantatāya saṃvattanti. **Idaṃ** pāṇātipātasattayugaṃ **kammaṃ**, taṃvācakañāpakaṃ suttampi **kammaṃ** nāma. **Tattha** subhasutte yā appāyukadīghāyukatā vuttā...pe... yā duppaññapaññavantatā vuttā, so **ayaṃ** appāyukadīghāyukatādiko **vipāko**, taṃvācakañāpakapāṭhopi **vipāko**. **Idaṃ** subhasuttaṃ kusalākusalakamme ceva vipāke ca vācakañāpakabhāvena pavattanato **kammañca vipāko ca** hoti. (14)

122. Yo puggalo vacīduccaritaparivajjanena **vācānurakkhī** bhaveyya, abhijjhādiānuppādanena **manasā saṃvuto** bhaveyya, pāṇātipātādi pajahanena **kāyena akusalaṃ na kayirā**, iti tayo ete kammapathe visodhaye, so puggalo isippaveditaṃ **maggam** ariyaṃ aṭṭhaṅgikaṃ maggaṃ **ārādhaye** ārādhayeyyāti yojanā. **Idaṃ** ‘‘vācānurakkhī’’ tiādikaṃ suttaṃ kusale vācakañāpakabhāvena pavattanato **kusalaṃ** nāma.

Yassa puggalassa kāyena **dukkaṭaṃ** duggatisaṃvattaniyakammaṃ natthi, vācāya dukkaṭakammaṃ natthi, manasā dukkaṭakammaṃ natthi, tīhi **ṭhānehi** uppajjanaṭṭhānehi saṃvutaṃ **taṃ** puggalaṃ ‘‘brāhmaṇa’’nti ahaṃ vadāmīti yojanā. **Idaṃ** gāthāvacanaṃ vuttanayena kusalaṃ nāma.

‘‘Tīṇimāni, bhikkhave...pe... kusalamūlāni’’ti **idaṃ** vacanaṃ vuttanayena kusalaṃ. Bhikkhave, kusalānaṃ dhammānaṃ samāpattiyā vijjā pubbaṅgamā hoti, hirī ca ottappañca anudevāti yojanā. **Idaṃ** vacanaṃ vuttanayena kusalaṃ nāma.

Māluvā **sālaṃ** rukkaṃ onataṃ bhūmiyaṃ patanaṃ karoti iva, tathā **yassa** janassa accantaṃ dvīsu tīsu bhavesu dussīlyaṃ atthi, so jano attānaṃ onataṃ apāyesu pākaṭaṃ karoti. Anattakāmo jano yathā anattaṃ icchati, tathā anattaṃ karoti yathā, tathā īdiso dussīlo **naṃ** attānaṃ anattaṃ karotīti yojanā. **Idaṃ** ‘‘yassā’’ tiādikaṃ vacanaṃ vuttanayena akusalaṃ.

Asmamayaṃ asmasaṅkhātaṃ pāsānamaṇimayaṃ **vajiraṃ** vajirassa utṭhānasaṅkhātaṃ pāsānamaṇiṃ **abhimatthati** vidhaṃseti iva, tathā **attanā hi** sayameva kataṃ **attajaṃ** attasambhavaṃ pāpaṃ **dummedhaṃ** pāpaṃ karontaṃ janaṃ abhimatthatīti yojanā. **Idaṃ** ‘‘attanā hī’’ tiādikaṃ vacanaṃ vuttanayena akusalaṃ.

Devate kusalehi vivajjitā akusalā dasa kammapathe **niseviya** katvā **garahā** gārayhā bhavanti, **bālamatī** mandabuddhino nirayesu paccareti yojanā. **Idaṃ** ‘‘dasa kammapathe’’ tiādikaṃ suttaṃ vuttanayena akusalaṃ.

‘‘Tīṇimāni, bhikkhave...pe... akusalamūlāni’’ti **idaṃ** vacanaṃ vuttanayena akusalaṃ. (15)

Yādisaṃ yaṃ bījaṃ vapate, taṃ bījaṃ tādisaṃ phalaṃ harate iva, tathā **kalyāṇakārī** paṇḍito kalyāṇaṃ phalaṃ harate, **pāpakārī** bālo ca pāpakaṃ phalaṃ harateti yojanā. **Tattha** ‘‘yādisa’’ntiādike sutte ‘‘kalyāṇakārī kalyāṇa’’nti **yaṃ** vacanaṃ āha, **idaṃ** vacanaṃ kusalaṃ. ‘‘Pāpakārī ca pāpaka’’nti

yam vacanaṃ āha, **idaṃ** vacanaṃ akusalaṃ. **Idaṃ** dvivacanaṃ vuttanayena kusalañca akusalañca hoti.

Kalyāṇakārī sappurisā subhena kammaena suggatiṃ **vajanti** gacchanti, pāpakārī kāpurisā asubhena kammunā apāyabhūmiṃ **vajanti** gacchanti, **kamma** abhisāṅkhāravīññāṇasahagatakamma **khayā** khayānato **vimuttacetasa** samucchadavimuttapaṭippassaddhivimutticittā **te** sappurisā asubhe nibbanti. Kimiva nibbanti? Indhanakkhayā joti nibbāti iva, tathā **te** sappurisā kamma **khayā** anavasesakhayanato nibbantīti yojanā. **Tattha** tasmim “subhenā” tiādigāthāvacane “subhena...pe... suggati”nti **yam** vacanaṃ āha, **idaṃ** “subhena...pe...suggati”nti vacanaṃ kusale vācakañāpakabhāvena pavattanato **kusalaṃ** nāma. “Apāyabhūmiṃ asubhena kammunā”ti **yam** vacanaṃ āha, **idaṃ** “apāya...pe... kammunā”ti vacanaṃ akusale vācakañāpakabhāvena pavattanato **akusalaṃ** nāma. **Idaṃ** “subhenā” tiādikaṃ gāthāvacanaṃ vuttanayena kusalañca akusalañca hoti. (16)

123. “Yathāpi bhamaro pupphaṃ...pe... muni care”ti idaṃ gāthāvacanaṃ anuññāte caraṇe vācakañāpakabhāvena pavattanato **anuññātaṃ** nāma.

Bhamaro nāma puppharasapivanagahaṇavasena caraṇako madhukarādiko bhamaro. So puppharasam gaṇhanto mandavego hutvā pupphañca vaṇṇaṇca gandhañca avināsetvā yāvadattham puppharasam pivivā madhukaraṇatthāya ca puppharasam gahetvā madhukaraṇatthānam vanasaṇḍam paleti. Pupphavaṇṇagandhā pākaticāva honti. Evameva piṇḍāya gāmaṃ pavisanto muni pasādajanakam ālokanavilokanagamanaṭṭhanādikaṃ janetvā pītisomanassasahitam pasādam janetvā saddhādeyyam piṇḍapātam yāpanamattam paṭiggahetvā gāmato nikkhamitvā udakaphāsukatthāne vane bhesajjam limpanto viya, kantāre puttamaṃsam khādanto viya, piṇḍapātam paccavekkhitvā paribhuñjitvā bhamaro vane madhum karoti viya, kammaṭṭhānānurūpaṃ vanasaṇḍam pavisitvā jhānamaggaphalanibbattanatthāya samaṇadhammakaraṇatthāya gāme **care** careyyāti adhippāyo vedītabbo.

“Tīṇimāni, bhikkhave, bhikkhūnaṃ karaṇīyāni...pe... imāni kho, bhikkhave, bhikkhūnaṃ tīṇi karaṇīyāni”ti **idaṃ** suttaṃ bhagavatā anuññāte ācāre atthe vācakañāpakabhāvena pavattanato **anuññātaṃ** nāma. Tasmim sutte yo bhikkhu sīlam pāti rakkhati, iti rakkhaṇato so bhikkhu **pāti** nāma. Yam sīlam taṃ pātiṃ bhikkhum apāyādidukkhato moceti, iti mocanato taṃ sīlam **pātimokkham** nāma. Yena sīlena bhikkhu saṃvaritabbacakkhundriyādikaṃ saṃvarati, iti saṃvaraṇakaraṇato taṃ sīlam **saṃvaram** nāma, pātimokkham eva saṃvaram **pātimokkhasaṃvaram**, pātimokkhasaṃvarena **saṃvuto** samannāgato hutvā saṃvuṇanato catuiriyāpathesu cārako hoti, iti saṃvuṇanato bhikkhu **pātimokkhasaṃvarasaṃvuto** nāma. **Viharati** catuiriyāpathe pavatteti. Vārittacāram vajjetvā cārittasīlam ādāya caraṇam **ācāro**, agocare vajjetvā gocare caraṇam **gocaroti**. Attho vuccamāno ativitthāro bhavissati, tasmā kiñcimattam kathetvā sāsanaṭṭhānasuttabhāvam kathessāma.

“Ettakameva suttaṃ ‘anuññāta’nti niddhāritabba’nti vattabbattā **“dasayime, bhikkhave, dhammā pabbajitena abhiṇham paccavekkhitabbā”**tiādi vuttaṃ. **Idaṃ** “dasā”tiādikaṃ suttampi anuññāte dasavidhe paccavekkhitabbe dhamme vācakañāpakabhāvena pavattanato **anuññātaṃ** nāma. “Tīṇimāni...pe... karaṇīyāni”ti **idaṃ** suttampi anuññāte tividhe sucarite vācakañāpakabhāvena pavattanato **anuññātaṃ** nāma.

Nānāvidham anuññātaṃ suttaṃ ācariyena niddhāritam, amhehi ca ñātam, “katamaṃ suttaṃ paṭikkhitta”nti pucchitabbattā **“tatha katamaṃ paṭikkhitta”**ntiādi vuttaṃ.

“Natthi puttasaṃsam pemaṃ, natthi gosamitaṃ dhanam;
Natthi sūriyasamā ābhā, samuddaparamā sarā”ti. –

Idaṃ devaputtavacanaṃ paṭikkhipanto bhagavā –

“Natthi attasamaṃ pemaṃ, natthi dhaññasamaṃ dhanam;
Natthi paññasamā ābhā, vuṭṭhi ve paramā sarā”ti. –

Gātham āha. **Ettha** etasmim gāthādvaye **yaṃ** “natthi puttasaṃ pema”ntiādikam purimakaṃ hoti. **Idam** “natthi puttasaṃ pema”ntiādikam devaputtavacanam bhagavatā paṭikkhittatā, paṭikkhitte atthe pavattanato ca **paṭikkhittam** nāma.

Dubbhikkhakāle vā kantāre vā mātāpitaro puttadhītarō ghātetvāpi attānameva posenti, tasmā “**natthi attasamaṃ pema**”nti vuttam. Dubbhikkhakālādīsu hiraññasuvaṇṇasārādīni, gomahimsādīnīpi dhaññagahaṇatthāya dhaññassāmikānaṃ datvā dhaññameva gaṇhanti, tasmā “**natthi dhaññasamaṃ dhana**”nti vuttam. Sūriyādīnaṃ ābhā paccuppannatamaṃ ekadesaṃva vinodeti, pañña pana dasasahassilokadhātumpi ekapajjotaṃ ekobhāsaṃ kātuṃ samatthā, atītānāgatapaccuppannadhammakotṭhāsesupi paṭicchādakaṃ kilesatamampi vidhamati, tasmā “**natthi paññasamā ābhā**”ti vuttam. Samuddo bhūmiyā ca ekadeseyeva tiṭṭhati, so ca deve avuṭṭhe sati khayanasabhāvo bhavye, vuṭṭhi pana koṭisatasahassacakkavālesupi yāva ābhassarā brahmalokāpi pūrā bhavati, tasmā “**vuṭṭhi ve paramāsarā**”ti vuttam.

“Idameva paṭikkhittam niddhāritabba”nti vattabbatā “**tīṇimāni bhikkhave**”tiādi vuttam. **Idam** “tīṇimāni”tiādikam suttampi paṭikkhitte duccharite vācakañāpakabhāvena pavattanato **paṭikkhittam** nāma. (17)

124. Nānāvidham paṭikkhittam ācariyena niddhāritam, amhehi ca ñātam, “katamaṃ anuññātañca paṭikkhitañcā”ti pucchitabbatā “**tattha katamaṃ anuññātañcā**”tiādi vuttam.

Bhūripaññabhūripaññavanta gotama, **taṃ** bhūripaññaṃ gotamaṃ ahaṃ pucchāmi. **Idha** loke anekā **yā** janatā bhītā, sā janatā **kiṃsu** katamā bhavē. Yo ca maggo anekāyatano iti pavutto, so ca maggo **kiṃsu** katamo bhavē. **Kismim** dhamme **ṭhito** jano paralokaṃ **na bhāye** na bhāyeyyāti pucchati toyojanā.

Devaputta yo jano sammāvācañca pañidhāya, sammāmanañca pañidhāya, kāyena pāpāni akubbamāno ca bhavē, ayaṃ eko. Bahvannapānaṃ gharaṃ āvasanto ca bhavē, ayaṃ eko. **Saddho** saddhāsampanno cittamudubhāvena **muḍu** ca bhavē, ayaṃ eko. **Vadaññū** yācakaṇaṃ yācanavasena vuttavacanaññū hutvā saṃvibhāgī ca bhavē, ayaṃ eko. Iti **etesu** catūsu dhammesu **ṭhito** jano dhammesu ṭhito hutvā paralokaṃ **na bhāye** na bhāyeyyāti toyojanā.

“Tasmim sutte katamaṃ anuññātam, katamaṃ paṭikkhittam nāmā”ti pucchitabbatā “**tattha yaṃ āhā**”tiādi vuttam. **Tattha** tasmim “kiṃsūdhā”tiādi pañhāya vissajjane “vācam manañcā”tiādivacane “vācam manañca pañidhāya sammā”ti **yaṃ** vacanaṃ bhagavā āha, **idam** “vācam...pe... sammā”ti vacanaṃ anuññāte vacanīyādike atthe vācakañāpakabhāvena pavattanato **anuññātam** nāma. “Kāyena pāpāni akubbamāno”ti **yaṃ** vacanaṃ āha, **idam** “kāyena ...pe... māno”ti vacanaṃ pāpakubbena paṭikkhitte vuttanayena pavattanato **paṭikkhittam** nāma. “Bahvanna...pe... na bhāye”ti **yaṃ** vacanaṃ āha, **idam** “bahvanna...pe... na bhāye”ti vacanaṃ vuttanayena anuññātam nāma. **Idam** “vāca”ntiādikam vacanaṃ vuttanayadvayena anuññātañca paṭikkhitañca hoti.

“**Sabbapāpassa akaraṇa**”ntiādikō vuttatthova. “Tasmim sabbapāpassātiādikē katamaṃ anuññātam, katamaṃ paṭikkhitta”nti vattabbabhāvato “**tattha ya**”ntiādi vuttam.

Devānaminda, ahaṃ kāyasamācārampi duvidhena vadāmi – **sevitabbaṃ** anavajjam kāyasamācārampi vadāmi, **asevitabbaṃ** sāvajjam kāyasamācārampi ahaṃ vadāmi. Vacīsamācārādīsūpi vuttanayānusārena toyojanā kātabbā.

Saccanāmo avitathasaccadesanato saccanāmo khemo **sabbābhibhū** sabbe manussadevādike anabhibhavamānopi guṇātirekavasena abhibhavamāno viya pavattanato sabbābhibhū jino ca, **saccadhammo** avitathasabhāvato saccadhammo ca, **tassa** saccadhammassa **uttari** uttamo añño dhammo natthi, viññūnaṃ niccaṃ **pūjito** pūjāraho ariyaśaṅho ca iti tīṇi lokassa **uttari** uttamāni bhavanti.

Ekāyanapadassa vacanattho **aṭṭhakathāyaṃ (netti. aṭṭha. 170)** bahudhā vutto. Jātikhayantadassī hitānukampī bhagavā ekāyanaṃ maggaṃ pajānāti. “Yaṃ ekāyanaṃ maggaṃ pajānāti, tena maggena kiṃ taratī”ti vattabbabhāvato “**etena maggenā**”tiādi vuttaṃ. Yaṃ maggaṃ bhagavā jānāti, **etena maggena pubbe** atītamaddhānaṃ buddhādayo ariyā **oghaṃ** saṃsāroghaṃ tarimsu, anāgamaddhānaṃ tarissanti, **ye cāpi** buddhādayo paccuppanne uppajjanti, te cāpi buddhādayo paccuppanne taranti, **visuddhipekkhā** visuddhiṃ apekkhamānā **sattā** devamanussasetṭhaṃ tādisaṃ yathāvuttagaṇaṃ **taṃ** sammāsambuddhaṃ namassanti, **iti ayaṃ** nānāvidhasuttavisesopi thave ratanattaye, ratanattayagaṇe ca vācakañāpakabhāvena pavattanato **thavo** nāma. Icceṭaṃ sāsanaṇaṃ suttavisesadassako saṃvaṇṇanāvisesopi sāsanaṇaṃ nāmāti veditabbo.

Amhākācariya tumhehi amhākācariyehi soḷasappabhedasaṃkilesabhāgiyādīsānaṇaṃ suttavisesaṃ katamaṃ suttavisesaṃ katamena suttavisesena saṃsanditvā niddisitabba’nti vattabbattā “**tattha lokiyaṃ sutta**”ntiādi āradhā. **Aṭṭhakathāyaṃ** pana – “evaṃ duvidhampi sāsanaṇaṃ nānāvidhasuttavisesopi udāharantena vibhajitvā idāni saṃkilesabhāgiyādīhi saṃsanditvā dassetuṃ puna ‘lokiyaṃ sutta’ntiādi āradhā”nti (netti. aṭṭha. 170) vuttaṃ.

Tattha **tatthāti** tesu soḷasavidhesu saṃkilesabhāgiyādīsū sāsanaṇaṃ suttavisesesū ceva aṭṭhavīsatividhesu lokiyādīsū sāsanaṇaṃ suttavisesesū ca akusalapakkhe pavattaṃ lokiyaṃ suttaṃ saṃkilesabhāgiyasuttāna samānatthabhāvena saṃsandati, kusalapakkhe pavattaṃ lokiyaṃ suttaṃ vāsanābhāgiyasuttāna samānatthabhāvena saṃsandati, tasmā lokiyaṃ suttaṃ ekavidhampi saṃkilesabhāgiyena ca vāsanābhāgiyena ca dvīhi suttehi niddisitabbaṃ. Dassanapakkhe pavattaṃ lokuttaraṃ suttaṃ dassanabhāgiyena samānatthabhāvena saṃsandati, bhāvanāpakkhe pavattaṃ lokuttaraṃ suttaṃ bhāvanābhāgiyena samānatthabhāvena saṃsandati, asekkhapakkhe pavattaṃ lokuttaraṃ suttaṃ asekkhabhāgiyena samānatthabhāvena saṃsandati, tasmā lokuttarampi suttaṃ dassanabhāgiyena ca bhāvanābhāgiyena ca asekkhabhāgiyena ca tīhi suttehi niddisitabbaṃ. Vuttanayānusārena sesesupi saṃsandanaṇaṃ kātābbā.

Amhākācariya tumhehi amhākācariyehi nayadassanavasena suttavisesasaṃsandanaṃ dassitaṃ, amhehi ca nātaṃ, “kimatthāya saṃkilesabhāgiyādībhedenā vibhajitvā bhagavatā vutta’nti vattabbattā “**vāsanābhāgiyaṃ suttaṃ saṃkilesabhāgiyassa suttassa nigghātāyā**”tiādi vuttaṃ. Ettha ca suttavasena suttatthā gahitā.

“Yaṃ sattādhiṭṭhānaṃ ācariyena niddhāritaṃ, taṃ sattādhiṭṭhānaṃ kittakehi suttehi vibhajitvā niddisitabba’nti vattabbattā “**lokuttaraṃ suttaṃ sattādhiṭṭhānaṃ chabbisatiyā puggalehi niddisitabba**”nti vuttaṃ. “Te chabbīsati puggalā katihi suttehi samanvesitabbā”ti vattabbattā “**te tīhi**”tiādi vuttaṃ. Dassanabhāgiyena sattādhiṭṭhānena, bhāvanābhāgiyena sattādhiṭṭhānena, asekkhabhāgiyena sattādhiṭṭhānena cāti tīhi suttehi te chabbīsati puggalā samanvesitabbā.

“Katamehi katamehi katamaṃ katamaṃ suttaṃ niddisitabba’nti vattabbattā “**tattha dassanabhāgiya**”ntiādi vuttaṃ. Tattha **tatthāti** tesu tīsū dassanabhāgiyādīsū suttasū. **Tatthāti** vā tesu chabbīsatiyā puggalesu. Sattādhiṭṭhānekadesaṃ dassanabhāgiyaṃ suttaṃ ekabjīnā puggalena ca niddisitabbaṃ...pe... dhammānusārīnā puggalena ca niddisitabbaṃ, iti imehi pañcahi puggalehi sattādhiṭṭhānekadesaṃ dassanabhāgiyaṃ suttaṃ niddisitabbaṃ. Ettha ca dassanaggahaṇena sotāpattiphalatṭhāpi gahitā, tasmā ekabjīkolanā suttakhattuparamā phalaṭṭhāpi gahitā.

Saddhānusārī pana yo vipassanākkhaṇe saddhaṃ dhuraṃ katvā sotāpattimaggam nibbatteti, so puggalo nibbattetabbasotāpattimaggakkhaṇe saddhānusārī nāma, saddhāya samāpattiṃ anussarati, iti saddhāya samāpattiyā anussaraṇato sotāpattimaggattho puggalo **saddhānusārī** nāma. So puggalo sotāpattiphalakkaṇe saddhāya vimuttattā saddhāvimutto hutvā ekabījīkolaṃkolasattakkhattuparamo bhavati. Yo pana puggalo vipassanākkhaṇe paññaṃ dhuraṃ katvā sotāpattimaggam nibbatteti, so puggalo nibbattetabbasotāpattimaggakkhaṇe **dhammānusārī** nāma, dhammena paññāya samāpattiṃ anussarati, iti dhammena paññāya samāpattiyā anussaraṇato **dhammānusārī** nāma. So puggalo phalakkhaṇe diṭṭhiyā paññāya nirodhaṃ pattattā diṭṭhipatto hutvā ekabījī...pe... paramo bhavati. **Dhammoti** cetha pañña gahitā. Iti pabhedato dve maggaṭṭhā, cha phalaṭṭhāti aṭṭhahi ariyapuggalehi, sampiṇḍite pana pañcahi ariyapuggalehi sattādhiṭṭhānekadesaṃ dassanabhāgiyaṃ suttaṃ niddisitabbaṃ.

Imesaṃ ekabījīādīnaṃ puggalānaṃ sattādhiṭṭhānekadesatthattā ceva dassanabhāgiyatthattā ca sattādhiṭṭhānekadesaṃ dassanabhāgiyaṃ suttaṃ ettakehi puggalehi niddisitabbanti niyametvā ācariyena vibhattaṃ, amhehi ca ñātaṃ, “sattādhiṭṭhānekadesaṃ dassanabhāgiyaṃ suttaṃ kittakehi puggalehi niddisitabba”nti pucchitabbattā –

“Bhāvanābhāgiyaṃ suttaṃ dvādasahi puggalehi niddisitabbaṃ sakadāgāmiphalaśchikiriyāya paṭipannaena, sakadāgāminā, anāgāmiphalaśchikiriyāya paṭipannaena, anāgāminā, antarāparinibbāyinā, upahaccaparinibbāyinā, asaṅkhāraparinibbāyinā, sasaṅkhāraparinibbāyinā, uddhamṣotena akaniṭṭhagāminā, saddhāvimuttana, diṭṭhipattana, kāyasakkhinā cāti bhāvanābhāgiyaṃ suttaṃ imehi dvādasahi puggalehi niddisitabba”nti –

Vuttaṃ. Tatthāpi sattādhiṭṭhānekadesaṃ bhāvanābhāgiyaṃ suttanti gahetabbaṃ. **Sakadā...pe...pannaena** sakadāgāmimaggatthena puggalena, **sakadāgāminā** sakadāgāmiphalaṭṭhena, **anāgāmi...pe...pannaena** anāgāmimaggatthena, **anāgāminā** anāgāmiphalaṭṭhena, avihādīsu pañcasu suddhāvāsesu āyuvemajjhaṃ anatikkamitvā arahattaṃ patvā parinibbāyanasabhāvena **antarāparinibbāyinā**namakena anāgāminā, āyuvemajjhaṃ atikkamitvā arahattaṃ patvā parinibbāyanasabhāvena **upahaccaparinibbāyinā**namakena anāgāminā, asaṅkhārena appayogena arahattaṃ patvā parinibbāyanasabhāvena **asaṅkhāraparinibbāyinā**namakena anāgāminā, sasaṅkhārena sappayogena arahattaṃ patvā parinibbāyanasabhāvena **sasaṅkhāraparinibbāyinā**namakena anāgāminā, avihādīhi uddhaṃ atappādīsu upapattisotena arahattaṃ patvā parinibbāyanasabhāvena **uddhamṣotanā**namakena anāgāminā, akaniṭṭhaṃ gantvā arahattaṃ patvā parinibbāyanasabhāvena **akaniṭṭhagāminā**namakena anāgāminā, saddhāya vimuttattā **saddhāvimuttanā**namakena anāgāminā, diṭṭhiyā paññāya nirodhaṃ pattattā **diṭṭhipattanā**namakena anāgāminā cāti imehi ekādasahi ajhānalābhīpuggalehi ca, kāyena nāmakāye phuṭṭhānaṃ arūpajhānānaṃ anantaraṃ nibbānaṃ sacchikaroti, iti sacchikaraṇato **kāyasakkhinā**namakena jhānalābhīnā cāti dvādasahi puggalehi niddisitabbaṃ.

Imesaṃ vuttappakārānaṃ puggalānaṃ sattādhiṭṭhānekadesatthattā ceva bhāvanābhāgiyatthattā ca sattādhiṭṭhānekadesaṃ bhāvanābhāgiyaṃ suttaṃ ettakehi puggalehi niddisitabbanti niyametvā ācariyena vibhattaṃ, amhehi ca ñātaṃ, “kittakehi puggalehi sattādhiṭṭhānekadesaṃ asekkhabhāgiyaṃ suttaṃ niddisitabba”nti vattabbattā –

“Asekkhabhāgiyaṃ suttaṃ navahi puggalehi niddisitabbaṃ saddhāvimuttana, paññāvimuttana, suññatavimuttana, animittavimuttana, appaṇihitavimuttana, ubhatobhāgavimuttana, samasīsinā, paccekabuddhehi, sammāsambuddhehi cāti asekkhabhāgiyaṃ suttaṃ imehi navahi puggalehi niddisitabba”nti –

Vuttaṃ. Tattha sattādhiṭṭhānekadesaṃ asekkhabhāgiyaṃ suttaṃ niddisitabbanti yojetabbaṃ. Saddhāya kilesehi vimuttattā arahattaphalakkaṇe **saddhāvimutto** arahā, tena saddhāvimuttana. Paññāya vimuttattā arahattaphalakkaṇe **paññāvimutto** arahā, tena paññāvimuttana. Suññatavipassanāsaṅkhātena anattānupassanaena vimuttattā **suññatavimutto** arahā, tena

suññatavimuttana. Animittānupassanāsāṅkhātena aniccānupassanena vimuttattā **animittavimutto** arahā, tena animittavimuttana. Appaṇihitānupassanāsāṅkhātena dukkhānupassanena vimuttattā **appaṇihitavimutto** arahā, tena appaṇihitavimuttana. Ubhato rūpakāyanāmakāyato ubhatobhāgato vimuttattā **ubhatobhāgavimutto** arahā, tena ubhatobhāgavimuttana. Purimā pañca puggalā ajhānalābhino gahitā, ubhatobhāgavimutto pana jhānalābhīgahito.

Samasīsī nāma iriyāpathasamasīsī, rogasamasīsī, jīvitasamasīsīti tividhā honti. Imesu tīsu samasīsīsu yo arahā catūsu iriyāpathesu ekekasmim iriyāpathe arahattaṃ patvā aññaṃ iriyāpathaṃ asaṅkamitvā tasmim tasmim iriyāpatheyeva parinibbāyati, ayaṃ arahā **iriyāpathasamasīsī** nāma. Yo arahā yasmim roge uppanne arahattaṃ patvā tato rogato anuṭṭhahitvā tasmim rogeyeva parinibbāyati, ayaṃ arahā **rogasamasīsī** nāma. Yo arahā paccavekkhaṇavīthiyānantaraṃ bhavaṅgaṃ otarivā tato maraṇāsannajavanavīthiyānantarameva parinibbāyati, ayaṃ arahā vārasamatāya **jīvitasamasīsī** nāma. **Vārasamatāti** ca paccavekkhaṇavīthi maggavīthyanuvattakattā paccavekkhaṇavīthianantaraṃ pavattamānāyapi maraṇāsannavīthi maggavīthianantaraṃ pavattāti vattabbārahā, tasmā vīthianantaratā vārasamatā nāma. Tāya vārasamatāya ca jīvitasamasīsī vutto.

Saha paṭisambhidāhi arahattaṃ pāpuṇīti etthapi paccavekkhaṇavīthiyānantaraṃ bhavaṅgaṃ otarivā bhavaṅgato vuṭṭhāya pavattavīthiyā paṭisambhidāññāni pavattanti. Vuttanayena vīthianantaratāya vārasamatāya “saha paṭisambhidāhi”ti vuttaṃ. **Bhagavato sabbaññutaññānampi** paccavekkhaṇavīthiyānantaraṃ bhavaṅgaṃ otarivā bhavaṅgato vuṭṭhāya pavattavīthiyā paṭhamam pavattāti veditabbaṃ. Iminā jīvitasamasīsīnā, sabbehi paccekabuddhehi, sabbehi sammāsambuddhehi cāti imehi navahi puggalehi sattādhiṭṭhānekadesam asekhabhāgiyam suttaṃ niddisitabbaṃ.

Imesaṃ puggalānaṃ sattādhiṭṭhānekadesatthattā ceva asekhabhāgiyatthattā ca **evaṃ** iminā “lokuttaraṃ suttaṃ sattādhiṭṭhāna”ntiādinā pakārena vuttehi imehi chabbīsatiyā puggalehi ariyehi dassanabhāgiyavāsanābhāgiyaasekhabhāgiyasuttānaṃ vasena lokuttaraṃ suttaṃ sattādhiṭṭhānekadesam suttaṃ niddisitabbaṃ.

Imesaṃ chabbīsatiyā puggalānaṃ sakalalokuttarasuttatthattā ceva sattādhiṭṭhānekadesasuttatthattā ca lokuttaraṃ sattādhiṭṭhānekadesam suttaṃ. Ettakehi puggalehi niddisitabbanti ācariyena niyamevā vibhattaṃ, amhehi ca ñātaṃ, “lokiyam sattādhiṭṭhānekadesam suttaṃ kittakehi puggalehi niddisitabba”nti vattabbattā “**lokiyam suttaṃ sattādhiṭṭhānaṃ ekūnavīsatiyā puggalehi niddisitabba**”ntiādi vuttaṃ. “Te ekūnavīsati lokiyā puggalā katamehi dhammehi niddiṭṭhā samanvesitabbā”ti vattabbattā “**te caritehi**”tiādi vuttaṃ. **Te** ekūnavīsati lokiyā puggalā **caritehi** caritavisesehi niddiṭṭhā samanvesitabbāti. “Kathaṃ caritehi niddiṭṭhā”ti vattabbattā “**keci rāgacaritā**”tiādi vuttaṃ. Rāgacaritadosacaritādīhi caritehi ekūnavīsati lokiyapuggalā rāgacaritā, keci dosacaritā...pe... mohacarito cāti niddiṭṭhā. Iti niddiṭṭhehi imehi ekūnavīsatiyā puggalehi lokiyasattādhiṭṭhānekadesam suttaṃ niddisitabbaṃ. “Lokiya”nti sāmāññavasena vuttampi “saṅkilesabhāgiyam lokiya”nti visesato viññātābbaṃ.

Lokiyam sattādhiṭṭhānekadesam suttaṃ ettakehi puggalehi niddisitabbanti ācariyena niyamevā vibhattaṃ, amhehi ca ñātaṃ, “vāsanābhāgiyam sattādhiṭṭhānekadesam suttaṃ katamehi puggalehi niddisitabba”nti vattabbattā “**vāsanābhāgiya**”ntiādi vuttaṃ. Vāsanābhāgiyam sattādhiṭṭhānekadesam suttaṃ sīlavantehi puggalehi, dhammehi ca niddisitabbanti yojetabbaṃ. “Kittakā sīlavantapuggalā”ti vattabbattā “**te sīlavanto pañca puggalā**”ti vuttaṃ. “Kittakā dhammā”ti vattabbattā “**pakatisīla**”ntiādi vuttaṃ. Idaṃ vuttaṃ hoti – pakatisīlavanto ca samādānasīlavanto ca cittappasādavanto ca samathavanto ca vipassanāvanto cāti **pañca puggalā**, pakatisīladhammo ca samādānasīladhammo ca cittappasādadhhammo ca samathadhhammo ca vipassanādhammo cāti **pañca dhammā**ti imehi pañcahi puggalehi, imehi pañcahi dhammehi vāsanābhāgiyam sattādhiṭṭhānekadesadhammādhiṭṭhānekadesam suttaṃ yathākkamaṃ niddisitabbanti.

Lokuttaraṃ sattādhīṭṭhānaṃ suttaṃ dassanabhāgiyavāsanābhāgiyaasekkhabhāgiyasuttehi niddisitabbanti ācariyena niyāmetvā vibhattaṃ, amhehi ca ñātaṃ, ‘lokuttaraṃ dhammādhīṭṭhānaṃ suttaṃ kittakehi suttehi niddisitabba’nti vattabbatā **“lokuttaraṃ suttaṃ dhammādhīṭṭhānaṃ...pe... asekkhabhāgiyena”**ti vuttaṃ.

‘Lokiyañca lokuttarañca sattādhīṭṭhānañca dhammādhīṭṭhānañca kittakehi niddisitabba’nti vattabbatā **“lokiyañca...pe... ubhayena niddisitabba”**nti vuttaṃ. **Ubhayenā**ti lokiyalokuttarena, sattādhīṭṭhānadhammādhīṭṭhānena samānatthabhāvena niddisitabbanti.

‘Ñānaṃ kittakehi niddisitabba’nti vattabbatā **“ñānaṃ paññāyā”**tiādi vuttaṃ. Yasmiṃ yasmiṃ sutte ñānaṃ āgataṃ, tasmīṃ tasmīṃ sutte ñānaṃ ñānapariyāyena paññādinā niddisitabbanti.

‘Ñeyyaṃ kittakena niddisitabba’nti vattabbatā **“ñeyyaṃ atītānāgatapaccuppannehī”**tiādi vuttaṃ. Yasmiṃ yasmiṃ sutte ñeyyaṃ āgataṃ, tasmīṃ tasmīṃ sutte ñeyyaṃ ñeyyapariyāyena niddisitabbanti.

‘Ñānañca ñeyyañca kittakena niddisitabba’nti vattabbatā **“ñānañca ñeyyañca tadubhayena”**tiādi vuttaṃ. Yasmiṃ yasmiṃ sutte ñānañeyyā āgatā, tasmīṃ tasmīṃ sutte ñānañeyyā ñānañeyyapariyāyena niddisitabbanti.

Dassanasutte yathā niddiṭṭhaṃ, tathā upadhārayitvā labbhamānato niddisitabbaṃ. Bhāvanāsutte yathā niddiṭṭhaṃ, tathā upadhārayitvā labbhamānato niddisitabbaṃ. Tadubhayaṃ dassanañca bhāvanā ca sutte yathā niddiṭṭhaṃ, tathā upadhārayitvā labbhamānato niddisitabbaṃ.

“Sakavacanaṃ paravacana”ntiādīsupi evameva viṣuṃ viṣuṃ ca ekato ca sutte yathā niddiṭṭhaṃ, tathā upadhārayitvā labbhamānato niddisitabbanti yojanā kātābā. ‘Ettakameva niddisitabba’nti vattabbatā **“yaṃ vā panā”**tiādi vuttaṃ.

‘Vipākassa hetu kammamevā’nti vattabbatā **“duvidho hetū”**tiādi vuttaṃ. Kilesā saṃkilesabhāgiyasuttēna samānatthabhāvena niddisitabbā. Taṇhāsāṅkhāto samudayo vā kilesasāṅkhāto samudayo vā akusalasāṅkhāto samudayo vā saṃkilesabhāgiyena suttēna samānatthabhāvena niddisitabbo. Lokiyakusalahetusāṅkhāto samudayo vā lokiyakusalasāṅkhāto samudayo vā vāsanābhāgiyena suttēna samānatthabhāvena niddisitabbo.

Kammañca vipāko ca yathārahaṃ labbhamānasuttēna niddisitabboti sāmāññavasena vibhatto, ‘kusalaṃ katamena niddisitabba’nti vattabbatā **“tattha kusala”**ntiādi vuttaṃ. **Tatthāti** tesu aṭṭhavīsatiyā sāsanaṭṭhānasuttēsu kusalaṃ catūhi suttehi samānatthabhāvena niddisitabbaṃ. ‘Katamehi catūhi’nti vattabbatā **“vāsanābhāgiyena”**tiādi vuttaṃ. Lokiyakusalaṃ vāsanābhāgiyena niddisitabbaṃ samānatthattā, lokuttarakusalaṃ dassanabhāgiyena, vāsanābhāgiyena, asekkhabhāgiyena ca yathārahaṃ samānatthabhāvena niddisitabbaṃ. Kusalaṃ ettakehi niddisitabbanti niyāmetvā vibhattaṃ, ‘akusalaṃ katamena niddisitabba’nti vattabbatā **“akusala”**ntiādi vuttaṃ. ‘Kusalañca akusalañca katamena niddisitabba’nti vattabbatā **“kusalañca akusalañca tadubhayena niddisitabba”**nti vuttaṃ. Yasmiṃ yasmiṃ sutte tadubhayaṃ āgataṃ, tasmīṃ tasmīṃ sutte āgatena tadubhayena niddisitabbaṃ.

‘Anuññātaṃ katamena niddisitabba’nti vattabbatā **“anuññāta”**ntiādi vuttaṃ. Anuññātaṃ bhagavato anuññātāya samānatāya niddisitabbaṃ. ‘Katividhaṃ anuññāta’nti vattabbatā **“taṃ pañcavidha”**ntiādi vuttaṃ. **Yaṃ** anuññātaṃ yāsu yāsu bhūmīsu dissati, **taṃ** anuññātaṃ tāsu tāsu bhūmīsu āgatena samānena **kappiyānulomena** niddisitabbaṃ.

Anuññātaṃ iminā niddisitabbanti ācariyena niyāmetvā vibhattaṃ, ‘paṭikkhittaṃ katamena

niddisitabba’’nti vattabbattā “**paṭikkhittam bhagavatā**’’tiādi vuttam. Bhagavatā paṭikkhittam bhagavatā **paṭikkhittakāraṇena** sutte āgatena vatthunā kāraṇaphalabhāvena niddisitabbam. Yaṃ paṭikkhittam yāsu yāsu bhūmīsu dissati, taṃ pana paṭikkhittam tāsu tāsu bhūmīsu āgatena pākaṇena akappiyānulomena niddisitabbam.

“Anuññātaṇca paṭikkhittaṇca katamena niddisitabba’’nti vattabbattā “**anuññātaṇca paṭikkhittaṇca tadubhayena niddisitabba**’’nti vuttam. Yasmiṃ yasmiṃ sutte anuññātaṇca paṭikkhittaṇca āgataṃ, tasmīṃ tasmīṃ sutte āgatena tadubhayena niddisitabbam.

“Thavo katamena niddisitabbo’’ti vattabbattā “**thavo pasamsāyā**’’tiādi vuttam. Yasmiṃ yasmiṃ sutte yā yā pasamsā āgatā, tasmīṃ tasmīṃ sutte āgatāya tāya tāya pasamsāya thavo niddisitabbo. “Yo thavo pasamsāya niddisitabbo, so thavo katavidhena niddisitabbo’’ti vattabbattā “**so pañcavidhenā**’’tiādi vuttam. Bhagavato thavo ca dhammassa thavo ca ariyasaṅghassa thavo ca ariyadhammānaṃ sikkhāya thavo ca lokiyaguṇasampattiyā thavo cāti pañcavidhena veditabbo. **Iti evaṃ** vuttappakārena pañcavidhena thavo niddisitabbo.

Amhākācariya amhākācariyena aṭṭhārasa mūlapadā sāsanaṇṇāpāṭṭhāne daṭṭhabbāti vuttā, “katamāni tāni aṭṭhārasa mūlapadāni’’ti pucchitabbattā “**indriyabhūmī**’’tiādi vuttam. Sāsanaṇṇāpāṭṭhāne **indriyabhūmi** saddhindriyādiindriyabhūmi yehi navahi padehi niddisitabbā, sāsanaṇṇāpāṭṭhāne kilesabhūmi yehi navahi padehi niddisitabbā, evaṃ iminā pakārena etāni mūlapadāni nava padāni kusalapadāni, nava padāni akusalapadāni aṭṭhārasa mūlapadāni honti. Sāsanaṇṇāpāṭṭhāne daṭṭhabbā, “kena kāraṇena aṭṭhārasa mūlapadā sāsanaṇṇāpāṭṭhāne daṭṭhabbāti viññāyatī’’ti vattabbattā “**tathā hī**’’tiādi vuttam. **Tathā hī**ti tato eva aṭṭhārasamūlapadānaṃ sāsanaṇṇāpāṭṭhāne daṭṭhabbattā “**aṭṭhārasa mūlapadā kuhiṃ daṭṭhabbā? Sāsanaṇṇāpāṭṭhāne**’’ti yaṃ vacanaṃ vuttam, tena vacanena viññāyatīti. “Kena mūlapadānaṃ navakusalapadānaṃ akusalapadābhāvena aṭṭhārasabhāvo viññāyatī’’ti vattabbattā “**tenāhā**’’tiādi vuttam. **Tena** mūlapadānaṃ navakusalapadānaṃ akusalapadābhāvato āyasmā mahākaccāno –

“Navahi ca padehi kusalā, navahi ca yujjanti akusalapakkhā;
Ete kho mūlapadā, bhavanti aṭṭhārasa padāni’’ti. –

Yaṃ vacanaṃ āha, tena “navahi...pe... padāni’’ti vacanena mūlapadānaṃ navakusalapadānaṃ akusalapadābhāvena aṭṭhārasabhāvo viññāyatīti.

“Yaṃ yaṃ saṃkilesabhāgiyādisoḷasavidham sāsanaṇṇāpāṭṭhānaṇceva yaṃ yaṃ lokiyādiṭṭhāvīsatividham sāsanaṇṇāpāṭṭhānaṇca ācariyena niddhāritam, ettakameva paripuṇṇam, aññaṃ sāsanaṇṇāpāṭṭhānaṃ niddhāretvā yuttam yujjitabbam natthī’’ti vattabbattā “**niyuttam sāsanaṇṇāpāṭṭhāna**’’nti vuttam. Yathāniddhāritasāsanaṇṇāpāṭṭhānato yaṃ yaṃ aññaṃ sāsanaṇṇāpāṭṭhānaṃ niddhāritam atthi, taṃ taṃ aññaṃ sāsanaṇṇāpāṭṭhānaṃ **niyuttam** yathārahaṃ niddhāretvā yuttam yujjitabbanti attho gahetabboti.

“Yaṃ loko pūjayate...pe... niyuttam sāsanaṇṇāpāṭṭhānanti yattako vacanakkamo bhāsito, ettakena vacanakkamena kiṃ netti samattā, udāhu asamattā’’ti vattabbattā “**ettāvatā**’’tiādi vuttam. Āyasmatā mahākaccānena yā netti bhāsitā, bhagavatā sā netti anumoditā, mūlasaṅgītiyaṃ saṅgāyantehi therāsabhehi yā netti saṅgītā, sā netti “yaṃ loko pūjayate...pe... niyuttam sāsanaṇṇāpāṭṭhāna’’nti **ettāvatā** vacanakkamena **samattā** paripuṇṇāva hoti.

Iti samattāya āyasmatā mahākaccānena bhāsītāya bhagavatā anumoditāya mūlasaṅgītiyaṃ saṅgāyantehi therāsabhehi saṅgītāya nettiyā atthavaṇṇanā **saddhammapālanāmena mahādhammarājagurunā mahātherena** racitā jinaputtānaṃ hitakarā nettivibhāvanā chabbīsādhikanavasate sakkarāje sāvaṇamāse sukkapakkhe navamadivase sūriyuggamanasamaye samattā.

Iti sāsanaṭṭhāne sattibalānurūpā racitā vibhāvanā

Niṭṭhitā.

Nigamanakathā

Sabbasattuttamo nātho, loke uppajji nāyako;
Sambuddho gotamo jino, anekaguṇalaṅkato.

Sāsanaṃ tassa seṭṭhassa, aṭṭhavassasatādhikaṃ;
Dvisahassaṃ yadā pattaṃ, nimmalaṃ vaḍḍhanaṃ subhaṃ.

Tadā bhūmissaro **mahādhammarājā** mahiddhiko;
Āṇācakkena sāreti, rājā noanuvattake.

Laddhā setagaḃe vare, loke vimhayaḃānake;
Appamatto mahāvīro, puññaṃ katvābhimodati.

Tasmiṃ vasseva sāvaṇe, māse navamadvase;
Sūriyuggamane kāle, nibbattāyaṃ vibhāvanā.

Yattakaṃ sāsanaṃ ṭhitāṃ, tattakaṃ racitaṃ mayā;
Ṭhātu nettivibhāvanā, jinaputtahitāvahā.

Iti taṃ racayantena, puññaṃ adhigataṃ mayā;
Hontu tassānubhāvena, sabbe vimuttibhāgino.

Rājadevī puttānattā, paṇattā ca saḃātikā;
Sabbe rajjasukhe ṭhatvā, carantu caritaṃ sukhī.

Devo kāle suvassatu, sabbo raṭṭhajano sukhī;
Aññaṃaññaṃ ahiṃsanto, piyo hotu hitāvahoti.

Nettivibhāvinī niṭṭhitā.